


O LE EKALESIA A IESU KERISO O LE AU PAIA O ASO E GATA AI • NOVEMA 2016

# O Le Liahona



Saunoaga o le  
Konafesi Aoao



O Fea le Toaiva? saunia e Walter Rane

“Ma o ia o lē e italiaina mea uma na le faafetai o le a faamamahina; ma o mea  
o le lablagi lenei o le a faaopoopina ia te ia, i le sautuaselau lava, ioe, e sili atu.  
MF&F 78:19, faaopoopo le faamamafai.

“Ua ou lagoraina lena suiga o le faatupulaia o le lotofaaifetai mo faamanuiaiga  
ma se alofa i le Atua ua faateleina i le Ekalesia atoa. Efoltiga mai ua faatelevaveina  
i tagata o le Ekalesia i raimi ma nofoga o loo i ai tofogoga o lo latou faanuia,  
lea e ao ai ona latou atoi atu i le Atua mo se fesoasoani e faanau ai le malaga.”

Peresitene Henry B. Eyring, Fesoasoani Muamua i le Au Peresitene Sili, “Lotofaaftai i le Aso Sepati,”  
Liahona, Nov. 2016, 101.

# Anotusi Novema 2016

Voluma 40 • Numera 11

## Sauniga Aoao a Tamaitai

- 6 O Le a Ou Aumaia le Malamalama o le Talalelei i Totonu o Lo'u Aiga  
Jean B. Bingham
- 9 O Le Fomai Sili  
Carole M. Stephens
- 12 Tutula'i A'e i le Malolosi, Uso e i Siona  
Bonnie L. Oscarson
- 15 Fogafale Fa, Faitotoa Mulimuli  
Peresitene Dieter F. Uchtdorf

## Sauniga o le Taeao o le Aso Toonai

- 19 E, Le Silisilise Naua o le Fuafuaga a lo Tatou Atua!  
Peresitene Dieter F. Uchtdorf
- 22 "Sau, Mulimuli Mai ia te A'u" e ala i le Ola i le Alofa ma le Auaunaga FaaKerisiano  
Elder Robert D. Hales
- 25 O Le Manaoga Faamaoni o le Loto  
Carol F. McConkie
- 27 "O Le a Ou Faatu Mai se Tagatavaai Filifilia"  
Elder Craig C. Christensen
- 30 Ua Aoao Mai i Tatou e le Alii o lesu Keriso ina ia Tatalo  
Elder Juan A. Uceda
- 32 O Lava Ea Lo'u Lelei? Pe O Le A Ou Ausia Ea?  
Elder J. Devn Cornish
- 35 O Se Molimau a le Atua  
Elder Neil L. Andersen

## Sauniga o le Afiafi o le Aso Toonai

- 39 O Le Lagolagoina o Taitai o le Ekalesia  
Peresitene Henry B. Eyring
- 40 Totoa i le Molimau ia lesu  
Elder Quentin L. Cook
- 44 Vaai i le Tusi, Vaai i le Alii  
Elder Gary E. Stevenson
- 48 "Tumau i Lo'u Alofa"  
Elder D. Todd Christofferson
- 52 Mo Lo Tatou Alualu i Luma ma le Aaoaina Faaleagaga  
Elder W. Mark Bassett
- 55 Ia Naunau Atu mo Keriso  
Elder Kazuhiko Yamashita
- 57 Faasoaina Atu o le Talalelei Toefuataiina  
Elder Dallin H. Oaks

## Sauniga Aoao a le Au Perisitua

- 61 Sui Vaaia i le Ekalesia  
Elder Jeffrey R. Holland
- 68 E I Ai le Mana i le Tusi  
Elder LeGrand R. Curtis Jr.
- 71 Aoao mai ia Alema ma Amoleka  
Peresitene Dieter F. Uchtdorf
- 75 Ina la Faamalosia Foi o la  
Peresitene Henry B. Eyring
- 78 O Mataupu Faavae ma Folafolaga  
Peresitene Thomas S. Monson

## Sauniga o le Taeao o le Aso Sa

- 80 O Le Ala Atoatoa i le Fiafia  
Peresitene Thomas S. Monson
- 81 Olioli ma le Ola ai Faaleagaga  
Peresitene Russell M. Nelson
- 85 E Mafai Ona Fesoasoani le Faamanatuga ia i Tatou ia avea ma Tagata Paia  
Elder Peter F. Meurs
- 88 O Le Fuafuaga Tele o le Togiolaina Linda S. Reeves
- 90 A Matou O Ea la te Ai?  
Elder M. Russell Ballard
- 93 O Faamanuiaga o le Tapuai Epikopo Dean M. Davies
- 96 O Le Faamasino Amiotonu  
Elder Lynn G. Robbins
- 99 Lotofaafetai i le Aso Sapati  
Peresitene Henry B. Eyring

## Sauniga o le Afiafi o le Aso Sa

- 102 "Ana Iloa e Outou o A'u"  
Elder David A. Bednar
- 106 O Le Mataupu Faavae a Keriso Brian K. Ashton
- 110 Auauna Atu  
Elder Carl B. Cook
- 113 Ne'i Galo ia te Oe  
Elder Ronald A. Rasband
- 116 O Le a Soloiesea e le Atua o Loimata Uma  
Elder Evan A. Schmutz
- 119 E Leai se Olioli Sili Atu Nai Lo le Iloa ua Latou Iloa  
Elder K. Brett Nattress
- 121 Salamo: O Se Filifilia Fiafia  
Elder Dale G. Renlund
- 64 O Au Pulega Aoao ma Taitai Aoao o Le Ekalesia a lesu Keriso o le Au Paia o Aso e Gata Ai
- 125 Faasino Upu o Tala o le Konafesi
- 126 Tala Fou o le Ekalesia



# O Le Konafesi Aoao Faaleafatausaga Lona 186

## Afiafi o le Aso Toonai, 24 Setema, 2016, Sauniga Aoao a Tamaitai

Pulefaamalumalu:  
Peresitene Thomas S. Monson.

Taitai: Linda K. Burton.  
Tatalo amata: Denise Lindberg.

Tatalo faaui: Bonnie H. Cordon.

O musika na saunia e se aufaipese a Tamaitai  
Talavou mai siteki i Ogden, Huntsville, ma  
Morgan, Iuta; Cherilyn Worthen, faatonu;  
Bonnie Goodliffe, taokeni: "Ia Silasila Mai  
Ia," *Viiga*, nu. 20, arr. Warby, e lei lolomiina;  
"Pe a Ou Faalogo ma Lo'u Loto," DeFord,  
arr. Warby, e lei lolomiina; "Le Faavae Malosi,"  
*Viiga*, nu. 45, arr. Kasen, pub. e Jackman;  
"Ua Ou Iloa Lo'u Faaola," *Viiga*, no. 73.

## Taeao o le Aso Toonai, 1 Oketopa, 2016, Sauniga Aoao

Pulefaamalumalu: Peresitene  
Thomas S. Monson.

Taitai: Peresitene Henry B. Eyring.  
Tatalo amata: Joy D. Jones.

Tatalo faaui: Elder Marcus B. Nash.

O musika na saunia e le aufaipese a Tapeneko; Mack Wilberg ma Ryan Murphy,  
faatonu; Andrew Unsworth ma Clay Christiansen, taokeni: "Sweet o the Work,"  
*Viiga*, nu. 147; "With Songs of Praise," *Viiga*, no. 71; "Ia Viva Oe Le Atua," *Viiga*, nu. 10;  
"Faaola o Isaraelu," *Viiga*, nu. 5; "Take Time to Be Holy," Longstaff, arr. Longhurst, pub. e  
Jackman; "If the Way Be Full of Trial, Weary Not," Sweney, arr. Wilberg, e lei lolomiina.

## Afiafi o le Aso Toonai, 1 Oketopa, 2016, Sauniga Aoao

Pulefaamalumalu: Peresitene  
Thomas S. Monson.

Taitai: Peresitene Dieter F. Uchtdorf.  
Tatalo amata: Elder Daniel L. Johnson.

Tatalo faaui: Elder Allen D. Haynie.

O musika na saunia e se aufaipese tuufaatasi  
mai le nofoaga Autu e Aoao ai Faifeatalai i  
Provo; Ryan Eggett ma Elmo Keck, faatonu;  
Linda Margetts ma Bonnie Goodliffe, taokeni:  
"O Le Talosaga Muamua a Iosefa Samita,"  
*Viiga*, nu. 14, arr. Kasen, pub. e Jackman;  
"Papatisoga," *Tusipese a Tamaiti*, 54, arr.  
Gates, pub. e Jackman; "Tofia e Auaua i  
le Atua," *Viiga*, nu. 156; "Ou Te Alu i Mea  
Te Tofia," *Viiga*, nu. 169, arr. Wilberg, e lei

lolomiina; "Faamoemoe o Isaraelu," *Viiga*,  
nu. 161, arr. Schank, e lei lolomiina.

## Afiafi o le Aso Toonai, 1 Oketopa, 2016, Sauniga a le Au Perisitua

Pulefaamalumalu: Peresitene  
Thomas S. Monson.

Taitai: Peresitene Henry B. Eyring.  
Tatalo amata: Elder Paul B. Pieper.

Tatalo faaui: Elder Bruce D. Porter.

O musika na saunia e se aufaipese a le au  
Perisitua Mekisateko mai siteki i West Valley  
City ma Magna, Iuta; Kenny Wiser, faatonu;  
Richard Elliott, taokeni: "Outou Faifeau o  
Isaraelu" (Mo Tane), *Viiga*, nu. 198, arr.  
e Spiel, e lei lolomiina; "A i ai i le Aiga le  
Alofa," *Viiga*, nu. 181, arr. Manookin, pub.  
e Jackman; "Ia Fiafia Tatou," *Viiga*, nu. 3;  
"E mafai e Sulu le Ala," *Viiga*, nu. 141, arr.  
Zabriskie, pub. e ala i Pepa Paia o Musika.

## Taeao o le Aso Sa, 2 Oketopa, 2016, Sauniga Aoao

Pulefaamalumalu: Peresitene  
Thomas S. Monson.

Taitai: Peresitene Dieter F. Uchtdorf.  
Tatalo amata: Elder Christoffel Golden.

Tatalo faaui: Devin G. Durrant.

O musika na saunia e le aufaipese a Tapeneko; Mack Wilberg, faatonu; Clay Christiansen ma Richard Elliott, taokeni: "O  
Loo Soifua Lo'u Faaola," *Viiga*, nu. 72; "In Hymns of Praise," *Viiga*, nu. 75, arr. Wilberg;  
"On This Day of Joy and Gladness," *Viiga*, no. 64, arr. Wilberg, e lei lolomia; "O Le Atua  
Lo'u Tama," *Viiga*, nu. 184; "E Alofa Lo'u  
Tama Faalelagi Ia te Au," *Tusipese a Tamaiti*, 16, arr. Hofheins ma Christiansen, e lei  
lolomia; "O mai, e ua Faafetai," *Viiga*, nu. 52, arr. Wilberg, pub. e le Oxford.

## Afiafi o le Aso Sa, 2 Oketopa, 2016, Sauniga Aoao

Pulefaamalumalu: Peresitene  
Thomas S. Monson.

Taitai: Peresitene Henry B. Eyring.

Tatalo amata: Elder Enrique R. Falabella.

Tatalo faaui: Erich W. Kopischke.

O musika na saunia e le Aufaipese a Tapeneko; Mack Wilberg ma Ryan Murphy,  
faatonu; Bonnie Goodliffe ma Linda Margetts, taokeni: "Upu Moni o A?" *Viiga*, nu. 170,  
arr. Longhurst, pub. e Jackman; "Le Atua,

le Tama e," *Viiga*, nu. 97, arr. Wilberg, pub. e  
Jackman; "I Luga o Mauga," *Viiga*, nu. 4; "I'll  
Follow Him in Faith," Perry, arr. Murphy, e  
lei lolomiina; "Faamalosi ia i le Galuega Nei,"  
*Viiga*, nu. 152, arr. Elliott.

## E Maua Saunoaga o le Konafesi

Ina ia maua saunoaga o konafesi aoao i luga  
o le Initonetia i le tele o gagana, asiasi i le  
conference.lds.org ma filifili se gagana. O loo  
maua foi lauga i luga o le polokalama feaveai  
o le Gospel Library. O loo maua faamatatalaga  
e uiga i le konafesi aoao i mamanu e mafai  
ona faaaogaina e tagata o le ekalesia e i ai  
manaoga faapitoa i le disability.lds.org.

## Savali a Faiaoga o Aiga ma Faiaoga Asiasi


Mo savali a faiaoga o aiga ma faiaoga asiasi,  
faamolemole ia filifili se lauga e aupito sili  
ona fetau lelei ma tulaga o loo manaomia  
e i latou te asia.

## I Le Faavaa

Luma: Ata na Pueina e Ashlee Larsen.  
Tua: Ata na Pueina e Ale Borges.

## Puega o Ata o le Konafesi

Ata na pueina i le Aai o Sate Leki, na pueina e Cody Bell,  
Ale Borges, Randy Collier, Weston Colton, Nate Edwards,  
Ashlee Larsen, Leslie Nilsson, Matt Reier ma Christina  
Smith; o le fale maototogi i Siamani, na pueina e Daniel G.  
Dornelles; o le aiga o Harriet Uchtdorf ma faifeatalai, mai  
faaloaloga a le aiga o Uchtdorf.



O Le Lomiga Faamaonia Faa-Samoa a le Ekalesia  
a lesu Keriso o le Au Paia o Aso e Gata Ai

**Susuga a le Au Peresitene Sili:** Thomas S. Monson,  
Henry B. Eyring, Dieter F. Uchtdorf

**O Le Korama a Apostolo e Toasefululuua:**

Russell M. Nelson, Dallin H. Oaks, M. Russell Ballard,  
Robert D. Hales, Jeffrey R. Holland, David A. Bednar,  
Quentin L. Cook, D. Todd Christofferson, Neil L. Andersen,  
Ronald A. Rasband, Gary E. Stevenson, Dale G. Renlund

**Faatonu:** Joseph W. Sitati

**Assistant Editors:** Randall K. Bennett, Carol F. McConkie  
**Fautua:** Brian K. Ashton, Jean B. Bingham, LeGrand R.  
Curtis Jr., Christoffel Golden, Douglas D. Holmes, Erich W.  
Kopischke, Larry R. Lawrence, Carole M. Stephens

**Pule Faatonusili:** Peter F. Evans

**Faatonusili o le Lagolago mo Aiga ma**

**Faatonusili o Mekasini a le Ekalesia:** Allan R. Loyborg

**Pule o Mea Tau Pisinisi:** Garff Cannon

**Pule Faatonutonu:** Adam C. Olson

**Pule Faatonutonu Lagolago:** Ryan Carr

**Lagolago o Lomiga:** Megan Seitz

**Ai Tuisitasi ma Faatonutonu:** Bethany Bartholomew,  
Brittany Beattie, David Dickson, David A. Edwards,  
Matthew D. Flinton, Lori Fuller, Garrett H. Garff, LaRene Porter  
Gaunt, Charlotte Larcabal, Michael R. Morris, Eric B. Murdock,  
Sally Johnson Odekirik, Joshua J. Perkey, Jan Pinborough,  
Richard M. Romney, Mindy Anne Selu, Marissa Widdison

**Pule Faatonusili Tusiata:** J. Scott Knudsen

**Faatonusili Tusiata:** Tadd R. Peterson

**Ai Mamanu:** Jeanette Andrews, Fay P. Andrus, C. Kimball  
Bott, Thomas Child, David Green, Colleen Hinckley, Eric P.  
Johnsen, Susan Lofgren, Scott M. Mooy, Mark W. Robison,  
Rachel Smith, Brad Teare, K. Nicole Walkenhorst

**Faatonu o le Puletaofia ma Fatufatuga:**

Collette Nebeker Aune

**Pule i le Gaosiga:** Jane Ann Peters

**Au Gaosia:** Glen Adair, Connie Bowthorpe Bridge, Julie  
Burdett, Bryan W. Gygi, Ginny J. Nilson, Gayle Tate Rafferty,  
Derek Richardson

**Tailolomi:** Joshua Dennis, Ammon Harris

**Faatonusili Lolomiga:** Steven T. Lewis

**Faatonusili o le Tufatufaga:** Troy K. Vellinga

Mo le okaina o mekasini, alu i le store.lids.org po o le  
Faletusi Tutotonu i Pesega. Telefoni 64127. Totogi o le  
Mekasini: \$0.55 (Samoa) ī le kopi. Totogi mo le Tausaga  
Atoa \$6.60 (Samoa).

**Auina atu tuisitasi ma faafesili i luga o le**

**intineti** i le liahona.lids.org: po meli mai i le *Liahona*,  
Rm. 2420, 50 E. North Temple, Salt Lake City, UT 84150-  
0024, USA; po o le i-meli: liahona@ldschurch.org.

O Le *Liahona* (o lona uioga i le Tusi a Mamona o le "tapasa"  
po o se "faatonutonu") e lornia i le faa-Alepania, Aminia  
(Sasae), Pisilama, Palekeria, Kemupotia, Sepuania, Saina,  
Kalaotia, Siekisolovakia, Tenimaka, Take, Igilisi, Esitonua,  
Fiti, Finelani, Farani, Sihamani, Eleni, Hanikeri, Initu, Iselani,  
Initonessa, Italia, Iapani, Kiripati, Korea, Latvia, Litunia,  
Malakasa, Masela, Monokolia, Nouei, Polani, Potukale,  
Romania, Rusia, Samoa, Saina (ua faafaoigofieina), Silovenia,  
Sipaniolo, Suetena, Swahili, Tagaloaka, Tahiti, Tai, Toga,  
lukureini, Urutu, ma Viatename. (E eseese lava gagana.)

© 2016 Puletaofia e le Intellectual Reserve, Inc. Ua taofia  
aia tatua uma. Lomia i le lunaite Setete o Amerika.

**Faamatatalaga o le Puletaofia:** Vagana ua faailoa atu, e  
mafai e tagata taitoatasi ona kopina anomea mai le Liahona  
mo lo latou faaaogainga patino, ma le salii tipe (e aofia ai  
mo valaauga o le Ekalesia). O lenei aia tatua e mafai ona  
faaleogainga i suo se taimi. O anomea o mea fatino e le  
mafai ona kopina pe afao o loo faailoa mai se faasa i le  
laiona o loo i ai ma le faatufugaga. O fesili mo le Puletaofia e  
tatua ona faatuatusi mai i le Intellectual Property Office, 50  
E, North Temple St., FL 13, Salt Lake City, UT 84150, USA;  
email: cor-intellectualproperty@ldschurch.org.

**For Readers in the United States and Canada:**

November Vol. 40 No. 11. O LE LIAHONA (USPS 311)  
Samoan (ISSN 1045-0947) is published monthly by The  
Church of Jesus Christ of Latter-day Saints, 50 East North  
Temple, Salt Lake City, UT 84150. USA subscription price  
is \$10.00 per year; Canada, \$12.00 plus applicable taxes.  
Periodicals Postage Paid at Salt Lake City, Utah. Sixty days'  
notice required for change of address. Include address label  
from a recent issue; old and new address *must* be included.  
Send USA and Canadian subscriptions to Salt Lake  
Distribution Center at address below. Subscription help  
line: 1-800-537-5971. Credit card orders (Visa, MasterCard,  
American Express) may be taken by phone. (Canada Poste  
Information Publication Agreement #40017431)

POSTMASTER: Send all UAA to CFS (see DMM 507.1.5.2).

NONPOSTAL AND MILITARY FACILITIES: Send address  
changes to Distribution Services, Church Magazines,  
P.O. Box 26368, Salt Lake City, UT 84126-0368, USA.



## Failauga i le Faasologa

### Faaalafapeta

- Andersen, Neil L., 35
- Ashton, Brian K., 106
- Ballard, M. Russell, 97
- Bassett, Mark W., 52
- Bednar, David A., 102
- Bingham, Jean B., 6
- Christensen, Craig C., 27
- Christofferson, D. Todd, 48
- Cook, Carl B., 110
- Cook, Quentin L., 40
- Cornish, J. Devn, 32
- Curtis, LeGrand R., Jr., 68
- Davies, Dean M., 93
- Eyring, Henry B., 39, 75, 99
- Hales, Robert D., 22
- Holland, Jeffrey R., 61
- McConkie, Carol F., 25
- Meurs, Peter F., 85
- Monson, Thomas S., 78, 80
- Nattress, K. Brett, 119
- Nelson, Russell M., 81
- Oaks, Dallin H., 57
- Oscarson, Bonnie L., 12
- Rasband, Ronald A., 113
- Reeves, Linda S., 88
- Renlund, Dale G., 121
- Robbins, Lynn G., 96
- Schmutz, Evan A., 116
- Stephens, Carole M., 9
- Stevenson, Gary E., 44
- Uceda, Juan A., 30
- Uchtdorf, Dieter F., 15, 19, 71
- Yamashita, Kazuhiko, 55

## Faasino Autu

- Agaga Paia, 9, 25, 27, 30, 44, 68, 85, 106
- Agalelei, 6
- Aiga, 119
- Aiga o Isarael, 35
- Alofa, 22, 48, 57, 61, 99, 113
- Alofa Mama, 6, 93
- Aoaiga, 61, 104
- Aoao atu, 12, 22
- Ata o le faaolataga, 12, 19, 80, 81, 88, 90
- Auauna atu, 22, 55, 61, 71, 75, 99, 102, 110
- Avea ma Soo, 90, 93, 102, 116
- E le atoatoa le malosi, 55
- Faaaliga, 52
- Faamaloga, 9
- Faamanatuga, 85, 99, 106
- Faamanuia, 78, 110
- Faamasinoina, 6, 96
- Faamoemoe, 93, 116
- Faatoagaina Mai, 71, 75
- Faatuatua, 9, 12, 15, 25, 27, 30, 52, 90, 93, 102, 106, 110, 113, 116
- Faaatuauina, 15, 52
- Faiaoga o aiga, 61
- Faigata, 6, 9, 12, 22, 40, 55, 68, 81, 99, 113, 116
- Faitalia, 15
- Feagaiga, 12, 99
- Galuega faafaifeatalai, 15, 35, 55, 57, 80
- Iesu Keriso, 6, 9, 12, 22, 25, 30, 32, 35, 40, 44, 48, 55, 80, 81, 85, 88, 90, 93, 96, 102, 106, 110, 113, 116, 119, 121
- Iosefa Samita, 12, 27, 35, 44, 93, 96, 99, 113
- Liliuese, 68
- Liua, 35, 57, 68
- Loto faafetai, 19, 75, 99



## Mea na Faamamafa mai mai le konafesi aoao o Oketopa 2016

**N**a faasoa mai e Peresitene Thomas S. Monson ni savali tuusa'o mai i le taimi o le konafesi aoao. I le taeao o le Aso Sa, sa ia molimau ai i le fuafuaga sili a le Atua o le fiafia mo tagata uma. Sa ia aoao e uiga i le vaega taua a Iesu Keriso i le ata o le faaolataga e pei foi o la tatou matafaioi i le mauaina o le fiafia sa fuafuaina e le Atua. (Tagai i le itulau 80.) I le taimi o le sauniga a le au perisitua, sa faamamafa mai ai e Peresitene Monson ia faamanuiga e oo mai i le usiusitai i poloaiga a le Alii ma le tausia faamaoni o le Upu o le Poto (tagai itulau 78).

Sa faapotopoto faatasi le faitau fia selau ma afe o tamaitai, tamaitai talavou, ma teineiti i le laitiiti e tai valu tausaga i le Maota Autu mo Konafesi ma i nofoaga i le salafa o le lalolagi e tatalaina sauniga e ono o le konafesi aoao i le sauniga aoao a tamaitai.

I le taimi o le sauniga i le afiafi o le Aso Toonai, sa tuuina atu ai i ni Au Pulega Aoao o Fitugafulu e toafa ni tulaga o le faamalolo faamamaluina, e toatasi le Fitugafulu Eria na faamalolo mai, ae toalua nisi Fitugafulu Eria na valaauiina (tagai i le itulau 39). I le Aso Sa, na faamamaluina ai e Elder Dale G. Renlund o le Korama a Apostolo e

Toasefululua Elder Per G. Malm, o se tasi o Fitugafulu na maliu i le aso 26 Iulai, 2016 (tagai itulau 121).

O konafesi aoao o le Ekalesia e tai ono masina ma usuia, e tuusao atu mai le Nofoga Autu mo Konafesi e 21,000-nofoa i le Aai o Sate Leki, Iuta, ma e oo atu i le faitau miliona o tagata i le lalolagi atoa. Sa faaliliuina le konafesi ma faasalalau atu i le initonet i gagana e silia ma le 80 ma ua lolomiina i gagana e 34 i mekasini a le Ekalesia. ■

*Mo se fautuaga i le faaaogaina o lenei lomiga, tagai i le faasino upu mo tala i le itulau e 125.*





Saunia e Jean B. Bingham

Fesoasoani Muamua i le Au Peresitene Aoao o le Peraimeri

# O Le A Ou Aumaia le Malamalama o le Talalelei i totonu o Lo'u Aiga

*E mafai ona tatou aumaia le malamalama o le talalelei i totonu o o tatou fale, o a'oga, ma falefaigaluega pe afai tatou te tagai mo mea lelei i isi ma faasoa atu.*

se tali atu i le valaaulia a Sister Linda K. Burton i le konafesi aoao ia Aperila,<sup>1</sup> e toatele outou na auai i ni faatinoga magafagafa ma agaalofa o le alofa mama na taulai atu i le faafetaia'ia o manaoga o tagata sulufai i a outou era i le lotoifale. Mai ni taumafaiga faatauvaa, taitoatasi e oo atu i polokalama lautele i nuu [ma alalafaga], o na faatinoga o le taunuuga o le alofa. A o outou faasoa atu tou taimi, taleni, ma punaoa, o o outou loto—ma loto o tagata sulufai—na faamalamalamaina. O le fausiaina o le faamoemoe ma le faatuatua ma e oo lava i se alofa tele atu i le va o lē e mauaina ma lē e foai atu o ni taunuuga lemaalofia ia o le alofa mama moni.

Ua ta'u mai e le perofeta o Moronae ia i tatou e faapea o le alofa mama o se uiga taua lea o i latou o le a ola faatasi ma le Tama Faalelagi i le malo selesitila. Ua ia tusia, "E vagana ai ua ia te outou le alofa mama e le mafai lava i se ala ona faaolaina outou i le malo o le Atua."<sup>2</sup>

Ioe, o Iesu Keriso o le faataitaiga atoa o le alofa mama. O Lona ofo mai i le muai olaga e avea ma o tatou Faaola, o Ana fegalegaleaiga i Lona olaga faaletino atoa, o Lana meaalofa paia o le Togiola, ma Ana taumafaiga faifai pea ia toe avatu i tatou i lo tatou Tama Faalelagi, o ni faailoaga sili ia o le alofa mama. E galue o Ia i se taulaiga se tasi lava: o le alofa mo Lona Tama ua faailoa e ala i Lona alofa mo i tatou taitoatasi. Ina ua fesiliglia e uiga i le poloaiga sili, sa tali Iesu:

"E te alofa atu i le Alii lou Atua ma lou loto atoa, ma lou agaga atoa, ma lou manatu atoa.

"O le poloaiga muamua lena ma le sili.

"E faapena foi le lona lua, E te alofa atu i le lua te tuaoi, ia pei o oe lava ia te oe."<sup>3</sup>

O se tasi o auala sili ona taua e mafai ona tatou atiae ai ma faailoa atu ai lo tatou alofa mo o tatou tuaoi e ala lea i le faaali atu o mafaufauga ma upu le agaalofa. I ni nai tausaga talu ai, sa

ta'ua ai e se ue pele e faapea, "O le itu-aiga silisili o le alofa mama atonu o le taofi o le faamasino atu."<sup>4</sup> O loo moni pea lena mea i aso nei.

Talu ai nei, a o matamata ai Alisa e tolu tausaga i se ata ma ona tei, sa ia faapea mai ma se lagona le mautonu, "Mama, e ese a le la moa!"

Sa tilotilo atu lona tina i le tv ma tali atu ma le ata, "Hani, o le pīpī le la."

E pei foi o lena teineitiiti tolu tausaga lemailoa, o nisi taimi tatou te tilotilo ai i isi ma se malamalama lē atoatoa. Atonu tatou te taulai atu i ni eseesege ma vaai ai i ni mea sese ia i latou o siomaina i tatou ae o loo silasila i ai lo tatou Tama Faalelagi i Ana fanau, na foafaina i Lona faatusa e faavavau, i ni gafatia ofogofogia ma mamalu.

E manatuaina lava Peresitene James E. Faust i lana saunoaga, "O le faateleina lava o lo'u matua, o le faaititia foi lena o lo'u faamasino atu."<sup>5</sup> Ua faamanatu mai e lena mea ia te a'u le matauga a le Apostolo o Paulo:

"O ona po na ou itiiti ai, na ou tau-tala ai faatamaitiiti, na ou manatunatu faatamaitiiti, na ou filifili faatamaitiiti, a ua oo ina ou tagata matua, ona ou tiai lea o mea a tamaiti.

"Aua o ona po nei tatou te vaavaai ai faanenefu i le faaata, a o ia ona po tatou te fesagai ai; o nei ona po ou te iloa ai faaleatoa, a o ia ona po ou te iloa tino ai, pei ona iloatinoina o a'u."<sup>6</sup>

A tatou vaai ma le manino atili i o tatou lava lē atoatoa, o le a itiiti le faaosofia o i tatou e vaavaai atu i isi ma le "faanenefu i le faaata." Tatou te mananao ia faaaoga le malamalama o le talalelei e vaai atu ai i isi e pei ona silasila i ai le Faaola—i le agaalofa, faamoemoe, ma le alofa mama. O le a oo mai le aso o le a tatou maua ai se malamalama atoatoa o loto o isi ma o le a faafetai o le a ofo mai ia i tatou le alofa mutimutivale—e pei lava ona tatou ofo atua mafaufauga ma upu o le alofa moni i isi i lenei olaga.

I nai tausaga talu ai, sa matou o ai e alo paopao ma se vaega o tamaitai talavou. O vaituloto lanumoana loloto na siomia e atumauga lanulauava i vaomatua ma tofē papa sa ofoofogia le matagofie. Sa fe'ilafi mai le vai i



a matou foe a o matou faatofuina i totonu o le vai manino, ma mafanafana le susulu mai o le la a o matou sopoaina ma le sologalelei le vaituloto.

Peitai, sa lei pine ae faauli mai le lagī ma se savili malosi na amata ona agi. Ina ia vave ona o ese atu, sa ao ia i matou ona faatofu loloto i lalo a matou foe ma alo malosi e aunoa ma le malolo. I le mavae ai o ni nai itula o le lelavavā ma le galuega faigata tele, na i'u ina matou tau atu i se vaega o le vaituloto ma iloa ai ma lo matou ofo tele ma le fiafia o loo agi le savili i le itu na matou mananaao e o i ai.

Na vave lava ona matou faaaogaina lenei meaalofa. Sa matou toso maia i fafo se tamai tapoleni, ma nonoa ona tulimanu e lua i au o foe ma isi tulimanu i vae o lo'u toalua, ia na faaloloa atu i le isi itu o le paopao. Sa feula atu e le savili le la [o le vaa] sa le'i mafaufauina, ma matou se'e atu ai loa!

Ina ua iloa mai e tamaitai talavou i isi paopao le auala na matou se'e atu ai ma le faigofie i le vai, sa vave foi loa ona latou faia a latou la sa lei

mafaufauina. Sa matou lagonaina le to'a ma taliē ma le fiafia, ma le faafetai mo le toomaga mai luitau o le aso.

E pei foi o lena savili mamalu e mafai foi ona i ai se faamālō faamoni a se uo, o se faafeiloaiga fiafia a matua, le lue mai ma le ioe o le ulu a sou tei, po o se ataata faamalosi'au a se uo faigaluega po o se uo i le a'oga, ua maua uma ai le "savili fou i a tatou la" a o tatou tauivi ma luitau o le olaga! Sa faamatalaina faapenei e Peresitene Thomas S. Monson: "E le mafai ona tatou faatonuina le matagi, ae e mafai ona tatou fetuunaia ia la. Mo le fiafia atoatoa, filemu, ma le faamalieina, tau ina ia tatou *filifilia* se uiga faaalia lelei."<sup>7</sup>

Ua i ai i upu se mana e ofo ai, e faafiafia ai isi ma faalotovaivaia ai foi. Atonu tatou te manatuinauma lava ni upu lē lelei na faalotovaivaia ai i tatou ma isi upu na tautalagia i le alofa na matua faagaeetia ai o tatou agaga. O le filifili e fai atu na o upu e lelei e uiga i isi—ma i—isi e siitia ma faamalosia ai i latou o siomiaina i tatou ma fesoasoani ai i isi ia mulimuli i le ala a le Faaola.

A o avea a'u ma se teineitiiti i le Peraimeri, sa ou galue ma le filiga e su'i-lima se faaupuga faigofie lea e faitauina, "O le a ou aumaia le malamalamā o le talalelei i totonu o lo'u aiga." I se tasi o aoauli, a o tasu'i e i matou o teineiti ia nila i luga ma lalo i totonu o le ie, sa faamatala mai e lo matou fiaaoga se tala i se teineitiiti sa nofo i luga o se maupuepue i le tasi itu o le vanu. I aoauli taitasi, sa ia matauina ai lava i luga o le maupuepue i le isi itu faafesagai o le vanu se fale o loo susulu mai ai ni faamalama auro. O lona fale sa laitiiti ma fai sina palapalā, ma sa moemiti le teineitiiti e fia nofo i lena fale matagofie e i ai faamalama auro.

I se tasi aso sa faatagaina ai le teineitiiti e tietie atu i lana uila e sopoia le vanu. Sa ia tietie atu ma le naunautai seia oo ina tau atu i le fale e auro faamalama lea ua leva tele o faame-melo i ai. Ae ina ua ia oso i lalo mai lana uila, sa ia vaiai o le fale ua tuufua ma faaleagaina, faatasi ai ma vao ua sosolo i le fanua ma faamalama masani ma palapalā. Ma le faanoanoa, sa tepa

atu ai le teineitiiti i le latou fale. I lona te'i ai, sa ia vaiai ai se fale o loo i ai ni faamalama auro o loo susulu mai luga o le maupuepue mai le isi itu o le vanu, ma iloaina vave ai o lona lava ia fale!<sup>8</sup>

O nisi taimi, e pei foi o lenei teineitiiti, tatou te vaavaai i mea o loo i ai i isi tagata po o o latou ituaiga tagata ma lagonaina e faatauvaa atu i tatou pe a faatusatusa. Tatou te oo ina taulai atu i ituaiga tagata i luga o le Pinterest po o le Instagram po o le faanenefuina i le manatu fia tautavā i isi i totonu o o tatou aiga po o falefaigaluega. Peitai, a tatou faaaluina se taimi, e "faitau ai le tele o o [tatou] manuia,"<sup>9</sup> tatou te vaiai i se vaiga moni atu ma iloaina le lelei o le Atua i *tagata uma* o Lana fanau.

Pe 8 pe 108 o tatou tausaga, e mafai lava ona tatou aumaia le malamalama o le talalelei i totonu o o tatou lava siosiomaga, po o se potumautotogi i se fogafale maualuga i Manhattan, se faleoo i Meleisia, po o se faleie i Monokolia. E mafai ona tatou fuafua e tagai mo le lelei i isi ma i tulaga o

siomia ai i tatou. E mafai e tamaitai talavou ma matutua teisi atu i soo se mea ona faaalia le alofa mama pe a latou filifili e faaaoga ia upu e atiae ai le toafimalie ma le faatuatua i isi.

Sa faamatala e Elder Jeffrey R. Holland se alii talavou sa taufaalili i ai lana tupulaga i le taimi o ona tausaga a'oga. I ni nai tausaga mulimuli ane, sa ia masii ese, ma auai i le militeli, sa a'otauina, ma sa toaga i le Lotu. I lea vaitau o lona soifuaga na failogaina i ni aafiaga matagofie ma faamanuaina.

I le mavae ai o ni tausaga, sa ia toefoi atu i lona nuu moni. Peitai, sa mumusu tagata e taliaina lona tuputupu a'e ma mea ua ia ausia. Ia i latou, o ia lava lea tuai "e faapea ma faapea," ma sa latou taulimaina o ia i lena lava ala. Na i'u lava ina mouese atu lenei alii lelei i se atalafoia o lona tagata faamanuaina sa i ai e aunoa ma le mafai ona faaaogaina o ana taleni ofoofogia na atiaeina e faamanuaina ai i latou sa faifai ma ua toe teenaina foi o ia.<sup>10</sup>

Oka se ma'umau, mo ia faapea ai foi ma le nuu!

Sa aoao mai le Aposetolo o Peteru, "Ia muamua i mea uma ona maua e outou o le alofa [mama] naunau o le tasi i le tasi, aua o le alofa [mama] e uifiu ai agasala e tele."<sup>11</sup> O le alofa [mama] naunau, o lona uiga o le "lotatoa," e faaalia e ala i le faagaloina o mea sese ma aleu o le isi tagata nai lo le faatautee pea i ai po o le manatua ina pea o mea sese a isi i le tuanai.

O la tatou matafaioi ma le avanoa o le taliaina lea o mea ua faaleleia i *tagata uma* a o tatou tauivi ia avea e pei o lo tatou Faaola, o Iesu Keriso. Oka se faageetia o le vaaia o le malamalama i fofoga o se tasi ua malamalama i le Togiola a Iesu Keriso ma o loo faia ni suiga moni i lona olaga! O faifeatalai e lagonaina le olioli o le vaaia o se tagata liliu mai o ulu atu i vai o le papatisoga ona ulufale atu ai lea i faitotoa o le malumalu, o ni molimau ia o faamanuiga o le faatagaina—ma le uunaia—o isi ia sui. O tagata o le ekalesia e talileleia tagata liliu mai o e atonu na le'i manatu i ai o ni sui o le malo e mauaina le faamalieina tele i le fesoasoani ia i latou ia lagona le alofa o le Alii. O le matagofie tele o le talalelei a Iesu Keriso o le moni lea o le alualu i luma e faavavau—e le gata ua *faatagaina* i tatou ia sui mo le lelei atu ae uunaia foi, ma *poloaiina*, ia faauau pea ona tulitulimatagauina le faaleleiga atili, ma ia i'u ai i le atoatoa.

Na fautua mai Peresitene Thomas S. Monson: "I ni auala faatauvaa se selau, ua i ai ia te outou uma le tiute o le alofa mama. . . . Nai lo le faamasino atu ma faitioina e le tasi le isi, ia tofu maua e i tatou le alofa mama o Keriso mo i latou o loo tatou malaga faatasi i lenei faigamalaga o le olaga. Tau ina ia tatou iloaina o loo faia e tagata taitoatasi le mea sili na te mafaia e taulima ai luitau e oo atu i o [latou] ala, ma tau ina ia tatou tauivi ia faia le mea sili *tatou te* mafaia e fesoasoani atu ai."<sup>12</sup>

O le tagata e i ai le alofa mama, e onosai, agalelei ma faamalieina. O le alofa mama na te faamuamuaina isi, e lotomaualalo, e amiopulea, e tagai mo



le lelei i isi, ma olioli pe a faia e se tasi ni mea lelei.<sup>13</sup>

E pei o ni uso (ma tuagane) i Siona o le a tatou tuuto ea e “galulue faatasi *uma* . . . e fai soo se mea lelei ma tatau, e faafafia ai tagata uma i le suafa [o le Faaola]”?<sup>14</sup> Faatasi ai ma le alofa ma faamoemoega sili, e mafai ona tatou tagai ma talaina le matagofie o loo i ai i isi tagata, e faatagaina ma uunaia ai le alualu i luma? E mafai ea ona tatou olioli i mea e ausia e isi a o faaaauau pea ona galulue e agai atu i a tatou lava mea e faaleleia?

Ioe, e *mafai* ona tatou aumaia le malamalama o le talalelei i totolu o o tatou fale, o a’oga, ma falefai-galuega pe afai tatou te tagai mo mea lelei i isi ma faasoatatu ae aua le vaavaai masei. Oka se faatumulaina o lo’u loto i le faafetai pe a ou mafau-fau atu i le salamo ua mafai e ala i lo tatou Faaola, o Iesu Keriso mo i tatou uma ua agasala ma le mautinoia i lenei lalolagi le atoatoa ma faigata i nisi taimi!

Ou te molimau atu a o tatou mulimuli i Lana faataitaiga atoatoa, e mafai ona tatou mauaina le mealofoa o le alofa mama, lea o le a tatou maua ai le olioli tele i lenei olaga atoa ai ma le faamanuiga folafolaina o le ola e faavavau faatasi ma lo tatou Tama o i le Lagi. I le suafa o Iesu Keriso, amene. ■

#### FAAMATALAGA

1. Linda K. Burton, “Sa Avea Au ma Tagata Ese,” *Liahona*, Me 2016, 13–15.
2. Moronae 10:21.
3. Mataio 22:37–39.
4. Sandra Rogers, “Hearts Knit Together,” i le *Hearts Knit Together: Lauga mai le 1995 Women’s Conference*, 7.
5. James E. Faust, i le Dallin H. Oaks, “‘Judge Not’ and Judging,” *Ensign*, Aug. 1999, 13.
6. 1 Korinito 13:11–12.
7. Thomas S. Monson, “Ola i se Olaga Faamanuaina,” *Liahona*, Jan. 2012.
8. Sii mai le Laura E. Richards, *The Golden Windows: A Book of Fables for Young and Old* (1903), 1–6.
9. “Faitau Ou Manuia,” *Viiga*, nu. 151.
10. Tagai Jeffrey R. Holland, “O Le A Oo Mai le Mea Sili,” *Liahona*, Jan. 2010, 18–19.
11. 1 Peteru 4:8.
12. Thomas S. Monson, “E Le Uma le Alofa,” *Liahona*, Nov. 2010, 125.
13. Tagai 1 Korinito 13:4–6.
14. “Galulue E Pei o Ni Uso i Siona,” *Viiga*, nu. 196; ua faoopoopo le faamamafa.



Saunia e Carole M. Stephens

Fesoasoani Muamua i le Au Peresitene Aoao o le Aualofa

## ○ Le Fomai Sili

*E le tatau ona tuua oe e lagonaina—na o oe—le faanoanoa ona o agasala, le tiga ona o amioga a isi, po o mea moni matuitui o le olaga faaletino.*

**O** se tasi o o’u avanoa aupito sili ona tauia o le faimalaga lea—ia aoao mai i o’u uso i le lalolagi atoa. E leai se mea e faatusalia i le limalima faatasi, talanoa faafesaga’i, ma le lotogatasi faatasi ma outou.

I se tasi o aafiaga faapena, sa fesili ai se taitai Aualofa, “E i ai se mea patino e tatau ona taulai atu i ai tamaitai?”

Sa ou tali atu, “Ioe!” a o oo mai le lauga a Peresitene Russell M. Nelson “O Se Talosaga i O’u Tuafafine” i lo’u mafau-fau. Sa aoao mai Peresitene Nelson, “Tatou te manaomia ni tamaitai o e ua i ai se malamalama mausali o le [mataupu] faavae a Keriso.”<sup>1</sup>

Sa faamatala e Nifae le mataupu faavae a Keriso i le ala lenei:

“Aua o le faitotoa e tatau ona outou ulu atu ai o le *salamo* ma le *papatisoga* i le vai; ona oo mai ai lea o se faamagaloga o a outou agasala i le afi ma i le *Agaga Paia*. . . .

“Ma o lenei . . . Ou te fesili atu pe ua uma ona faia o mea uma? Faauta, ou te fai atu ia te outou, E leai; ona tou te lē oo mai iinei pe a na lē seanoa le afioga a Keriso faatasi ma le *faatuatua* lē mafaa-gaeetia ia te ia, ma le faalagolago atoa i galuega a ia o lē ua malosi aoao e laveai.

“O le mea lea, e tatau ai ona outou fetaomi atu i luma ma le tumau ia Keriso, ma se susulu atoatoa o le

faamoemoe, ma le alofa i le Atua ma tagata uma. O le mea lea, afai tou te fetaomi atu i luma, ma taumamafa fiafia i le afioga a Keriso, ma *tumau e oo i le iuga*, faauta, ua faapea ona fetalai mai o le Tamā: O le a outou maua le ola e faavavau.

“. . . O le ala lenei; ma ua leai se isi lava ala po o se isi suafa ua tuuina mai i lalo ifo o le lagi e mafai ona faaolaina ai o le tagata i le malo o le Atua. Ma o lenei, faauta, o le *mataupu faavae lenei a Keriso*.”<sup>2</sup>

Aisea tatou te manaomia ai se malamalama mausali o nei mataupu faavae?

E tele ina ou feiloi atu i tamaitai o le Au Paia o Aso e Gata Ai o loo matua manaomia lava se fesoasoani, ae latou te le o liliu atu i Lē e mafai ona tuuina maia le fesoasoani e faavavau. E tele ina latou saili mo le malamalama e ala i le sailili “o le fale tele ma le ateatea.”<sup>3</sup>

A o tatou faateleina lo tatou malamalama e uiga i le mataupu faavae a Keriso, o le a le pine ae tatou iloa o loo tatou atiaeina se malamalamaaga loloto atu e uiga “i le fuafuaga sili o le fiafia.”<sup>4</sup> Tatou te faamamaluina ai foi lo tatou Faaola, o Iesu Keriso, o loo i ai i le totonugalemu o le fuafuaga.

A tatou iloaina le auala e faaaoga ai le mataupu faavae a Keriso i o tatou tulaga faaletagata lava ia, o le a faatupulaia



lo tatou alofa mo lo tatou Faaola. Ma e tatou te iloaina ai e faapea “po o a lava ni eseesega ua iloagofie, o loo manaomiaina e i tatou uma le Togiola le i'u lava e tasi.”<sup>5</sup> Tatou te iloaina o Ia o lo tatou faavae—“le papa o lo tatou Togiola, . . . o le faavae mautinoa lea, o se faavae lea afai e atiae ai [i tatou] e le mafai lava ona [tatou] paau.”<sup>6</sup>

E mafai faapefea e lenei aoaoga faavae ona faamanuiaina ai i tatou a o tatou saili atu i le filemu ma le malamalama ma taumafai ia tumau ma le olioli i a tatou faigamalaga tulagaese i le olaga nei?

E mafai ona ou fautua atu ia tatou amata, e pei ona fai mai ai Nifae, “faatasi ma le faatuatua le mafaagaeetia ia [Kerisol], ma le faalagolago atoa i galuega a ia o lē ua malosi aoao e laveai.”<sup>7</sup> O lo tatou faatuatua ia Iesu Keriso e mafai ai ona tatou faafetaia’ia soo se luitau.

O le mea moni, e tele lava ina tatou iloaina le faalolotoina o lo tatou faatuatua ma le faaleleia o lo tatou sootaga ma le Tama Faalelagi ma Lona Alo e ala i faigata. Sei ou faasoa atua ni faataitaiga se tolu.

**Muamua, ua i ai i le Faaola, le Fomai Sili, le mana e suia ai o tatou loto ma tuuina mai ia i tatou le toomaga tumau mai faanoanoaga ua mafua ona o a tatou lava agasala.** Ina

ua aoao atu e le Faaola le fafine Samaria i le vaieli, sa Ia silafia ana agasala ogaoga. Peitai, “e silasila le Alii i le loto,”<sup>8</sup> ma sa Ia silafia foi sa i ai sona loto aoaoina gofie.

Ina ua sau le fafine i le vaieli, sa fetalai atu Iesu—le faatusa o le vai ola—e faapea, “Au mai ia ia te au, ou te inu.” O le a faapena foi ona fetalai mai lo tatou Faaola ia i tatou i se siufogoga tatou te iloa pe a tatou o atu ia te Ia—aua Na te silafia i tatou. Na te fesoasoani ia i tatou i o tatou tulaga o i ai. Ma ona o le tagata e i ai o Ia ma mea ua Ia faia mo i tatou, ua Ia malamalama ai. Ona ua Ia oo i o tatou tiga, e mafai ona Ia foai mai ia i tatou le vai ola pe a tatou saili atu i ai. Sa Ia aoao atua le mea lenei i le fafine Samaria ina ua Ia fetalai, “Ana e iloa le mea foai fua a le Atua, ma le ua fai atu ia te oe, Au mai ou te inu; po ua e ole mai ia te ia, ona foai atu lea ia te oe o le vaiola.” Ina ua malamalama mulimuli ane, sa tali atu ai loa le fafine i le faatuatua ma ole atu, “Le Alii e, aumai ia te au lena vai, ina ia ou le toe fia inu.”

Ina ua mavae le aafiaga lenei a le fafine Samaria ma le Faaola, sa ia “tuu . . . lana vai, a e alu atu i le aai, ua fai atu i tagata,

“Ina o mai ia; ina vaai i le tagata ua na ta’ua mai ia te au o mea uma lava ua ou faia; pe le o le Keriso ea lea?”

Sa ia maua se molimau—sa amata ona ia taumafa i le vai ola—ma sa ia manao ai e molimau atu i isi Lona paia.<sup>9</sup>

A tatou o mai ia te Ia ma loto maualalalo ma le aoaoina gofie—e tusa lava pe mamafatu o tatou loto i measese, agasala, ma solitulafono—e mafai lava ona Ia suia i tatou, “ona ua malosi o ia e faaola.”<sup>10</sup> Faatasi ai ma loto ua suia, tatou te mafaiia foi, e pei o le fafine Samaria, ma o atu i o tatou lava aai—i o tatou pale, o a’oga, ma falefaigaluega—ma molimau atu e uiga ia te Ia.

**Lua, e mafai e le Fomai Sili ona faamafanafana ma faamalosia i tatou pe a tatou lagonaina le tiga ona o amioga le tonu a isi.** E tele ni a matou talanoaga ma tamaitai na matua lofituina lava i avega mamafa. O lo latou ala o le feagaiga mai le malumalu ua avea ma se faigamalaga faigata o le faamaloloina. Ua mafatia i latou mai feagaiga malepelepe, loto nutimomoia, ma le leai o se talitonuga mautu. E toatele ua mafatia mai le muli-lua, ma sauaga i faaupuga, faalefeusuaiga, ma faalelagona, e tele lava o taunuuga o vaisu a isi tagata.

O nei aafiaga, e ui e le o sa latou lava measese, ae ua tuua ai le toatele ua ta’usalaina ma maasiasi. I le le malamalama ai pe faapefea ona puleaina lagona

malolosi latou te oo i ai, e toatele e tau-mafai e tanumia, natia ma faagaloina.

O le faamoemoe ma le faamaloloina e le maua i le natiaina faalilolilo ae i le malamalamo o le alofa o lo tatou Faaola, o Iesu Keriso.<sup>11</sup> Sa fautua mai Elder Richard G. Scott: "Afai o e saoloto [mai] se agasala matuia, aua ne'i e pologa fua i taunuuga o agasala a se isi tagata. . . . E mafai ona e lagonaina le agaalofa. . . . Ae e le tatau ona tauave i ou lava luga se lagona o le noatiaina mo na amioga. . . . A uma ona e faia le mea talafeagai e fesoasoani ai i sē e te alofa i ai, ona lafo atu lea o avega i aao o le Faaola. . . . A faapena ona e faia, e le gata o le a e mauaina le filemu ae o le a faaalia ai foi lou faatuatua i le mana o le Faaola e aveese ai le avega o le agasala mai sē pele e ala i lona salamo ma le usiusitai."

Sa ia faaauau faapea: "O le faamalologa atoa o le a oo mai e ala i lou faatuatua ia Iesu Keriso ma Lona mana ma le gafatia, e ala i Lana Togiola, e faamalolo ai manu'aga o mea lē amiontonu ma lē talafeagai."<sup>12</sup>

Afai e te mauaina oe i lenei tulaga, uso e, atonu e umi la le faagasologa mo le faamaloloina. O le a manaomia ai lou saili atu ma le agaga tatalo i le taitaiga ma le fesoasoani talafeagai, e aofia ai le fefautuaii ma alii ua faauuina ma le tatau i le perisitua. A o e aoao e talanoa ma le loto matala, seti ni tapulaa talafeagai, ma masalo ia saili atu i ni fautuaga faapolofesa. O le faatumauina o se soifua maloloina faaleagaga i le faagasologa atoa e taua tele! Manatua lou faasinomaga paia: o oe o se afafine faapelepele a ni Matua Faalelagi. Faalagolago i le fuafuaga e faavavau a lou Tama mo oe. Faaauau i aso uma ona fausia i luga o le faavae mausali o le mataupu faavae a Iesu Keriso. Faatino le faatuatua i aso taitasi ia matuai inu mai le vai puna o le vai o le ola a le Faaola. Faalagolago i le faaeeina mai o le mana ua avanoa mo i tatou taitoatasai e ala i sauniga ma feagaiga. Ma faatagaina le mana faamalolo o le Faaola ma Lana Togiola i lou olaga.

**Tolu, e mafai e le Fomai Sili ona faamafanafana ma lagolago i tatou a o tatou oo i le tiga o "mea moni o le olaga faaletino,"<sup>13</sup> e pei**



**o faalavelave, faaletonu o le mafau-fau, faama'i, tiga faifai pea, ma le oti.** Talu ai nei lava sa ou masani ai i se tamaitai talavou ofoofogia e igoa ia Josie o loo mafatia mai se faama'i o lagona lē fiafia. O sina vaega itiiti lenei o lana malaga agai atu i le faamaloloina e pei ona ia faasoaina mai ia te a'u:

"O taimi sili ona faigata e tupu i le mea e ta'ua e lo matou aiga o 'aso o le fola.' E amata i se lagona mamafa lofituina ma lagona maaleale ma le tetee i soo se ituaiga o leo, tago, po o le malamalamo. O se tiga faalemafau-fau matuia tele. E i ai se aso patino o le a le gallo lava ia te a'u.

"O le taimi muamua faatoa ou aafia ai i le ma'i, sa matua ou fefe lava i aafiaga. Ou te manatua le tagi masusu, le maligi mai o loimata a o ou tau mapuea mo se ea. Ae oo foi lava i ia mafatiaga matuitui e le mafaatusalia i le tiga lea e sosoo ai a o ou vaai atu i le atuatuvalo e lofituina ai si o'u tina, i le pulunaunau mai e fesoasoani ia te a'u.

"I lo'u mafau-fau nutimomoia ua oo mai ai lona loto nutimomoia. Ae sa lilo ia i ma'uua e ui i faigata matuitui ua faateteleina, ae sa toe o ni nai minute ona oo lea i se vavega tele.

"A o faasolo pea le itula umi, sa musumusu mai pea lava pea lo'u tina, 'O le a ou faia soo se mea e aveese ai lenei mea mai ia te oe.'

"I le taimi lava lea, sa faateteleina ai tiga, ma ina ua faatalitonuina a'u ua le mafai ona ou toe lavatia, ae tupu loa se mea ofoofogia.

"Sa faafuasei ona ulufia lo'u tino i se mana ofoofogia le mafaamatatalaina. Ona oo lea, faatasi ma se 'malosiaga e sili atu ma lo'u lava malosi,'<sup>14</sup> sa ou tau-tino atu ai i lo'u tina ma se talitonuga maumaututu ni upu se fitu na suia ai le olaga e tali atu ai i lona manao faifai pea e tauave o'u tiga. Sa ou fai atu, 'E te le tau faia, ua faia e se isi Tagata.'"

Mai taimi faigata o le ma'i matautia faalemafau-fau, sa faaaoga ai e Josie le malosi e molimau atu ai ia Iesu Keriso ma Lana Togiola.

Sa lei faamaloloina atoa o ia i lena aso, ae sa ia maua le malamalamo o le faamoemoe i se taimi o le pogisa tele. O le asō, i le lagolagoina ai e se malamalamo mausali o le mataupu faavae a Keriso ma le faafouina i aso uma e ala i le vaiola a le Faaola, o loo faaauau ai pea e Josie lana malaga e agai atu i le faamaloloina ma le faatinoina o le faatuatua le

mafaagaetia i le Fomai Sili. O loo ia fesoasoani i isi i luga o le ala. Ma ua ia fai mai, “A oo ina lagonaina le tumau pea o le pogisa, ou te faalagolago i le manatuaga o Lona alofa mutimutivale agamalu. E avea i latou ma se sulu tiala a o ou ui atu i taimi faigata.”<sup>15</sup>

Uso e, ou te molimau atu—

E le manaomia ona e faaaaua pea ona tauaveina—na o oe—le avega o faanoanoaga e mafua mai i le agasala.

E le manaomia ona e tauaveina—na o oe—le tiga e mafua mai i amioga le tonu a isi.

E le manaomia ona e lagonaina—na o oe—le tiga o mea moni o le olaga faaletino.

Ua augani mai le Faaola:

“Pe tou te le foi mai nei ea ia te au, ma salamo ia outou agasala, ma liliu, ina ia ou faamaloloina outou?”

“... Afai tou te o mai ia te au, e maua e outou le ola faavavau. Faauta, ua faaloaloa atu ia te outou lou lima alofa mutimutivale, ma o soo se tasi e sau, . . . o le a ou taliaina.”<sup>16</sup>

“O le a [Ia] faia soo se mea e aveese ai lenei mea mai ia te oe.” O le mea moni, “Ua uma ona [Ia] faia.” I le suafa o Iesu Keriso, le Fomai Sili, amene. ■

#### FAAMATALAGA

1. Russell M. Nelson, “O Se Talosaga i O’u Tuafafine,” *Liahona*, Nov. 2015, 97.
2. 2 Nifae 31:17, 19–21; faaopoopo le faamamafa.
3. 1 Nifae 11:36.
4. Alema 42:8.
5. Dale G. Renlund, “Le Au Paia o Aso e Gata Ai, Taumafai Pea,” *Liahona*, Me 2015, 57–58.
6. Helamana 5:12.
7. 2 Nifae 31:19.
8. 1 Samuelu 16:7.
9. Tagai Ioane 4:5–30, 39–42.
10. Alema 34:18.
11. Mo se fesoasoaniga faaopoopo mo tagata, o taitoalua ma aiga, ma taitai o le Ekalesia, tagai i le OvercomingPorngraphy.org ma le mentalhealth.lds.org.
12. Richard G. Scott, “Ia Saoloto Mai Avega Mamafa,” *Liahona*, Nov. 2002, 88.
13. Tagai Paul B. Pieper, “O Mea Moni o le Olaga Faalelino ua Faalia,” *Liahona*, Ian. 2016, 44.
14. “Faaola, ia Ou Alofa,” *Viiga*, nu. 150.
15. Mo nisi faamatalaga e uiga i le malaga a Josie agai i le faamaloloina, tagai i le Morgan Jones, “Bipolar Disorder Can’t Stop LDS Woman from Spreading Light, Joy through the 444 Project,” *Deseret News*, Mar. 21, 2016, deseretnews.com.
16. 3 Nifae 9:13–14.



Saunia e Bonnie L. Oscarson

Peresitene Aoao o Tamaitai Talavou

# Tutula’i A’e i le Malolosi, Uso e i Siona

*Ina ia avea ma tagata tausi feagaiga ua liua, e manaomia ona tatou suesue i aoaoga faavae taua o le talalelei ma maua se molimau mausali o lo latou moni a’ia’i.*

**O**se fiafiaga le faatasi ai i lenei Maota Autu mo Konafesi ma teineiti, tamaitai talavou, ma tamaitai o le Ekalesia. Matou te iloa foi e faitau afe isi vaega o uso o loo potopoto i le lalolagi atoa e maimoa i nei taualumaga, ma ou te faafetai mo le avanoa ma auala ua mafai ai ona tatou auai faatasi i le lotogatasi ma le faamoemoega i lenei afiafi.

Ia Oketopa 2006, sa saunoa ai Peresitene Gordon B. Hinckley i se lauga sa faaululalaina “Tutulai A’e Alii o le Atua,” sa faaululalaina i se viiga na tusia i le 1911.<sup>1</sup> O se valaau ia faatino mo alii o le Ekalesia ina ia tutulai a’e ma faaleleia i latou lava. Na tatagi pea lena lauga i lo’u mafaufau a o ou tatalo ia iloa po o le a se mea e faasoa atu ia te outou.

Uso e, o loo tatou ola i “aso faigata.”<sup>2</sup> O tulaga o o tatou aso e le tatau ona faate’ia ai i tatou. Ua uma ona muai ta’u mai mo le tele o meleniuma o se lapa-taiga ma apoapoaga ina ia mafai ai ona tatou saunia. Ua maua i le mataupu e 8 o le Mamona se faamatalaga maoti faatuatuvalo o tulaga o o tatou aso. I lenei mataupu, ua fai mai ai Moronae na vaai o ia i o tatou aso, ma ua aofia ai taua

ma tala o taua, mea leaga, fasioti tagata, gaoi, ma tagata e ta’u mai ia i tatou e leai se sa’o po o se sese i fofoa o le Atua. Ua ia faamatalaina tagata ua tumu i le faamauluga, e manao lava ia ofuina lavalava taugata, ma ē e faatauemu i tapuaiga. Na faaali atu ia te ia tagata ua pūpū i mea o le lalolagi ma latou tuu “ē ua matitiva, ma e ua lē lavalavā, ma ē ua mama’i ma puapuagatia, e ui ane”<sup>3</sup> e aunoa ma le amana’iaina.

Na fai e Moronae se fesili sailiili lagona e uiga ia i tatou—o ē o loo ola i nei aso. Fai mai o ia, “Aisea ea ua outou maasiasi ai e ave i o outou luga le suafa o Keriso?”<sup>4</sup> O lea tuua’iga ua faamatala tonu ai le faateleina o tulaga faaletino o lo tatou lalolagi.

I le Iosefa Samita—Mataio, o loo faailoa ai o aso e gata ai e oo lava i “e ua filifilia e tusa ma feagaiga”<sup>5</sup> o le a faaseseina. O tagata o le feagaiga ua aofia ai ma teineiti, tamaitai talavou, ma uso o le Ekalesia ua papatisoina ma osia feagaiga faatasi ma lo latou Tama Faalelagi. E oo lava ia i *tatou* ua lama-tiaina i le faaseseina i aoaoga sese.

Uso e, ou te le talitonu o le a faaleleia tulaga [o le lalolagi] i le agai



i luma. Afai o tifiga ua i ai nei o se faailoga lena, e manaomia la ona tatou saunia mo afā o loo i luma atu. O le a faigofie lava le togi o lima i luga pe a faalotovaivai, ae i le avea ai ma tagata o le feagaiga, e le manaomia ona tatou lotovaivai. E pei ona saunoa mai Elder Gary E. Stevenson, “o le tauri lotolofo a le Tama Faalelagi mo le ola ai i taimi faigata, o lo tatou ola lea i le atoaga o taimi.”<sup>6</sup> Ou te fiafia i le mafanafana o lena saunoaga.

Sa ta'u mai e Peresitene Russell M. Nelson ia i tatou i le tausaga ua te'a: “O le a faateleina osofaiga e faasaga i le Ekalesia, o ona aoaoga faavae, ma le ala o loo tatou ola ai. Ona o lena mea, tatou te manaomia ai tamaitai o e ua i ai se malamalama mausali i aoaoga faavae a Keriso ma o le a faaaogaina lena malamalama e aoao atu ai ma fesoasoani e atinae se tupulaga e mafai ona tetee atu i le agasala. Tatou te manaomia tamaitai o e mafai ona iloa le taufaasese i ona foliga uma. Tatou te manaomia tamaitai o e ua iloa le ala e maua ai le mana ua faavanoa mai e le Atua i e tausia feagai-ga ma e e faaalia o latou talitonuga ma

le talitonuga maumaututu ma le alofa moni. Tatou te manaomia tamaitai o e lotototoa ma i ai le vaaiga mamao a lo tatou Tina o Eva.”<sup>7</sup>

O lenei savali ua faamautinoa mai ai ia te a'u e faapea e ui lava i tulaga o o tatou aso, ae e tele ni mafuaaga tatou te olioli ai ma i ai se faamoemoe. Ou te talitonu ma lo'u loto atoa ua i ai ia i tatou o uso le malosiaga faalenatura ma le faatuatua o le a mafai ai ona tatou faafetaia'ia luitau o le ola ai i aso e gata ai. Na tusia e Sister Sheri Dew e faapea, “Ou te talitonu o le taimi lava tatou te aoao ai e tatala atu le faatosinaga atoa o tamaitai osifeagaiga ua liuaina, o le a vave ona suia le malo o le Atua.”<sup>8</sup>

O le a alu ai se taumafaiga malosi ina ia liuaina ai ma tausia a tatou feagaiga. Ina ia faia lea mea, e manaomia ona avea i tatou ma teineiti ma tamaitai e suesue i aoaoga faavae taua o le talalelei ma maua se molimau mausali o lo latou moni a'ia'i. E tolu ni vaega ou te talitonu o mea faavae ia i ni molimau malolosi ma ou te manatu e taua i lo tatou malamalama.

Muamua, e manaomia ona tatou faamamaluina le taua tele o le Atua lo tatou Tama Faavavau ma Lona Alo, o Iesu Keriso, i lo tatou faatuatua ma le faaolataga. O Iesu Keriso o lo tatou Faaola ma le Togiola. E manaomia ona tatou suesue ma malamalama i Lana Togiola ma le auala e faaaoga ai i aso taitasi; o le salamo o se tasi o faamanu-iaga silisili e maua e i tatou taitoatasi ia tumau ai i le ala. E manaomia ona tatou vaai atu ia Iesu Keriso o lo tatou faataitaiga autu ma le faataitaiga o le tagata e manaomia ona tatou avea ai. E manaomia ona tatou aoao pea o tatou aiga ma vasega e uiga i le fuafuaga sili o le faaolataga a lo tatou Tama, lea e aofia ai le aoaoga faavae a Keriso.

Lua, e manaomia ona tatou malamalama i le manaomiaina o le toefuataiga o le aoaoga faavae, faatulagaga, ma ki o le pule i nei aso e gata ai. E manaomia ona i ai sa tatou molimau i le filifilia o le Perofeta o Iosefa Samita mai le lagi ma tofia e le Alii e aumaia lenei toefuataiga ma faamamaluina o ia na faatulagaina tamaitai o le Ekalesia e tusa ma le faatulagaga na i ai i le Eklesia anamua a Keriso.<sup>9</sup>

Ma le tolu, e manaomia ona tatou suesue ma malamalama i sauniga ma feagaiga o le malumalu. Ua tu mau-sali le malumalu i le totonugalemu o o tatou talitonuga sili ona paia ma ua faatonuina i tatou e le Alii ia auai, mafaufau loloto, suesue, ma saili ia maua le uiga patino ma le faaaogaina e le tagata lava ia. O le a tatou malamalama ai e ala i sauniga o le malumalu, o le a faaalia ai le mana o le amioatua i o tatou olaga<sup>10</sup> ma ona o na sauniga o le malumalu, e mafai ai ona faaau-upegaina i tatou i le mana o le Atua ma o le a i ai Lona suafa i o tatou luga, o le a siomia i tatou e Lona mamalu, ma o le a leoleoina i tatou e Ana agelu.<sup>11</sup> Ou te tomanatu pe o tatou faalagolago atoa atu ea i le mana o na folafolaga.

Uso e, e oo lava i sē aupito itiiti o lenei aofia e mafai lava ona tula'i a'e i le faatuatua ma faia se matafaioi taua i le fausiaina o le malo o le Atua. E amata ona maua e le fanau a latou lava molimau e ala i le faiatina po o le faalogologo i tusitusiga paia, tatalo



i aso taitasi, ma le taumamafa i le faamanatuga i se ala anoa. E mafai e fanau uma ma tamaitai talavou ona uunaia afiafi faaleaiga ma auai ai ma le atoatoa. E mafai ona avea oe ma le tagata muamua e tootuli a o potopoto lou aiga mo tatalo faaleaiga. E oo lava i lou aiga e le atoatoa foi, ae o au faataitaiga patino o le ola faamaoni i le talalelei e mafai ona uunaia ai olaga o lou aiga ma au uo.

E manaomia foi ona vaai tamaitai talavou o le Eklesia ia i latou lava o ni tagata auai taua i le galuega o le faaolataga o loo taitaia i le perisitua ma ia le tau na ona matamata i ai ma lagolago. Ua outou umia valaauga ma ua vaetofaina outou e i latou o loo umiaina ki o le perisitua ia galulue ai o ni taitai i le mana ma le pule i lenei galuega. A o outou faalauteleina o outou valaauga i au peresitene o vasega ma saunia faaleagaga, fefautuuaai faatasi, aapa atu ia auauna i tagata o a outou vasega, ma aoao e le tasi le isi i le talalelei, o loo outou faia o outou tofiga i lenei galuega ma o le a faamunuiaina ai outou ma a outou uo.

E manaomia e tamaitai uma ona tagai ia i latou lava o ni tagata auai taua i le galuega a le perisitua. O tamaitai i lenei Eklesia ma peresitene, fesoasoani,

faiaoga, sui o aufono, uso, ma tina, ma le malo o le Atua e le mafai ona gaoioi vagana ua tutula'i a'e ma faataunu o tatou tiute i le faatuatua. O nisi taimi e manaomia ona i ai sa tatou vaaiga mamao sili atu o mea e mafai ona fai.

Sa ou feiloai talu ai nei i se uso i Mekisiko e malamalama i le uiga o le faalauteleina o lona valaauga i le faatuatua. Sa valaauna Marfissa Maldonado e aoao se vasega a le autalavou i le Aoga Sa i le tolu tausaga talu ai. E toa 7 tamaiti na auai ina ua valaa o ia, ae o le taimi nei ua 20 tamaiti ua auai soo. Sa ou fesili atu ia te ia, ma le maofa, po o le a se mea na ia faia na aumai ai se faatelega faapea. Sa ia fai mai ma le lotomaualalo, "Oi, sa le na o a'u. Sa fesoasoani uma tagata o le vasega." Sa latou tagai faatasi i igoa o tagata lē toaaga i luga o le tauvalaauga ma amata ona ō atu faatasi ma valaulia i latou ia foi mai i le lotu. Sa i ai foi se latou papatisoga ona o a latou taumafaiga.

Sa settina e Sister Maldonado se saite faaagafesootai mo tagata o lana vasega ua ta'ua o le "I Am a Child of God," ma ua ia tusia ai ni mafauauga musuia ma ni mau i le tele o taimi o le vaiaso. Na te tesu soo lava i ana tamaiti aoga o fai ni tofiga ma faamalosiau i ai.

Na te lagonaina e taua le fesootai pea i ala sili latou te talanoa ai, ma o loo aoga. Sa ia ta'u maia ia te a'u, "Ou te alofa i a'u tamaiti aoga." Sa mafai ona ou lagonaina lena alofa a o ia ta'u maia a latou taumafaiga, ma sa faamanatu mai e ana faataitaiga ia te a'u le mea e mafai ona ausia e se tagata o le faatuatua ma faatinoga i lenei galuega faatasi ai ma le fesoasoaniga a le Alii.

O loo fetaiai a tatou talavou ma ni fesili faigata i aso taitasi, ma e toatele i tatou e i ai nisi o ē pele o loo tauivi e su'e ni tali. O le tala fiafia e faapea o loo *i ai* ni tali i fesili o loo fesiliginaina. Faafogoga i savali talu ai nei mai i o tatou taitai. Ua uunaia i tatou ia suesue ma malamalama i le fuafuaga o le fiafia a lo tatou Tama Faalelagi. Ua faamanatu mai ia i tatou mataupu faavae i le folafolaga i le aiga.<sup>12</sup> Ua uunaia i tatou ia aoao atu ma faaaoga nei punaoa e fai ma ālāfua e faatumau ai i tatou i luga o le ala lauitiiti ma le vaapiapi.

Pe tusa ma se tausaga talu ai, sa ou asia ai se tina e laiti lana fanau o le na filifili e faia se auala mataalia e puipuia ai lana fanau mai le tele o faatosinaga le lelei ua latou vaai ai i luga o le initoneti faapena ma le a'oga. Na te filifilia se autu i vaiaso taitasi, o se autu e tele na faagaepu ai le tele o talanoaga i luga o le initoneti, ma ia faamatuā'ia ni talanoaga anoa i le aluga o le vaiaso pe a mafai ona fai e lana fanau ni fesili ma mafai ona ia faamautinoa latou te mauaina vaaiga paleni ma talafeagai i faafitauli e tele ina faigata. O loo ia faia lona fale o se nofoaga saogalemu e fai ai ni fesili ma maua ai ni aoaoga anoa o le talalelei.

Ou te popole lava o loo tatou ola i ni siosiomaga faapena o le aloese mai solitulafono lea i nisi taimi, ua tatou aloese atoa ai mai le aoaoina atu o mataupu faavae sa'o. Ua tatou toilalo i le aoaoina o a tatou tamaitai talavou i le taua tele o le sauniaina e avea ma se tina ona ua tatou le mananao ina ia faatiga i latou e le o faaipoipo, i latou e le o mafai ona fai ni fanau, po o le tagai i ai o ni filifilia tapulaa i le lumanai. I se isi itu, e mafai foi ona tatou toilalo e faamamafa le taua o le a'oga ona tatou te le mananao e avatu se savali e faapea e sili atu lona taua i lo le faaipoipoga.

Tatou te aloese mai le folafola atu o le faaipoipoga ua faauigaina e lo tatou Tama Faalelagi e na o le va lava o le tane ma le fafine ona tatou te le mananao e faatiga ia i latou e tosina atu i le itupa e tasi. Ma atonu tatou te le maua le toafimalie e talanoaina ai faafitauli tau itupa po o feusuaiga mama.

Ia mautinoa, uso e, e manaomia ona tatounofouta, ae ia tatou faaaogaina foi le atamai ma lo tatou malamalama e uiga i le ata o le faaolataga ina ia maoti ma tuusao pe a oo i le taimi e aoao atu ai a tatou fanau ma le autalavou i mataupu faavae taua o le talalelei e tatau ona latou malamalama i ai e feoai ai i le lalolagi o loo latou ola ai. Afai tatou te le aoaoina a tatou fanau ma le autalavou i aoaoga faavae moni—ma aoao atu ma le manino—o le a aoao atu e le lalolagi ia i latou pepelo a Satani.

Ou te fiafia i le talalelei a Iesu Keriso, ma e faavavau lo'u faafetai mo le taitaiga, mana, ma fesoasoaniga i aso taitasi ou te maua o se afafine o le feagaiga a le Atua. Ou te molimau atu o loo faamanuiaina i tatou e le Alii, o ni tamaitai o loo ola i nei aso faigata, faatasi ai ma le mana uma, meaalofo, ma le malosi o loo manaomiaina e mafai ai ona fesoasoani e saunia le lalolagi mo le Toe Afio Mai Faalua o le Alii o Iesu Keriso. Ou te tatalo ina ia tatou vaaia uma lo tatou gafatia moni ma tutula'i a'e ia avea ma tamaitai o le faatuatua ma le lototeli e finagalo lo tatou Tama o i le Lagi e avea ai i tatou. I le suafa o Iesu Keriso, amene. ■

#### FAAMATALAGA

1. Tagai "Rise Up, O Men of God," *Hymns*, no. 324.
2. 2 Timoteo 3:1.
3. Mamona 8:39; tagai foi i fuaiupu 26–38.
4. Mamona 8:38.
5. Iosefa Samita—Mataio 1:22.
6. Gary E. Stevenson, "O Upumoni Manino ma Taua," *Liahona*, Nov. 2015, 92.
7. Russell M. Nelson, "O Se Talosaga i O'u Tuafafine," *Liahona*, Nov. 2015, 97.
8. Sheri Dew, *Women and the Priesthood: What One Mormon Woman Believes* (2013), 163.
9. Tagai *Tagai o Afafine i Lo'u Malo: O Le Talafaaasolopito ma le Galuega a le Aualofa* (2011), 7.
10. Tagai Mataupu Faavae ma Feagaiga 84:20.
11. Tagai Mataupu Faavae ma Feagaiga 109:22.
12. Tagai i le "O Le Aiga: O Se Folafolaga i le Lalolagi," *Liahona*, Nov. 2010, 129.



Saunia e Peresitene Dieter F. Uchtdorf

Fesoasoani Lua i le Au Peresitene Sili

## Fogafale Fa, Faitotoa Mulimuli

*E "tauia e le Atua i latou e saili atu ma le naunautai ia te la," o lea ia tu'itu'i ai pea. Tuafafine, aua le fiu. Saili atu i le Atua ma lou loto atoa.*

**O**u tuafafine pele, au uo pele, ua faamanuiaina lava i tatou e toe potopoto foi i lenei konafesi i le lalolagi atoa i lalo o le taitaiga ma le faamalumaluga a lo tatou perofeta pele, Peresitene Thomas S. Monson. Peresitene, matou te alolofa ia te oe ma lagolagoina oe! Matou te iloa e te alofa i tuafafine o le Ekalesia.

Ou te fiafia lava e auai i lenei sau-niga matagofie o le konafesi aoao ua patino lava mo tuafafine o le Ekalesia.

Tuafafine, a ou vaai ia te outou, e le mataofiofia lo'u mafaufau i tamaitai na matua faatosinaina lo'u olaga: lo'u tinamatua ma lo'u tina, o e na muamua taliaina le valaaulia ia o mai ma vaavaai i le uiga moni o le Ekalesia.<sup>1</sup> O loo i ai la'u manamea pele, o Harriet, o le na ou alofa faamama'i i ai i le taimi muamua na ou vaai ai ia te ia. O loo i ai le tina o Harriet, o le na auai i le Ekalesia ae lei leva ona maliu si ona toalua i le kanesa. Ona oo mai lea i lo'u tuafafine,



lo'u afafine, le afafine o lo'u atalii, ma le afafine o le atalii o lo'u afafine—o nei tagata uma ua i ai ni faatosinaga lelei tele mo a'u. Latou te aumai moni lava le lasusulu i lo'u olaga. Latou te uunaia a'u ia avea ma se tagata lelei atu ma se taitai o le Ekalesia e sili atu ona nofouta i isi. Semanu e ese so'u olaga pe a na le seanoa ma i latou!

Masalo o le mea e sili ona faa-maualalo ai a'u o le iloaina lea o le faatosinaga lava e tasi e faamilliona ona fai soo i le Ekalesia atoa e ala i tomai, taleni, atamai, ma le molimau a tamaitai o le faatuatua e pei o outou.

Ia, o nisi o outou atonu e lagonaina le le agavaa i le matua viia faapea. Atonu e te manatu e te le taua tele i le faia o se faatosinaga anoa i isi. Masalo e te le o manatu ia te oe lava ia o se "tamaitai o le faatuatua" ona o nisi taimi e te tauivi ma le masalosalo po o le fefe.

O le asō, ou te fia talanoa atu ai i soo se tasi o loo lagonaina sea lagona faapea—ma atonu e aafia uma ai tatou i nisi taimi. Ou te fia talanoa atu i le faatuatua—o le a le faatuatua, o le a se mea e mafai ma lē mafai ona ia faia, ma o le a se mea e tatau ona tatou faia e faaola ai le mana o le faatuatua i o tatou olaga.

#### O Le A Le Faatuatua

O le faatuatua o se talitonuga mau-maututu malosi e uiga i se mea tatou te talitonu i ai—o se talitonuga maumau-tutu e matuai malosi lava lea e uunaia i tatou e fai ni mea ia e ono le mafai ona tatou faia. "O le faatuatua o le faalago-lago lea i mea ua faamoemoe i ai, o le mautinoa lea o mea e le o vaaia."<sup>2</sup>

E ui e sa'o lenei mea i tagata talitonu, ae tele ina fenumiai ai le au le talitonu. E lulu o latou ulu ma fesili, "E mafai faapefea e se tasi ona mautinoa i mea latou te le mafafai ona vāai i ai?" Ia i latou, o se faamaoniga lenei o le faavalevalea o tapuwaiga.

Ae o le mea latou te le o malama-lama i ai, o loo tele atu isi auala e vaai ai nai lo o tatou lava mata, tele atu auala e lagona ai nai lo o tatou lava lima, tele atu auala e faalogo ai nai lo o tatou lava taliga.



E tai pei o le aafiaga o se teineitiiti sa ō e savavali ma lona tinamatua. Sa matua mamalu pesega a manulele i le teineitiiti, ma sa ia faailoa atu leo uma i lona tinamatua.

"O e faalogo atu i le leo le la?" sa fesili atu ai pea lava pea le teineitiiti. Ae sa le lelei le faalogo a lona tinamatua ma sa le mafai ai ona ia lagonaina ia leo.

Mulimuli ane, sa tootuli ifo ai tinamatua ma fai atu, "Faamalie atu, la'u pele. E le lelei le faalogo a tinamatua."

Sa tau le fiafia le teineitiiti ma tago atu i foliga o lona tinamatua, pulato'a i ai ma le naunautai i ona mata, ma fai i ai, "Tinamatua, faalogo atili!"

O loo i ai lesona i lenei tala mo ē uma e le talitonu ma ē foi e talitonu. E le faapea ua le mafai ona tatou faalogoina se mea ona faapea ai lea e le o i ai se mea e faalogo i ai. E mafai ona faalogo ni tagata se toalua i le savali lava e tasi pe faitau i le fuaiupu lava e tasi o se mau, ma e mafai ona lagona e le tasi le molimau a le Agaga, ae le lagonaia e le isi.

I se isi itu, i a tatou taumafaiga ia fesoasoani i e pele ia i tatou ia lagonaia le siufogoga o le Agaga atoa ai ma le matagofie tele, faavavau ma le loloto o le talalelei a Iesu Keriso, o le ta'u atu ia i latou ia "faalogo atili" atonu e le o le ala sili lea ona aoga.

Masalo o se fautuaga lelei atu—mo soo se tasi e fia manao e faateleina le faatuatua—o le faalogo lea i se auala e ese ai. O loo uunaia i tatou e le Apo-setolo o Paulo ia saili atu i le siufogoga o loo fetalai mai i o tatou agaga ae le na o o tatou taliga. Sa ia aoao mai, "E le talia e le tagata faaletino o mea a le Agaga o le Atua; aua o mea valea ia ia te ia, na te le mafai foi ona iloa, aua e faamasinoina faaleagaga."<sup>3</sup> Pe tatau foi ona tatou mafaufau i upu a le tusi a Saint-Exupéry, le Little Prince, lea na fai mai: "E na o le loto e manino ai le vaaia a se tasi. Soo se mea taua lava o le a le vaaia e mata."<sup>4</sup>

#### O Le Mana ma Tapulaa o le Faatuatua

O nisi taimi e le faigofie le atiaeina o le faatuatua i mea faaleagaga a o ola ai i se lalolagi faaletino. Ae e tauia ia taumafaiga, ona o le mana o le faatuatua i o tatou olaga e mafai ona matua loloto lava. Ua aoao i tatou e tusitusiga paia e faapea o le faatuatua na foafoa ai le lalolagi, na vaevae ai vai, faatutu ai e na oti, na aveesea ai mauga ma vaitafe mai o latou ala.<sup>5</sup>

Ae e ono fesili nisi, "Afafai e matua mamana tele le faatuatua, aisea e le mafai ai ona ou mauaina se tali i se tatalo faamaoni? Ou te le manaomia se sami e vaeluaina, po o se mauga ia aveese. Na o lo'u ma'i lava ou te

manaomia ia aveesea pe, ia faamagalo e o'u matua le tasi ma le isi, po o se soa e faavavau e tu mai i lo'u faitotoa ma se teufugalaau i le tasi lima ma se mama faamau i le isi lima. Aisea e le mafai ai e lo'u faatuatua ona faia *lena mea*?"

O le faatuatua e mamana tele, ma e tele lava ina tupu ai vavega. Ae po o le a lava le tele o lo tatou faatuatua, e luga mea e le mafai e le faatuatua ona fai. Mo le tasi, e le mafai ona ia aiāina le fatalia o se tagata.

Sa tatalo le tasi fafine mo le tele o tausaga ina ia toefoi mai lana tama teine sa se ese mai le lafu a Keriso ma lagona ai le lotovaivai e faapea ua le taliina ana tatalo. Sa atili ai le tiga ina ua ia faalogo i tala o isi fanau faa-maumau oa ua toe salamo i o latou ala sese.

O le faafitaui e le o le le lava o tatalo po o se leai o se faatuatua. Sa na o le pau le mea na manaomia ona ia malamalama i ai e faapea, e ui e ono tiga matuitui foi mo lo tatou Tama o i le Lagi, ae o le a Ia le fosia lava se tasi e filifili le ala o le amiontonu. Sa lei fosia e le Atua Lana lava fanau e mulimuli ia te Ia i le muai olaga. E mautinoa lava o le a Ia le fosia lava i tatou i le taimi nei a o tatou faimalaga ai i lenei olaga faaletino.

O le a valaaulia e le Atua, ma faatauanau. O le a aapa mai pea le Atua ma le le faavaivai ma le alofa ma musumusuga ma faamlosiauga. Ae o le a le fosia lava e le Atua—o le a faatoilaloina ai e lena mea Lana fuafuaga sili mo lo tatou tuputupu ae e faavavau.

O le mea lona lua e le mafai ona faia e le faatuatua o le fosi lea o o tatou loto i le finagalo o le Atua. E le mafai ona tatou fosia le Atua ia lolo mai i o tatou manaoga—e tusa lava pe sa'o o tatou manatu po o le faamaoni foi o a tatou tatalo. Mafaufau i le aafiaga o Paulo, lea na tele taimi na aioi atu ai i le Alii mo se toomaga mai se tofotofoga faaletagata lava ia—lea na ia ta'ua o "le mea matuitui i le tino." Ae e le o se finagalo lena o le Atua. Mulimuli ane sa iloa e Paulo o lona tofotofoga o se faamanuiaga, ma sa ia faafetai atu i le Atua mo le le taliina o ana tatalo i le auala sa ia faamoemoe ai.<sup>6</sup>

### Faalagolago ma le Faatuatua

Leai, o le faamoemoega o le faatuatua e le o le *sua* o le finagalo o le Atua ae ia faamanaina i tatou ia *faatino* le finagalo o le Atua. O le faatuatua o le faalagolago—faalagolago e silafia e le Atua mea e le mafai ona tatou vaiaia ma Na te silafia mea tatou te le iloaina.<sup>7</sup> O nisi taimi, o le faalagolago i la tatou lava vaai ma faiuga ua le lava lea.

Sa ou aoaoina lenei mea a o avea ma se pailate vaalele, i aso pe a ou lele atu i ao mafafia po o puao ma na o ni nai futu i luma atu sa mafai ona iloa atu. Sa ao ona ou faalagolago i meafaigaluega na ta'u maia ia te a'u po o fea o ou i ai ma le mea sa ou agai atu i ai. Sa ao ona ou faalogo i le leo o masini faatonutonu o le ea. Sa ao ona ou mulimuli i le taitaiga a se tasi e sili atu ona maoti ana faamatalaga nai lo au. O se tasi na le mafai ona ou vaaia ae sa ou aoao ia faalagolago i ai. O se tasi na mafai ona vaaia mea sa le mafai ona ou vaaia. Sa ao ona ou faalagolago ma faatino ma le tatau ina ia taunu ai ma le saogalemu i lo'u taunuuga.

O le faatuatua o lona uiga e le gata tatou te faalagolago i le poto o le Atua ae faapena foi i Lona alofa. O lona uiga o le faalagolago lea i le Atua e alofa ma le atoatoa ia i tatou, o mea uma Na te faia—o faamanuiaga uma Na te foai mai ma faamanuiaga uma Na te taofia mo se taimi—e mo lo tatou fiafia e faavavau.<sup>8</sup>

Faatasi ai ma lenei ituaiga o faatuatua, e ui atonu tatou te le malamalama i le mafuaaga e tutupu ai ni mea patino po o le mafuaaga e le taliina ai ni fesili patino, ae mafai lava ona tatou iloa i le taimi mulimuli o le a malamalama mea uma. "E galue . . . mea uma lava mo le lelei faatasi ma i latou o e ua alolofa [i le Atua]."<sup>9</sup>

O le a tonu mea uma. O le a lelei mea uma.

E mafai ona tatou mautinoa o le a oo mai tali, ma e mafai ona tatou talitonuina e le gata o le a faamalieina i tatou i tali, ae o le a faagaeetina foi i tatou i le alofa tunoa, alofa mutimutivale, agaalofa, ma le alofa

o lo tatou Tama Faalelagi mo i tatou, o Lana fanau.

### Ia Tu'itu'i Pea

Seia oo i lena taimi, tatou te savavali pea i soo se faatuatua ua ia i tatou,<sup>10</sup> ma saili pea i taimi uma ia faateleina lo tatou faatuatua. O nisi taimi, e le o se sailiga faigofie lenei mea. O i latou e lē onosai, e lē tuuto, pe lē faaeteete e ono iloaina e faigata ona maua le faatuatua. O i latou e vave ona faalotovaivaia pe faalavelaveina e faigata ona lagonaina. O le faatuatua e oo mai i ē lotomaua-lalo, filiga, ma tumau.

E oo mai ia i latou e totogia le tau o le faatuatua.

O lenei upumoni ua faaalia i le aafiaga o ni faifeautalai talavou se toalua na auauna atu i se eria sa toalaiti lava ni papatisoga liliu mai. Ou te manatu e ono malamalama mo i laua le mafaufau o le mea sa la faia o le a le faia ai se eseesega tele.

Ae o nei faifeautalai e toalua sa i ai le *faatuatua*, ma sa tuuto atu. Sa ia i laua le uiga e faapea afai e leai se tasi e faalogo i le la savali, o le a le mafua ona sa la le'i faia se taumafaiga sili la te mafaia.

I se tasi aso, na tonu ai ia i laua e o atu i tagata o loo nonono i se fale mautotogi fogafale fa manaia lava. Sa



O le fale mautotogi i Siamani lea na tuitui ai ni faifeautalai faamaoni se toalua i faitotoa uma.

la amata i le fogafale muamua ma sa tu'itu'i i faitotoa taitasi, ma tuu atu i ai le savali lavea'i a Iesu Keriso ma le Toefuataiga o Lana Ekalesia.

Sa leai ma se tasi i le fogafale muamua na faalogo ia i laau.

Sa faigofie lava le faapea mai, "Sa ta taumafai. Ta faamuta ai loa ii. Ta ò ia e faataitai se isi fale."

Ae o nei faifeautalai e toalua sa i ai le *faatuatua* ma sa naunau e *galulue*, ma o lea sa la tu'itu'i ai i faitotoa uma i le fogafale lua.

Sa faapena foi, na leai se tasi na faalogo.

Sa faapena foi ma le fogafale tolu. Ma sa faapena foi ma le lona fa—seia oo ina la tu'itu'i i le faitotoa mulimuli i le fogafale fa.

Ina ua matale mai lena faitotoa, sa ataata mai se teineitiit ia i laau ma fai mai ia i laau e faatali ae se'i talanoa atu i lona tina.

Sa na o le 36 tausaga o lona tina i lona taimi, ae faato'a maliu atu lava lana tane, ma sa leai ma sona fia talanoa i ni faifeautalai Mamona. Ae sa ia fai atu i lana tama teine e tutuli ese i laau.

Pe se aioi atu pea i ai lana tama. O le lelei ia o nai alii talavou ia, o lana tala lea. Ma e na o ni nai minute lava e alu ai.

Sa malie i ai le tina ma le musuā. Sa tuu atu e faifeautalai le la savali ma tauao atu i ai se tusi i le tina e fiaitau—le Tusi a Mamona.

Ina ua la o ese, sa tonu i le tina o le a ia fiaitau na o ni nai itulau.

Sa ia faaumaina le tusi atoa i totonu i ni nai aso.



O Sister Harriet Uchtdorf (ogatotonu) ao teineitiit laitiiti ma lona tina, lona uso, ma faifeautalai faamisiona.

Sa lei pine, ae ulu atu lenei aiga ma le tina nofotoatasi i vai o le papatisoga.

Ina ua auai lea aiga toalaiti i lo latou paranesi i Frankfurt, Siamani, sa matauina e se tiakono talavou le lalelei o se tasi o ana tama teine ma manatu ifo ia te ia, "O loo faia e nei faifeautalai se galuega maoae!"

O le igoa o le tiakono talavou lea o Dieter Uchtdorf. Ma o le tamaitai talavou lalelei—lea na aioi atu i lona tina ia faalogo i faifeautalai—o lona igoa matagofie o Harriet. E alofagia o ia e tagata uma latou te feiloai a o ia faafeoina au i au malaga. Ua ia faamanuiaina ia olaga o le toatele o tagata e ala i lona alofa mo le talalelei ma ona uiga tausaafia. O ia moni lava o le lasusulu i lo'u olaga.

Ua faafia ona ou siitia lo'u loto i le faafetai mo faifeautalai e toalua sa le'i taofi i le faitotoa muamua! Ua faatele lo'u agaga faafetai mo lo la *faatuatua* ma *galuega*. Ua faatele ona ou faafetai i lo la faaauau pea—ma oo atu ai i le fogafale fa, ma le faitotoa mulimuli.

#### O Le A Tatala atu ia te Outou

I la tatou sailiga mo le faatuatua tumau, i la tatou sailiga ia fesoottai atu i le Atua ma Ona faamoemoega, ia tatou manatua le folafolaga a le Alii: "Tu'itu'i atu, ona [tatalaina] ai lea ia te outou."<sup>11</sup>

Pe o le a tatou fiu ea pe a uma ona tu'itu'i i se faitotoa se tasi pe lua? Se fogafale se tasi pe lua?

Pe o le a tatou saili pea seia oo ina tatou tau atu i le fogafale fa, le faitotoa mulimuli?

O le Atua "na te tauia mai o e matuā saili ia te ia,"<sup>12</sup> ae o lena taui e le



O loo malaga faatasi Sister Uchtdorf ma Peresitene Uchtdorf i ana femalagaaiga ma faamanuiaina ai olaga a o faasoaa atu lona alofa mo le talalelei.

masani ona maua i tua atu o le faitotoa muamua. O lea ia tatou tu'itu'i ai pea. Tuafafine, aua le fiu. Saili atu i le Atua ma lou loto atoa. Faatino le faatuatua. Savali i le amiontonu.

Ou te folafola atu afai o le a e faia lenei mea—seia oo atu i le fogafale fa, i le faitotoa mulimuli—o le a e mauaina ia tali o loo e sailia. O le a e mauaina le faatuatua. Ma o le a i ai se aso o le a faatumulua ai oe i le malamalamala e tuputupu "susulu . . . tele pea lava pea seja oo i le aso e atoatoa ai."<sup>13</sup>

Ou tuafafine pele ia Keriso, e moni le Atua.

O loo soifua o Ia.

E alofa o Ia ia te oe.

E silafia e Ia oe.

E malamalamala o Ia ia te oe.

E silafia e Ia aioiga leleoia o lou loto.

Na te le i tuulafoaia lava oe.

O le a Ia le lafoai ese lava oe.

O la'u molimau ma le faamanuiaaga faaaposepolo lea ia te outou taitoatasi ina ia outou lagona i o outou loto ma le mafaufau lenei upumoni paia mo outou lava. Ola i le faatuatua, uo pele, tuafafine pele, ma "[o le a] atili faatoateleina outou e le Alii [lo tatou] Atua ia faatoafeina, ma ia manua outou e pei ona fetalai mai o ia ia te outou!"<sup>14</sup>

Ou te tuua ia te outou lo'u faatuatua, lo'u talitonuga maumaututu, ma la'u molimau mautinoia ma le le maluelue o le galuega lenei a le Atua. I le suafa paia o lo tatou Faaola pele, i le suafa o Iesu Keriso, amene. ■

#### FAAMATALAGA

1. 14 Dieter F. Uchtdorf Uchtdorf, "O Le Avanoa e Molimau Atu Ai," *Liahona*, Nov. 2004, 74; *Sister Eternal* (2005).

2. Eperu 11:1, New International Version (1984).

3. 1 Korinito 2:14, New International Version (2011).

4. Antoine de Saint-Exupéry, *The Little Prince*, trans. Richard Howard (2000), 63.

5. Tagai Eperu 11:3, 5, 29, 35; Eteru 12:30; Mose 7:13.

6. Tagai 2 Korinito 12:7–10.

7. Tagai Isaia 55:8–9.

8. Tagai 2 Nifae 26:24.

9. Tagai Roma 8:28.

10. Tagai 2 Korinito 5:7.

11. Mataio 7:7.

12. Eperu 11:6, New International Version (1984).

13. Mataupu Faavae ma Feagaiga 50:24.

14. Teuteronomi 1:11, New International Version (2011).



Saunia e Peresitene Dieter F. Uchtdorf

Fesoasoani Lua i le Au Peresitene Sili

# E, Le Silisilise Na'uā o le Fuafuaga a lo Tatou Atua!

O loo siomia i tatou e se tamaoaiga ofoofogia tele o le malamalama ma le upumoni lea ou te tomanatu ai pe o tatou talisapaiaaina moni ea mea ua tatou maua.

**U**a faamanuiaina lava i tatou e toe potopoto foi i lenei konafesi i le lalolagi atoa i lalo o le taitaiga ma le faamalumaluga a lo tatou perofeta pele, Peresitene Thomas S. Monson. Peresitene, matou te alolofa ia te oe ma lagolagoina oe ma o matou loto atoa!

I le taimi o lo'u olaga faigaluega o se pailate, sa ou faalagolago tele ai i le maoti ma le faatuauaina o masini komepiuta ae sa seāseā ou iloa faaaoga la'u lava ia komepiuta patino. I la'u galuega faaofisa o se pule sili, sa i ai ni alii ofisa lagolago ma ni failautusi sa fesoasoani ma le agalelei ia te au i galuega.

Sa suia nei mea uma i le 1994, ina ua valaauna a'u o se Pulega Aoao. Sa i ai i lo'u valaauga le tele o avanoa ofoofogia e auauna atu ai, ae sa aofia ai foi ma se vaega tele o galuega faaosiga a le Ekalesia—e sili atu nai lo mea na ou mafaufau e mafai ona fai.

Sa faateia a'u, ona o le meafaigaluga autu e faatumauina ai le lelei o la'u galuega, o se komepiuta patino.

Mo le taimi muamua lava i lo'u olaga, sa ao ona ou faamasani i lenei lalolagi ese, lavelave ma fenumiai.

Sa matua faigata tele ia te a'u e pei o se pa piliki.

Sa tele se taimi na alu ai, o le fai soo, onosai; tele se faamoemoe ma se faatuatua; le tele o faamautinoaga mai si o'u toalua; ma le tele o apa inu o le a ou le ta'u atua igoa.

Ia, i le 22 tausaga mulimuli ane, ua siomia a'u i tekinolosi faakomepiuta. Ua i ai sa'u tuatusi imeli, se itulau Twitter ma se itulau Facebook. E i ai sa'u telefoni poto, se tapeleti, komepiuta feaveai, ma se meapueata otometi. Ma, e ui atonu e le i oo o'u tomai faatekinolosi i tomai o se tamaitiiti masani e fitu tausaga, mo se toeaina fitusefulu tausaga, ae lea e seki a a'u.

Ae ua ou matauina se mea mata'ina. O le faateleina lava o o'u tomai faatekinolosi, o le faateleina foi lena o lo'u manatu faatauvaa i ai.

Mo le tele o le talafaasolopito o le tagata soifua, o fesootaiga sa tupu i le saoasaoa o solofanua. O le auina atua o se feau ma le mauaina o se tali sa mafai ona alu ai ni aso po o ni masina foi. O aso nei o a tatou feau e faitau afe maila e oo i ai i le lagī po o le faitau afe o mita i lalo o le vasa e oo atu ai i se tagata i le isi itu o le lalolagi, ma afai e i ai se tuai i ni nai sekone, tatou te lē fiafia ma lē onosai.

E foliga mai o le natura lea faaletaga: a o tatou faasolo ina masani atili i se mea, e oo lava i se mea faavavega ma ofoofogia, tatou te le mauaina so tatou lagona maofa ma taulima ai o se mea masani.





### Pe o Tatou Manatu Faatauvaa ea i Upumoni Faaleagaga?

O le manatu faatauvaa i teki-nolosi faaonapo nei ma le faigofie o le mauaina atonu o se mea faatauvaa. Ae, o le mea e faanoanoa ai, o nisi taimi i faapena ai o tatou uiga i aoaoga faavae e faavavau o le talalelei a Iesu Keriso e faalautele ai lo tatou malamalama. I le Ekalesia a Iesu Keriso, ua tele mea ua aumai ia i tatou. O loo siomia i tatou e se tamaoaiga ofoofogia tele o le malamalama ma le upumoni lea ou te tomanatu ai pe o tatou talisapaiaina moni ea mea ua tatou maua.

Mafaufau i na uluai soo o ē na savavali ma talanoa faatasi ma le Faaola i le taimi o Lana galuega faalealolagi. Mafaufau i le lotofaafetai ma le migao atonu na lōfia ai o latou loto ma faatumulia ai o latou mafaufau ina ua latou vaaia o Ia ua toetu mai le tuugamau, ina ua latou fetagofi atu i

manu'a i Ona aao. O le a le toe tutusa lava o latou olaga!

Mafaufau i uluai Au Paia o lenei tisipenisione na iloaina le Perofeta o Iosefa Samita ma faalogo ia te ia o tala'i atu le talalelei toefuataiina. Mafaufau pe na faape'i o latou lagona i le iloaina ua toe matale le veli i le va o le lagi ma le lalolagi, ma susulu mai ai le malamalama ma le poto i luga o le lalolagi mai lo tatou aiga faaselesitila i luga.

Ae o le mea sili o mea uma, mafaufau po o le a sou lagona i le taimi muamua na e talitonu ai ma malamalama o oe moni o se atalii [po o se afafine] o le Atua; ma na puapuaga ma le loto i ai Iesu Keriso mo *au* agasala ina ia mafai ona e toe mama; o le mana o le perisitua e moni ma e mafai ona faamau ai oe i ē pele ia te oe mo le olaga nei ma le faavavau atoa; ma o loo i ai se perofeta soifua i le lalolagi i aso nei. E le matagofie ma ofoofogia ea lena mea?

I le mafaufau ai i nei mea uma, e mafai faapefea la e i tatou mai tagata uma, ona le fafia e auai i a tatou sau-niga Faale-Ekalesia e tapuai ai? Pe ua lē lavāvā foi faitau ia tusitusiga paia? Ou te manatu na o le pau le auala e mafai ai [ona tupu ai lena meal] pe afai lena e *le toe lagonaina* e o tatou loto se loto faafetai ma le maofa mo meaalofa paia ma ofoofogia ua foai mai e le Atua ia i tatou. Ua faigofie ona tatou vaaia ma mauaina upumoni e suia ai olaga, ae o nisi taimi tatou te savavali ma tulemomoe i luga o le ala o le avea ma soo. E tele lava ina tatou faatagaina i tatou lava ia faalavelaveina i uiga le atoatoa o o tatou uso a tagata nai lo le mulimuli i faataitaiga a lo tatou Matai. O loo tatou ola i se olaga e tumu i avanova ofoofogia ae e tele lava ina tatou le iloaina lo latou taua tele.

### O Se Savali Masani

A o avea a'u ma se alii talavou, e fesili mai a'u uo ia te a'u e uiga i la'u lotu. E tele ina ou amata i le faamatalaina o eseesege, e pei o le Upu o le Poto. O isi taimi ou te faamamafaina ai tulaga e tutusa ai ma isi lotu Kerisiano. E leai ma se mea o nei mea e faafiafiaina tele ai i latou. Ae a ou talanoa e uiga i le fuafuaga sili o le fafia a lo tatou Tama i le Lagi mo i tatou o Ana fanau, e gauai mai i latou ia te a'u.

Ou te manatua lo'u taumafai ai e tusi le ata o le faaolataga i luga o se laupapa i se potuaoga o le matou falesa i Frankfurt, Siamani. Sa ou faia ni li'o na fai ma faatusa o le muai olaga, olaga faaletino, ma le toefoi atu i o tatou Matua Faalelagi pe a mavae lenei olaga.

A o ou talavou, oka so'u fafia e faasoa atu lenei savali fafia. A ou faamalamalama atua nei mataupu faavae i a'u lava ia upu faigofie, e taumasusua lo'u loto i le agaga faafetai mo se Atua e alofa i Lana fanau, ma se Faaola na togiolaina i tatou uma mai le oti ma seoli. Sa ou mitamita lava i lenei savali o le alofa, olioli, ma le faamoemoe.

Sa fai mai nisi o a'u uo na lagonaina le masani i lenei savali, e ui lava o ia mea sa lei aoaoina lava i a latou aoaoga faalelotu. Sa peisea'i na latou iloaina lava i taimi uma le moni o nei mea, e

peisea'i sa na ona ou faasusulu atu o se malamalama i se mea ua leva ona mauaa i o latou loto.

#### Ua la I Tatou Tali!

Ou te talitonu o loo tauaveina e tagata soifua uma i o latou loto se ituaiga o fesili autu e faatatau i le olaga lava ia. O fea na ou sau ai? Aisea ua ou i ai iinei? O le a le mea o le a tupu pe a ou ot?

O nei ituaiga o fesili ua fesiligia pea e tagata soifua talu mai le amataga o taimi. Ua faaluina e le au fafilosofia, sikola, ma tagata atamamai o latou olaga ma tamaoaiga e saili ai mo tali.

Ou te faafetai lava ua i ai i le talalelei toefuataiina a Iesu Keriso ia tali i fesili ona faigata o le olaga. O nei taili o loo aoaoina i totonus o Le Ekalesia a Iesu Keriso o le Au Paia o Aso e Gata Ai. E moni, manino, tuusa'o, ma faigoifie ona malamalama i ai. E musuia, ma e tatou te aoao atua i a tatou fanau tai tolu tausaga i le vasega o le Aveolela.

Uso e ma tuafafine, o i tatou o tagata e faavavau, e aunoa ma le amataga ma le gataaga. Sa tatou i ai lava i le amataga.<sup>1</sup> O i tatou o fanau agaga moni lava a ni Matua Faalelagi paia, tino ola pea, ma silisliese!

Ua tatou o mai mai maota faalelagi o le Alii lo tatou Atua. O i tatou o le aiga tautupu o Elohimia, le Atua Silisili Ese. Sa tatou savavali faatasi ma Ia i lo tatou muai olaga. Sa tatou faalogo o fetalai o Ia, molimauna Lona mamalu, ma aoaoina Ona ala.

Sa tatou auai i se Fono Tele lea na tuu mai ai e lo tatou Tama Pele Lona fuafuaga mo i tatou—o le a tatou o mai i le lalolagi, maua ni tino faaletino, aoao ia filifili i le va o lelei ma le leaga, ma alualu i luma i ni auala ia e le mafai ona faia i se isi lava ala.

Sa tatou iloaina lava a tatou pasia le veli ma ulufale mai i lenei olaga faaletino, o le a tatou le toe manatua-inia loa le olaga muamua. O le a i ai le faafeagai ma faigata ma faaososoga. Ae sa tatou iloaina foi o le mauaina o se tino faitino sa matua sili ona taua mo i tatou. Sa tatou faamoemoe o le a vave ona tatou aoao ia faia filifiliga sa'o, tetee atu i faaososoga a Satani,

ma mulimuli ane ai toefoi atu i o tatou Matua pele i le Lagi.

Sa tatou iloaina o le a tatou agasala ma faia ni mea sese—masalo e oo lava i ni agasala ogaoga. Ae sa tatou iloaina foi sa aioi lo tatou Faaola, o Iesu Keriso e afio mai i le lalolagi, soifua o se tagata lē agasala, ma ofofua mai Lona soifua i se taulaga e faavavau. Sa tatou iloaina a gauai atu o tatou loto ia te Ia, faalagolago ia te Ia, ma tauivi ma le malosi atoa o tatou agaga e savavali i le ala o le avea ma soo, o le a mafai ona faamamaina i tatou ma toe ulufale atu ai i le afioaga o lo tatou Tama pele o i le Lagi.

O lea, faatasi ai ma le faatuatua i le taulaga a Iesu Keriso, na tatou taliaina ai e ala i lo tatou loto fuatiaifo, le fuafuaga a le Tama Faalelagi.

O le mafuaaga lena ua tatou i ai iinei i lenei paneta matagofie o le lalolagi—ona na ofo mai e le Atua ia i tatou le avanoa, ma sa tatou filifili ai e taliaina. Peitai, o lo tatou olaga faaletino, ua na o se tulaga le tumau, ma o le a faamutaina i le oti o o tatou tino faaletino. Ae o le ute o le ituaiga tonu o tagata e i ai oe ma a'u o le a le faaumatiaina. O le a ola pea o tatou agaga ma faatalitali i le Toetutu—o se meaalofa foafua mai i tagata uma e lo tatou Tama Faalelagi alofa ma Lona Alo, o Iesu Keriso.<sup>2</sup> I le Toetu, o le a toe tuufaatasia ai o tatou agaga ma tino, ua saoloto mai tiga ma lē atoatoa faaletino.

A maea le Toetutu, o le a i ai se Aso o le Faamasinoga. E ui o le a faaolaina mulimuli ane ia tagata uma ma maua se malo o le mamalu, ae o i latou o e faalagolago i le Atua ma saili atu e mulimuli i Ana tulafono ma sauniga o le a mauaina ni olaga i faavavau ia e le mafaaamatalaina i le viiga ma le ofoofogia i le mamalu.

O le Aso o le Faamasinoga o le a avea ma se aso o le alofa mutimutivale ma le alofa—o se aso e faamaloloina ai loto nutimomoia, o le a suia ai loimata faanoanoa i loimata o le lotofaafetai, o le taimi o le a sa'o ai mea uma.<sup>3</sup>

Ioe, o le a i ai le faanoanoa matuitui ona o le agasala. Ioe, o le a tatou salamo e oo foi i le tiga ona o a tatou measese, lo tatou valea, ma lo tatou



lotomaaa na mafua ai ona tatou misia ni avanoa mo se lumanai sili atu ona lelei.

Ae ou te talitonu lava o le a le gata ina faamalieina i tatou i le faamasinga a le Atua; ae o le a tatou maofa foi ma faagaeetia i Lona alofa tunoa le i'u, alofa mutimutivale, ma le alofa mo i tatou, o Lona fanau. Afai na lelei o tatou manaoga ma galuega, afai tatou te faatuatua i le Atua soifua, ona mafai lea ona tatou tepa taulai atu i le mea na saunoa ai Moronae “le pa faamasino logomalie a le Ieova silisili, le Faamsino Faavavau.”<sup>4</sup>

#### Pro Tanto Quid Retribuamus

Ou uso e ma tuafafine pele, a'u ou pele, e le faatumulaina ai ea o tatou loto ma mafaufau i le ofo ma le maofa pe a mafaufau i le fuafuaga sili o le fiafia a lo tatou Tama Faalelagi ua saunia mo i tatou? E le o faatumulua ai ea i tatou i le olioli le mafaamatalaina o le iloaina o le lumanai mamalu ua saunia mo tagata uma o e faatalitali i le Alii?

Afai e te lagonaina se ofo ma se olioli faapena, ou te valaaulia oe ia saili, suesue, ma mafaufau loloto i ni upumoni faigoifie ma loloto o le talalelei toefuataiina. “Ia tuu le tulaga mamalu o le faavavau ia mau i luga o o outou mafaufau”<sup>5</sup> Tuu atu ia i latou

e molimau atu ia te outou e uiga i le fuafuaga paia o le faaolataga.

Afai na e lagonaina nei mea muamua, ou te fesili atu ia te outou i le asō, “E mafai ea ona outou lagonaina nei?”<sup>6</sup>

Talu ai nei sa ou mauaina le avanoa e malaga ai i Belfast, Aialani i Matu. A o i ai iina, sa ou matauina le pine Belfast Coat of Arms, lea sa aofia ai le mautauave “Pro tanto quid retribuamus,” po o le “O le a se mea tatou te foai atu o se taui mo le tele o mea [ua maua]”<sup>7</sup>

Ou te valaaulia i tatou taitoatasi ia mafaufau i lenei fesili. O le a se mea tatou te foai atu o se taui mo le tele o le malamalama ma le upumoni ua sasaa mai e le Atua i o tatou luga?

Ua augani mai lo tatou Tama pele ia tau lava ina ia tatou ola i upumoni ua tatou maua ma ia tatou mulimuli i le ala ua la saunia. O le mea lea, ia tatou lototetele ma faalagolago atu i le taitaiga a le Agaga. Ia tatou faasoa atu i o tatou uso a tagata e ala i upu ma amio le savali ofoofogia ma le musuia o le fuafuaga o le fiafia a le Atua. Ia avea lo tatou faanaunautaiga ma o tatou alofa mo le Atua ma mo Ana fanau, aua o i latou o o tatou uso ma tuafine. O le amataga lenei o mea e mafai ona tatou faia ia toe taui atu ai le tele o mea [ua tatou maua].

E i ai se aso “o le a tootuli tulivae uma, ma tautino atu laulaufaiva uma” o ala o le Atua e tonu ma e atoatoa Lana fuafuaga.<sup>8</sup> Mo oe ma a’u, ia avea lena aso o le asō. Ia tatou folafola atu faatasi ma Iakopo o anamua, “E, le silisiliese na’ua o le fuafuaga a lo tatou Atua!”<sup>9</sup>

Ou te molimau atu ai i nei mea ma le lotofaafetai tele i lo tatou Tama Faalelagi, a o ou tuua ai a’u faamanuiaga ia te outou i le suafa o Iesu Keriso, amene. ■

#### FAAMATALAGA

1. Tagai Mataupu Faavae ma Feagaiga 93:29.
2. Tagai Ioane 5:28-29.
3. Tagai Faaaliga 21:4.
4. Moronae 10:34.
5. Mataupu Faavae ma Feagaiga 43:34.
6. Alema 5:26.
7. Tagai Salamo 116:12.
8. Mosaea 27:31.
9. 2 Nifae 9:13; tagai foi i fuaiupu 8-12, 14-20.



Saunia e Elder Rober D. Hales

O Le Korama a Aposetolo e Toasefululua

# “Sau, Mulimuli Mai ia te A’u” e ala i le Ola i le Alofa ma le Auaunaga FaaKerisiano

*I le avea ai ma soo o le Faaola i aso e gata ai, tatou te o mai ia te la e ala i le alofa ma le auauna atu i fanau a le Atua.*

Elie Wiesel, sa manumalo i se taui taualoa, sa i ai i le falemai a o faasolo malosi mai se taotoga o le fatu ina ua asiasi atu i ai le atalii o lona atalii e lima tausaga le matua. A o tilotilo atu le tamaititi i fofofa o lona tamamatua, sa ia vaaia ai ona tiga. “Tamamatua,” sa ia fesili atu ai, “afai ou te alofa atili ia te oe, faamata o le a itiiti ai ou tiga?”<sup>1</sup> O le asō ou te fesili atu ai i se fesili faapena ia i tatou taitoatasi: “Afai tatou te alolofa atili i le Faaola, o le a itiiti ea o tatou puapuaga?”

Ina ua valaaufina e le Faaola Ona soo ia mulimuli ia te Ia, sa latou ola i le tulafono a Mose, e aofia ai le sui “o le mata i le mata, ma le nifo i le nifo,”<sup>2</sup> ae sa afio mai le Faaola e faataunuu lena tulafono i Lana Togiola. Sa Ia aoao mai se aoaoga faavae fou: “Ia outou alolofa atu i e ua ita mai ia te outou, ia outou faamanua atu i e ua fetuu mai ia te outou, ia outou agalelei atu i e ua inoino mai ia te outou, ia outou tatalo

foi mo e ua tuuaifua mai ma faasaua mai ia te outou.”<sup>3</sup>

Sa aoaoina le au soo ia liliu ese mai ala o tagata natura i ala alofa ma le popole o le Faaola e ala i le suia o finauga i le faamagalo atu, agalelei, ma le agaalofa. O le “poloiga fou” ia “fealofani”<sup>4</sup> sa lei faigofie ona tausia i taimi



uma. Ina ua popole le au soo e uiga i le fegalegaleai ma tagata agasala ma ni vaega patino o tagata, sa aoao atu i ai ma le onosai le Faaola, "Aua na faia e outou i le tasi o e aupito itiiti o o'u uso nei, o a'u lea na outou faia i ai."<sup>5</sup> Po o le faamatalaga a se perofeta o le Tusi a Mamona, "Pe a outou auauna atu i o outou uso-a-tagata, ua nao lo outou auauna atu lava lea i lo outou Atua."<sup>6</sup>

I le avea ai ma soo o le Faaola i aso e gata ai, tatou te o mai ia te Ia e ala i le alofa ma le auauna atu i fanau a le Atua. A o tatou faia, atonu o le a le mafai ona tatou aloese mai faafitauli, mafatiaga, ma puapuaga i la le tino, ae o le a itiiti o tatou puapuaga faale-agaga. E oo lava i o tatou tofotofoga e mafai lava ona tatou lagonaina le olioli ma le filemu.

O lo tatou alofa ma auaunaga FaaKerisiano e masani ona amata i le aiga. Matua, ua valaauna outou e avea ma ni faiaoga ma ni faifeautalai alolofa i a outou fanau ma le autalavou. O i latou o au tagata sailiili. Ua ia te oe le tiutetauave e fesoasoani ia i latou ia liuaina. O le mea moni, o loo tatou saili uma ina ia liuaina—o lona uiga ia faatumulia i le alofa o lo tatou Faaola.

I le avea ai ma soo o Iesu Keriso, e faaosofia e Lona alofa i tatou e lagolago le tasi ma le isi i la tatou malaga i le olaga nei. E le mafai ona tatou faia na o i tatou.<sup>7</sup> Sa outou faafogaga muamua na ou faasoa atua le faataoto lenei [a le lotu Quaker]: E te lifina a'u ae ou lifina oe, ma o le a ta fe'aei faatasi e faavavau."<sup>8</sup> I le avea ai ma soo, tatou te amata ona faia lenei mea pe a papatisoina i tatou, i le faaali atu o lo tatou naunautaiga "e tauave avega a le tasi, ina ia mama."<sup>9</sup>

"[Aoaoina o le tasi o le isi il] mataupu faavae o le malo"<sup>10</sup> o se auala e alofa atu ai ma auauna le tasi i le isi. Matua ma matua matutua, ua tatou faaseā i le tulaga ua i ai le lalolagi—ua le o aoaoina e a'oga ia uiga mama faaletagata. Ae e tele lava mea e mafai ona *tatou* faia. E mafai ona *tatou* faaaogaina taimi e aoao atu ai i totou o o tatou lava aiga—o lona uiga o le taimi nei. Aua ne'i ma'umaua na taimi. A oo mai se avanoa e faasoa atu ai ou mafaufaug



e uiga i le talalelei ma lesona o le olaga, taofi mea uma ae nofo i lalo ma talanoa ma lau fanau ma fanau a fanau.

E le tatau ona tatou popole faapea e le o i tatou o ni faiaoga o le talalelei ua aoaoina faalematata. E leai ma se vasega faaleaoaoga po o se tusi lesona e sili atu ona aoga nai lo a tatou lava suesuega faaletagata lava ia o tutsi-tusiga paia, tatalo, mafaufau loloto, ma le saili atu i le taitaiga a le Agaga. O le a taitaiina oe e le Agaga. Ou te folafola atu ia te oe: o le valaauga o le avea ma se matua e aofia ai le meaalofa o le aoao atu i auala e sa'o mo oe ma lau fanau. Manatua, o le mana o le Atua e faatosina ai i tatou i le amiotonu, o Lona alofa lea. "Tatou te alolofa ia te Ia, aua na Ia muai alofa mai ia te i tatou."<sup>11</sup>

Autalavou, o outou o nisi o a matou faiaoga sili ona mataalia o le talalelei. Tou te o mai i le lotu e aoao ina ia mafai ai ona outou ō atu i le fare e aoao atu ma auauna atu i o outou aiga, tuaoi, ma uo. Aua le fefe. Ia i ai le faatuatua e molimau atu ai i mea e te iloaina e moni. Mafaufau i le auala e tuputupu ae ai faifeautalai faamisiona ona latou te ola ma le faamaoni i se olaga faapaiaina—i le faaaogaina o a latou taimi ma taleni ma le tuuina atu o molimau e auauna ai ma faamanuiaina isi. A e faasoa atu lau molimau o le talalelei, o le a tuputupu ae lou faatuatua ma o le a faateleina lou talitonuga.

O nisi o a tatou auaunaga FaaKerisiano e sili ona anoa, e tuuina atu e ala i le faia o suesuega faaleaiga o tusitusiga

paia, tatalo faaleaiga, ma fonotaga faaleaiga. Mo le silia ma le selau tausaga, o loo valaaau mai pea taitai o le Ekalesia ia faatulaga ese se taimi e le faalavelaveina i vaiaso taitasi. Ae e toatele lava i tatou o loo misia ia faamanuiaga. O le afiafi faaleaiga e le o se otiegaga mai ia Tina ma Tama. O le tatou taimi faaleaiga lea e fefaaosoai ai ni manatu faaleagaga faigofie ma ni aafiaga, e fesoasoani ai i a tatou fanau e aoao ia fetausia'i ma fetufaa'i, fiafia faatasi, femolimaua'i faatasi, ma tuputupu ae ma agai faatasi i luma. E ala i le faia o afiafi faaleaiga i vaiaso uma, o le a faatupulaia ai le malosi o lo tatou alolofa mo le tasi ma le isi, ma o le a itiiti o tatou puapuaga.

Ia tatou manatua, o le galuega aupito sili ona taua tatou te faia i totou o o tatou aiga e faia lea i le mana o le Agaga Paia. Soo se taimi lava tatou te sii ai o tatou leo i le ita, e aluese le Agaga mai ia tatou mafutaga [faaleulugalii] ma aiga. A tatou tautatala atu ma le alofa, e mafai ona faatasi mai le Agaga ma i tatou. Ia tatou manatua foi e fuatiaina e a tatou fanau ma fanau a fanau lo tatou alofa i le tele o lo tatou taimi e tuuto atu ia i latou. E sili i lo mea uma, ia onosai ma aua le faavaivai!

Ua ta'u mai e tusitusiga paia ia i tatou ina ua filifili nisi o fanau agaga a le Tama Faalelagi e le mulimuli i Lana fuafuaga, sa tutulu le lagi.<sup>12</sup> O nisi matua na alolofa ma aoao a latou fanau, e tutulu foi pe a filifili a latou fanau ua matutua e le mulimuli i le fuafuaga a le Alii. O le a se mea e



mafai ona faia e matua? E le mafai ona tatou tatalo ia aveesea le faitalia o se isi tagata. Manatua le tamā o le atalii faamaumauoa, o lē sa faatalitali ma le onosai mo lona atalii ia “atamai . . . o ia,” i le taimi atoa sa tauautilo mo ia. Ae sa “mamao [ese] atu o ia,” sa ia tamoe atu ia te ia.<sup>13</sup> E mafai ona tatou tatalo mo le taitaiga po o le a le taimi e tautala ai ma mea e ta’u atu, ae ioe, o nisi taimi, ia iloa le taimi e filemu ai. Manatua, ua uma ona filifili a tatou fanau ma tagata o le aiga e mulimuli i le Faaola i lo latou muai olaga. O nisi taimi ua na o aafiaga o o latou lava olaga e toe fagua ai na lagona paia. I le faiiuga, o le filifiliga o le alofa ma le mulimuli i le Alii e ao ona avea ma a latou lava filifiliga.

O loo i ai se isi ala faapitoa e faaalia ai e soo lo latou alofa mo le Faaola. O le asō ou te faamamaluina ai i latou uma o e auauna atu i le Alii o ni tausima’i. E maeu le alofa o le Alii ia te outou! I a outou auaunaga leleoa ma le le amanaiaina, o loo outou mulimuli ia te Ia o lē na folafola mai, “O lou Tama o le e silasila mai i mealilo, o ia lava o le a tauia faaaliali oe.”<sup>14</sup>

Ou te mafaufau i lo’u tuaoi o lona toalua sa mafatia i le faamai o le mafaufau. O Aso Sa uma e fesoasoani ai o ia ia te ia e fai ona lavalava mo sauniga Lotu, selu lona ao, fai ana vali, ma fai ona tautaliga. I le tuuina atu ai o lenei auaunaga, sa avea ai o ia ma se faatai taiga i alii ma tamaitai uma i la matou

uarota—o le mea moni, mo le lalolagi. I se tasi aso sa fai atu ai lona toalua ia te ia, “Ou te toe fia vaai lava i si o’u toalua ma faatasi ma ia.”

Sa ia tali atu, “O a’u o lou toalua.”

Ma sa ia tali fiafia mai, “Oi, ta’i lelei!”

E le mafai ona ou tautala atu e uiga i le tuuina atu o le tausiga e aunoa ma le faamamaluina o le tausima’i faapitoa i lo’u olaga—le soo faapitoa o le Faaola mo au—la’u soa e faavavau, o Mary. Ua ia tuuina mai mea uma i le faaialelega agaalofa ma le alofa. O ona lima ua iloa atu ai le aao lagolago ma le agamalu o le [Alii]. Se manu ou te le i ai iiinei pe a na le aunoa ma ia. Ma ona o ia, o le a mafai ai ona ou tumau e oo i le iuga ma faatasi ai ma ia i le ola e faavavau.

Afai o loo e puapuagatia tele, ma isi pe na o oe, ou te uunaia oe ia faataga le Faaola e avea ma au tausima’i. Faalagolago atu i Lona alofa naua.<sup>15</sup> Talia Lana faamautinoaga. “Ou te le tuua outou o matuaoti: Ou te sau ia te outou.” Ua Ia folafola mai.<sup>16</sup>

Uso e ma tuafafine, afai tatou te le o faia atoatoa lava, ia tatou liliu atili atu i le faamagalo atu, agalelei, ma le alofa. Ia tatou lafoai ese taua o le feitaga’i ia e tele ina sasao i o tatou loto o tagata natura ae folafola atu le tausiga, alofa, ma le filemu o Keriso.<sup>17</sup>

Afai “ua outou o mai i le malamalamo o le mamalu [ma le agalelei] o le Atua”<sup>18</sup> faapea foi ma “le togiola na saunia mai le faavaega o le lalolagi,”<sup>19</sup> “o le a le i ai ia te outou se manatu

e faamanu’ā i le tasi, ae outou nonofo i le filemu. . . . Ma o le a outou le tuu a outou fanau . . . ia latou soli tulafono a le Atua, ma misa ma fefinauai ma le tasi. . . . Ae tou te aoao i latou ia alofa le tasi i le isi, ma auauna le tasi i le isi.”<sup>20</sup>

A o lumanai le faasatauroga o le Faaola, sa Ia aoao ai Ana Apostolo: “O le poloaiga fou ou te tuu atu ai ia te outou, ia outou fealofani; faapei ona ou alofa atu ia te outou”<sup>21</sup> ma “Afai tou te alofa mai ia te au, ia outou tausi mai i au poloaiga.”<sup>22</sup>

Ou te molimau atu o le uiga moni o le Faaola ia i tatou o le uiga lea e faatino mai e le faatusa a Thorvaldsen, le *Keriso (Christus)*. O loo faaauau pea ona Ia faaloaloa mai Ona aao,<sup>23</sup> ma augani mai, “Sau, mulimuli mai ia te au.” Tatou te mulimuli ia te Ia e ala i le alofa ma le auauna atu i le tasi ma le isi ma le tausiaina o Ana poloaiga.

Ou te tuu atu la’u molimau faapitoa o loo soifua o Ia ma e alofa ia i tatou i se alofa atoatoa. O Lana Ekalesia lenei. O Thomas S. Monson o Lana perofeta i le lalolagi i aso nei. Tau ina ia faateleina atili lo tatou alolofa i lo tatou Tama Faalelagi ma Lona Alo, ma ititii ai o tatou puapuaga, o la’u tatalo lea. I le suafa o Iesu Keriso, amene. ■

#### FAAMATALAGA

1. I le Elie Wiesel, *Open Heart* (2012). Marion Wiesel (2012), 70.
2. Mataio 5:38.
3. Mataio 5:44; tagai foi 3 Nifae 12:44.
4. Ioane 13:34.
5. Mataio 25:40.
6. Mosaea 2:17.
7. Tagai 1 Korinto 12:12.
8. Sii mai le “A Story of the ‘Barefoot Boy’: Sa tusia mo J. G. Whittier’s Seventieth Birthday,” *The Poetical Works of John Townsend Trowbridge* (1869), 227.
9. Mosaea 18:8.
10. Matapu Faavae ma Feagaiga 88:77.
11. 1 Ioane 4:19.
12. Tagai Matapu Faavae ma Feagaiga 76:26; Mose 7:37.
13. Luka 15:17, 20.
14. 3 Nifae 13:4; tagai foi i le Mataio 6:4.
15. Tagai “Lean on My Ample Arm,” *Hymns*, no. 120.
16. Ioane 14:18.
17. Tagai Matapu Faavae ma Feagaiga 98:16.
18. Mosaea 4:11.
19. Mosaea 4:7.
20. Mosaea 4:13–15.
21. Ioane 13:34.
22. Ioane 14:15; tagai foi Ioane 15:10.
23. Tagai Iakopo 6:4.



Saunia e Carol F. McConkie

Fesoasoani Muamua i le Au Peresitene o Tamaitai Talavou

# O Le Manaoga Faamaoni o le Loto

*O taimi uma o tatalo faapelepele e mafai ona avea ma se taimi paia e faaalu faatasi ma lo tatou Tama, i le suafa o le Alo, e ala i le mana o le Agaga Paia.*

tauiviga o le olaga faaletino, e le o tuua ai na o i tatou e ausia la tatou galuega, ia tau a tatou taua, ia feagai ma faigata po o ni fesili e le taliina. Sa aoao mai Iesu Keriso i se faataoto “ina ia tatalo soo e tatau ai, a e aua le faavavai.” Sa Ia faamatalaina se faamasino sa lei faamamaluina le Atua ma sa leai ma sona popole mo isi tagata. E sau soo lava se fafine ua oti lana tane ia te ia, ma aioi i ai mo se faamasinogatonu mo ona fili. Mo se taimi, sa lei tuuina atu ai e le faamasino ia te ia se toomaga. Ae i se taunuuga o ana aioiga faamaoni ma le faifai pea, sa tonu ai loa i le faamasino, “Ona o le faasoesa mai ia te au o le fafine nei ua oti lana tane, ou te faamasino i ana mea ina ne’i faatiga mai ia te au i lona sau soo.”

Ona faamalamalama mai lea e Iesu:

“Pe le faia ea e le Atua le faamasino mo e na ia filifilia, o loo alalaga ia te ia i le ao ma le po . . . ?

“Ou te fai atu ia te outou e vave ona faamasino e ia o a latou mea.”

Ona fesili mai lea o le Alii i le fesili lenei: ““Peitai, a sau le Atalii o le tagata, pe maua ea e ia le faatuatua i le lalolagi”<sup>1</sup>

E taua le tatalo i le atiaeina o le faatuatua. Pe a toe afio mai le Alii, pe o le a Ia maua mai ea se nuu e iloa tatalo i le faatuatua ma o ē ua saunia e maua le faaolataga? “Aua e faaolaina i latou uma o e valaa atu i le suafa o le Alii.”<sup>2</sup> O i tatou o fanau a se Tama Faalelagi alofa, ma e mafai ona tatou olioli i se fesootaiga patino ma Ia pe a tatou tatalo atu “ma le loto faamaoni, ma le manatu moni i ai, ma le faatuatua ia Keriso”<sup>3</sup> ona galue lea e tusa ma tali tatou te maua e ala mai i uunaiga a le Agaga Paia. Tatou te tatalo i le faatuatua, tatou te faalogo, ma tatou te usiusitai ina ia tatou aoao ia tasi ma le Tama ma le Alo.<sup>4</sup>

O se tatalo o le faatuatua e matala ai le ala e maua ai faamanuiaga mamalu e auina mai le lag. Sa aoao mai le Faaola:

“Ia ole atu, ona foaiina mai ai lea ia te outou; ia outou saili, ona outou maua ai lea; ia outou tu’itu’i atu, ona toina ai lea ia te outou:

“Aua ai se ole atu, e maua e ia; o le saili, e iloa e ia; o le tuitui e toina mai ia te ia.”<sup>5</sup>

Afai tatou te faamoemoe e maua se mea, e tatau ona tatou ole atu, saili, ma

tu’itu’i. I lana sailiga mo le upumoni, sa faitau ai Iosefa Samita i le mau, “A e afai ua leai se poto i so outou, ina ole atu ia i le Atua, o le foai tele mai i tagata uma ma le le toe ta’uta’ua, ona foaiina mai ai lea ia te ia.”<sup>6</sup> I se tali i lana tatalo o le faatuatua, na matai ai le lag. Na afifio mai le Atua le Tama ma Lona Alo, o Iesu Keriso i le mamalu ma fatalai mai ia Iosefa Samita, i le amataina o le tisipenisione o le atoaga o taimi. Mo i tatou, o le faamalologa faavavega, pui-puiga mamana, malamalamfaalelagi, faamagaloga o le togiola, ma le filemu taua, o nisi ia o tali e oo mai ia i tatou pe a tatou avatu “manoaga faamaoni o le loto”<sup>7</sup> i le faatuatua.

Tatou te tatalo atu i lo tatou Tama i le suafa o Iesu Keriso, e ala i le mana o le Agaga Paia, o lea, e auai uma ai tagata e toatolu o le Aiga Atua i a tatou tatalo.

## Tatou te tatalo atu i lo tatou

**Tama Faalelagi** ma na o Ia lava ona o Ia o le “Atua i le lag, o lē ua lē tuaoia ma faavavau, . . . mai le tumau-faavavau i le tumau-faavavau, o lē na faia le lag ma le lalolagi, ma mea uma o i ai.” I le avea ai ma o tatou Foafoa, sa Ia tuu mai ai poloaiga “e tatau ona [tatou] alolofa ma auauna atu ia te ia, le Atua soifua moni e toatas, ma ia nao ia lava le tagata o lē e tatau ona [tatou] tapuai atu i ai.”<sup>8</sup>

A e tatalo atu i le Tama Faalelagi i le faatuatua, “o le a ia faamafanafanaina outou i o outou puapuaga, . . . [ma o le a mafai ona outou] taumamafa fiafia i lona alofa.”<sup>9</sup> Sa faasoai mai e Peresitene Henry B. Eyring o tatalo a lona tama i le taimi na lē manuia ai ana tauiviga ma le kanesa sa aoaoina ai o ia i le sootaga loloto patino i le va o le Atua ma Lona fanau:

“Ina ua oo ina ogaoga le tiga, sa matou maua atu o ia i le taeao i ona tulivae i autafa o le moega. Sa matuai vaivai lava e toe foi atu i lona moega. Sa ia fai mai ia i matou sa tatalo e fesili i lona Tama Faalelagi pe aisea lava ua matua mafatia ai o ia, ae sa ia taumafai i taimi uma ia amiolelei. Sa ia fai mai sa oo mai se tali agalelei: ‘O loo manao-mia e le Atua ni atalii totoa.’

“Ma o lea na ia lototele ai e oo i le iuga, sa talitonu e alofa le Atua ia te ia,



sa faafogaga mai ia te ia, ma o le a ia siitia o ia i luga. Sa faamanuiaina o ia i le vave iloaina ma le le faagaloina lava, e latalata mai lava se Atua alofa e ala i le tatalo.<sup>10</sup>

**Tatou te tatalo i le suafa o Iesu Keriso** ona o lo tatou faaolataga o loo ia Keriso, ma “e leai lava se isi igoa i lalo o le lagi ua foaiina mai i tagata, e mafai ona faaolaina ai o i tatou.”<sup>11</sup> Tatou te o mai i le Tama i le suafa paia o Iesu Keriso<sup>12</sup> ona o Ia o lo tatou Fautua i le Tama ma e aioi atu o Ia mo tatou.<sup>13</sup> Sa puapuagatia, lavatoto, ma maliu o Ia e faamamaluina ai Lona Tama, ma o Ana aioiga o le alofa mutimutivale mo i tatou e matale ai le ala mo i tatou taitoatasi e maua ai le filemu i lenei olaga ma le ola e faavavau i le lalolagi a sau. E le finagalo o Ia ia tatou toe puapuagatia pe mafatia i nisi tofotofoga nai lo tofotofoga e manaomia. E finagalo o Ia tatou te liliu atu ia te Ia ma faatagaina o Ia ia faamāmā a tatou avega, ia faamalolo o tatou loto, ma ia faamamaina o tatou agaga e ala i Lona mana faamama. Tatou te le mananao e ta’ufua Lona suafa i upu faisoo ma taulotoina. O tatalo faamaoni e tuuina atu i le suafa paia o Iesu Keriso, o se faailoaga lea o lo tatou alofa tuuto, lo tatou lotofaafetai e faavavau, ma lo tatou manao mausali e tatalo e pei ona sa Ia tatalo, ia faia e pei ona sa Ia faia, ma ia avea e faapei o Ia.

**Tatou te tatalo e ala i le mana o le Agaga Paia** ona “o ia o lē e ole atu i le Agaga, e ole atu o ia e tusa ma le finagalo o le Atua.”<sup>14</sup> A tatou tatalo i le faatuatua, e mafai ona taiala e le Agaga Paia o tatou mafaufauuga ina ia ogatusa a tatou upu ma le finagalo o le Atua. “Aua le ole atu i se mea, ina ia mafai ona outou faamau-mauina i o outou tuinanauga, ae ia ole atu ma le mausali le maluelueina, ina ia outou le gauai atu i se faaososoga, ae o le a outou auauna atu i le Atua moni ma soifua.”<sup>15</sup>

“E le gata e taua lo tatou iloa o le auala e tatalo atu ai, ae e tutusa foi ma le taua o lo tatou iloaina o le auala e maua ai le tali i a tatou tatalo, ia iloatino, ia nofouta, ia mafai ona vaai ma le manino ma malamalamama ma se faamoemoega manino i le finagalo o le Atua ma [Ona] faamoemoega e faata-tau ia i tatou.”<sup>16</sup>

Sa faasoai mai e Peresitene Eyring: “E i ai au tatalo na taliina mai. Sa sili ona manino nā tali ina ua faafilemu-inia mea sa ou manao i ai e se lagona malosi tele o le fia iloa o le finagalo o le Atua. O le taimi lena e mafai ai ona ta’uina mai e le Tama Faalelagi le tali i le mafaufau e ala i le leo filemu ma le ititi ma mafai ona tusia i le loto.”<sup>17</sup>

Ina ua ulu atu le Faaola i le Faatoaga o Ketesemane, na matuai

faanoanoa Lona agaga e oo i le oti. I Ona tiga, e na o le pau le tagata na mafai ona Ia liliu atu i ai o Lona Tama. Sa Ia aioi atu, “Afafai e mafai, ia ave ese lenei ipu ia te au.” Ona Ia faaopoopo atu lea, “Ae aua le faia lo’u loto, a o lou finagalo.”<sup>18</sup> E ui e leai se agasala, sa valauina le Faaola ia “[mafatiā] i tiga ma puapuaga ma faaososoga o ituaiga eseese uma,” e aofia ai ma’i ma vaivaiga o Lona nuu. “E mafatia [o Ia] e tusa ai ma la le tino, ina ia mafai ona ia ave i ona luga agasala a ona tagata, ina ia mafai ona ia soloi ese a latou soli-tulafono e tusa ai ma le mana o lana laveaiga.”<sup>19</sup> Sa faatolu ona Ia tatalo, “Tama, ia faia lou finagalo.”<sup>20</sup> Sa lei aveesea le ipu. I tatalo faamaulalo ma le faatuatua, sa faamalosia ai o Ia e agai pea i luma ma faataunu LANA misiona paia e saunia lo tatou faaolataga, ina ia tatou salamo, talitonu, usiusitai ma maua faamanuiaga o le faavavau.

O tali tatou te maua i tatalo atonu e le o mea ia tatou te mananao ai. Ae i taimi o faafitauli, e avea a tatou tatalo ma se lainaola o le alofa ma le alofa mutimutivale agamalu. I a tatou aioiga, e mafai ona faamalosia i tatou ia agai pea i luma ma faataunu mea uma na faauuina ai i tatou e fai. I LANA Au Paia o loo ola i aso faigata, ua fetalai mai le Alii, “Ia faamafanafanaina o outou loto . . . ; aua ua i ai tagata uma i o’u lima; ia filemu ma iloa o A’u o le Atua.”<sup>21</sup>



Pe o tuuina atu faalilolilo a tatou tatalo, po o totonus o aiga, i le lotu, po o le malumalu; pe o tatou tatalo ma ni lotu momomo ma ni agaga salamo e saili le faamagaloga, poto faalelagi po o le malosi e tumau ai, ae ia tatou tatalo *e le aunoa* ma ni lotu e tumu, e sasaa atu peia i le Atua mo o tatou manuia ma le manuia o i latou o siomiaina i tatou. O manaoga faamaoni e tuuina atu i se agaga o le lotofaafetai mo le anoanoai o faamanuiga ma le lotofaafetai mo lesona o le olaga, e totoina ai i o tatou lotu le faatuatua mausali ia Keriso, se “susulu o le faamoemoe, ma se alofa i le Atua ma tagata uma.”<sup>22</sup>

O le tatalo o se meaalofa mai le Atua. E le manaomia ona tatou lagonaina le feseta'i po o le tuuatoatasi. Ou te molimau atu o taimi uma o tatalo faapelepele e mafai ona avea ma se taimi paia e faaalu faatasi ma lo tatou Tama, i le suafa o le Alo, e ala i le mana o le Agaga Paia. I le suafa paia o Iesu Keriso, amene. ■

#### FAAMATALAGA

1. Tagai Luk 18:1–8; tagai foi i le Faaliliuga a Iosefa Samita, Luk 18:8 (i le Luk 18:8, vaefaaamatatalaga *a*).
2. Roma 10:13.
3. Moronae 10:4.
4. Tagai Ioane 17:21–23. Sa tatalo le Faaola ina ia tasi i tatou ma le Tama ma le Alo ma ia faaatoatoaina. Tatou te maua le lotogatasi ma le Tama ma le Alo pe a tatou talitonu i afioga a Keriso ma faatinlo le faatuatua.
5. Mataio 7:7–8.
6. Iakopo 1:5.
7. “O Le Tatalo o Moomooga Moni o le Agaga,” *Viiga*, nu. 80.
8. Mataupu Faavae ma Feagaiga 20:17, 19.
9. Iakopo 3:1–2.
10. Henry B. Eyring, “O Aiga ma le Tatalo,” *Liahona*, Sete. 2015, 4.
11. Galuega 4:12.
12. Tagai Mataupu Faavae ma Feagaiga 93:19–20.
13. Tagai Mataupu Faavae ma Feagaiga 45:3–5.
14. Mataupu Faavae ma Feagaiga 46:30.
15. Mamona 9:28.
16. Melvin J. Ballard, “Our Channels of Power and Strength,” *Improvement Era*, Sept. 1923, 992; quoted in M. Russell Ballard, *Yesterday, Today, and Forever* (2015), 133.
17. Henry B. Eyring, “Tusi i luga o Lo'u Loto,” *Liahona*, Ian. 2001, 100.
18. Mataio 26:39; tagai foi i fuaiupu 38.
19. Alema 7:11, 13.
20. Tagai Mataio 26:39–44.
21. Mataupu Faavae ma Feagaiga 101:16.
22. 2 Nifae 31:20.



Saunia e Elder Craig C. Christensen

O Le Au Peresitene o Fitugafulu

# “O Le A Ou Faatu Mai Se Tagatavaai Filifilia”

*Ona o Iosefa o se perofeta, ua sili atu ai i lo na o se faamalama i le lagi—ae o le faitotoa lava i faavavau ua matai ia i tatou.*

na ua oo muamua atu Moronae ia Iosefa Samita, sa ia lapatai atu e faapea, o le “igoa [o Iosefa] o le a lauiloa mo mea lelei ma mea leaga i atunuuma.”<sup>1</sup> Ua tatou vaai i le faataunuina o lena valoaga. I le taua i le va o le lelei ma le leaga, ma le Toefuataiga o le talalelei e ala i le Perofeta o Iosefa Samita ua musuia uma ai le au talitonu o ē mulimuli ia te ia faapea ai foi ma le faaitaina o fili o ē tau ma le ita tele e faasaga i le galuega a Siona ma faasaga ia Iosefa lava ia. E le fou le taua lea. Sa amata tonu ina ua mavae le savali atu o le taulealea o Iosefa i totolu o le Vao Paia ma o loo faaauau ai pea i aso nei faatasi ai ma se vaaiga faaopoopo i luga o le Initoneti.

Sa folafola atu patino e le Alii ia Iosefa Samita:

“O le a fesilisili tuluiga o le lalolagi i lou igoa, ma o le a fai oe ma tauemuga a tagata valelea, ma o le a ‘atigu seoli e faasaga ia te oe;

“A’o e lotu mamā ma e atamamai, ma e agamalu, ma e amiomama, o le a saili fautuaga, ma le pule, ma faamanuiga mai lou lima e lē aunoa.”<sup>2</sup>

O le asō, ou te tuu atu ai la’u molimau i tagata uma ia saili ia malamalamā

atili i le misiona paia a Iosefa Samita le Itiiti, le Perofeta o le Toefuataiga.

E le manaomia ona tatou popolevale e molimau atu i le misiona a Iosefa o se perofeta, tagatavaai, ma talifaaaliga, aua e galue peia le Alii e ala mai i perofeta.<sup>3</sup> Ona o upumoni na toefuatai mai e ala ia Iosefa Samita, ua tele atu ai lo tatou iloa e uiga i lo tatou Tama Faalelagi ma le Faaola o Iesu Keriso. Ua tatou iloa o La uiga paia, lo La sootaga i le tasi ma le isi faapea ma i tatou, ma le fuafuaga sili o le togiola lea ua mafai ai ona tatou toe foi atu i lo Laua afioaga.

Sa tautino mai Peresitene Polika Iaga e uiga ia Iosefa: “Sa filifilia i le aufono o le faavavau, ae le i taitai faataatitia faavae o le lalolagi, e tatau ona avea o ia ma tagata, i le tisipenisione mulimuli o lenei lalolagi, na te aumaia le afioga a le Atua i tagata ma maua le atoaga o ki ma le mana o le Perisitua o le Alo o le Atua. Sa silasila mai fofoga o le Alii ia te ia . . . [aua o ia] sa muai faauuina i le faavavau e pulefaamalumalu i lenei tisipenisione mulimuli.”<sup>4</sup>

I sauniunga mo lenei galuega tele, sa soifua mai ai Iosefa Samita i se aiga agaalofa na oo i le tele o avega ma



tofotofoga o le olaga i aso uma. A o faasolo matua Iosefa, o ona lagona i le Atua "sa loloto . . . ma malosi i le tele o taimi,"<sup>5</sup> ae sa ia le mautonu i manatu feteenai faalelotu sa aoao e faifeau o ona aso. O le mea e lelei ai, sa lei faatagaina e le taulealea o Iosefa ana fesili e faamateina lona faatuatua. Sa ia saili i ni tali i le Tusi Paia ma sa maua ai le fautuaga lenei: "A e afai ua leai se poto i so outou, ina ole atu ia i le Atua, o le foai tele mai i tagata uma ma le le toe tautaua, ona foaiina mai ai lea ia te ia."<sup>6</sup>

Sa faamatalaina e Iosefa: "E leai lava se mau o tusitusiga paia na oo i le tagata ma le mana tele nai lo o lenei mau i lo'u loto i lea taimi. Sa foliga ua ulu mai ma se mana tele i lagona uma o lo'u loto. Sa ou mafaufau ma saga mafaufau pea i ai."<sup>7</sup>

Faatasi ma se faatuatua faatauvaa, sa faatino ai e Iosefa nei lagona faale-agaga. Sa ia maua se nofoaga tuufua, sa tootuli i lalo, ma "amata ona tuu atu o manaoga o [lona] loto i le Atua"<sup>8</sup> O

loo i ai se mana tele i le faamatalaga a Iosefa i le mea na tupu.

"Na ou vaiai ai se malamalama faaniutu i luga ae tonu lava o lou ulu, ua sili atu le pupula i le la, ua alu ifo malie lava seja oo mai i ou luga.

" . . . Ina ua oo mai le malamalama i o'u luga, sa ou vaiai ni Tagata e toalua, o lo laua pupula ma le mamalu e lē mafaamatalaina, o tutu mai i o'u luga a'e i le ea. Sa fetalai mai le tasi o i laua ia te a'u, ma fofoga mai ia te a'u i lo'u igoa ma fetalai mai, a'o tusi ane i le tasi—*O Lo'u Atalii Pele lenei. Faalogo ia te Ia!*"<sup>9</sup>

Sa vaai Iosefa Samita i le Atua, le Tama Faavavau, ma Iesu Keriso, le Faaola ma le Togiola o le lalolagi. O le *Uluai Faaliga* lenei a Iosefa. I tausaga na mulimuli ane ai, na faaliliu ai e Iosefa Samita le Tusi a Mamona e ala i le meaalofa ma le mana o le Atua. E toatele isi tagata faalelagi na asiasi mai ia te ia, ma toefuatai mai upumoni ma le pule ia na leiloloa mo le tele o

seneturi. O nei fesootaiga faalelagi ia Iosefa Samita na matala ai pupuni o le lagi faapea ai ma mamalu o le faavavau i la tatou vaai. O le soifuaga o Iosefa ua tu o se molimau lea afai e leai se poto i so tatou, e mafai ona tatou ole atu i le Atua i le faatuatua ma maua ai ni tali—o nisi taimi e mai tagata faalelagi ae o le tele o taimi e ala mai i le mana o le Agaga Paia, lea e fetalai mai ia i tatou e ala i mafaufauga ma lagona musia.<sup>10</sup> E ala mai i le Agaga Paia e mafai ona tatou "iloa ai le moni o mea uma lava."<sup>11</sup>

Mo le toatele o i tatou, o se molimau a le Perofeta o Iosefa Samita e amata a o tatou faitauina le Tusi a Mamona. Sa ou faitauina muamua le Tusi a Mamona mai le faavaa i le faavaa a o avea au ma se tamaitiiti talavou o le seminare i le vaveao. I o'u mafaufauga tiotio faata-maitiiti, sa ou filifili ai e faiata e peiseai o au o Iosefa Samita, na mauaina upu-monni i le Tusi a Mamona mo le taimi muamua lava. Sa oo ai se aafiaga i lo'u olaga lea o loo ou faiatau ai lava le Tusi a Mamona i lena ala. E tele ina ou iloaina o le faia o lena mea e faalolotoina ai lo'u talisapaiaina o le Perofeta o Iosefa faapea ai ma upumoni toefuataina i lenei tusi taua.

Mo se faataitaiga, mafaufau i lagona o Iosefa a o ia faaliliuina fuaitau e uiga i le papatisoga mo le faamagaloga o agasala. O Iosefa, o le na faatonuina ia aua ne'i auai i soo se lotu i lena taimi, na i ai lava ni fesili e uiga i lenei sauniga faaola. O ana fesili na taitai atu ai o ia, e toe tatalo foi, ma o lena tatalo na taitai atu ai i se asiasiga mai ia Ioane le Papatiso, lea na fuata'i maia le Perisitua Arona ma le pule e papatiso atu ai.<sup>12</sup>

Pe mafaufau foi po o a ni lagona o Iosefa ina ua ia iloa mo le taimi muamua na asiasi atu Iesu Keriso i tagata o le Itulagi i Sisifo—ma sa Ia aoao atu ia i latou, tatalo mo i latou, faamalolo o latou ma'i, faamanuia a latou fanau, faaee atu le pule, ma faautauta le faamanatuga ia i latou.<sup>13</sup> Atonu sa lei iloaina e Iosefa i lena taimi, ae o mea na ia aoaoina e uiga i sauniga ma le faatulagaga o le Ekalesia anamua a Keriso sa saunia ai o ia ia fesoasoani

mulimuli ane ai i le Alii i le toefuataiina o lena lava Ekalesia e tasi i le lalolagi.

I le taimi o le faaliliuga o le Tusi a Mamona, sa faanoanoa ai Iosefa ma lona faletua o Ema i le maliu o lo la atalii laititi. I na aso sa taatele ai aoaoga a faifeau e faapea o tamaiti e maliliu e aunoa ma le papatisoina o le a faasalaina e faavavau. I le mafaufau ai i lenei mea, manatu i lagona na oo ia Iosefa a o ia faaliliuina nei upu mai le perofeta o Mamona: “E le manaomia e fanau laiti se salamo, po o le papatisoga. . . [Aua] o fanau laiti ua ola ia Keriso, mai lava i le faavaega o le lalolagi.”<sup>14</sup>

Masalo o le fuaitau aupito sili ona mata’ina i le Tusi a Mamona i le taulealea o Iosefa atonu o le mataupu lona tolu o le 2 Nifae. O loo i ai i lenei mataupu se valoaga anamua e uiga i le “tagatavaai filifilia” o lē o le a faatu a’ē e le Alii i aso e gata ai—o se tagavaai e igoa ia Iosefa, e igoa foi i lona tama. O lenei perofeta o le lumanai o le a “taua tele” ma o le a faia se galuega “aoga tele” i lona nuu. O le a “silisili o ia e pei o Mose” ma o le a tuu atu i ai le mana e aumai ai le afioga a le [Atua].<sup>15</sup> Mafaufau i le lagona na oo i ai Iosefa Samita ina ua ia iloaina o lenei valoaga sa faataatau ia te *ia!* Sa le na o se talafaasolopito na ia faaliliuina; sa ia faaliliuina foi se faaaliga o aso e gata ai, o le Toefuataiga ofoo fogia o le talalelei a Iesu Keriso—*ma sa fesoasoani Iosefa Samita e faataunuuiuina!*

O le asō, toetoe lava 200 tausaga mulimuli ane, e faigofie lava le vaiaia o le auala ua iloaina ai lenei valoaga. Ua tatou iloa e uiga i mea tetele na ausia e Iosefa i le avea ai ma perofeta a le Alii. Ae ia manatua ina ua faaliliuina e Iosefa lenei valoaga, na ia faia ni mea na muai valoia e perofeta. Sa talavou lava o ia i le popofou o lona vaitau 20 tausaga. Sa lei faatulagaina le Ekalesia. Sa leai ni uarota po o ni paranesi, leai ni faifeatalai, ma leai ni malumalu. Sa seāseā i ai nisi na iloaina Iosefa Samita, ma o nisi o i latou sa matua tetee atu ia te ia. Sei tagai nei la i le galuega tele ua faatinoina e le Alii i le lima o Lana auauna o Iosefa, e ui lava i le faatautee mai o le fili ia te ia.



Pe le o le faataunuuga ea o lenei valoaga ua faamautu ai le faamaoniga o le valaauga faaperofeta o Iosefa Samita?

I soo se tasi lava atonu o loo fesiligia pe a latou molimau e uiga ia Iosefa Samita pe o tauivi foi ma faamatalaga sese, fenumiai, pe le atoatoa e uiga i lona olaga ma lana auaunaga, ou te valaaulia outou ia mafaufau i fua—o faamanuiaga e tele ua oo mai ia i tatou e ala mai i le misiona ofoo fogia a Iosefa Samita, le Perofeta o le Toefuataiga.

Ona o Iosefa o se perofeta, o lea, o faaaliga ma perofeta ua le o toe avea ma ni mea o aso lava la ua leva. O “aso o vavega”—o faaaliga, faamalologa, ma auaunaga a agelu—e le o taofia.<sup>16</sup>

Ona o Iosefa o se perofeta, ua tatou taufai maua uma ai le mana ma faamanuiaga o le perisitua paia, e aofia ai le papatisoga, le meaalofa o le Agaga Paia, ma le faamanatuga.

Ona o Iosefa o se perofeta, ua tatou maua ai faamanuiaga ma sauniga o le malumalu ua fusia ai tatou i le Atua, ua avea ai i tatou ma Lona nuu, ma faailoa mai ai ia i tatou “le mana o le faaleatua,” ua mafai ai e i tatou i se aso ona “vaai i fofoga o le Atua, le Tama, ma ola [ai].”<sup>17</sup>

Ona o Iosefa o se perofeta, ua tatou iloa ai o le faaipoipoga ma le aiga o se vaega taua lea o le fuafuaga a le Atua mo lo tatou fiafia. Ua tatou

iloa e ala i sauniga ma feagaiga o le malumalu, e mafai ai ona tumau e faavavau a tatou mafutaga faapele-pele faaleaiga.

Ona o Iosefa o se perofeta, ua sili atu ai i lo na o se faamalama i le lagi—ae o le faitotoa lava i faavavau ua matala mai ia i tatou. Ua mafai ona tatou iloa “le Atua moni e toatasí atoa ma le na Ia auina mai o Iesu Keriso lea.”<sup>18</sup> E mafai ona avea ma tatou le ola e faavavau.

Ae e sili i mea uma, ona o Iosefa o se perofeta, ua tatou maua ai se tautinoga i luga o tautinoga, molimau i luga o molimau, o Iesu Keriso o le Alo o le Atua ma o le Faaola o le lalolagi. Ua ia i tatou se filifili le mamotusiaina o molimau faapitoa a Iesu Keriso, e aofia ai lo tatou perofeta i aso nei, Peresitene Thomas S. Monson; o fesoasoani i le Au Peresitene Sili; ma uso o le Korama a Aposetolo e Toasefululua. I a latou molimau, ou te faaopoopo atu i ai ma la’u molimau mautinoa faamaulalo: O loo soifua Iesu Keriso ma o loo taitaia Lana Ekalesia. O Iosefa Samita sa avea ma perofeta ma o le Perofeta o le Toefuataiga. O le perisitua ma le pule a le Atua ua toe i ai i luga o le fogaeleele. Ia tatou tautino atu ma le le fefe a tatou molimau ma lo tatou lotofaafetai mo lenei perofeta ofoofo-gia, tagatavaai ma talifaaaliga a le Alii, o la’u tatalo lea i le suafa paia o Iesu Keriso, amene. ■

#### FAAMATALAGA

1. Iosefa Samita—Talafaasolopito 1:33.
2. Matapu Faavae ma Feagaiga 122:1–2.
3. Tagai Amosa 3:7.
4. Brigham Young, *Deseret News*, Oct. 26, 1859, 266; tagai foi *Aoaoga a Peresitene o le Ekalesia: Iosefa Samita* (2007), 544.
5. Iosefa Samita—Talafaasolopito 1:8.
6. Iakopo 1:5.
7. Iosefa Samita—Talafaasolopito 1:12.
8. Iosefa Samita—Talafaasolopito 1:15.
9. Iosefa Samita—Talafaasolopito 1:16–17.
10. Tagai Matapu Faavae ma Feagaiga 8:2.
11. Moronae 10:5.
12. Tagai Iosefa Samita—Talafaasolopito 1:68–72.
13. Tagai 3 Nifae 11:20.
14. Moronae 8:11–12.
15. Tagai 2 Nifae 3:6–15.
16. Tagai Moronae 7:35–37; Matapu Faavae o le Faatuatua 1:7.
17. Matapu Faavae ma Feagaiga 84:21–22.
18. Ioane 17:3.



Sauniga e Elder Juan A. Uceda  
O Le Fitugafulu

# Ua Aoao Mai i Tatou e le Alii o Iesu Keriso ina ia Tatalo

*Pe a e tatalo, faamata o loo e tatalo moni lava pe tau lava  
o le faia o tatalo?*

le 1977, sa ou auauna atu o se faifeatalai faamisiona i Cusco, Peru. Sa ma maua ma lau soa le faatagaga e ave ai faifeatalai uma o le sone a Cusco i mea matagofie na faaleagaina i Machu Picchu.

E latalata atu i le faaiuga o la matou asiasiga i mea na faaleagaina, sa mananao nisi o faifeatalai e o i le Alalaupapa

o Inca, o se vaega o le auala i le mauga. Sa vave, ona ou lagona le taofia o au e le Agaga ina ia ‘aua nei o ai iina. Sa i autafa o se mauga le auala faatasi ai ma se tofe e 2,000-futu (610 m). I nisi o eria sa lautele le auala mo na o le tagata e toatasí e sopoia i le taimi. Sa ma ta’u atu ma lau soa ia i latou e le tatau ona matou o i le Alalaupapa o Inca.



Peitai, sa mananao pea faifeatalalai ina ia matou o. Sa oo ina faateteleina aioiga ma e ui i le mea na ta'u mai e le Agaga ia te au, sa ou usitai i le uunaiga a faifeatalai ma ta'u atu ia i latou o le a matou asiiasi i le alalaupapa pe afai o le a matou faaeteete.

Sa matou ulufale atu i le auala e taitai atu i le Alalaupapa o Inca faatasi ai ma a'u i le tausiusiuga o le vaega, ma i le taimi muamua sa lemu le savavali o tagata uma, e pei ona autasi i ai. Ona amata lea ona saoasaoa tele le savavali a faifeatalai ma tamomoe foi. Sa latou le faalogo i la'u talosaga atu ina ia faifai lemu. Sa ou lagona e tatau ona ou tulituli atu ia i latou, e ta'u atu ia i latou e tatau ona matou toe foi. Sa ou mamao i tua o i latou, ma sa tatau ona ou tamoe faatopetope ina ia o'o atu ia i latou.

Ina ua ou o'o atu i se pioga, sa ou maua ai i se auala e vaiti tele e savavali ai ni tagata se toalua, se faifeatalai o loo tu ma lona papatua i ma'a. Sa ou fesili ia te ia pe aisea ua ia tu ai iina. Sa ia fai mai ia te a'u, sa ia maua se uunaiga e tu ai i le vaega lena mo se taimi, ma e tatau ona ou alu pea.

Sa ou lagona le manao ina ia tulituli atu ia i latou na muamua atu ia i maua, o lea na ia fesoasoani ai ina ia ou pasia o ia, ma sa mafai ai ona ou oo atu i le mamao teisi atu i lalo o le auala. Sa ou iloa sa liloia le eleele i laau. Sa ou tuuina lou vae taumatau i le eleele, ma le iloaina, a o o'u pau atu, e leai se palapala o loo i lalo o laau. Sa ou pipii atu ma le popole i nisi o lala sa i lalo ifo o le auala. Mo se taimi, sa mafai ona ou vaai i lalo, i le 2,000 futu i lalo ifo o au, i le Vaitafe o Urubamba lea e tafe atu i le Vanu Paia o le Incas. Sa ou lagona sa pei ua alu ese atu lou malosi, ma e toe o se taimi ona le mafai lea ona ou toe pipii. I lena taimi, sa ou tatalo malosi ai. O se tatalo puupuu lava. Sa ou tatala lou gutu ma faapea atu, "Tama, fesoasoani mai ia te au!"

Sa le lava le malolosi o lala e lago-lago ai le mamafa o lo'u tino. Sa ou iloa ua lata ona ou oti. I le taimi *tonu lea* o le a ou pau ai, sa ou lagonaina se lima malosi o tago mai i lou lima ma toso atu a'u i luga. Faatasi ai ma lena

fesoasoani, sa mafai ona ou faaauau pea ona tauivi ina ia toe pe'a i luga o le ala. O le faifeatalai lea sa mulimuli o le tagata tonu lea sa faasaoina au.


Ae o le mea moni, sa faasaoina a'u e lo tatou Tama oi le Lagi. Sa ia faafogaga mai i lo'u leo. Sa faa-tolu ona ou lagonaina le leo o le Agaga i le taimi muamua, o ta'u mai ia te a'u ina ia aua nei alu i le Alalaupapa o Inca ae sa ou le usitaia lena leo. Sa ou te'i, ma sa ou sesega, ma ou te lei iloa le tala e fai atu. Ona ou manatua lea o isi faifeatalai na muamua atu ia i maua, lea sa ma o atu ai loa ma saili i latou seia oo ina maua i latou ma tau atu ia i latou le mea na tupu ia te au.

Sa matou toe foi atu i Machu Picchu, ma le faaeteete tele ma i le filemu. I le malaga e toe foi atu, sa faaauau pea ona ou filemu, ma sa oo mai le manatu i lou mafaufau sa Ia gauai mai i lou leo ae sa ou le gauai atu i Lona siufofoga. Sa i ai se tiga loloto i lou loto mo le le usiusitai i Lona siufofoga ma i le taimi lava e tasi o se lagona o le loto faafetai mo Lona alofa mutimutivale. Sa Ia le faaoo mai Lona faamasinotonu i luga o au, ae i Lona alofa mutimutivale tele, sa Ia faasaoina lou ola (tagai Alema 26:20).

I le faaiuga o le aso, ina ua oo i le taimi o lou tatalo patino, sa ou tatalo mai i lou loto i "le Tama e ona le alofa mutimutivale, ma le Atua foi e ana le faamafanafanaga uma" (2 Korinito 1:3). Sa ou tatalo "ma le loto faamaoni, ma le manatu moni i ai, ma le faatuatua ia Keriso" (Moronae 10:4).

I le taeao po o lena lava aso, sa ou tatalo ai ma ou laugutu, ma ina ua tauau ina ou fano, sa ou tatalo mai le loto ia te ia. Sa ou mafaufau loloto i lou olaga i lena tulaga. Sa ou iloa ai i le tele o taimi, sa tele le alofa mutimutivale o le Tama oi le Lagi ia te au. Sa Ia aoao mai ia te au le tele o lesona i lena aso i Machu Picchu ma i Cusco, Peru. O se tasi o lesona silisili e faapea e tatau pea, ona ou tatalo pea "ma se loto faamaoni, ma le manatu moni i ai, ma le faatinoina o le faatuatua ia Keriso."

I se tasi o taimi "ua tatalo [le Alii o Iesu Keriso i le tasi mea]," ma "[ina] ua



uma, ona fai mai lea ia te ia o le tasi o lona au soo, Le Alii e, ia e aoao mai ia te i matou i tatalo" (Luka 11:1). Ona Ia aoao lea o Ona soo ina ia tatalo. Ma i le aso, ua Ia aoao mai ia te oe ma au ina ia tatalo a o tatou vaai ia te Ia i o tatou mafaufau o loo tatalo i Ketesemane ma faapea atu, "A e aua le faia lo'u loto, a o lou finagalo" (Luka 22:42). Pe a e tatalo, faamata o loo e manao moni ma faamaoni ia "le faia lo'u loto, a o lou finagalo"?

Sa faamatala e Paulo le ala na tatalo ai Iesu "i ona po na tino tagata mai ai," aemaise lava i Ketesemane: "O ia lenei sa tatalo atu i ona po na tino tagata mai ai, ma aioi atu ma le tagi tele ma loimata i le na mafai ona faaola ia te ia nai le oti, na faafogogaina foi o ia i le mea na ia fefe ai" (Eperu 5:7). Pe a e tatalo, faamata o loo e tatalo moni lava pe tau lava o le faia o tatalo? Pe o e faafoliga i au tatalo?

Sa tatalo malosi Iesu ma talanoia i Lona Tama. "Ona papatisoina ai lea o Iesu, ua tatalo ia, ona faavanoaina ai lea o le lagi" (Luka 3:21). Pe a e tatalo, mata e te lagonaina e pei o loo tatala mai le lagi? O le a le taimi mulimuli na e lagona ai lena sootaga ma le lagi?

Sa saunia e Iesu o Ia Lava ina ia faia ni faaiuga taua e ala i le tatalo i Lona Tama.

"O aso lava ia ua maliu ae ai o ia i le mauga e tatalo, ua aoina lana tatalo i le Atua.

"Ua ao foi, ona valaau atu lea o ia i ona soo: ua filifilia e ia ni o latou e toasefulu ma le toalua" (Luka 6:12-13).

Mata e te saunia oe lava e faia ni faaiga taua e ala i le tatalo atu i lou Tama Faalelagi. Mata e saunia oe lava mo se taimi o le tatalo?

Ina ua afio mai Iesu i le konetineta o Amerika, sa Ia aoao tagata ina ia tatalo. "Ma sa fetalai atu Iesu ia te i latou: Ia outou tatalo pea; e ui i lea sa le tuua lava le tatalo atu" (3 Nifae 19:26).

Ua valaaulia i tatou e Iesu ina ia tatalo "e le aunoa" (MF&F 10:5). E silafia e Iesu e faafogfa ma tuuina mai e le Tama Faalelagi mea e sili ona lelei mo i tatou. Aisea tatou te le mananao ai i nisi taimi ina ia maua mea ua tuuina mai e le Tama Faalelagi? Aisea?

I lena lava taimi tatou te faapea atu ai, "Tama oi le Lagi," Na te faafogfa mai i a tatou tatalo ma e mafaufau ia i tatou ma o tatou manaoga. Ma o lea e fesoottai mai ai Ona fofoga ma Ona taliga ia te oe i le taimi nei. Na te faitauina o tatou mafaufau, ma Na te lagonaina o tatou loto. E le mafai ona e natia se mea mai ia te Ia. Ia, o le mea matagofie e Na te silasila mai ia te oe ma ni fofoga o le alofa ma le alofa mutimutivale—le alofa ma le alofa mutimutivale e le mafai ona tatou malamalamalama atoatoa i ai. Ae e ia te Ia le alofa ma le alofa mutimutivale i le taimi lava e te faapea atu ai, "Tama oi le Lagi."

O lea la o le taimi o le tatalo, o se taimi e paia tele. E le o Ia o se tagata e faapea mai, "Leai, ou te le faalogo atu nei ia te oe, aua e na o taimi lava e te oo ai i faigata e te sau ai ia te a'u." E na o tagata e faia lena mea. E le o Ia o se tagata e faapea mai, "Oi, e le mafai ona e vaai faalemafaufau i lou pisi i le taimi nei." E na o tagata e faia lena mea.

Tau ina ia tatou tatalo uma e pei ona sa aoao mai i tatou e Iesu ia tatalo ai, o lau tatalo ma le faamoe-moe lea i le suafa o le Alii o Iesu Keriso, amene. ■



Saunia e Elder J. Devn Cornish  
O Le Fitugafulu

## ○ Lava Ea Lo'u Lelei? Pe ○ Le A Ou Ausia Ea?

*Afai o le a e taumafai moni lava ma o le a e le fai alofaga pe fouvale—o le salamo soo ma le aioi atu mo le alofa tunoa—o le a mautinoa ai le "lava o lou lelei,"*

**T**uafafine ma uso pele, oka se faamanuiaga mo i tatou le potopoto ai ina ia aoaoina e auauna a le Alii. Pe le matagofie ea le tele o auala o loo taialaina ma faamanuiaina ai i tatou e lo tatou Tama Faalelagi? E finagalo moni lava o Ia ia tatou fo'i atu i le aiga.

E ala i le soloaiga o ni alofa mutimutivale agamalu a o avea ma se fomai talavou ua faatoa faauu mai se aoga faafomai, sa taliaina a'u i le aoga faafomai mo tamaiti i se polokalama e mauluga

tele le atamai ma le faigata. Ina ua ou feiloai atu i isi fomai, sa ou lagona o a'u le tagata aupito sili ona vaivai le atamai ma lē saunia. Sa ou manatu e matua leai ma se auala e mafai ai ona ou tutusa ma le toatele o le vaega.

I le amataga o le matou masina lona tolu, sa ou saofai ai i se potu tausimai i le falemai i le leva o le po, sa ou tagi ma tautulemoe a o ou taumafai ai e tusi se lipoti taofia mo se tamaitiiti na aafia i le niumonia. Ou te le'i lagonaina lava se lotovaivai tele faapea i lo'u olaga. Sa ou le iloaina pe faapefea ona togafitia se niumonia i se tamaitiiti e 10 tausaga le matua. Sa amata ona ou tuufesili po o le a la'u mea sa fai iina.

Ae i lena lava taimi, sa pa'i mai ai se fomai sinia i lo'u tauau. Sa ia fesili mai pe o a mai a'u, ma sa ou sasaa atu i ai lo'u mafatiaga ma popolega. O lana tali sa suia ai lo'u olaga. Sa ia ta'u mai ia te a'u lona mitamita faapea ai ma isi fomai sinia ia te a'u ma o latou lagona o le a avea a'u ma se fomai lelei tele. I se faapuuupuuga, sa ia talitonu ia te a'u i le taimi sa ou lē talitonuina ai a'u lava ia.

E pei foi o lo'u lava ia aafiaga, e tele ina tatou faalogo i o tatou tagata o fesili,



“O lava ea lo’u lelei o se tagata?” po o le “Pe o le a ou ausia ea le malo selesitila?” Ioe, e leai se mea faapea o le “lava o le lelei.” E leai ma se tasi o i tatou e mafai ona “mauaina” pe “agavaa” mo lo tatou faaolataga, ae o se mea masani lava le tomanatu pe faamata e taliaina i tatou i luma o le Alii, ona o le auala lea ou te malamalama ai i nei fesili.

O nisi taimi a tatou auai i le lotu, e faalotovaivaia i tatou e oo lava i ni valaaulia faamaoni ina ia faaleleia i tatou lava. Tatou te mafaufau leleoa, “E le mafai ona ou faia nei mea uma” po o le “O le a ou le lelei lava e pei o nei tagata uma.” Masalo tatou te lagonaina uma lea mea e tasi e pei ona ou lagonaina i le falemai i lena po.

Faamolemole, o’u uso e ma tuafafine pele, e tatau ona tuu lo tatou faatusatusaina o i tatou lava i isi tagata. Tatou te faapologaina i tatou lava e aunoa ma se uiga e ala i le fiatautavā ma le ola faatusatusa. Tatou te faamasino sese lo tatou agavaa faaletagata lava ia i *mea* tatou te maua pe le maua foi faapea ai ma *manatu o isi*. Afai e tatau ona tatou ola faatusatusa, ia o tatou faatusatusa lo tatou tulaga i le tuanai i lo tatou tulaga ua i ai i aso nei—faapea ai ma le tulaga tatou te mananao ia avea ai i le lumanai. E na o le pau le manatu e taua ia i tatou o le mea o loo finagalo ai lo tatou Tama Faalelagi ia i tatou. Faamolemole ia ole atu ma le faamaoni ia te Ia po o le a Sona finagalo ia te oe. O le a Ia alofa ma faasa’o mai ae le faalotovaivaia i tatou; o le togafiti lena a Satani.

Se’i ou tuu sa’o atu ma le manino. O tali i fesili “O lava ea lo’u lelei?” ma le “Pe o le a ou ausiaina ea?” o le “Ioe! O le a oo ina lava lo outou lelei” ma “Ioe, o le a outou ausiaina pe afai tou te salamo pea ma aua le fai ‘alofaga ma fouvale.” O le Atua o le lagi e le o se laufalī le alofa o loo saili i sooo se ‘alofaga e lafoai ese ai i tatou mai le taaloga. O Ia o lo tatou Tama e alofa atoatoa, ua naunau atili mai i lo se isi lava mea ia toe foi uma atu Lana fanau i le aiga ma mau faatasi ma Ia o ni aiga e faavavau. Na Ia foai moni mai lava Lona Alo e Toatasi na Fanaua ina ia le



fano i tatou ae maua le ola e faavavau!<sup>1</sup> Faamolemole ia talitonu, ma faamolemole ia faamoemoe ma faamafanafanova, mai lenei upumoni e faavavau. Ua faamoemoe lo tatou Tama Faalelagi mo i tatou ia ausiaina! O Lana galuega ma Lona mamalu lena.<sup>2</sup>

Ou te fiafia i le auala e masani ona aoao mai ai e Peresitene Gordon B. Hinckley lenei mataupu faavae. Sa ou faalogo o ia saunoa i nisi o sauniga, “Uso e ma tuafafine, o mea uma ua faamoemoeina e le Alii mai ia i tatou, o le taumafai, ae e ao ona e taumafai *moni* lava!”<sup>3</sup>

O le “taumafai moni lava” o lona uiga o le faia o le mea sili tatou te mafafia, iloaina o vaega e manaomia ona tatou faaleleia, ona toe taumafai lea. E ala i le faia sooo o lenei mea, tatou te latalata atili atu ai pea lava pea i le Alii, tatou te lagonaina atili ai pea Lona Agaga,<sup>4</sup> ma tatou maua atili ai pea Lona alofa tunoa, po o le fesoasoani.<sup>5</sup>

O nisi taimi ou te manatu ai, tatou te le o iloaina le tele o le manao o le Alii e fesoasoani mai ia i tatou. Ou te fiafia i upu a Elder David A. Bednar, lea na saunoa:

“O le toatele o i tatou ua malamalama lelei o le Togiola e mo tagata agasala. Peitai, ou te le o mautinoa pe

ua tatou iloaina ma malamalama o le Togiola foi e mo tagata o le au paia. . . .

“. . . Ma o le Togiola ua tuuina mai ai le fesoasoani mo i tatou e faatoilalo ma aloese ai i mea leaga ae ia faia le lelei ma avea ma tagata lelei. . . .

“. . . *E . . . ala i le alofa tunoa o le Alii . . . e maua ai e tagata taitoatasile malosi ma le fesoasoaniga e fai ai galuega lelei ia e le mafai ona latou [fai]. . . . O lenei alofatunoa o se mana gafatia . . .*” [Bible Dictionary, “Grace”; faoopoopo le faamamafa] . . . po o le fesoasoani faalelagi lea e matuui manaomia lava e i tatou taitoatasile e agavaa ai mo le malo selesitila.”<sup>6</sup>

Ma e na o le pau le mea tatou te faia e maua ai lenei fesoasoaniga faalelagi o le ōle atu lea, ona faatino lea i uunaiga amiotonu tatou te maua.

O le talafou sili e faapea, afai tatou te salamo faamaoni, o le a le taofia e a tatou agasala ua te’i tatou mai le faaeaina. Na faamatala mai e Moronae ia i tatou tagata solitulafono i ona aso: “Ae o sooo se taimi sa latou salamo ai ma saili le faamagaloga, ma le faamoemoe faamaoni, sa faamagaloina i latou.”<sup>7</sup>

Ma sa fetalai le Alii lava Ia e uiga i ē agasala:

“Ma afai e ta’utino mai e ia ana agasala i luma o oe ma a’u, ma salamo ma



le faamaoni o lona loto, ia e faamagaloina o ia, ma o le a Ou faamagaloina foi o ia.

"Ioe, ma o le tele o taimi e salamo ai lo'u nuu 'Ou te faamagalo ai i latou ia latou solitulafono faasaga mai ia te a'u."<sup>8</sup>

Afai o le a tatou salamo faamaoni, o le a faamagalo moni lava i tatou e le Atua, e tusa lava pe na tatou solia pea lava pea le agasala lava e tasi. E pei ona aoao mai Elder Jeffrey R. Holland: "Pe o le a lava le tele o avanoa e te manatu ua e misia, pe o le a foi le tele o mea sese e te lagona sa e faia, . . . , ou te molimau atu e te *le i* malaga lava i se mamao o le a le mafai ona aapa atu i ai le alofa faalelagi. E le mafai ona e magoto maualalo ifo nai lo le mea e suluia e le malamalama le i'u o le Togiola a Keriso."<sup>9</sup>

E le faapea la o le uiga o lenei mea i soo se ala e lelei le agasala. E i ai pea taunuuga o le agasala. O taimi uma e faamanualia ma faatiga ai e le agasala le tagata agasala ma i latou e aafia i ana agasala. Ma o le salamo moni e lē taitai faigofie.<sup>10</sup> Ma le isi, faamolemole ia malamalama e ui lava e aveesea e le Atua le ta'usalaina ma pisipisia o a tatou agasala pe a tatou salamo faamaoni, ae Na te le vave aveesea ia taunuuga uma o a tatou agasala. O nisi taimi e tumau ai lava ia i tatou i o tatou olaga atoa. Ma o le ituaiga sili ona

leaga o le agasala o le agasala ma le faamoemoe i ai lea e faapea ai se tasi, "E mafai ona ou agasala i le taimi nei ae salamo mulimuli." Ou te talitonu o se faatauemu moni lea i le taulaga ma puapuaga o Iesu Keriso.

Sa tautino mai e le Alii Lava Ia, "Ona o A'u o le Alii e lē mafai ona Ou vaai i luga o le agasala ma sina tikeri itiiti o le faatagaina."<sup>11</sup>

Ma sa folafola mai e Alema, "Faauta, ou te fai atu ia te oe, e lei avea lava le amioleaga ma fiafia."<sup>12</sup>

O se tasi o mafuaaga e patino ai le moni o le saunoaga a Alema e faapea o le faisoo o le agasala, tatou te faamamao ai i tatou lava mai le Agaga, ma oo ai ina faalotovavaia, ona tuu ai lea o le salamo. Ae ou te toe fai atu, ona o le Togiola a le Faaola, ua mafai ai ona tatou salamo ma faamagaloina atoa ai, i le vave tatou te salamo faamaoni ai.

O le mea e le mafai ona tatou faia o le fai 'alofaga nai lo le salamo E le fetau i foi le tauamiontuina o i tatou lava i a tatou agasala i le faapea, "Ua silafia e le Atua ua faigata tele mo a'u, o lea Na te taliaina ai a'u e pei ona i ai a'u." O le "taumafai moni" o lona uiga o le tumau ai pea a o tatou ausia atoatoa tulaga faatonuina a le Alii, lea e manino le faauigaina i fesili e fesiligia ai i tatou ina ia maua se pepa faataga o le malumalu.

O le isi mea o le a mautinoa lava e taofia i tatou mai le lagi ma aveesea i tatou mai le fesoasoani tatou te manaomia i le taimi nei, o le fouuale. Mai le tusi a Mose, ua tatou aoao ai na tuliesea Satani mai le lagi ona o le fouuale.<sup>13</sup> Tatou te fouuale i soo se taimi lava tatou te faapea ifo ai i o tatou loto, "Ou te le manaomia le Atua, ma ou te le tau salamo."


I le avea ai ma se fomai i le potu tigaina o tamaiti, ou te iloa afai e teena ma le le tatau ai e se tasi se togafitiga e laveai ai le soifua, e mafai ona oo atu i le oti faaletino e le manaomia. E faapena foi, a tatou fouuale e faasaga i le Atua, ua tatou teenaina le tatou fesoasoaniga lava e tasi ma le faamoemoe, o Iesu Keriso lea, lea e tau atu ai i le oti faaleagaga. E leai ma se tasi o i tatou e mafai ona faia lenei mea i lo tatou lava malosi. E leai ma se tasi o i tatou o le a

"lava le lelei," vagana ai e ala i le alofa ma le alofa mutimutivale o Iesu Keriso,<sup>14</sup> ae ona e faaaloalogia e le Atua lo tatou fitalia, e le mafai ai foi ona laveaiina i tatou e aunoa ma lo tatou taumafai. O le auala lena e galue ai le paleni i le va o le alofatunoa ma galuega. E mafai ona tatou maua le faamoemoe ia Keriso ona e finagalo o Ia e fesoasoani mai ma suaia i tatou. O le mea moni, ua leva lava ona fesoasoani atu o Ia ia te oe. Tau lava ina e taofi ma mafaufau ma iloa Lana fesoasoani i lou olaga.

Ou te molimau atu afai o le a e tau-mafai moni lava ma o le a e le fai alofaga pe fouvale—o le salamo soo ma le aioi atu mo le alofa tunoa, po o le fesoasoani, a Keriso—o le a mautinoa lava le "lava o lou lelei," o lona uiga, taliaina i luma o le Alii; o le a e ausia ai le malo selesitila ua atoatoa ia Keriso; ma o le a e mauaina ai faamanuiaga ma le mamalu ma le olioli e finagalo ai le Atua mo Ana fanau pele taitoatas—e aofia patino ai oe ma a'u. Ou te molimau atu o loo soifua le Atua ma e finagalo o Ia ia tatou foi atu i le aiga. Ou te molimau atu o loo soifua Iesu. I le suafa paia o Iesu Keriso, amene. ■

#### FAAMATALAGA

1. Tagai Ioane 3:16.
2. Tagai Mose 1:39.
3. O le fasifauitau tonu lenei mai ia Peresitene Hinckley e le o maua i ni lomiga, ae ua faamaumauina le fuaitau lenei: "Tau lava o le faia o le mea sili e te mafai, ae ia mautinoa o le mea aupito silisili lea e te faia" ("A Challenging Time—a Wonderful Time," *Teaching Seminary: Preservice Readings* [Church Educational System manual, 2004], 68–74). Sa ia saunoa foi: "Faamolemole aua e te faitio soo ia te oe lava ia i ni manatu o le toilalo. Aua e te faatutuina ni sini e sili atu nai lo mea e te gafatia ona ausia. Tau lava o le fai o mea e mafai ona e faia, i le auala aupito sili e te iloa fai ai, ma o le a taliaina e le Alii au taumafaga" ("Rise to the Statue of the Divine within You," *Ensign*, Nov. 1989, 96).
4. Tagai Mataupu Faavae ma Feagaiga 50:24.
5. Tagai Eteru 12:27.
6. David A. Bednar, "O Le Togiola ma le Malaga o le Olaga Faaletino," *Liahona*, Apr. 2012, 14.
7. Moronae 6:8.
8. Mosaea 26:29–30.
9. Jeffrey R. Holland, "O Le Au Faigaluega i le Tovine," *Liahona*, Me 2012, 33.
10. Tagai Mataupu Faavae ma Feagaiga 19:15–19.
11. Mataupu Faavae ma Feagaiga 1:31.
12. Alema 41:10.
13. Tagai Mose 4:3.
14. Tagai 2 Nifae 2:6–8.



Saunia e Elder Neil L. Andersen  
O Le Korama a Aposetolo e Toasefululua

# O Se Molimau a le Atua

A e tatalo soo ma le faamaoni mo ni avanoa e te “tu ai o se molimau a le Atua,” o le a oo mai na avanoa.

**O** le tele o le galuega taua a le Atua e le vaaia e mata o le lalolagi. O le seneturi lona ono a o lei aumaia e Keriso ni tagata mafaufau faaaloalogia e pei o Konefusi i Saina ma Puta i Initia i Sasae, ae sa i ai le mana o le perisitua a le Atua i luga o Tanielu, le perofeta sa avefaatagataotauaina i le taimi o le nofoaiga a le tupu o Papelonia o Nepukanesa.

I le atatuvalavele tele, na faatonuina ai e le Tupu o Nepukanesa ana taulaitu ma vaafaatau e faamatala atu ia te ia po o le a le mea sa ia miti ai atoa ma le faauigaga o le miti. Ioe, sa le mafai ona latou ta'u atu i le tupu le mea sa ia miti ai ma latou finau atu. “E leai se tagata i le lalolagi na te mafai [ona faia lenei mea, po o se tupu foi na te fesilgia] se mea faapena.”<sup>1</sup> Sa matua ita le Tupu o Nepukanesa i lo latou toilalo ma tautino atu ma le ita o le a fasiotia uma ana faufautua.

O Tanielu, o se tasi o tagata popoto a le Tupu, sa tatalo mo le “alofa mai le Atua . . . i lenei mea sa lilo.”<sup>2</sup>

Sa tupu se vavega. O le mealilo e uiga i le mea sa miti ai le tupu sa faaali atu ia Tanielu.

faailoa mai ia Nepukanesa le tupu o mea e oo mai i aso amuli. . . .

“O le Atua o le lagi,” sa fai atu ai Tanielu, “[o le a] faatuina le malo, [o se maa na tofia ae lei tofia i lima, o le a avea ma mauga tele ma tumu ai le lalolagi atoa] e le faaumatia . . . [ae tumau] e faavavau.

“. . . Sa fai atu Tanielu, “E moni lava le li'a, e faamaoni foi le uiga.”<sup>3</sup>

Faatai ai ma le faamatalaina o lana miti ma le faauigaga o le miti, sa saunoa atu ai ma le malosi le tupu, “O lo outou Atua o le Atua o atua ia, ma le Alii o tupu.”<sup>4</sup>

Mai le fesootaiga faavavega a le Atua ia Tanielu na oo mai ai le valoiaina o le lumanai o le talalelei a Iesu Keriso o le a toefuataiina mai i le lalolagi, “se malo . . . [o le a tumu a] le lalolagi atoa . . . e le toe faaumatiaina . . . [ae ia tumau] e faavavau.”

O le aofaiga o tagata o le Eklesia i aso e gata ai o le a toalaiti lava, e pei ona valoia ai e Nifae, ae o le a i ai i latou i luga o le fogaelele atoa, ma o le a avanoa ai le mana ma sauniga o le perisitua i tagata uma e manaomaiaina, ma faatumuina ai le lalolagi e pei ona muai ta'u mai e Tanielu.<sup>5</sup>

I le 1831, sa maua ai e le Perofeta o Iosefa Samita le faaaliga lenei: “O ki o le malo o le Atua [ma le faapotopotoina o Israelu mai tuluiga e fa o le lalolagi] ua tuu atu i tagata i luga o le lalolagi,

Sa avatu Tanielu i luma o le tupu. “Ua e mafaia ea ona faailoa mai ia te au le miti na a'u iloa, atoa ma lona uiga?”

Sa tali atu Tanielu:

“O tagata popoto, o vaafaatau, ma taulaitu [e le o mafai ona ta'u atu ia te oe le mea na e miti a]. . . .

“[Ae o loo] i ai [se] Atua i le lagi [e mafai ona faaali mai nei mea ma Ia]



ma mai iina o le a taavale atu ai i luma le talalelei i tuluiga o le lalolagi, e pei ona o le a taavale atu le maa na tofi mai le mauga e aunoa ma lima, seja tumu ai le lalolagi atoa.”<sup>6</sup>

#### O Se Tiutetauave Tatou te Faaso Atu

O le faapotopotoina o Isaraelu o se vasega. E pei o se paso tele lava, ia o ona fasi vaega o le a faatulaga tonu a o lei oo i mea mamalu e tutupu o le Afio Mai Faalua. E pei lava o le ono faafenu-miaia o i tatou i se mauga o fasi vaega o le paso, atonu sa vaaia foi e le uluai Au Paia le poloaiga ia avatu le talalelei toefuataiina i le lalolagi atoa o se galuega toetoe lava a le mafai ona fai. Ae sa latou amatalia, i le tasi le tagata, tasi le fasi vaega o le paso i le taimi e tasi, mauaina o pito sa'o, galulue ia faaauivi sa'o lenei galuega paia. I sina mea itiiti ma sina mea itiiti, ma amata taavale atu

ai i luma le maa sa tofia e aunoa ma lima; mai le faitau selau i le faitau afe, i sefulu o afe, ma o le taimi nei ua faitau miliona le Au Paia osifeagaiga o Aso e Gata Ai i malo uma o loo faafesootaia fasi vaega o le paso o lenei galuega ofoofogia ma le maofa.

O i tatou taitoataso o se fasi vaega o le paso, ma ua fesoasoani i tatou taitoataso ia faatulaga isi fasi vaega taua. E taua tele oe i lenei galuega tele. Ua manino nei la tatou vaai i luma atu. Ua mafai ona tatou vaai o loo faaauau pea vasega, ma o loo taijalaina i tatou e le aao o le Alii a o tatou faatumuina avanoa o loo totoe. Ona, “fetalai lea le Ieova Silisili ua maea le galuega,”<sup>7</sup> ma o le a toe afio mai o Ia i le mamalu ma le viiga.

Sa saunoa Peresitene Thomas S. Monson e faapea: “O le taimi lenei mo tagata uma ma faifeautalai e o

mai faataso ai, ia galulue faataso . . . ina ia aumai agaga ia te Ia. . . . O le a Ia fesoasoani mai ia i tatou i a tatou galuega pe afai o le a tatou galulue i le faatuatua e faataunu Lana galuega.”<sup>8</sup>

O le tiutetauave na tofia mai le lagilea sa taoto muamua i luga o tauau o faifeautalai faamisiona ua taoto nei i luga o i tatou uma. Tatou te mananao uma ia faaso atu le talalelei toefuataiina, ma le agaga faafetai, e faitau afe e papatisoina i vaiaso taitasi. Ae oo foi lava i lenei faamanuiaga matagofie, o lo tatou popolega mo o tatou uso ma tuafafine ma lo tatou manao ia faafafia le Atua, ua aumaia ai se naunautaiga malosi e faaso atu ma faamalosia le malo o le Atua i le lalolagi atoa.

#### O Tapulaa o le Ta'usalaina

E oo lava i se manao malosi e faaso atu le talalelei, ae atonu foi e te le o fiafia tele i le tulaga manuia o au taumafaiga ua tuanai. Atonu e te lagona e pei o se uo sa faapea mai, “Ua ou talanoa i lo matou aiga ma uo e uiga i le Ekalesia, ae e toalaiti lava na faaalia se naunau, ma e faataso ai ma ni teteega taitasi, ua ou faatuutuu ai lava. Ou te iloa e tatau ona ou faia atili, ae ua utia a'u, ma e na o le pau le mea ua ou lagonaina o se tausalaga tele.”

Sei vaai pe mafai ona ou fesoasoani.

O le tausalaina e i ai sana matafai oia ona na te fagua i tatou i ni suiga e manaomia ona tatou faia, ae o loo i ai ni tapulaa i le mamao o le a fesoasoani ai tausalaga ia i tatou.

O le tausalaina e pei lava o se maa taavale i totonusi o se taavale penisini. E mafai ona faamumuina le taavale, faaola le afi, ma faamumu moli, ae o le a ia le tuuina atua le penisini mo le malaga umi o i luma atu. O le maa, na o ia lava, e le lava lea. Ma e faapena foi le tausalaina.

Ou te fautua atu ia tuu lou lagonaina o le tausalaina e uiga i sooo se le atoatoa e te manatu o loo ia te oe i le faasoaina atu o le talalelei. Ae, ia tatalo, e pei ona aoao mai Alema, mo ni avanoa “ia tu [ai] o se [molimau] a le Atua i taimi uma ma i mea uma, ma i nofoaga uma . . . ina ia mafai ona togolaina [isi] e le Atua, ma faitauina faataso ma



O le faapotopotoina o Isaraelu e pei o se paso tele o le a faatulagaina ona vaega a o lumanai le Afio Mai Faalua. O i tatou taitoataso o se vaega o le paso, ma e tofia i tatou taitoataso ma se vaega e fesoasoani ai i le faatulagaina o isi vaega taua.

i latou o le uluai toetu, [ma] maua le ola e faavavau.<sup>9</sup> E matua malosi atu lenei uunaiga nai lo le tausalaina.

Ina ia avea ma se molimau a le Atua i taimi uma ma i nofoaga uma ua atagia ai uma le auala tatou te ola ai ma le auala tatou te tautatala ai.

Ia tatala atu ou lagona e uiga i lou faatuatua ia Keriso. A oo mai se avanoa e faia ai, tautala atu e uiga i Lona soifugaga, Ana aoaoga, ma Lana meaalofa lemafaatusalia i tagata uma. Faasoa atu Ana upumoni mamana mai le Tusi a Mamona. Ua Ia tuuina mai ia i tatou lenei folafolaga. "Ai se na te ta'uta'u au i luma o tagata, o au foi ou te tautau o ia i luma o lo'u Tama o i le Lagi."<sup>10</sup> Ou te folafola atu a outou tatalo soo ma le faamaoni mo ni avanoa e "tu ai o se molimau a le Atua," o le a oo mai na avanoa, ma o i latou o loo saili atili i le malamalama ma le poto o le a tuu atu i ou luma. A e tali atu i uunaiga faaleagaga, o le a molioo atu e le Agaga Paia au upu i le loto o le isi tagata, ma e i ai se aso o le a tautau ai e le Faaola oe i luma o Lona Tama.

#### O Se Taumafaiga Faavaega

O le galuega faaleagaga o le fesoasoani atu i se tasi ia sau i le malo o le Atua, o se taumafaiga faavaega. Ia vave faaaoga faifeautalai i le vave e te mafaia, ma tatalo mo le fesoasoaniga faalelagi. Ae ia manatua, o le taimi e liua ai se tasi e le o se mea lena a oe.<sup>11</sup>

O Kamla Persand sa sau mai Mauritius Islands, sa auai i le aoga faafomai i Bordeaux, Farani, ina ua ma feiloai ia Fepuari o le 1991. Sa matou tatalo o se aiga ina ia mafai ona faasoa atu le talalelei i se tasi o loo saili i le upumoni, ma sa matou aaooina o ia i totonus o le matou fale. Sa faamanuiaina au e faatino lona papatisoga, ae e le o i matou na sili ona faia ni faatosinaga taua i le auai ai o Kamla i le Ekalesia. O uo, faifeautalai, ma e oo lava i tagata o le aiga sa avea ma ni "molimau a le Atua" i lona atunu moni, ma i se tasi aso i Farani, ina ua sa'o le taimi mo Kamla, sa ia faia ai le faaiuga ia papatisoina. Ia, i le 25 tausaga mulimuli ane, o faamanuiaaga o lena faaiuga ua siomia atoa ai o ia, ma o loo avea lona atalii ma se faifeautalai i Madagascar.



Sa oo mai le liua o Diego Gomez (luga, laina pito i luma, lona tolu mai le itu taumatau) ma Kamla Persand (i le itu taumatau ma lona aiga i le 25 tausaga talu ona maea lona papatisoga) i le fesoasoani ma le lagolago o le toatele o e na aapa atu ia te i latou o ni "molimau a le Atua."

Faamolemole aua ne'i e tagai i au taumafaiga e faasoa atu le alofa o le Faaola i se isi tagata o se suega e pasi pe le pasi faatasi ma sau togi ua fuafua ai le lelei o le tali mai o au uo i ou lagona po o se valaaulia e feiloai ma faifeautalai.<sup>12</sup> Faatasi ma o tatou mata faaletino, e le mafai ona tatou faamasonina le aafiaga o a tatou taumafaiga, pe mafai foi ona tatou faamautuina le faasologa o taimi. A e faasoa atua le alofa o le Faaola i se isi tagata, o taimi uma lava e te maua ai le togi A+.

O nisi malo ua faatapulaaina le galuega a faifeautalai, ua taitai atu ai o tatou tagata tautupu ia faaali atu se lototeli sili atu i le avea ai ma "molimau a le Atua i taimi uma ma i nofoaga uma."

E tele ina tuu e Nadezhda mai Moscow le Tusi a Mamona i se pusa faamealofo faatasi ai ma le tele o lole e tuu ai i totonus. "Ou te tau atu ia i latou," sa ia fai mai ai, "o le mealofo aupito sili lena ona suamalie e mafai ona ou avatu ia i latou."


E lei leva ona uma ona papatisoina i Iukureini, sa maua ai e Svetlana le uunaiga e faasoa atu le talalelei i se alii sa ia vaiaa soo i luga o le pasi. Ina ua oso i lalo le tagata lea i le mea e nofo ai, sa ia fesili atu i ai, "E te fia iloa atili e uiga i le Atua?" Sa fai mai le alii lea, "Ioe." Sa aaooina e faifeautalai ia Viktor,



ma sa papatisoina o ia. Mulimuli ane sa faamanuina ai o ia ma Svetlana i le Malumalu o Freiberg Siamani.

Ia faaeteete, e mafai ona oo mai ou faamanuiaaga i ni auala e lei faamoemoeina.

I le fitu tausaga talu ai, sa ma feiloai atu ai ma Kathy ia Diego Gomez ma lona aiga matagofie i le Aai o Sate Leki, Sa latou auai i se fale tatala o le malumalu faatasi ma i ma'ua ae sa teena ma le faaaloalo le ma valaaulia ia aoao atili e uiga i le Ekalesia. Ia Me na sei mavae atu nei, sa faateia ai au i se telefoni mai ia Diego. O mea na tutupu i lona olaga na taitai atu ai o ia i ona tulivae. Sa maua lava e ia ia faifeautalai, faia ia lesona, ma sauna mo le papatisoga. I le aso 11 o Iuni na sei mavae atu nei, sa ou savali atu ai i vai o le papatisoga faatasi ma la'u uo ma se soo, o Diego Gomez. O lona liua sa i ai i lana lava taimi ma sa oo mai ma se fesoasoani ma se lagolago a le toatele na aapa atu ia te ia o ni "molimau a le Atua."



## O Se Valaaulia i le Autalavou

I a tatou talavou oooofogia ma talavou matutua i le lalolagi atoa, ou te tuu atu ia te outou se valaaulia faapitoa ma se lu'i ina ia avea ma ni "molimau a le Atua." O i latou o loo siomiaina oe o loo taliaina ni suesuega faaleagaga. Manatua le paso? E te le sau i le laulau e aunoa ma se mea, ae ua i ai tekinolesi ma ala faasalalau faaagafesootai e te faaaogaina. Matou te manaomia oe; o loo manaomia oe e le Alii ina ia auai atili i lenei galuega tele.

Sa fetalai mai le Faaola, "O lenei ia outou o atu e fai nuu uma lava ma soo, ma papatiso atu ia te i latou i le suafa o le Tama, ma le Atalii, ma le Agaga Paia."<sup>13</sup>

E le o se mea faafuvaveta lou ola ai i Aferika; Asia; Europa; Amerika i Matu, Tutotonu, po o Saute; le Pasefika; po o se isi nofoaga i le lalolagi a le Atua, ona e tatau ona oo atu le talalelei i "atunuuma, ituiga, gagana, ma nuu."<sup>14</sup>

"O le Atua o le lagi [ua] faatuina le malo, [o se maa na tofia ae lei tofia i lima, o le a avea ma mauga tele ma tumu ai le lalolagi atoa] e le faaumatiia . . . [ae tumau] e faavavau.

" . . . E moni lava le li'a, e faamaoni foi le uiga."<sup>15</sup>

Ou te faamaea atu i upu mai le Mataupu Faavae ma Feagaiga: "Valaau

atu i le Alii, ina ia alu i luma lona malo i luga o le lalolagi, ina ia maua e e o nonofo ai, ma sauni mo aso o le a oo mai, lea o le a afio mai ai i lalo le Atalii o le Tagata [mai] le lagi, ua laei i le pupula o lona mamalu, e fetaia'i ma le malo o le Atua . . . i luga o le lalolagi."<sup>16</sup> I le suafa o Iesu Keriso, amene. ■

## FAAMATALAGA

1. Tanielu 2:10.
2. Tanielu 2:18.
3. Tanielu 2:26–28, 28, 44–45; tagai foi i fuaiupu 34–35.
4. Tanielu 2:47.
5. Tagai 1 Nifae 2:12–14.
6. Mataupu Faavae ma Feagaiga 65:2; tagai foi Mataupu Faavae ma Feagaiga 110:11.

7. *Aoaoga a Peresitene o le Ekalesia: Iosefa Samita* (2007), 444; tagai foi Boyd K.

Packer, "Ua Faatuina le Tagavai o le Upumoni," *Liahona*, Nov. 2003, 27.

8. Thomas S. Monson, "Susu Maia i le Konafesi," *Liahona*, Nov. 2013, 4.

9. Mosaea 18:9.

10. Mataio 10:32.

11. I se masina talu ai sa ou i ai i Santa Maria, Pasila. Sa tau mai e Uso João Grahl ia te au, a o avea ma alii talavou, sa auai o ia i le lotu mo le lua tausaga, sa manao ia papatisoina, ae sa le faatagaina e lona tama. I se tasi aso sa ia tau atu i ona tuafafine, sa tutusa o latou manao, e manaomia ona latou tootutuli ma tatalo ina ia faamaluluina e le Atua le loto o lo latou tama. Sa tootutuli i latou i le tatalo ona õ ai lea i le a'oga.

Ina ua latou toefoi mai i le tale i lena aso, sa faateia i latou, sa sau le uso o lo latou tama, mai se aai mamao lava. Sa i ai o ia i lo latou tale i talanoa ma lo latou tama. Faatasi ai ma le uso o lo latou tama i le potu, sa toe fesili atu ai le fanau i lo latou tama pe mafai ona papatisoina i latou. Sa laa mai i luma le uso o lo latou tama ma tuu lona lima i luga o le tauau o lona uso laititi ma faapea atu i ai, "Reinaldo, e moni. Tuu i latou e papatiso." Sa lei iloa e i latou, sa papatisoina le uso o lo latou tama i ni nai masina na mavae atu.

Sa uunaia le uso o le tama ia malaga atu i le tale o lona uso, ma ona sa ia "tu o se molimau a le Atua" i lena aso, sa faatagaina ai ona tei ina ia papatisoina. I nai masina mulimuli ane, sa papatisoina ai Reinaldo ma lona toalua. Sa taliina e le Atua ia tatalo a na tamaiti i se ala faavavega e ala i se tasi na naunau ia avea ma "se molimau a le Atua."


12. "E faamanuiaina oe pe a valaaulia isi, e tusa lava pe o le a le tali mai" (Clayton M. Christensen, *O Le Mana o Faifeautalai i Aso Uma* [2012], 23; tagai foi i le everydaymissionaries.org).

13. Mataio 28:19.

14. Mosaea 15:28.

15. Tanielu 2:44–45; tagai foi i fuaiupu 34–35.

16. Mataupu Faavae ma Feagaiga 65:5.



E o mai le autalavou ma talavou matutua i le lalolagi atoa i le laulau ma tekinolesi ma ala o faasalauga faaleagafesootai latou te faaaogaina.



**Fofogaina e Peresitene Henry B. Eyring**  
Fesoasoani Muamua i le Au Peresitene Sili

# O Le Lagolagoina o Taitai o le Ekalesia

**U**so e ma tuafafine, ua valaaulia au e Peresitene Monson e tuu atu suafa o Taitai Aoao ma Fitugafulu Eria o le Ekalesia mo la outou palota lagolago.

E tuuina atu ina ia tatou lagolagoina Thomas Spencer Monson o se perofeta, tagatavaai, ma talifaaaliga ma o le Peresitene o Le Ekalesia a Iesu Keriso o le Au Paia o Aso e Gata Ai; Henry Bennion Eyring o le Fesoasoani Muamua i le Au Peresitene Sili; ma Dieter Friedrich Uchtdorf o le Fesoasoani Lua i le Au Peresitene Sili.

O e e lagolagoina ia faailoa mai.  
O e faatuiese ia faailoa mai.

E tuuina atu ina ia tatou lagolagoina ia Russell Marion Nelson o le Peresitene o le Korama a Apusetolo e Toasefululu ma uso nei o lena Korama: Russell M. Nelson, Dallin H. Oaks, M. Russell Ballard, Robert D. Hales, Jeffrey R. Holland, David A. Bednar, Quentin L. Cook, D. Todd Christofferson, Neil L. Andersen, Ronald A. Rasband, Gary E. Stevenson, ma Dale G. Renlund.



O e e lagolagoina, faamolemole ia faailoa mai.

A i ai se faatuiese ia faailoa mai.

E tuuina atu ia tatou lagolagoina ia fesoasoani i le Au Peresitene Sili ma le Korama a Aposetolo e Toasefululu o ni perofeta, tagatavaai, ma talifaaaliga.

O i latou uma e lagolagoina, faamolemole ia faailoa mai.

O e faatuiese, pe afai o i ai, i le faailoga lava lea.

E tuuina atu ina ia faamalolo mai le agaga faafetai mo a latou auaunaga tulagaese ia Elder Daniel L. Johnson, Jairo Mazzgardi, Kent F. Richards, ma Francisco J. Vinas o ni Fitugafulu o le Pulega Aoao ma faamamaluina i latou o ni Pulega Aoao ua malolo ma le mamalu. Tatou te faamamaluina foi le auaunaga a Elder Per G. Malm, lea na maliu i le aso 26 o Julai, 2016. Matou te faailoa atu lo matou alofa ma faamaiseg faamomoiloto ia Sister Malm ma le la fanau ma fanau a fanau.

O i latou e fia aufaatsasi ma i matou e tuu atu le agaga faafetai i nei Uso mo la latou tautua maoae, faamolemole ia faailoa mai.

E tuuina atu ina ia tatou faamalolo mai ia Alan R. Walker o se Fitugafulu Eria. O e fia au faatasi ma i matou e faailoa atu le lotofaafetai ia Brother Walker mo lana auaunaga, faamolemole faailoa mai.

E tuuina atu ia tatou lagolagoina uso fou nei o Fitugafulu Eria: Bhanu K. Hiranandani ma Sandino Roman.

O i latou uma e lagolagoina, faamolemole ia faailoa mai.

O e faatuiese pe afai e i ai.

Ua tuuina mai tatou te lagolagoina isi Au Pulega Aoao, Fitugafulu Eria, ma Au Peresitene Aoao o Ausilali e pei ona i ai nei.

O i latou uma e lagolagoina, faamolemole ia faailoa mai.

O e faatuiese, pe afai o i ai, i le faailoga lava lea.

Peresitene Monson, ua faamauina le palota. Matou te valaaulia i latou o e na faatuiese i soo se tofiga ia faafesootai tou peresitene o siteki.

O'u uso e ma tuafafine pele, faafetai atu mo lo outou faatuatua ma tatalo mo taitai o le Ekalesia. ■



**Saunia Elder Quentin L. Cook**  
O Le Korama a Aposetolo e Toasefululuua

# Totoa i le Molimau ia Iesu

*E le mafai ona i ai ni a tatou molimau o le Tama ma le Alo ae tatou fenumia'i ma lē mautonu i maa tu'ia.*

**O**le ola e faavavau o le meaalofa silisili lea a le Atua ma e tuuina atu ia i latou e "tausia . . . poloaiga a le [Atua] ma tumau e oo i le iuga."<sup>1</sup> I le isi itu, o le ola e faavavau faatasi ma lo tatou Tama Faalelagi e le tuuina atua i "e sa lei totoa i le molimau ia Iesu."<sup>2</sup> E tele ni maa tu'ia i lo tatou lototoa e mafai ona taofia i tatou mai le ausiaina o le sini o le ola e faavavau.<sup>3</sup> O maa tu'ia e mafai ona lavelave; se'i ou faamanino atu.

I le tele o tausaga talu ai sa fausia ai e lo'u tama se tamai fale i se vaega o le fanua o le faatoaga sa ola ae ai o ia. O le faataatiaga o le laufanua atoa sa ma'eu na'ua. Ina ua fausia puipui o le tama'i fale, sa ou asiasi atu i ai. Sa faateia lava a'u i le faamalama na i ai se vaaiga sa taulai sa'o atu lava i se pou moli sa le'i mamao ese mai le fale. Ia te a'u, sa matua faalavelave tele i le vaaiga ofoofogia.

Sa ou fai atu, "Tama, aisea na e faatagaina ai i latou e tuu le pou moli i luma tonu o lau vaaiga mai le faamalama?"

O lo'u tama, o se tagata toaga ma to'a, sa alaga mai ma ni lagona, "Quentin, o le pou moli le la o le mea

aupito sili lea ona matagofie ia te a'u i le faatoaga atoa lava!" Ona ia faamautu mai lea: "A ou vaai atu i le pou le la, ou te iloaina, e le pei o le taimi na ou ola a'e ai iinei, o le a ou le toe asuvai i ni paelo mai le vaipuna e ave i le fale e fai ai kuksa, fufulu ai o'u lima, pe taele ai. Ou te le toe tutuina ni moli ga'o po o ni moli fagu i le po e faitautusi ai. Ou te manao ia ou vaai i le pou moli le la i le ogatotonu o le faamalama ou te matamata ai.

Sa ese foi se vaaiga a lo'u tama i le pou moli nai lo a'u. Ia te ia, o lena pou sa fai ma faatusa o se olaga ua siitiaina, ae ia te a'u o se maa tu'ia i se vaaiga ofoofogia. Sa faatauaina e lo'u tama le eletise, mōlī, ma le māmā e sili atu i lo se vaaiga matagofie. Sa vave ona ou iloaina e ui sa avea le pou ma se maa tu'ia ia te a'u, ae sa i ai sona uiga moni faafaatusa tele i lo'u tama.

O se maa tu'ia o "se faalavefau i se talitonuga po o se malamalamaga" po o "se faafitauli i le alualu i luma."<sup>4</sup> O le tautevateva faaleagaga o le "pa'u atu lea i le agasala po o le faatautee."<sup>5</sup> O se maa tu'ia e mafai ona avea ma soos mea e faalavefau ia i tatou mai le ausiaina o sini amiontonu.

E le mafai ona i ai ni a tatou moli-mau o le Tama ma le Alo ae tatou fenumia'i ma lē mautonu i maa tu'ia. E le tatau ona tatou pauu atu i lena mailei. O a tatou molimau e uiga ia i Laua e manaomia ona faatumauina le mama ma le faigofie e pei o le puipuiga faigofie a lo'u tama o le pou moli i le faatoaga na ia ola a'e ai.

O a nisi o maa tu'ia o loo faafenumia'i ma faafaigataina a tatou molimau mama ma faigofie e uiga i le Tama ma le Alo ma taofia ai i tatou mai le totoia i lena molimau?

## O Le Tasi Maa Tu'ia o Filisofia a Tagata

Ua tatou tuuto atu i ituaiga uma o le poto ma talitonu "o le mamalu o le Atua o le atamai lea."<sup>6</sup> Ae ua tatou iloa



foi o le togafiti e fiafia i ai le tiapolo o le taitai ese lea o tagata mai le Atua ma mafua ai ona latou tautevateva e ala i le faamamafaina o filosofia [po o manatu] o tagata e sili atu i lo le Faaola ma Ana aoaoga.

O le Apostolo o Paulo o se molimau mautinoa ia Iesu Keriso ona o se aafiaga faavavega ma le Faaola na suia ai le olaga.<sup>7</sup> O le talaaga tulagaese o Paulo na saunia ai o ia e fesootai atu i tagata o aganuu e tele. Sa alofa o ia i le "faigofie ma le faamaoni" o tagata Tesononia ma le "alofa agamalu" o tagata Filipi.<sup>8</sup> Sa ia muai iloaina e faigata atu ona fesootai i le atamai ma le faaleaganuu o tagata Eleni. I Atenai i luga o Areopako, sa ia taumafai ai se talanoaga faalefilosofia ma sa teenaina. I tagata Korinito, sa tonu ai ia te ia ia tau lava o le aoao atu "o le aoaoga faavae a Keriso na faasatauroina."<sup>9</sup> I le faaogaina o upu a le Apostolo o Paulo:

"E lei sauni atu foi la'u upu, ma la'u tala'iga i upu mālie o le poto o tagata, a e peitai o le faasino mai e le Agaga ma le mana:

"Ina ia le i ai lo outou faatuatua i le poto o tagata, a o le mana o le Atua."<sup>10</sup>

O nisi o tala sili ona ofoofogia o tusitusiga paia e uiga i le Faaola ma Lana misiona o loo ta'u mai i le 1 Korinito. O le mataupu—15—ua matua gauai atu i ai le lalolagi atoa e ala i faatinoga faamusika a George Frideric Handel, le *Messiah*.<sup>11</sup> O loo i ai aoaoga faavae loloto e uiga i le Faaola. I le vaega lona tolu o le *Messiah*, lea e sosoo lava ma le "Hallelujah Chorus," o loo faaaogaina ai le tele o mau mai le 1 Korinito 15. I ni nai fuaiupu nei, o loo faamatalaina ai ma le matagofie e Paulo nisi o mea na ausiaina e le Faaola.

"[Aua] o lenei ua toe faatuina mai Keriso i e ua oti, ua avea ma faapolopolo o e ua momoe.

"Aua ua oo mai le oti talu le tagata, ua oo mai foi le toe tutu o e ua oti talu le tagata.

"Aua faapei ona oti uma ia Atamu e faapea foi ona faolaina uma ia Keriso. . . .

"Le oti e, o fea o i ai lou tui? Le tuugamau e, o fea o i ai lou manumalo? . . .



"A e faafetai i le Atua, o le na te foaina mai le manumalo ia te i tatou talu lo tatou Alii o Iesu Keriso."<sup>12</sup>

Ua tatou iloa o se vaega na tupu ai le Liliuese ona o filosofia a tagata na faasilisili i lo aoaoga faavae autu ma taua a Keriso. Nai lo le faigofie o le savali a le Faaola, o le tele o upumoni manino ma taua sa suia pe leiloloa. O le mea moni, sa talia e le FaaKerisiano nisi o uputuu faalefilosofia FaaEleni e faamaonia ai o latou talitonuga faatasi ma a latou aganuu sa i ai. Sa tusia e le tusi talafaasolopito o Will Durant: "Sa lei faaumatiaina e le FaaKerisiano faiga faapaupau; sa ia vaetamaina mai. Sa mou atu tu ma aga FaaEleni, ae tulai mai ai se olaga fou ia i latou sa apoaina ni ona vaega."<sup>13</sup> I le talafaasolopito, faapea ai ma o tatou lava aso, e teena e nisi tagata le talalelei a Iesu Keriso ona, i o latou manatu, e le o lava se lavelave faaleatamai o i ai.

I le amataga o le Toefuataiga, e toatele sa tautino e mulimuli i aoaoga a le Faaola. E tele atunu sa manatu ia i latou lava o ni malo Kerisiano. Ae e oo foi i lena taimi sa i ai se valoaga e uiga i se taimi sili atu ona faigata mo o tatou aso.

O Heber C. Kimball o se tasi o uluai Apostolo e Toasefulula o lenei tisipensione ma sa Fesoasoani Muamua ia Peresitene Polika Iaga. Sa ia lapatai mai: "Ua oo mai le taimi . . . o le a faigata ai ona iloa foliga o se Au Paia mai foliga o se fili e faasagatau i le nuu o le Atua. O le taimi la lena e tagai ai mo le seleselega tele, aua o le a lulueseina ē amiotonu mai ē amioleaga, ma e toatele o le a pauu." Sa ia faaiuina e faapea o loo i ai "se SUEGA o loo sau."<sup>14</sup>

I o tatou aso, o le faatosinaga o le FaaKerisiano i le tele o atunu, e aofia ai le Iunaite Setete, ua matua faaitiitia lava. A aunoa ma talitonuga faalelotu,

o le a leai se lagona o le tali atu o le tagata lava ia i le Atua. O le mea lea, ua faigata ona faamautuina tulaga faataua-inia lautele e uiga i le auala e ola ai. O filosofia e matua taofimau e tele ina feteenai ma le tasi ma le isi.

Ae paga lea, e tupu foi lenei mea i nisi tagata o le Ekalesia o e ua maluelue talitonuga ma faatosinaina e mea ua taatele i lena taimi—e tele lava ua manino e le o ni mea amiotonu.

E tusa ai ma le valoaga a Heber C. Kimball, sa saunoa ai foi Elder Neal A. Maxwell i le 1982: “O le tele o le luluvina o le a tupu ona o fesasia’iga i amioga amiotonu ia e le o salamo ai. O nisi o le a faavaivai nai lo le tumau e oo i le iuga. O nisi o le a faaseseina e tagata ua liliuese. E faapena foi, o isi o le a faatausuai, ona o le a i ai maa tu’ia e fitoitonu i tisipenisione taitasi!”<sup>15</sup>

#### O Le Isi Maa Tu’ia o le Musu e Vaa i le Agasala i Lona Tulaga Moni

O se tasi o vaaiga tulagaese ma faapopoleina o o tatou aso, o le toatele o tagata e faia amioga agasala ae mumusu e manatu i ai o se agasala. E leai ma so latou faanoanoa po o se

naunautaiga e faailoa a latou amioga o ni mea sese moni. E oo lava foi i isi e i ai se talitonuga i le Tama ma le Alo e talitonu sese e faapea o se Tama i le Lagi alofa e le tatau ona tuuina ni tau-nuuga mo amioga e feteenai ma Ana poloaiga.

O le talitonuga tonu lava lenei sa i ai ia Korianetona, le atalii o Alema le Itiiti i le Tusi a Mamona. Sa ia faia ni amioga le mama matuia ma sa fautuina ai e Alema. Ua faamanuiaina i tatou i le tusiaina ai e le perofeta maoae o Alema, o le sa aafia patino i “se lua loloto sili ona pogisa [ma le] malamalamo ofoofogia,”<sup>16</sup> ia faatonuga na ia tuuina mai. I le mataupu 39 o le Alema, tatou te faitau ai i le auala sa ia fautuina ai lenei atalii e ala i le faagasologa o le salamo ona ia faamalamalama atu lea o le auala na afio mai ai Keriso e ave-e le agasala. Sa ia faamanino atu le manaomia o le salamo ia Korianetona ona “e leai se mea le mama e mafai ona mautofi i le malo o le Atua.”<sup>17</sup>

I le Alema 42 o loo i ai nisi o aoaoga faavae sili ona ofoofogia e uiga i le Togiola i tusitusiga paia. Sa fesoasoani Alema ia Korianetona ia malamalamo

e le o se lē “faamasinotonu le tofia o le tagata agasala i se tulaga o le pagatia.”<sup>18</sup> Ae sa ia ta’ua e amata atu ia Atamu, sa saunia ai e se Atua alofa mutimutivale se “taimi e salamo ai” ona a aunoa ma le salamo, “ua le taulau le fuafuaga tele o le olataga.”<sup>19</sup> Sa faamautu foi i ai e Alema le fuafuaga a le Atua o se “fuafuaga o le fiafia.”<sup>20</sup>

Ua sili ona aoga o aoaoga a Alema: “Aua faauta, e faaaoga e le faamasintonu ona manaoga uma; ma e maua foi e le alofa mutimutivale mea uma e a ia lava; ma o lea, e leai se tasi ae ua nao e lava ua salamo moni e faaolaina.”<sup>21</sup> O le malamalamo moni i ai, e matua taua tele ai faamanuiaaga mamalu o le salamo ma le ususitai i aoaoga a le Faaola. O se mea talafeagai le manino, e pei ona sa faia e Alema ia Korianetona, e uiga i taunuuga o filifiliga agasala ma le leai o se salamo. Ua tele ona tautino mai, “Pe vave pe tuai mai ae e ao lava ona fetaiai tagata uma ma taunuuga o a latou filifiliga.”<sup>22</sup>

O faamanuiaaga ofoofogia ma faaselesita o le Togiola a le Faaola e faapea, o amioga agasala o le a soloia ese e le salamo. Ina ua mavae le salamo o Korianetona, sa faaiu atu e Alema e faapea, “Ia e tuu nei mea ia le toe faalavelave ia te oe, ae ia nao au agasala ia e popole i ai, le popole lena e aumai ai oe i lalo i le salamo.”<sup>23</sup>

#### O Le Tagai i Talaatu o le Faailoga o se Maa Tu’ia

Sa faasino atu le perofeta o Iakopo i Tagata Iutaia anamua o “se nuu ua maaa” o e na inoino i upu manino, sa “latou fasioti perofeta, ma saili mo mea sa le mafai ona latou malamalamo i ai. O le mea lea, ona o lo latou tauaso, o se tauaso na oo mai i le latou vaai i tala atu o le faailoga, o lea o le a latou pauu ai.”<sup>24</sup>

E ui o loo tele ni faataitaiga o le vaai i tala atu o le faailoga,<sup>25</sup> ae o se tasi iloga i o tatou aso o le manatu faasausili. O le manatu faasausili faaletala-lelei o le faasili lea e se tasi o soo se mataupu faavae o le talalelei i luga o isi mataupu faavae taua e tutusa lelei ma finauina faapea e sili atu pe feteenai foi ma aoaoga a taitai o le Ekalesia. O se tasi faataitaiga pe a fautua e se tagata ni




faaopopoga, suiga po o ni faamamafa autu i se vaega se tasi o le Upu o le Poto. O le isi o ni tapenaga taugata mo le "iuga o le lalolagi." I faataitaiga uma ia e lua, ua uunaia ai isi e taliaina ni faaliliuga tumaoti. "Afafai tatou te liliuina se tulafono faalesoifua maloloina po o se isi mataupu faavae i se ituaiga o faanaunautaiga faalelotu, o lona uiga ua tatou vaai i tala atu o le faailoga."<sup>26</sup>

I le fetalai ai e uiga i le taua o aoaoga faavae, sa folafola mai ai e le Alii, "Ai se na te tala'i atu se mea e tele atu pe itiiti mai i lo lenei, o ia lava lea ua le o se a a'u."<sup>27</sup> A tatou faateleina soo se mataupu faavae i se ala e faaititia ai lo tatou tuuto atu i isi mataupu faavae e tutusa le taua pe faia foi se mea e feteenai ai pe faasili atu foi i aoaoga a taitai o le Ekalesia, ua tatou vaai i tala atu o le faailoga.

Ma le isi, o nisi tagata o le ekalesia ua faasili atu ni galuega, o le tele lava o mea lelei, i se tulaga e sili atu i lo aoaoga faavae autu o le talalelei. Ua latou suitulaga lo latou tuuto atu i le galuega e fai ma a latou faamuamua ae tuualalo lo latou tuuto atu i le Faaola ma Ana aoaoga i se tulaga lona lua. Afafai tatou te faamuamua soo se mea i luga atu o lo tatou tuuto i le Faaola, afai o a tatou amioga ua iloa ai ua na o Ia o se isi faiaoga ae le o le Alo paia o le Atua, o lona uiga ua tatou vaai i tala atu o le faailoga. O Iesu Keriso o le faailoga!

O le vaega 76 o le Mataupu Faavae ma Feagaiga ua faamanino mai ai e faapea o le "totoa i le molimau ia Iesu"<sup>28</sup> o le suega faigofie ma taua lea i le va o i latou o e o le a mauaina faamanuiaga o le malo selesitila ma i latou e o i le malo terasitila e maualalo ifo. Ina ia totoa, e manaomia ona tatou taulai atu i le mana o Iesu Keriso ma Lana taulaga togiola e faatoilalo ai le oti ma, e ala i le salamo, e faamama ai i tatou mai agasala, ma e manaomia ona tatou mulimuli i le mataupu faavae a Keriso.<sup>29</sup> Tatou te manaomia foi le malamalama ma le poto e uiga i le soifuaga ma aoaoga a le Faaola e taiala ai i tatou i luga o le ala o feagaiga, e aofia ai sauniga paia o le malumalu. E tatau ona tatou mausali ia Keriso, taumamafa i Ana afioga, ma tumau e oo i le iuga.<sup>30</sup>



### Faaiuga

Afafai e ao ona tatou totoa i a tatou molimau ia Iesu, e tatau ona tatou aloese mai maa tu'ia o loo saisaitia ma taofia ai i tatou mai le alualu i luma o le toatele o isi alii ma tamaitai mamalu. Ia tatou filifili ia i ai i taimi uma i Lana galuega. A o saili atu i le poto, e manaomia ona tatou aloese mai filosofia a tagata ia e faaititia ai lo tatou tuuto atu i le Faaola. E tatau ona tatou vaai i le agasala i lona tulaga moni lava ma talia le Togiola a le Faaola e ala i le salamo. E manaomia ona tatou aloese mai le vaai i tala atu o le faailoga ma taulai atu ia Iesu Keriso, lo tatou Faaola ma le Togiola, ma mulimuli i Lana mataupu faavae.

Sa vaai lo'u tama i le pou o se auala e maua ai le eletise, malamalama, ma le tele o le vai mo kuka ma le faamaina. Sa avea o se maa lagolago na faaleleia ai lona olaga.

Na fautua mai se tasi tusitala e faapea e mafai ona faia maa tu'ia e avea ma "maa lagolago ina ia avea ma tagata malualii ma oo atu ai i le lagi."<sup>31</sup>

Mo i tatou, o le totoa i a tatou molimau ia Iesu o se maa lagolago lea agai atu i le agavaa mo le alofatunoa o le Faaola ma le malo selesitila. O Iesu Keriso ua na o le pau lea o le suafa i lalo o le lagi e mafai ona faaolaina ai tatou.<sup>32</sup> Ou te tuu atu la'u molimau mautinoa i Lona paia ma Lana matafaioi faalelagi i le fuafuaga a le Tama. I le suafa o Iesu Keriso, amene. ■

## FAAMATALAGA

1. Mataupu Faavae ma Feagaiga 14:7; tagai foi Ioane 17:3.
2. Mataupu Faavae ma Feagaiga 76:79.
3. Tagai i le *Faamaoni i le Faatuatua: O Se Tusitaiala o le Talalelei* (2004), 52–53.
4. *Merriam-Webster's Collegiate Dictionary*, 11th ed. (2003), “stumbling block.”
5. *Merriam-Webster's Collegiate Dictionary*, “stumble.”
6. Mataupu Faavae ma Feagaiga 93:36.
7. Tagai Ioane 9:1–9; 13–18.
8. Tagai Frederic W. Farrar, *The Life and Work of St. Paul* (1898), 319.
9. Tagai Farrar, *The Life and Work of St. Paul* (319), 20.
10. 1 Korinito 2:4–5.
11. Tagai i le George Frideric Handel, *Messiah*, ed. T. Tertius Noble (1912).
12. 1 Korinito 15:20–22, 55, 57.
13. Will Durant, *The Story of Civilization*, vol. 3, *Caesar and Christ* (1944), 595.
14. Heber C. Kimball, in Orson F. Whitney, *Life of Heber C. Kimball* (1945), 446.
15. Neal A. Maxwell, “Ia Fiafia Pea,” *Liahona*, Ian, 1983, 127.
16. Mosaea 27:29.
17. Alema 40:26.
18. Alema 42:1. I aoaoga faavae a le Au Paia o Aso e Gata Ai, o le laveaiga ua faia mo tagata uma e aofia ai i latou e le i faalogo ia Keriso i lenei olaga, o fanau e maliliu a o lei oo i tausaga e tali atu ai, ma i latou e leai se malamalamala (tagai Mataupu Faavae ma Feagaiga 29:46–50; 137:7–10).
19. Alema 42:5.
20. Alema 42:8.
21. Alema 42:24. Ia manatua o le soanauna patino mo le faamasinotonu o le *his* (alii) ma le soanauna patino mo le alofa mutimutivale o le *her* (tamaitai).
22. Robert Louis Stevenson, i le Carla Carlisle, “A Banquet of Consequences,” *Country Life Magazine*, July 6, 2016, 48. O loo faamamalu e Mrs. Carlisle ia Robert Louis Stevenson mo le upusii. E avatu e isi le faamamaluga i isi.
23. Alema 42:29.
24. Iakopo 4:14.
25. I se tusiga na ou tusiaina mo le mekasini a le Ekalesia i le 2003, sa ou faamamafaina ai ni vaega se fa e mafai ona tupu ai le tauaso i mataupu faalelotu ma le tautevateva lea na faamatalaina e Iakopo: suitulagaina o filosofia a tagata mo upumoni o le talalelei, manatu faasausili i mataupu o le talalelei, o uiga fiatoa ua suia ai uiga faapaiaina o aso uma, ma le faasiliina o tulafono i lo aoaoga faavae (tagai “Vaai i Tala Atu o le Faailoga,” *Liahona*, Mat. 2003, 21–24).
26. Tagai Quentin L. Cook, “Vaai i Tala Atu o le Faailoga,” *Liahona*, Mat. 2003, 2122.
27. Mataupu Faavae ma Feagaiga 10:68.
28. Mataupu Faavae ma Feagaiga 76:79.
29. Tagai 2 Nifae 31:17–21.
30. Tagai 2 Nifae 31:20–21.
31. Henry Ward Beecher, i le Tryon Edwards, *A Dictionary of Thoughts* (11891), 586.
32. Tagai 2 Nifae 31:21; Mosaea 3:17.



Sauniga e Elder Gary E. Stevenson

O Le Korama a Aposetolo e Toasefululua

# Vaai i le Tusi, Vaai i le Alii

O mafai ona e vaai atu i le Tusi a Mamona o lau maa'au'au, o le nofoaga autu faaleagaga o lou malosiaga?

## Mary Elizabeth Rollins


I lo'u mafaufau, ou te vaai ai ia te outou o le tupulaga faiae o loo matamata pe faalogologo i lenei sauniga o le konafesi i se mea i le lalolagi. Ou te fia faasoa atua se tala moni ia te outou, o se tala e mafai ona avea ma se faataitaiga ma se lesona foi. E mafai ona faaali atu ai ia te outou le auala e latalata atili ai i le Alii ma maua ai le mana tele atu e tetee ai faaososoga.


O le tala lenei i se teineitiiti, sa nofo i Niu Ioka, o lē a o lei atoa lona tolu tausaga sa maliu ai lona tama ina ua goto lona vaa i se vaituloto tele lava. Sa masii atu o ia, lona tina, tuagane matua atu, ma lona uso laitiiti ifo ia te ia, i se aai fou i se isi setete e nonofo ai ma lona aunt ma lona uncle. I se taimi ina ua mavae le taunu o le aiga, sa o atu ai ni faifeautalai ma tagata o se tapuaiga fou faatoa faatulaga i lo latou aai ma le tala fou mamalu o le Talalelei Toefuataiga. Sa latou faamatalaina se tala ofoo fogia o se agelu na tuuina atua se faamaumauga anamua i se alii talavou e igoa ia Iosefa Samita, o se faamaumauga na ia faaliliuina i le mana o le Atua. O tagata asiiasi uma e toalua, o Oliva Kaotui ma Ioane Uitimera, sa vaai moni lava o laua fofoga i itulau apa sa vaneina o faamaumauga anamua, ma sa uuina e Uitimera papatusi auro i ona lava lima. O lenei faamaumauga sa lei

lava ona lolomiina, ma sa aumai e Uso Uitimera le tusi ia te ia. Ioe, o le igoa o le tusi, o le Tusi a Mamona.

Ina ua faalogo Mary e 12 tausaga le matua i faifeautalai o talanoa e uiga i le tusi, sa i ai sona lagona faapitoa i lona loto. E ui lava sa mafafia le Tusi a Mamona i le tele o itulau, ae sa naunau pea Mary e faitau i ai. Ina ua alu ese atu Uso Uitimera, sa ia avatu le kopi faapelepele e tasi o le tusi ia Uso Isaac Morley, o se uo a le uncle o Mary ma se taitai i le lotoifale i le ekalesia fou.

Sa tusia e Mary mulimuli ane: “Sa ou alu atu i le fale o [Uso Morley] . . .





ma talosaga i ai se'i vaai i le Tusi; sa [ia] tuuina i lo'u lima, [ma] a o ou tilotilo i ai, sa ou lagonaina se manao e faitauina, lea sa le mafai ai ona taofia au mai le talosagaina o ia e faataga au e ave i le fale e faitau ai. . . . Sa ia fai mai . . . e seāseā i ai sona taimi e faitau ai se mataupu, ae sa toalaiti le auuso na vaai foi i ai, ae sa ou matua aioi atu ma le naunautai mo le tusi, lea sa i'u ai na ia fai mai, 'sega e, afai e te aumaia lenei tusi i le fale a o lei faia le mālū taeao a taeao, e mafai la ona e aveina.'

Sa tamoe atu Mary i le fale sa matua tosina atu i le tusi lea na toeitiiti aoina i le faitauina i le po atoa. I le taeao na sosoo ai, ina ua ia toe faafoi atua le tusi, sa fai atu Uso Morley, "Ou te matea e lei tele se mea na e faitaua a" ma "ou te le talitonu foi e mafai ona e ta'u maia se upu se tasi mai le tusi." Sa tu sa'o i luga Mary ma ta'u atu mai lona mafaufau le fuiapu muamua o le Tusi a Mamona. Ona ia faamatala atu lea ia te ia le tala i le perofeta o Nifae. Mulimuli ane sa tusia e Mary, "Sa ia sioa mai ia te au ma le te'i, ma fai mai, 'sega, ave le tusi lea i le fale ma faauma, e mafai ona ou faatali.'"

I se taimi puupuu mulimuli ane, sa faauma ai e Mary le faitauina o le tusi ma o le tagata muamua lea i le latou aai na faitaua le tusi atoa. Sa ia iloa e

moni le tusi ma sa aumai mai le Tama Faalelagi. A o ia vaai atu i le tusi, sa ia vaai atu i le Alii.

I le masina mulimuli ane, sa asiiasi atu ai se tagata faapitoa i lona fale. O le mea lenei na tusia e Mary e uiga i le la feiloaiga lemafaagaloina i lena aso: "Ina ua vaai mai [Iosefa Samita] ia te au, sa ia tilotilo mai ma le naunau tele. . . . I le mavae ai o se minute pe lua sa ia . . . tuu maia so'u faamanuiaga maoae, . . . ma faameaalofa mai ia te au le tusi, ma fai mai o le a ia toe avautua se isi [kopi] ia Uso Morley. . . . Ua tatou lagona uma o ia o se tagata o le Atua, aua sa ia saunoa ma le mana, ma se tasi e umiaina le pule."

Sa vaai lenei teineitiiti, o Mary Elizabeth Rollins, i le tele o wavega i lona olaga ma tausisi ai pea i lana molimau o le Tusi a Mamona.<sup>1</sup> O lenei tala e i ai sona uiga faapitoa ia te au ona o ia o lo'u aunty o le augatupulaga lona fa [i le itu o lo'u tama]. E ala i le faataitaiga a Mary, faatasi ai ma isi aafiaga i lo'u olaga, ua ou aoao ai e le taitai laitiiti se tagata e saili ma maua se molimau patino o le Tusi a Mamona.

#### O Le Maa'au'au o Lau Molimau

O loo i ai se lesona patino mo oe i le tala ia Mary. O outou alii talavou,

tamaitai talavou, ma fanau taitoatasi e mafai ona mauaina ia lagona lava e tasi na ia maua. A e faitauina le Tusi a Mamona ma tatalo ma se manao ia iloa lona moni, e mafai foi ona e mauaina le uunaiga lava e tasi i lou loto lea na maua e Mary. Atonu foi e te iloaina e faapea, a o e tu ai ma molimau atu e uiga i le Tusi a Mamona, o le a e lagonaina lea lava agaga e tasi o le faamautinoaga. O le a fetalai atu le Agaga Paia i lou loto. E mafai foi ona e lagonaina lenei lava agaga e tasi o le faamautinoaga pe a e faalogo atu i isi o faasoa mai a latou molimau e uiga i le Tusi a Mamona. O nei molimau faaleagaga taitasi e mafai ona taitai atu ai i le Tusi a Mamona ma avea ai ma maa'au'au o lau molimau.

Sei ou faamatala atu. Sa faamatalaina e le Perofeta o Iosefa Samita, lea na faaliliuina le Tusi a Mamona e ala i le meaalofa ma le mana o le Atua e faapea o le Tusia Mamona "o le tusi aupito sili lea ona sa'o i lo se isi lava tusi i luga o le lalolagi, ma o le maa'au'au foi lea o la tatou tapuaiga."<sup>2</sup>

Talu mai le uluai lomiga o le Tusi a Mamona i le 1830, ua silia ma le 174 miliona kopi ua lolomiiina ma faasala-lauina i gagana eseese e 110, ua faaalia ai o loo avea pea le Tusi a Mamona ma



E mafai ona avea le Tusi a Mamona, e pei o se maaauau o se faitotoa faafoofu, ma maaauau o la tatou molimau.

maa'au'au o la tatou tapuaiga. Ae o le a le uiga o lenei mea mo outou taitoatasi?

I se faaupuga faatusiata o fale, o se maa'au'au o se elemene autu lea o se faitotoa faafoofu. O le maa e foliga o se tina e tuu i le ogatotonu ma i le vaega aupito sili ona maualuga o se faafoofu. O le maa aupito sili lea ona taua o maa uma ona na te taofia itu e lula o le faafoofu, ma puipuia mai le solovi i lalo. Ma o le elemene o le fausaga na te faamautinoaina le faitotoa, po o se avanoa i lalo ifo, e mafai ona uia.

I faaupuga faaletalalelei, o se mealofo ma se faamanuiaga mai le Alii lea o le maa'au'au o la tatou tapuaiga o se mea e mafai ona tagofia ma uumauina e pei o le Tusi a Mamona ma e mafai ona e uuina ma fatauina. O mafai ona e vaai atu i le Tusi a Mamona o lau maa'au'au, o le nofoaga autu faaleagaga o lou malosiaga?

Sa faalautele e Peresitene Ezra Taft Benson na aoaoga a Iosefa Samita. Sa ia saunoa mai: "O loo i ai ala e tolu ua avea ai le Tusi a Mamona ma maa'au'au o la tatou tapuaiga. O le maa'au'au lea i la tatou molimau ia Keriso. O le maa'au'au lea o la tatou aoaoga faavae. O le Tusi a Mamona o le maa'au'au o le molimau."

Sa toe aoao mai Peresitene Benson: "O le Tusi a Mamoni ua aoao mai ia i

tatou upu moni [ma] molimau mai e uiga ia Keriso. . . . Ae e i ai se mea e sili atu. O loo i ai se mana i le tusi o le a amata ona tafe mai i o outou olaga i le taimi tou te amatalia ai se suesuega faamaoni o le tusi. O le a outou maua ai le malosi sili atu e tetee atu ai i faaososoga. . . . O le a outou maua ai le mana e tumau ai i le ala sao ma le vaapiapi."<sup>3</sup>

#### O La'u Molimau Patino

Ia te au lava ia, o le Tusi a Mamona na avea ma maa'au'au o la'u molimau i le aluga o tausaga ma le tele o ni aafiaga. O le tasi molimau mamana i le fatuuiina o la'u molimau na tupu a o avea au ma se faifeaultalai talavou na auauna atu i la'u uluai eria muamua lava: Kumamoto, Iapani. Sa ma talai tu'itu'i ma la'u soa mai lea fale i lea fale. Sa ma feiloai ma se tina matua lea na valaauliaina ma le agalelei i ma'u'a e o atu i totonu o le faitotoa e ulufale ai i lona fale, lea e ta'u'a o se *genkan* i le faaSapani. Sa ia ofo mai ia i maua se vaiinu malulu i se aso vevela lava. Sa lei leva na ou i ai i Iapani, ma sa lei leva na ou faamaeaina le fatauina o le Tusi a Mamona ma sa tatalo ia iloa ma le mautinoa e moni.

Ona o lo'u fou i Iapani, sa ou lei lelei tele ai la'u tautala faaSapani. O le mea moni, ou te manatu sa lei malamalamene tamaitai i le tele o mea sa ou tautala ai. Sa amata ona ou aoaoina o ia i le Tusi a Mamona, ma faamatala atu le auala na maua ai e Iosefa Samita mai se agelu se faamaumauga anamua na vaneina i luga o papatusi ma le auala na ia faaliliuina ai i le mana o le Atua.

A o ou tuuina atu la'u molimau o le Tusi a Mamona o le afioga a le Atua ma o se tasi molimau ia Iesu Keriso, sa ou mauaina se uunaiga sili ona malosi, sa o mai faatasi ma se lagona mafanafana o le toafimalie ma le filemu i lo'u loto, lea e faamatalaina e tuisitusiga paia o "lou loto [e mu] i totonu ia te oe."<sup>4</sup> O lenei lagona sa toefaaamautu mai ai ia te au i se ala mamana o le Tusi a Mamona e moni lava o le afioga a le Atua. I lena taimi, sa matua malosi lava o'u lagona na ala ai ona maligi o'u loimata a o ou talanoa atu i lenei tina matua Sapani.

E lei galo lava ia te au le lagona faapitoa o lena aso.

#### O La'u Molimau Patino

E mafai foi e outou taitoatasi ona mauaina se molimau patino o lenei tusi! O e iloaina ea o le Tusi a Mamona sa tusia mo outou—ma mo lo outou taimi? O lenei tusi o se tasi o faamanuiaga o le ola ai i le taimi ua tatou ta'u'a o le tisipenisione o le atoaga o taimi. E ui o le Tusi a Mamona sa tusiaina e ni tusitala musuia anamua—o le toatele o i latou o perofeta—ae sa latou lei mauaina ma tagata o o latou aso le faamanuiaga o le umiaina o le tusi atoa. Ua faigofie nei ona outou mauaina le faamaumauga paia na faapelepele, opomauina, ma faasaoina e perofeta, ositaulaga, ma tupu! Ua outou maua le manua o le uuina i o outou lima le Tusi a Mamona atoa. O le mea e mata'ina ai, o se tasi o perofeta o le Tusi a Mamona, o Moronae, na vaai i o tatou aso—tou aso. Sa ia vaai foi ia te outou, i se faaaliga, i le fatau selau o tausaga ua mavae! Na tusia e Moronae:

"Faauta, ua faaali mai e le Alii ia te au mea tetele ma ofoofogia e faatatau . . . i lena aso o le a oo mai ai nei mea," o lona uiga o le Tusi a Mamona, "ia te outou.

"Faauta, ou te tautala atu ia te outou e peiseai o outou faatasi mai i le taimi nei, peitai ua outou le o i ai. Ae faauta, ua faaali mai outou ia te au e Iesu Keriso, ma ua ou iloa a outou mea o fai."<sup>5</sup>

Ina ia fesoasoani e avea le Tusi a Mamona ma maa'au'au o lau molimau, ou te tuu atu ia te outou se lu'i. Talu ai nei sa ou iloa ai o le tele o atunu i le lalolagi, e faaalu e le autalavou se averesi e fitu itula i le aso e matamata ai i le TV, komepiuta, ma telefonipoto.<sup>6</sup> I le iloaina ai o lenei mea, e mafai ona e faia sina suiga ititi? E mafai ona e suitulaga nisi o na taimi i aso taitasi—ae patino lava i taimi o loo faaalu i alafaasalalau faaagafesootai, le initoneti, taaloga, po o televise—i le fatauina o le Tusi a Mamona? Afai o suesuega ia ou te faasino atu i ai e maoti, e faigofie lava la ona maua se taimi i aso taitasi e suesue ai le Tusi a Mamona e tusa lava pe na o se 10 minute i le aso. Ma

e mafai ona e suesue i se ala e faata-gaina ai oe e olioli ai ma malamalama ai—pe o luga o lau tamai masini po o le tusi lava ia. Sa lapatai mai Peresitene Russell M. Nelson talu ai nei, “E le tatau ona tatou faia le faitauina o le Tusi a Mamona ma se mea e foliga mai o se tiute mamafa, e pei o le inuina o se vai faafomai e le lelei lona tofo ona ua faatonuina e inu ai.”<sup>7</sup>

Mo nisi o outou le fanau laiti, e mafai ona e faitauina ma ou matua, matuamatutua, po o sē pele ia te oe. Afai e faigata se mataupu, fuaiupu, po o se vaega e ono faalotovaivaia ai lau faitau, me'i atu i se isi mataupu ma se isi vaega. Ua ou vaai faalemafaufau atu ia te outou ua mulimuli i le faataitaiga a Mary. Ua ou vaai faalemafaufau atu ia te outou ua mauaina ma le fiafia se taimi ma se nofoaga filemu e faitau ai le Tusi a Mamona. Ua ou vaai ua outou mauaina ni tali, lagonaina le taitaiga, ma le mauaina o lau lava ia molimau o le Tusi a Mamona ma se molimau ia Iesu Keriso. A o e vaai atu i le tusi, e te vaai atu i le Alii.

O le a e faitauina fuaitau o lenei tusi taua ma fetaiai ai ma lou Faaola pele, le Alii o Iesu Keriso, e toetoe lava o itulau uma. O le faaaogaina o nisi ituaiga o suafa mo Lona suafa pe tusa o se averesi o le faatasi i fuaiupu uma e 1.7.<sup>8</sup> E oo foi lava i le Keriso Lava Ia na molimau mai i lona moni a'ia'i i nei aso e gata ai, e faapea, “E pei ona soifua lo outou Alii ma lo outou Atua, ua moni ia.”<sup>9</sup>

Ou te faafetai lava i le valaaulia ma le folafolaga ua ofo mai e le Alii e ala mai i le perofeta o Moronae ia te outou taitoatasi—ma i tagata uma e faitauina le Tusi a Mamona. Ou te faai'u atu i le faitauina o lenei valaaulia ma le folafolaga ma faaopoopo atu ai ma la'u molimau: “Ma pe a outou maua nei mea, ou te apoapoi atu ia te outou ia outou ole atu i le Atua, le Tamā Faavavau, i le suafa o Iesu Keriso, pe ua le moni ea nei mea; ma afai tou ole atu ma le loto faamaoni, ma le manatu moni i ai, ma le faatuatua ia Keriso, o le a ia faaali mai le moni o ia mea ia te outou, i le mana o le Agaga Paia.”<sup>10</sup>

Ou te molimau atu i le Toefuataiga o le talalelei i nei aso e gata ai faapea ai



ma le Tusi a Mamona o se faamaoniga moni o lena Toefuataiga. E pei foi ona musuia e upu o lenei tusi se teineitiiti 12 tausaga le matua e taliaina le Ekale-sia toefuataiina a Iesu Keriso ua toetoe lua seneturi talu ai, o upumoni e te maua ai iina o le a siitiaina ma musuia oe i se ala talitutusa lava. O le a faamlosia ai lou faatuatua, faatumulia ai lou agaga i le malamalama, ma saunia ai oe mo se lumana i te le o mauaina atoa le tomai e malamalama i ai.

I totonus o itulau o le tusi, o le a e iloaina ai le alofa lemafuatia ma le alofatunoa le mafaaamatalaina o le Atua. A o e tauivi e mulimuli i aoaoga e te mauaina iina, o le a faalauteleina lou olioli, o le a faateleina lou malamalama, ma o tali o loo e sailia i le tele o luitau o le olaga faaletino o le a tatala atu ia te oe. A o e vaai atu i le tusi, e te

vaai atu i le Alii. O le Tusi a Mamona o le afioga a le Atua ua faaalia. Ou te molimau atu ai i nei mea ma lo'u loto ma le agaga atoa i le suafa o Iesu Keriso, amene. ■

#### FAAMATALAGA

1. Tagai “Mary Elizabeth Rollins Lightner,” *Utah Genealogical and Historical Magazine*, July 1926, 193–95.
2. Faatomuaga i le Tusi a Mamona.
3. Ezra Taft Benson, “O Le Tusi a Mamona—o le Maa ‘Au’au o Lo Tatou Faatuatua,” *Liahona*, Jan. 1987, 5.
4. Mataupu Faavae ma Feagaiga 9:8.
5. Mamona 8:34–35.
6. Tagai American Academy of Pediatrics, “Media and Children,” aap.org.
7. Russell M. Nelson, “Strengthen the Shepherds” (o se lauga na tuuina atu i fonotaga faaleautaitai i le konafesi aoao, Sete. 28, 2016).
8. Tagai Susan Easton Black, *Finding Christ through the Book of Mormon* (1987), 16–18.
9. Mataupu Faavae ma Feagaiga 17:6.
10. Moronae 10:4; tagai foi i fuaiupu 3, 5.



Saunia e Elder D. Todd Christofferson  
O Le Korama a Aposetolo e Toasefululua

## “Tumau i Lo’u Alofa”

O le alofa o le Atua e le mafuatia ma o le a tumau pea e faavavau, ae o lona uiga mo i tatou taitoatasi e faalagolago lea i le auala tatou te tali atu ai i Lona alofa.

**U**a ta’u mai e le Tusi Paia ia i tatou o le “Atua o le alofa lava ia.”<sup>1</sup> O Ia o le faatusa atoatoa o le alofa, ma e tatou te faalagolago atoa i le aapa mai faifai pea o lena alofa i tagata uma. E pei ona faailoa mai e Peresitene Thomas S. Monson e faapea: “Usi ai le alofa o le Atua iina mo outou e tusa lava pe ua outou lagona lo outou manaomia pe leai foi se alofa. E i ai lava iina i taimi uma.”<sup>2</sup>

E tele lava auala e faamatala ai ma talanoa ai e uiga i le alofa paia. O se tasi o faaupuga ua tatou faalogo sooo i ai i nei ona aso e faapea, o le alofa o le Atua e “le faatuaoia.” E ui i se tasi lagona e moni ai, ae o le faamatalaga *le faatuaoia* e le o maua i tusutisiga paia. Ae, o Lona alofa ua faamatalaina i tusutisiga paia o le “alofo tele ma le ofoofigia,”<sup>3</sup> “alofo atoatoa,”<sup>4</sup> “alofo togiola,”<sup>5</sup> ma le “alofo e faavavau.”<sup>6</sup> O loo i ai isi faaupuga sili atu ona o le upu *le fatuaoia* e mafai ona avatu ai ni manatu sese e uiga i le alofa paia, e pei o le, e faatagaina ma tuusaunoa e le Atua sooo se mea tatou te faia ona o Lona alofa le faatuaoia; po o le, e le faia e le Atua ni poloaiga ia i tatou, ona o Lona alofa le faatuaoia; po o le, e faaolaina *tagata uma* i le malo faalelagi o le Atua ona o Lona alofa le faatuaoia. O le alofa o le

Atua e le mafuatia ma o le a tumau pea e faavavau, ae o lona uiga mo i tatou taitoatasi e faalagolago lea i le auala tatou te tali atu ai i Lona alofa.

Sa fetalai mai Iesu:

“Faapei ona alofa mai o le Tama ia te au, e faapea lava ona ou alofa atu ia te outou; ia tumau pea outou i lo’u alofa.”

“Afai tou te tausia a’u poloaiga, ona tumau lea o outou i lo’u alofa; pei ona ou tausia poloaiga a lo’u Tama, ma ou tumau i lona alofa.”<sup>7</sup>

O le “faaauau pea i le” po o le “tumau i le” alofa o le Faaola o lona uiga ia maua Lona alofa tunoa ma ia faaatoatoa ai.<sup>8</sup> Ina ia maua Lona alofa tunoa, e tatau ona tatou maua le faatuatua ia Iesu Keriso ma tausi Ana poloaiga, e aofia ai le salamo i a tatou agasala, papatisoina mo le faamagaloga o agasala, taliaina o le Agaga Paia, ma le faaauau pea i le ala o le usuisitai.<sup>9</sup>

O le a alofa pea le Atua ia i tatou, ae e le mafai ona ia laveai i tatou i a tatou agasala.<sup>10</sup> Manatua upu a Amoleka ia Seseroma o le a le laveaia e le Faaola Lona nuu i a latou agasala ae *mai* a latou agasala,<sup>11</sup> o le mafuaaga o lena mea ona o le agasala tatou te eleelea ai ma “e le mafai e se mea ua le mama ona mautofi i le malo o le lagi”<sup>12</sup> pe nofo foi i le afioaga o le Atua. “Ma ua ia

[Keriso] le mana na tuuina mai ia te ia mai le Tamā e togiola ai i latou mai ia latou agasala ona o le salamo; o lea na ia auina mai ai ana agelu e talai mai tala o tuutuuga o le salamo, lea e aumai ai i latou i le mana o le Togiola, mo le olataga o o latou agaga.”<sup>13</sup>

Mai le Tusi a Mamona ua tatou aoao ai o le faamoemoega o puapuaga o Keriso—o le faailoaga sili lea o Lona alofa—e “aumai ai loto o le alofa mutimutivale, ia ua faumalo i le faamasinotonu, ma aumai ai ala i tagata e mafai ai ona latou maua o le faatuatua e salamo ai.

“Ma faapea ona mafai ai e le alofa mutimutivale ona faamalie manaoga o le faamasinotonu, ma siosiomia ai i latou i lima o le saogalemu, a’o ia o le na te le faaaoga se faatuatua e salamo ai, ua tualiali i le tulafono atoa o manaoga o le faamasinotonu; o lea ua nao ia o le ua i ai le faatuatua e salamo ai, ua aumai ai le fuafuaga tele ma faavavau o le togiolaina.”<sup>14</sup>

O le salamo la, o Lona meaalofa lea ia i tatou, na faatauina i se tau tau-gata tele.

O le a finauina e nisi e faapea e faamanua e le Atua tagata uma e aunoa ma se eseesege—ma ta’ua ai, mo se faataitaiga, le fetalaiga a lesu i le Lauga i luga o le Mauga: “E faaoso e le [Atua] lona la i e ua amio leaga atoa ma e ua amio lelei; ua ia faatoto ifo foi le ua





i e ua amiontonu atoa ma e ua amiontonu.”<sup>15</sup> O le mea moni, e lili mai faaua e le Atua i luga o Ana fanau uma ia faamanuiaga uma Na te mafai—faamanuiaga uma o le a faatagaina e le alofa ma le tulafono ma le faamasintonu ma le alofa mutimutivale. Ma ua Ia poloaiina i tatou ia faapena foi ona tatou lotoalofa atu:

“A ou te fai atu a’u ia te outou, ia outou alolofa atu i e ua ita mai ia te outou, faamanuia i e ua fetuu mai ia te outou, ia agalelei atu i e ua inoino mai ia te outou, ma tatalo foi mo e ua tuuui fua mai ma faasaua mai ia te outou;

“Ina ia avea outou ma fanau a lo outou Tamā o lē o i le lagi.”<sup>16</sup>

E ui i lea, o faamanuiaga sili atu a le Atua ua aiaia i luga o aiaiga o le usiusitai. Sa faamalamalama mai e Peresitene Russell M. Nelson e faapea: “O le teufugalaau tele matagofie o le alofa o le Atua—e aofia ai le ola e faavavau—e aofia ai faamanuiaga ia e tatau ona tatou agavaa ai, ae le o faamanuiaga ia tatou te manatu e tatau ona tatou maua e tusa lava pe tatou te le agavaa. E le mafai e tagata agasala ona lolo’u mai Lona finagalo i o latou loto ma

manaomia o Ia e faamanuia i latou a o fai le agasala [tagai Alema 11:37]. Afai latou te mananao ia olioli i faamanuiaaga uma o Lana teufugalaau matagofie, e tatau la ona latou salamo.”<sup>17</sup>


I tala atu o le lagonaina e le tagata ua salamo o le le tausalaina ma le le pisia i le folafolaga o le “sii ae . . . i luga i le aso gataaga,”<sup>18</sup> o loo i ai se vaaiga taua lona lua o le tumau i le alofa o le Atua. O le tumau ai i Lona alofa o le a mafai ai ona tatou iloaina lo tatou gafatia atoatoa, e avea ai e pei o Ia.<sup>19</sup> Sa ta’ua e Peresitene Dieter F. Uchtdorf: “O le alofatunoa o le Atua e le tau na ona fuata’i ai o i tatou i le tatou tulaga mama sa i ai muamua. . . . O Lona faamoemoega e maualuga tele atu: E finagalo i Ona atalii ma afafine ina ia avea e pei o Ia.”<sup>20</sup>

Ina ia tumau i le alofa o le Atua i lenei lagona o lona uiga ia gauai atu atoa i Lona finagalo. O lona uiga ia talia Ana aoaiga pe a manaomia, “aua o lē ua alofagia e le Alii, [e] aoai [e ia].”<sup>21</sup> O lona uiga o le alofa ma le auauna atu i le tasi ma le isi e pei ona alofa mai Jesu ma auauna mai ia i tatou.<sup>22</sup> O lona uiga ia aoao “e ola i le tulafono o se malo selesitila” ina ia mafai ai ona “[mau] i se

mamalu selesitila.”<sup>23</sup> Mo Ia ina ia mafai ona faia i tatou i tagata e mafai ona tatou avea ai, ua augani mai ai lo tatou Tama Faalelagi ia i tatou ina ia gaua’i atu “i uunaiga a le Agaga Paia, ma tuu ese le tagata natura ma [aveal] ma tagata paia e ala i le togiola a Keriso le Alii, ma [aveal] e pei o se tamaititi, e usiusitai, agamalu, lotomaualalo, onosai, ma tumu i le alofa, loto ina usitai uma ua silafia e le Alii e tatau ona faaoo mai i ona luga, e pei ona usitai atu se tamaititi i lona tamā.”<sup>24</sup>

Na matau e Elder Dallin H. Oaks: “O le Faamasinoga Mulimuli ua le na o se iloiloga o le aofaiga atoa o amioga lelei ma amioga leaga—o mea ua tatou *faia*. O le faailoaina mai o aafiaga faaiu o a tatou amioga ma mafaufauga—o tagata ua tatou *avea ai*.”<sup>25</sup>

O le tala ia Helen Keller o se faataoto ua fautua mai ai le auala e mafai ai e le alofa paia ona liliua se loto naunautai. Sa fanau mai Helen i le setete o Alapama i le Iunaite Setete i le 1880. Ina ua faatoa 19 masina le matua, sa mafatia o ia i se ma’i sa lei mailoa lea na logonoa ma tauaso ai o ia. Sa matua atamai lava o ia ma na oo ina le fiafia a o ia taumafai e malamalama ma



faauiga tonu ona siosiomaga. Ina ua lagona e Helen le feminoia'i o laugutu o tagata o le aiga ma iloa ai latou te faaaogaina o latou fofoga e tautatala ai, "sa matua ita lava [ona] sa le mafai ona ia auai i talanoaga."<sup>26</sup> E oo ifo i le ono o tausaga o Helen, o lona manaoga ia tautala ma lona le fiafia sa matua faatupulaia lea "na oso faama'imaliu ai lona ita i aso taitasi, o nisi taimi e ta'i itula [ma oso]."<sup>27</sup>

Sa faafaigaluega e matua o Helen se faiāoga mo le la afafine, o se fafine e igoa ia Anne Sullivan. E pei lava foi ona tatou maua ia Iesu Keriso o lē e malamalama i o tatou vaivaiga,<sup>28</sup> Sa tauivi foi Anne Sullivan ma ona lava faigata ogaoga ma malamalama ai i vaivaiga o Helen. I le lima tausaga, sa aafia ai Anne i se faamai na mafua ai se mageso tiga i le afuafu o le mata ma na toetoe a tauaso atoa ai. Ina ua valu tausaga o Anne, sa maliu lona tina; sa tiae o ia ma lona tuagane laitiiti, o Jimmie; ma sa auina atu ai i laua i se "nofoaga mativa," ma sa matua leaga lava tulaga lea na maliu ai Jimmie i le mavae ai na o le tolu masina. E ala i lona lava ia naunautaiga malosi, sa mafai ona ulufale atu ai Anne i le Aoga a Perkins mo e Tauaso ma faaletonu le vaai, lea na faamanuiaina ai faaleatamai. Sa faia se taotoga ma faaleleia ai lana vaai ma

o lea na mafai ai ona ia faiāua lomiga. Ina ua faafesootai atu e le tama o Helen le Aoga a Perkins e saili mai se tasi e avea ma faiāoga mo lona afafine, sa filifilia loa Anne.<sup>29</sup>

Sa le o se aafia fiafia i le amataga. Sa "tu'i, iini ma kiki e Helen lona faiāoga ma pa'u ese ai se tasi o ona nifo. Sa i'u lava ina mafai ona pulea e [Anne] e ala i le masii atu ma [Helen] i se tamai fale i le fanua o Kellers ma nonofo ai. E ala i le onosai ma le tumau mausali, sa i'u ai lava ina manumalo o ia i le loto ma le faatuatuaga o le teineiititi."<sup>30</sup> E faapena foi, a oo ina tatou faatuatuaina ae le tetee atu i lo tatou Faiaoga faalelagi, o le a mafai ona Ia galue faatasi ma i tatou e faamalamalama ma siitia i tatou i se tulaga moni fou.<sup>31</sup>

Ina ia fesoasoani ia Helen ia aoaoina ni upu, e sipela i ai e Anne igoa o meafaitino masani i lona tamailima i luga o le alofilima o Helen. "Sa fiafia lava [Helen] i lenei 'taalogia i tamailima,' ae sa lei malamalama o ia seja oo i le taimi lauiloa ina ua sipela e [Anne] le 'v-a-i' a o pamuina le vai i lima o [Helen]. Na tusia mulimuli ane e [Helen]:

"Sa faafuasei ona ou iloaina se mea sa foliga mai na galo ia te au . . . ma sa pei na faaalia mai ia te au le mealilo o le gagana. Sa ou iloa ai i lena taimi o le "v-a-i" o lona uiga o le mea malulu lea sa tafe i luga o lo'u lima. O lena upu mamana sa fagua ai lo'u agaga, maua ai le malamalama, faamoemoe, olioli, ma le saolotoga! . . . O mea uma e i ai se igoa, ma o igoa taitasi e fanau mai mase manatu fou. A o ma toe foi atu i le fale[,] o meafaitino uma . . . na ou pa'i i ai sa foliga mai na tumu i le ola."<sup>32</sup>

A o tuputupu a'e Helen Keller i se tagata matua, sa lauiloa o ia mo lona fiafia i le gagana, o ona tomai o se tusitala, ma lona poto e tautala o se failauga i tagata latutele.

I se atatifaga o loo faaalia ai le olaga o Helen Keller, o loo faamatalaina ia le faamalieina o ona matua i le galuega a Anne Sullivan na faafilemuina ai lo la afafine amiolepulea lea na saofai ai ma le migao i le aiga o le afiafi, tausami faalelei, ma gaugau lana sololima i le maea ai o le meaai. Ae sa iloa e Anne e anoanoai atu isi mea e gafatia e Helen

ma e tele ni ona sao e fai.<sup>33</sup> E faapena foi i tatou, atonu e faamalieina i mea ua tatou faia i o tatou olaga ma o tagata lava ia ua avea ai i tatou, ae e malamalama le Faaola i se gafatia mamalu lea e na o le "faanenefu i le faaata"<sup>34</sup> tatou te vaia ai. E mafai e i tatou taitoatasina ona lagonaina se olioli naua o le gafatia paia e atiaeina i totolu o i tatou, e pei lava o le olioli na lagona e Helen Keller ina ua mamana upu ia te ia, ma tuu atu le malamalama i lona agaga, ma faasaolotoina ai. E mafai e i tatou taitoatasina ona alofa ma auauna atu i le Atua ma faamanaina e faamanua ai o tatou uso a tagata. "E pei ona tusia, o mea e lei vaia e mata, e lei lagona foi e taliga, e lei oo foi i le loto o se tagata, o mea ia ua saunia e le Atua mo i latou o e alofa ia te ia"<sup>35</sup>

Ia tatou mafaufau i le tau o le alofa faapelepele o le Atua. Sa faaali mai e Iesu ina ia togiola mo a tatou agasala ma togiola i tatou mai le oti uma faafaitino ma faaleagaga, o Ona mafatiaga ia na oo ai ia te Ia lava, "o le Atua lava lea, o lē ua silisili i tagata uma, le gatete ona o le tiga, ma tafe toto ai i pu afu uma, ma mafatia ai i le tino atoa ma le agaga—ma manao ai ia Ou lē inuina le ipu oona, ma ma'e'e'e."<sup>36</sup> O Ona tiga i Ketesemane ma luga o le satauro sa sili atu i lo tiga e mafai e se tagata ona lavatia.<sup>37</sup> Ae ui i lea, ona o Lona alofa mo Lona Tama ma mo i tatou, sa Ia tumau ai ma, o se taunuuga, ua mafai ona ofo maia ia i tatou le tino ola pea ma le ola e faavavau.

O se faatusa loloto le "[sau] o le toto mai ona pu afu uma"<sup>38</sup> a o mafatia ai Iesu i Ketesemane, le nofoaga o le soligā vine. Ina ia gaosi le suauu olive i le taimi o le Faaola, e olopala muamua olive e ala i le faataavale ai i luga o se maa tele. O "mea ua olopalaina" sa tuu i totolu o se ato lalaga vaivai o loo matala, lea sa faaputu le tasi i luga o le isi. O lo latou mamafa e tatauina mai i fafo le suauu muamua ma sili ona lelei. Ona toe faaaoga lea o se isi mamafa faaopoopo e al ai le tuuina o se amopou tele po o se ogalaau i luga o ato ua faaputuina, ma toe maua ai nisi suauu. Mea mulimuli, ina ia tatau mai i fafo ni mataua mulimuli, e faamamafa i ai le amopou ma ni maa i le tasi pito

e maua ai le mamafa sili ma le olopalaina.<sup>39</sup> Ma ioe, e mumu totototo le suauu i le taimi muamua e tafe mai ai.

Ou te mafaufau i le tala a Mataio e uiga i le Faaola a o Ia ulufale atu i Ketesemane i lena po matautia—lea na amata ai ona “tiga [o Ia] ma atuatuvalue.

“Ua maliu faaititi atu o ia i luma, ona faapa’ū faō ai lea o Ia ma tatalo, ua faapea atu, Lo’u Tama e, afai e mafai, ia ave ese lenei ipu ia te a’u: ae ‘aua le faia lo’u loto, ao lou finagalo.”<sup>40</sup>

Ona oo lea e pei ona ou mafaufau i ai sa faateteleina le atuatuvalue, sa Ia aioi atu i le taimi lona lua mo se toomaga ma, masalo i le taimi mulimuli i le luluti ai o Ona puapuaga, o le taimi lona tolu. Sa Ia onosaia le tiga seiā oo lava ina ua faamalieina le faamasinotonu i le matāāa mulimuli lava.<sup>41</sup> Na Ia faia lenei mea e togiola ai oe ma a’u.

E maeu lenei meaalofa taua o le alofa paia! I le faatumuliaina ai i lena alofa, sa fesili ai Iesu, “Pe tou te le foi mai nei ea ia te au, ma salamo ia outou agasala, ma liliu, ina ia ou faamaloloina outou?”<sup>42</sup> Sa Ia faamautinoa mai ma le agamalu, “Faauta, ua faaloaloa atu ia te outou lou lima alofa mutimutivale, ma o soo se tasi e sau, o ia lea o le a ou taliaina; ma amuia lava i latou o e e o mai ia te au.”<sup>43</sup>

E te le alofa ea ia te Ia o lē na muai alofa ia te oe?<sup>44</sup> Tausi la Ana poloaiga.<sup>45</sup> E avea ea oe ma se uo ia te Ia o lē na foai mai Lona ola mo Ana uo?<sup>46</sup> Tausi la Ana poloaiga.<sup>47</sup> E te le tumau ea i Lona alofa ma maua mea uma ua Ia ofo maia ma le alofa tunoa ia te oe? Tausi la Ana poloaiga.<sup>48</sup> Ou te tatalo ina ia tatou tumau atoatoa i Lona alofa, i le suafa o Iesu Keriso, amene. ■

#### FAAMATALAGA

1. 1 Ioane 4:8. O le mamalu ma le faamautinoaina e pei o le alofa o Iesu Keriso, e le na o le pau lena o Sona uiga paia. O Ona “uiga faaletagata, uiga atoatoa, ma uiga paia” (*Lectures on Faith* [1985], 38) o loo aofia ai foi le faamasinotonu, upumoni, ma le tumau mausali; O Ia le Atua lava e tasi o ananafi, o le asō, ma le faavavau (tagai *Lectures on Faith*, 41). Ana le seanoa ma nei uiga ma isi amioga ma uiga auau mama o loo ia te la ua atoatoa tonu ai, semanu e le avea o Ia ma Atua.
2. Thomas S. Monson, “E Le Tuua Lava Na o i Tatou,” *Liahona*, Nov. 2013, 124.



3. Mataupu Faavae ma Feagaiga 138:3.
4. 1 Ioane 4:18; Moronae 8:16.
5. Alema 5:26.
6. Ieremia 31:3.
7. Ioane 15:9–10.
8. Tagai Moronae 10:32–33.
9. Tagai 2 Nifae 31:11–21; 3 Nifae 27:16–20; tagai foi Mataupu Faavae ma Feagaiga 20:29–34.
10. Tagai Alema 11:32–37; tagai foi Alema 42:13, 15, 22–27.
11. Tagai Helamana 5:10–11.
12. Alema 11:37; tagai foi Mose 6:57.
13. Helamana 5:11.
14. Alema 34:15–16.
15. Mataio 5:45; tagai foi 3 Nifae 12:45.
16. Mataio 5:44–45; tagai foi 3 Nifae 12:44–45.
17. Russell M. Nelson, “O Le Alofa Paia,” *Liahona*, Feb. 2003, 16. E toe faapea atu, “e le sao atu i le malo o le lag i latou uma o e fai mai ia te au, Le Alii e, le Alii e; na o le na te faia le finagalo o lo’u Tama o i le lag i” (Mataio 7:21; tagai foi 3 Nifae 14:21).
 

Ua aoaoina foi i tatou:

“E i ai se tulafono, na folafola lē maaveeseia i le lag i luma atu o le faavaega o le lalolagi lenei ua faavae ai i luga faamanuiaga uma—

“Ma a tatou maua se faamanuiaga mai le Atua, e maua i le usiusitai i lena tulafono ua faavae ai i luga” (Mataupu Faavae ma Feagaiga 130:20–21).

E galo i nisi tagata o le Atua “e le mafai ona [silasila] i luga o le agasala ma sina tikeri ititi o le faatagaina” (Mataupu Faavae ma Feagaiga 1:31). I le taimi lava e tasi, ua Ia faamautinoa mai ia i tatou e faapea, “O ia o lē e salamo ma faia poloaiga a le Alii o le a faamagaloina” (Mataupu Faavae ma Feagaiga 1:32).
18. 3 Nifae 27:22.
19. Tagai 3 Nifae 27:27; tagai foi Mataio 5:48; 3 Nifae 12:48.
20. Dieter F. Uchtdorf, “O le Meaalofa o le Alofatunoa,” *Liahona*, Me 2015, 108.
21. Eperu 12:6; tagai foi Eperu 12:5, 7–11; Ioane 15:1–8.
22. Tagai Ioane 15:12.
23. Mataupu Faavae ma Feagaiga 88:22.
24. Mosaea 3:19.
25. Dallin H. Oaks, “O Le Luitau ia Avea ma se Tasi,” *Liahona*, Ian. 2001, 40; faamamafa i le uluai lomiga.
26. “Helen Keller,” [perkins.org/history/people/helen-keller](http://perkins.org/history/people/helen-keller).
27. “Helen Keller,” [perkins.org/history/people/helen-keller](http://perkins.org/history/people/helen-keller).
28. Tagai Eperu 4:15.
29. Tagai “Anne Sullivan,” [perkins.org/history/people/anne-sullivan](http://perkins.org/history/people/anne-sullivan).
30. “Helen Keller,” [perkins.org/history/people/helen-keller](http://perkins.org/history/people/helen-keller).
31. Tagai, mo se faataitaiga, Mataupu Faavae ma Feagaiga 93:28: “O lē tausia ana poloaiga e maua le upu moni ma le malamalamā, seiā faamamaluina o ia i le upu moni ma iloa mea uma lava.”
32. “Helen Keller,” [perkins.org/history/people/helen-keller](http://perkins.org/history/people/helen-keller).
33. Tagai William Gibson, *The Miracle Worker* (ata tifaga 1962).
34. 1 Korinito 13:12.
35. 1 Korinito 2:9.
36. Mataupu Faavae ma Feagaiga 19:18.
37. Tagai Mosaea 3:7.
38. Mosaea 3:7.
39. Tagai Richard Neitzel Holzapfel and others, *Jesus Christ and the World of the New Testament* (2006), 18; Richard Neitzel Holzapfel and others, *Jehovah and the World of the Old Testament* (2009), 281.
40. Mataio 26:37, 39.
41. Tagai Mataupu Faavae ma Feagaiga 19:19.
42. 3 Nifae 9:13.
43. 3 Nifae 9:14.
44. Tagai 1 Ioane 4:19.
45. Tagai Ioane 14:15.
46. Tagai Ioane 15:13.
47. Tagai Ioane 15:14.
48. Tagai Ioane 15:10.



Saunia e Elder W. Mark Bassett  
O Le Fitugafulu

# Mo Lo Tatou Alualu i Luma ma le Aoaoina Faaleagaga

*Ua na o Lona finagalo ma e ala i le mana o le Agaga Paia  
o le a tatala mai ai mealilo a le Atua ia i tatou.*

**A**o ou tama talavou, sa maua e ou matua se meaalofa lea sa mata-gofie i lou uso laitiiti o Tavita ma au. O le meaalofa o se faatusa laitiiti o papatusi auro na maua e le Perofeta o Iosefa Samita mai le agelu o Moronae. Ou te manatua, sa i ai i papatusi faatusa o itulau uamea e 10 pe a ma upu o loo tusia ai. Peitai, e le o itulau na sa ma gauai atu i ai.

A o ma tuputupu ae sa ma faalogo e uiga i le Toefuataiga. Sa ma iloa ma pepese i le Peraimeri e uiga i papatusi auro sa natia loloto i se mauga ma sa tuuina mai e le agelu o Moronae ia Iosefa Samita.<sup>1</sup> A o faateleina lo ma fia iloa [e uiga i nei papatusi], e tasi lava le mea sa ma fia vaai moni i ai: o a mea sa tusia i le vaega laitiiti o papatusi faatusa sa malupuipua le faamaufaailogaina i noataga uamea laiti e lua?

Sa i ai papatusi i se laulau laitiiti [i lo matou fale] mo ni nai aso ao lei faamalosia i maua e fai se mea i lo ma fia iloa. E ui sa ma malamalamalama lelei e le o papatusi tonu ia na tuuina mai e Moronae, sa ma mananao e vaai i vaega na

faamaufaailogaina. O lea i nisi taimi, sa ma taumafai ai ma lou uso e tatala e faaaoga ai naifi faapata [falaoa], sipuni tuai, ma soo se mea sa ma mafaufau ai e tatala ai vaega na faamaufaailogaina o papatusi ia tau lava ia vaai i mea o loo i ai—ae ia le tele tele e gauai ai noataga laiti. Sa ma popoto tele ina ia le tuua se faailoga o mea sa ma faia e fa'amalie ai lo ma fia iloa. I le ma le fiafia ma le

ita, o nei taumafaiga o le “fia iloina ia papatusi” sa le manuia i taimi uma.

Ou te lei iloa po o le a—pe o i ai se mea—sa natia i lalo o lena vaega na faamaufaailogaina. Ae o le vaega maasiasi o la maua tala, e oo mai i le aso, ou te leiloa po o a mea na tusia i luga o vaega o itulau uamea lea sa tatau ona faitauina. E na o le mafai ona ou mafaufau, o nei itulau o loo i ai tala o le Toefuataiga ma le molimau a Iosefa Samita ma Mau a Molimau e Toatolu ma le Toavalu, o e na vaai moni i papatusi na tuuina mai e Moronae.

Talu mai le Foafoaga o lenei lalolagi, ua saunia e lo tatou Tama oi le Lagi alofa le taiala, taitaiga, ma le faatonuga i Lana fanau e ala i perofeta. O Ana afioga ua faamaumauina e nei perofeta ma ua puipuia o ni tusitusiga paia mo lo tatou alualu i luma ma le aoaoina. Sa faamatalaina e Nifae i le ala lenei:

“Ona ua fiafia lou agaga i tusitusiga paia, ma ua manatunatu loloto i ai lou loto, ma ua ou tusia mo le aoaoaga ma le manuia o a'u fanau.

“Faaauta, ua fiafia lo'u agaga i mea a le Alii; ma ua manatunatu loloto pea lo'u loto i mea sa ou vaia ma faalogoinga.”<sup>2</sup>

E le gata i lea, i le taimi o tisipenisona ua tuanai ma i lenei tisipenisione mulimuli o le atoaga o taimi, ua faamunuiaina tagata agavaa o le Ekalesia a le Alii i le mafutaga a le Agaga Paia, o loo fesoasoani i lo tatou alualu i luma faaleagaga ma le aoaoina.





O le iloaina o le natura filiga o lou uso laitiiti, ou te masalo sa ia faitaunia uma upu sa tusia i luga o le papatusi faatusa i le fale a o maua matua. E ui i lea, o au, sa ou le amanaiaina na upumoni manino ma pele ae tuu atu lau taumafaiga e saili mo na mea sa lei faaali mai.

E faanoanoa ai, o lo tatou alualu i luma ma le aoaoina e mafai i nisi taimi ona faatelegese po o le taofia foi e se manao le talafeagai e “fia iloaina ia papatusi.” O nei faatinoga e mafai ona taitai atu i tatou e saili i mea e le manaomia ona malamalama i ai i lenei taimi, i le taimi lava e tasi o loo faatuatuanā'i upumoni matafogie e tatau mo i tatou ma o tatou tulaga—o upumoni na faamatalaina e Nifae ua tusia mo lo tatou aoaoina ma le manuia.

Sa aoao mai Iakopo le uso o Nifae: “Faauta, ua silisili ma ofoo fogia galuega a le Alii. Ua le masuesueina lava le loloto o ana mealilo; ma e le mafai e le tagata ona iloa ona ala uma.”<sup>3</sup>

Ua aoao mai e upu a Iakopo e le mafai ona tatou faamanuiaina e “fia iloaina ia papatusi” pe faamalosia le faaali mai ia i tatou o mealilo a le Atua. Nai lo lena, ua na o Lona finagalo ma

e ala i le mana o le Agaga Paia o le a tatala mai ai mealilo a le Atua ia i tatou.<sup>4</sup>

Ua faauau e Iakopo:

“Ma e leai se tasi na te iloa ona ala vagana ai ua faaalia ia te ia; o le mea lea, uso e, aua le inoino i faaaliga a le Atua.

“Aua faauta, o le mana o lana fetalaiga na sau ai le tagata i luga o le lalolagi. . . . O lea la, aisea e le mafai ai ona poloai atu i le lalolagi, po o galuega e ona aao i luga o le lalolagi, e tusa ma lona loto ma lona finagalo?

“O le mea lea, uso e, aua tou te saili e fautuaina le Alii, a ia outou talia fautuaga mai lona aao.”<sup>5</sup>

Ina ia malamalama i mealilo a le Atua, po o na mea e na o faaaliga e mafai ona malamalama ai, e tatau ona tatou mulimuli i le faataitaiga a Nifae, o le na faapea mai, “Ona sa ou talavou lava, e ui i lea sa ou tino ese, ma sa ia te a'u foi le naunau tele e fia iloa mealilo a le Atua, o le mea lea, na ou tagi atu ai i le Alii; ma faauta sa asiasi mai o ia ia te a'u, ma faamaluluina lo'u loto, o le mea lea na ou talitonu ai i upu uma na tautalaina e lo'u tama.”<sup>6</sup> O le Alii Lava Ia na faamalamalama atili sa faatino e Nifae le faatuatua, saili ma le

filiga ma le maualalo o le loto, ma tauis Ana poloaiga.<sup>7</sup>

O le faataitaiga a Nifae o le sailia o le malamalama e aofia ai (1) se manao faamaoni, (2) lotomaualalo, (3) tatalo, (4) faalagolago i le perofeta, ma se faatinoga o le (5) faatuatua, (6) filiga, ma le (7) usiusitai. O lenei auala o le sailia o loo i ai se eseesega tele i lou “fia iloaina o papatusi” po o le taumafai e faamalosia se malamalamaaga o mea e faaali mai e tusa ma le taimi a le Alii ma e ala i le mana o le Agaga Paia.

I lenei vaitau o aso nei, ua tatou faamoemoe e mafai ma e tatau lava ona vave ona maua le malamalama; pe a le faigofie le iloaina po o le mauaina o faamatalaga, e masani lava ona le amanaiaina pe le talitonuina. Ona o le anoanoai o faamatalaga, o nisi e aunoa ma le iloaina e mafaufau e sili atu ona talafeagai punaoa o loo mauaina [o faamatalagal] e ona le afuaga e lemailoa i lo le faalagolago i le mamanu ua faatulagaina a le Alii mo le mauaina o faaaliga faaletagata lava ia. E mafai ona faamatalaina e Iakopo lo tatou vaitaimi ina ua ia faapea mai: “Ae faauta, sa [latou] ua maa; ma sa latou inoino i upu manino . . . ma saili mo mea sa le mafai ona latou malamalama i ai. O le mea



lea, ona o lo latou tauaso, o se tauaso na oo mai i le latou vaai i tala atu o le faailoga, o lea o le a latou pauu ai; ona ua aveese e le Atua lana manino mai ia te i latou, ma tuu atu ia te i latou le tele o mea e le mafai ona latou malamalama i ai, ona sa latou mananao i ai.”<sup>8</sup>

I se faatusatusaga o le fautuaga lenei a Peresitene Dieter F. Uchtdorf. Sa ia saunoa e uiga i faifeatalai, ae o ana upu e tutusa le faatatau i tagata sailili o le upumoni faaleagaga. “Pe a . . . maua e faifeatalai le faatuatua ia Iesu Keriso,” sa ia fai mai, “o le a latou faatuatuaaina le Alii e mulimuli ai i Ana poloaiga—e tuna pe latou te le malamalama atoatoa i mafuaaga mo [na poloaiga]. O le a faailoa mai lo latou faatuatua e ala i le filiga ma e ala i le galuega.”<sup>9</sup>

I le taimi o le konafesi aoao ua tua-nai ia Aperila, sa faamatala mai e Elder Dallin H. Oaks: “O loo faia e le Ekalesia ni taumafaiga tele ina ia faamaoni ia faamaumauga uma o i ai ia i tatou, ae i le uma ai ona tatou faia o mea uma e mafai ona tatou lolomiina, e tuua ai lava o tatou tagata o le ekalesia i nisi taimi ma ni fesili autu e le mafai ona taliina e suesuega. . . . O nisi mea e na o le faatuatua e mafai ona aoaoina ai.”<sup>10</sup>

Sa aoao mai e perofeta o anamua lenei mataupu faavae e tasi, ma taua i le aluga o le taimi e le suia le natura o le tagata ma e aoga le mamanu a le Alii mo le aoaoina i vaitau o taimi uma. Mafaufau i lenei faataoto o le Feagaiga Tuai: “Ia e faatuatua ia Ieova ma lou

loto atoa; a e aua le faalagolago i lou lava atamai.”<sup>11</sup>

Sa faamatala mai e Isaia, i le saunoa ai mo le Alii, “Aua e pei ona sili ona maualuga o le lagi i le lalolagi, ua faapea ona sili ona maualuga o’u ala i o outou ala, ma o’u manatu e sili i o outou manatu.”<sup>12</sup>

Sa faaopoopo e Nifae le isi molimau ina ua ia taua, “Le Alii e, ua ou faalagolago ia te oe, ma o le a ou faalagolago pea ia te oe e faavavau.”<sup>13</sup>

O le faatuatua ma le faalagolago i le Alii e manaomia ai ona tatou faailoa atu o Lona atamai e sili atu i lo tatou lava atamai. E tatau foi ona tatou faailoa atu o Lona fuafuaga ua tuuina mai ai le gafatia silisili mo le alualu i luma ma le aoaoina faaleagaga.

Sa lei faamoemoe lava tatou te “maua lea o se malamalama atoatoa i mea” i lenei olaga faaletino. I lo lena, ua faamoemoeina i tatou e “faamoemoe mo mea e le vaaia, a e moni.”<sup>14</sup>

E oo lava i le faatuatua maoae o Nifae, sa ia faailoa mai lona malamalama tapulaa ina ua tali atu i le agelu o le na fesili ia te ia, “Pe ua e iloa ea le faamaualalo o le Atua?” Sa tali Nifae, “Ua ou iloa e alofa o ia i ana fanau; e ui i lea, *ou te le iloa le uiga o mea uma.*”<sup>15</sup>

E faapena foi, sa faailoa atu e Alema i lona atalii o Helaman, “O lenei o nei mea lilo e lei faailoa atoatoa mai ia ia te au i le taimi nei; o lea o le a ou taofia ai.”<sup>16</sup>

Ou te tuuina atu lou molimau e alofa le Tama oi le Lagi i Lana fanau,

ma e ui, e pei o Nifae ma Alema, ou te le iloa le uiga o mea uma. Ou te le manaomia foi le iloa o mea uma; O au *foi* o le a aloese le talanoa i ai ma faatalitali ma le onosai i le Alii, ma le iloaina “Ua ia te au mea uma o se molimau ua moni nei mea; ma ua ia te oe foi mea uma o se molimau ia te oe ua moni i latou. . . .

“. . . Ua folasia i ou luma tusitusiga paia, ioe, ma ua faailoa mai i mea uma o loo i ai se Atua; ioe, e oo i le lalolagi, ma mea uma ua i ona luga, ioe, ma lona faataamilosaga, ioe, ma paneta uma foi o loo i o latou ala masani ai ua molimau mai o loo i ai se Foafoa Silisilise.”<sup>17</sup>

Ao tatou faailoa atu o i tatou o foafoaga o se Tama oi le Lagi atamai ma tuuto, “O le mea lea,” aisea e le faataga ai o Ia e taitaia lo tatou alualu i luma ma le aoaoina faaleagaga “e tuna ma lona loto ma lona finagalo” nai lo tatou lava [loto]?<sup>18</sup>

O loo soifua o Ia. O Iesu Keriso o Lona Alo Pele e Toatasi na Fanaua ma o le Togiola o tagata uma. Ona o le Togiola le iu a Keriso, ua ia te Ia le malamalama ma le muai silafia e taitaia ai i tatou i nei aso e gata ai. O Iosefa Samita o Lana perofeta, sa filifilia e toefuatai mai Lona malo i le lalolagi i lona atoaga. O Thomas S. Monson o Lona perofeta ma le failauga i le aso. O lenei ou te molimau faamaoni atu ai i le suafa o Iesu Keriso, amene. ■

#### FAAMATALAGA

1. Tagai “O Papatusi Auro,” *Tusipese a Tamaiti*, 61.
2. 2 Nifae 4:15–16.
3. Iakopo 4:8.
4. Tagai 1 Nifae 10:19.
5. Iakopo 4:8–10.
6. 1 Nifae 2:16.
7. Tagai 1 Nifae 2:19–20.
8. Iakopo 4:14.
9. Dieter F. Uchtdorf, “The Lord’s Work” (saunoaga na tuuina atu i le semina mo peresitene fou o misiona, Iuni 25, 2016), 6.
10. Dallin H. Oaks, “Faafeagai o Mea Uma,” *Liahona*, Me 2016, 117.
11. Faataoto 3:5.
12. Isaia 55:9.
13. 2 Nifae 4:34.
14. Alema 32:21.
15. 1 Nifae 11:16–17; faaopoopo le faamamafa.
16. Alema 37:11.
17. Alema 30:41, 44.
18. Iakopo 4:9.



Saunia e Kazuhiko Yamashita  
O Le Fitugafulu

## la Naunau Atu mo Keriso

*Tatou te naunau atu mo Keriso pe a tatou auauna atu ma le faamaoni, talia ma le lotomaualalo, tumau faatamalii, tatalo faatauanau, ma aai ma feinu ma le agavaa [i le faamanatuga].*

**O** u uso e ma tuafafine, ou te fia talanoa atu i le aso i tagata talavou o le Eklesia e aofia ai a tatou faifeautalai ofoofogia. Ioe, o uso ma tuafafine o e manatu e laiti ifo e valaaulia ma le agalelei e faalogologo.

Ia Aokuso 21 ua tuanai , sa faapaia ai e Peresitene Russell M. Nelson le Malumalu matagofie o Sapporo—the malumalu lona tolu i Iapani. Ua fausia le Malumalu i Sapporo i matu o Iapani i se nofoaga e taua o Hokkaido. E pei o Iuta, sa nofoia Hokkaido e paionia malolosi ma galulue malosi.

I le 1876, sa valaaulia se faiaoga lauiloa e suafa ia Dr. William Clark<sup>1</sup> e sau i Hokkaido e faiaoga ai. Sa nofo o ia i Iapani mo le na o le valu masina, ae o ona uiga faaKerisiano sa tuua ai se aafiaga tumau i ana tamaiti aoga talavou e le o ni Kerisiano. Ao lei tuua le nofoaga, sa ia tuu atu i ana tamaiti aoga se savali faamavae sa faamanatina i lenei faatagata apamemea.<sup>2</sup> Sa ia faapea atu, “Tamaiti, ia naunau atu!”—“Ia naunau atu mo Keriso.”<sup>3</sup> O lana poloaiga ina “ia naunau atu mo Keriso” e mafai ona fesoasoani e faatonutonu ai faaiuga o aso uma mo Au Paia o Aso e Gata Ai i le aso.

O le a le uiga ina “ia naunau atu mo Keriso”? Ia naunau atu mo Keriso o lona

uiga o le uunaia, taulai atu, ma tuuto atu i Lana galuega. Ia naunau atu mo Keriso e seasea faaungaina ua tulaga ese i tatou mo le faamamaluga o tagata lautele. Ia naunau atu mo Keriso o lona uiga tatou te auauna atu faamaoni ma filiga i a tatou uarota ma paranesi e aunoa ma le tomumu ma faatasi ai ma loto fiafia.

O a tatou faifeautalai o loo auauna atu i le lalolagi atoa o ni faataitaiga



Faatagata apamemea o le faiaoga lauiloa o Dr. William Clark, o le na uunaia tamaiti ina ia “naunau atu Keriso.”

matagofie o i latou o e naunau atu faamaoni mo Keriso. I nai tausaga ua tuanai, sa ma auauna ai ma Sister Yamashita i le Misiona o Iapani Nagoya. Sa matuai naunau atu a matou faifeautalai mo Keriso. O se tasi o na faifeautalai o se alii e suafa ia Elder Cowan.

Sa leai se vae taumatau a Elder Cowan ona o se faalavelave tau uila a o talavou. I nai vaiaso i le maea ai ona ia ulufale atu i le misiona, sa ou maua se valaau mai i lana soa. Sa gau le vae faapipii a Elder Cowen ao tietie o ia i lana uila. Sa matou aveina o ia i se fale lipea lelei, ma o iina i se potu tumaoti, sa ou vaai ai mo le taimi muamua i lona vae. Sa ou iloa le tele o le tiga sa ia mafatia ai. Sa faaleleia lana vae faapipii, ma sa ia toe foi atu i lana eria.

Peitai, a o faagasolo vaiaso, sa faauau pea ona gau ma toe gau le [vae] faapipii. Sa fautua mai le faufautua faafomai a le eria ina ia toe foi atu Elder Cowan mo se toetofia i se misiona talafeagai. Sa ou teena lenei fautuaga aua o Elder Cowan o se faifeautalai maoae ma sa ia te ia se manao malosi e nofo i Iapani. Peitai, sa fasolosolo lava, ona amata oo Elder Cowan i lana tapulaa faaletino. E ui i lenei mea, sa lei muimui pe tomumu o ia.

Sa toe fautuaina au ina ia faataga Elder Cowan e auauna atu i se nofoga e le manaomia ai e ia ona tietie i se uila. Sa ou mafaufau i lenei tulaga. Sa ou mafaufau e uiga ia Elder Cowan ma lona lumanai, ma sa ou tatalo ai e uiga i le mataupu. Sa ou lagona, ioe, e tatau ona toe foi atu Elder Cowan i le aiga ma faatali le toetofiaina. Sa ou telefoni atu ia te ia ma faailoa atu lou alofa ma le popole ma tau atu ia te ia lau faaiuga. Sa leai sana tala na fai mai e tali mai ai. Sa na o lona masusu sa mafai ona ou lagonaina i le isi itu o le telefoni. Sa ou fai atu, “Elder Cowan, e te le manaomia ona tali mai ia te au i le taimi nei. O le a ou valaau atu ia te oe taeao. Faamolemole ia mafaufau i lau fautuaga faatasi ai ma se tatalo faamaoni.”

Ina ua ou valaau atu ia te ia i le taeao na sosoo ai, sa ia fai mai ma le lotomaualalo o le a ia mulimuli i lau fautuaga.



I le taimi o lou faatalanoaga mulimuli ma ia, sa ou fai atu ia te ia le fesili lenei: "Elder Cowan, na e talosaga i lau talosaga faafaifeatalai e auina atu oe i se misiona e le manaomia ai ona e tietie i se uila?"

Sa ia fai mai, "Ioe, Peresitene, sa ou faia."

Sa ou tali atu, "Elder Cowan, sa valaauina oe i le Misiona a Nagoya Iapani, lea e manaomia ai ona e tietie i se uila. Na e tauina lenei mea i lau peresitene o le siteki?"

Sa ou te'i i lana tali. Sa ia fai mai, "Leai, ou te lei faia. Sa ou naunau afai o le mea *lena* e valaaauina ai au e le Alii, o le a ou alu i le fale taalo ma toleni lou tino ina ia mafai ona tietie i se uila."

I le faaiuga o la maua faatalanoaga, sa ia fesili mai ia te au le fesili lenei ma loimata i ona fofoga: "Peresitene Yamashita, aisea na ou sau ai i Iapani? Aisea ua ou i ai iinei?"

Sa ou tali atu ia te ia e aunoa ma le faatali: "Elder Cowan, ou te iloa le mafuaaga e tasi ua e sau ai iinei. Sa e sau iinei mo lo'u manuia. Ua ou malamalama oka se maoae o se alii talavou sa ma auauna faatasi. Ua faamanuiaina a'u e iloaina oe."

Ou te fefia e lipoti atu sa toe foi atu Elder Cowan i lona aiga agaalofa ma sa toe tofia e auauna atu i se misiona sa mafai ai ona ia faaaogaina se taavale

mo lana faigamalaga. E le gata ua ou mitamita ia Elder Cowan ae faapena foi faifeautalai uma i le lalolagi atoa o e auauna atu ma le naunautai e aunoa ma le muimui pe tomumu. Faafetai, alii ma tamaitai faifeautalai, mo lo outou faatuatua, lo outou taulaiga, ma lo outou naunau atu malosi mo Keriso.

O loo i ai i le Tusi a Mamona le tele o tala o i latou sa naunau atu mo Keriso. O Alema le Itiiti, a o tama talavou, sa sauaina le Ekalesia ma ona tagata. Sa ia uia mulimuli ane se suiga maoae o le loto ma sa auauna atu o se faifeautalai maoae. Sa ia sailia le taitaiga

a le Alii, ma sa ia faamanuiaina ana soa a o ia auauna faatasi ai ma i latou. Sa faamalosia o ia e le Alii, ma sa ia faatoilaloina tofotofoga sa feagai ma ia.

O lenei Alema, sa tuuina atu i lona atalii o Helamana le fautuaga lenei:

"O ai lava e tuu atu lo latou faala-golago i le Atua e lagolagoina i o latou tofotofoga, ma o latou faalavelave. . . .

". . . Tausi i poloaiga a le Atua. . . .

"Filifili faatasi ma le Alii i au mea uma e fai, ma o le a ia taitai oe mo le lelei."<sup>4</sup>

Sa ola le ma atalii mo le tele o lona talavou i fafo atu o le Ekalesia. Ina ua atoa lona 20, sa ia maua se aafiaga na ia manao ai e suia lona olaga. Faatasi ai ma le alofa, tatalo, ma le fesoasoani a lona aiga ma tagata o le Ekalesia, ma mulimuli ane e ala i le agaalofa ma le alofa tunoa a le Alii, sa ia toe foi mai i le Ekalesia.

Sa mulimuli ane valaaauina o ia e auauna atu i le Misiona a Uosigitone Seattle. Sa ia mafatia i le taimi muamua i se lotovaivai tele. O po uma mo masina e tolu muamua, e na te alu i le faleletaua ma tagi ai. E pei o Elder Cowan, sa ia saili ina ia malamalama i le "Aisea ua ou i ai iinei?"

I le mavae ai o lana auaunaga mo se tausaga, sa matou maua se imeli sa avea o se tali i la matou tatalo. Sa ia tusia: "I le taimi nei ua mafai moni ona ou lagona le alofa o le Atua ma Jesu. O le a ou galue malosi ina ia avea e pei o perofeta anamua. E ui o loo o'u aafia ai



foi i le tele o faigata, ua ou fiafia moni lava. O le auauna atu ia Iesu e moni lava o le mea aupito sili ona lelei. E leai seisi mea e matagofie i lo lenei [galuega]. Ua ou fiafia lava.”

Sa ia lagonaina e pei foi o Alema: “Ma oi, le olioli e, ma le malamalama ofoofogia tele na ou vaia; ioe, sa faatumulia lo’u agaga i le olioli sa sili atu ona tele e pei o lo’u tiga!”<sup>5</sup>

I o tatou olaga tatou te oo i tofotofoga, ae afai o loo tatou naunau atu mo Keriso, e mafai ona tatou tauilai ia te Ia ma lagona le olioli e oo foi i le lotolotoi o [tofotofoga]. O lo tatou Faaola o le faataitaiga silisili. Sa Ia malamalama i Lona misiona paia ma sa usitai i le finagalo o le Atua le Tama. O se faamanuiga maoae le tatou manatua ai o Lana faataitaiga matagofie i vайасо taitasi ao tatou aai ma feinu i le faamanatuga.

Ou uso e ma tuafine, tatou te naunau atu mo Keriso pe a tatou auauna atu ma le faamaoni, talia ma le lotomaualalo, tumau faatamalii, tatalo faatauanau, ma aai ma feinu ma le agavaa [i le faamanatuga].

Tau ina ia tatou naunau atu mo Keriso ao tatou taliaina o tatou faigata ma tofotofoga ma le onosai ma le faatuatua ma maua le olioli i la tatou ala o le feagaiga.

Ou te molimau atu e silafia e le Alii outou. E Na te silafia o outou tauiviga ma popolega. E Na te silafia o outou manaoga e auauna atu ia te Ia ma le tuuto ma, ioe, e oo lava foi i le naunau atu. Tau ina Ia taitai ma faamanuia outou a o outou faia. I le suafa o Iesu Keriso, amene. ■

#### FAAMATALAGA

1. O William Smith Clark (1826–86) sa avea o se polofesa i le kemisi, vaega tau laau, ma i meaola ma sa auauna atu o se taitai i le taimi o le Taua Faalemaloa a Amerika. Sa avea o ia o se taitai i aoaoga tau faatoaga ma se peresitone o le Kolisi a Massachusetts Agricultural. (Tagai “William S. Clark,” wikipedia.com.)
2. Faatagata o loo i le Maupuepue o Sapporo Hitsujigaoka Observation.
3. William S. Clark, i le Ann B. Irish, *Hokkaido: A History of Ethnic Transition and Development on Japan’s Northern Island* (2009), 156.
4. Alema 36:3; 37:35, 37.
5. Alema 36:20.



Saunia e Elder Dallin H. Oaks

O Le Korama a Aposetolo e Toasefululua

## Faasoaina Atu o le Talalelei Toefuataiina

*O le mea ua tatou ta’ua o le “galuega faafaifeautalai a tagata o le au paia” e le o se polokalama ae o se uiga o le alofa ma le aapa atu e fesoasoani ia i latou o siomiaina i tatou.*

I.

E latalata atu i le faaiuga o Lana misiona faalelalolagi, sa poloaiina ai e lo tatou Faaola, o Iesu Keriso Ona sooo: “O lenei, ia outou o atu e fai nuu uma lava ma sooo” (Mataio 28:19) ma “O atu ia outou i le lalolagi uma, ina tala’i atu ai le tala lelei i tagata uma lava”



(Mareko 16:15). Ua noatia Kerisiano uma i lalo o nei poloaiga e faasoa atu le talalelei i tagata uma. E ta’ua e le toatele lenei mea “O Le Tiute Sili.”

E pei ona faamatalaina e Elder Neil L. Andersen i le sauniga i le taeao, e mautinoa lava o le Au Paia o Aso e Gata Ai o loo i ai faatasi ma i latou ua sili ona tuuto atu i lenei tiutetauvave sili. Ma ua tatau ai ia i tatou, ona ua tatou iloa e alofa le Atua i Ana fanau uma ma i nei aso e gata ai ua Ia toefuatai mai ai isi malamalama taua ma le mana e manuia ai i latou uma. Na aoao i tatou e le Faaola ia alolofa atu i tagata uma o ni o tatou uso ma tuafine, ma e tatou te faamamaluina lena aoaoga e ala i le faasoa atu o le molimau ma le savali o le talalelei toefuataiina “i totonus o atunuuma, ituaiga, gagana, ma nuu” (MF&F 112:1). O se vaega taua lenei o le uiga o le avea ma se tasi o le Au Paia o Aso e Gata Ai. Tatou te vaai i lenei mea o se avanoa fiafia. O le a se mea e sili atu ona faafiafiaina nai lo le faasoa atu o upumoni o le faavavau i fanau a le Atua?

Ua tele punaoa i aso nei e faasoa atu ai le talalelei sa lei maua i tupulaga na muamua atu. Ua ia i tatou le TV, le

Initoneti, ma alaleo o faasalalauga faa-agafesootai. E tele a tatou savali taua e faalauiola atu ai le talalelei toefuataiina. Ua lauiloa le Ekalesia i le tele o malo. Ua faatoateleina naua le aofai o a tatou faifeautalai. Ae o tatou faaaogaina ea nei punaoa uma i le mea silisili e gata ai? Ou te talitonu o le toatele o i tatou o le a fai mai e leai. Tatou te mananao ia mataalia atili i le faataunuuina o la tatou tiutetauave na tofia mai le lagi e folafola atu le talalelei toefuataiina i le talolagi uma.

E tele manatu lelei mo le faasoaina atu o le talalelei o le a aoga i siteki taitasi po o atunu. Peitai, ona o i tatou o se Ekalesia i le talolagi atoa, ou te fia talanoa atu ai i ni manatu o le a aoga i soo se mea, mai lava i iunite sili ona fou e oo atu i iunite ua sili ona mautu, mai aganuu ua talaina le talalelei a Iesu Keriso i aganuu ma malo ua faateleina pea le tetee i tapuaiga. Ou te fia talanoa atu i manatu e mafai ona e faasoaina atu i tagata ua talitonu ma tuuto atu ia Iesu Keriso, faapea ai foi ma tagata e lei faalogo muamua lava i Lona suafa, faatasi ai ma tagata ua faamalieina i o latou olaga o loo i ai i le taimi nei faapea ai ma tagata o loo matua saili ma le naunau ia faaleleia i latou lava.

O le a se mea e mafai ona ou ta'u atu o le a aoga i lou faasoaina atu o

le talalelei, po o a lava ou tulaga o i ai? Tatou te manaomiaina le fesoasoani a tagata uma o le au paia, ma e mafai ona fesoasoani tagata uma, talu ai ua matua anoanoai ni galuega e faatino a o tatou faasoaa atua le talalelei toefuataiina i malo uma, ituaiga, gagana, ma nuu.

Ua tatou iloa uma o le auai ai o tagata o le au paia i le galuega faafafeautalai e taua tele i le ausiaina uma o le liuaina ma le faatumauina. Sa saunoa Peresitene Thomas S. Monson e faapea: “O le taimi lenei mo tagata uma ma faifeautalai e o mai faatasi ai . . . [ma] galulue i le tovine a le Alii ina ia aumai agaga ia te Ia. Ua Ia saunia auala mo i tatou e faasoaa atu ai le talalelei i le anoanoai o ala, ma o le a Ia fesoasoani mai ia i tatou i la tatou galuega pe afai o le a tatou galulue i le faatuatua e faataunuu Lana galuega.”<sup>1</sup>

O le faasoaina atu o le talalelei toefuataiina o lo tatou tiute FaaKerisiano ma le avanoa i le olaga atoa. Ua faamanatu mai e Elder Quentin L. Cook ia i tatou, “O le galuega faafafeautalai e le na o se tasi o ki e 88 o se piano e seāseā taina; o se ki autu i se fati faagaeetia lea e tatau ona taina pea i o tatou olaga pe afai o le a tatou tumau i le ogatasi ma o tatou tautinoga i le faa-Kerisiano ma le talalelei a Iesu Keriso.”<sup>2</sup>

## II.

E tolu ni mea e mafai ona fai e tagata uma o le ekalesia e fesoasoani ai e faasoaa atu le talalelei, e tusa lava po o a tulaga o loo latou ola ma galulue ai. E tatau ia i tatou uma ona faia mea uma nei.

*Muamua*, e mafai ona tatou tatalo uma mo le manao e fesoasoani atu i lenei vaega taua o le galuega o le faaolataga. O taumafaiga uma e amata i le *manao*.

*Lua*, e mafai e i tatou lava ona tausia poloaiga. O tagata o le ekalesia faamaoni ma usiusitai o molimau sili ia ona faatosina o le upumoni ma le taua o le talalelei toefuataiina. E sili atu foi ona taua, o tagata faamaoni o le ekalesia o le a maua pea Lona Agaga e faatasi ma i latou, e taiala i latou a o latou saili atu e auai i le galuega tele o le faasoaina atu o le talalelei toefuataiina a Iesu Keriso.

*Tohu*, e mafai ona tatou tatalo mo musumusuga i mea e mafai ona *tatou* faia i o tatou tulaga patino e faasoaa atu ai le talalelei i isi. E ese atu lenei mea nai lo le tatalo mo *faifeautalai* pe tatalo mo mea e mafai ona faia e *isi*. E tatau ona tatou tatalo mo mea e mafai ona *tatou* faia, e i tatou lava ia. A tatou tatalo, e tatau ona tatou manatua o tatalo mo lenei ituaiga o musumusuga o le a talina pe afai e o faatasi ma se tautinoga—le mea lea e ta'ua e tusitusiga paia o le “manatu moni” po o le “faamoemoe atoa o le loto.” Tatalo faatasi ma se tautinoga ia faatino le musumusuga e te mauaina, ma folafola atu i le Alii afai o le a Ia fesoasoani mai ia i tatou ia saili ni tagata ua Ia silafia “ua saunia e faa-logo i le afioga” (Alema 32:6).

Tatou te manaomiaina le taitaiga a le Alii ona i soo se taimi patino lava, e i ai lava nisi—pe leai foi nisi—ua saunia mo upumoni faaopoopo o le talalelei toefuataiina. E le tatau lava ona tatou faatuina i tatou lava o ni faamasino po o ai ua saunia ae po o ai foi e lei saunia. Ua silafia e le Alii loto o Ana fanau uma, ma afai tatou te tatalo mo musumusuga, o le a Ia fesoasoani mai ia i tatou ia saili ni tagata ua Ia silafia “ua saunia e faa-logo i le afioga” (Alema 32:6).

I le avea ai ma se Aposetolo a le Alii, ou te uunaia tagata uma ma aiga i le Ekalesia ia tatalo mo le Alii





e fesoasoani mai ia i tatou ia saili tagata ua saunia e talia le savali o le talalelei toefuataiina a Iesu Keriso. Sa tuuina mai e Elder M. Russell Ballard lenei fautuaga taua, lea ou te ioe foi i ai: "Ia faalagolago i le Alii. O Ia o le Leoleo Mamoe Lelei. Na te silafia Ana mamoe. . . Afai tatou te le auai, o le toatele o ē o le a faalogo i le savali o le Toefuataiga o le a misia. . . E faigofie lava ia matapu faavae—tatalo, faaletagata lava ia ma i lou aiga, mo ni avanoa faafaifeatalai."<sup>3</sup> A o tatou faailoa atu lo tatou faatuatua, o le a oo mai nei avanoa e aunoa ma se "tali fai faamalosi pe . . . ua leva ona fuafua. O le a oo mai o se taunuuga masani o lo tatou alolofa mo o tatou uso ma tuafafine."<sup>4</sup>

Ou te iloa e moni. Ou te faaopoopo atu la'u folafolaga e faapea, faatasi ma le faatuatua i le fesoasoaniga a le Alii, o le a taialaina i tatou, musuiaina, ma maua le olioli tele i lenei galuega taua e faavavau o le alofa. O le a tatou malamalama o le manuia i le faasoaina atu o le talalelei o le valaauliaina lea o tagata i le alofa ma le manatu faamaoni e fesoasoani ia i latou, e tusa lava po o le a sa latou tali.

### III.

O nisi nei o mea e mafai ona tatou faia e faasoa atu ai le talalelei ma le mataalia.

1. E manaomia ona tatou manatuaina "e aoao tagata pe a latou saunia e aoao, ae le o le taimi ua tatou saunia ai e aoao atu i latou."<sup>5</sup> O le mea ua tatou naunau i ai, e pei o aoaoga taua faaopoopo o aoaoga faavae i le Ekalesia toefuataiina, e masani lava e le o le mea ua naunau i ai isi. O isi e masani lava e mananao i taunuuga o le aoaoga faavae, ae le o le aoaoga faavae. A o latou matauina pe oo foi i aafiaga o le talalelei toefuataiina a Iesu Keriso i o tatou olaga, latou te lagonaina le Agaga ma amata ai ona naunau i le aoaoga faavae. Atonu foi latou te fia naunau pe a latou saili atili i le fiafia, latalata atu i le Atua, po o se malamalama sili atu e uiga i le faamemoega o le olaga.<sup>6</sup> O le mea lea, e tatau ona tatou saili ma le faaeteete ma le agaga tatalo ia iloatino pe faapefea ona fesili atu i isi tagata i mea latou te naunau e aoao atili ai. O le a faalagolago lenei mea i nisi

mea se tele, e pei o tulaga o loo i ai se tagata ma lo tatou sootaga ma ia. O se mataupu lelei lenei e talanoaina i aufono, korama, ma Aualofa.

2. A tatou talanoa atu i isi, e manaomia ona tatou manatuua o se valaaulia ia aoao atili e uiga ia Iesu Keriso ma Lana talalelei e sili atu i lo se valaaulia ia aoao atili e uiga i la tatou Ekalesia.<sup>7</sup> Tatou te mananao i tagata ia liua i le talalelei. O le matafaioi tele lena a le Tusi a Mamona. O lagona e uiga i la tatou Ekalesia e sosoo ma le liuaina ia Iesu Keriso, e le tatau ona muamua. E ui e toatele e le talitonusina ia lotu, ae e i ai lava so [latou] alofa mo le Faaola. Faamuamua mea e tatau ona faamuamua.
3. A tatou saili e faailoa atu i tagata le talalelei toefuataiina, e tatau ona tatou faia lenei mea i auala e faamaoni ma popole ma le alofa mo le tagata. E tupu lenei mea pe a tatou taumafai e fesoasoani atu i isi i faafitauli ua latou faailoaina pe o taimi foi tatou te galulue faatasi ai ma i latou i auauanga ma gaoioiga faalenuu, e pei o le faamāmāina o mafatiaga, tausiaina o ē matitiva ma



lē tagolima, po o le faaleleia o le tulaga o le olaga o isi.

4. O a tatou taumafaiga e faasoat atu le talalelei e le tatau ona faatapulaaina i a tatou li'o o uo ma paaga. I le taimi o le Olimipeka na tatou iloa ai se avetaavale la'u pasese Mamona i Rio de Janeiro na feaveaia ni kopi o le Tusi a Mamona i gagana eseese se fitu ma tuu atu i soo se tasi lava e taliaina. Sa ia ta'ua ia lava o le "faifeautalai ave taavale la'u pasese." Sa ia fai mai, "O alatele o Rio de Janeiro . . . o [la'u] eria o le misiona lena."<sup>8</sup>

Na ta'ua e Clayton M. Christensen, o lē na i ai sona aafiafa faagaeitia o se faifeautalai a le au paia e faapea "i le silia ma le luasefulu tausaga talu ai, ua tatou matauina ai e leai se fesootaiga i le va o le loloto o se sootaga [a ni tagata se toalua] ma le ono naunau o le tasi e aoaoina le talalelei mai le isi."<sup>9</sup>

5. E mafai e au epikopo a uarota ona fuafuaina se sauniga faamanatuga faapitoa lea e uunaia ai le au paia ia aumai ni tagata e naunau [e fia faalogol]. O le a itiiti se popole o tagata o le uarota e aumai a latou uo i se sauniga faapena ona o le

a latou mautinoa atili o le aano o lena sauniga o le a fuafuaina lelei e faaosofia ai le naunau ma faailoa lelei atu ai le Ekalesia.

6. E tele isi avanoa e faasoat atu ai le talalelei. Mo se faataitaiga, o le taumafanafana lenei na ou maua ai se tusi fafia mai se tagata fou na aoao e uiga i le talalelei toefuataiina ina ua telefoni atu i ai se uo ua leva e fesili i ai i se gasegase sa ia oo i ai. Sa ia tusia: "Sa faamalamalamaina au i le auala sa ia faailoa mai ai o ia ia te au. I le mavae ai o ni nai masina o le aoaoina e faifeautalai, sa papatiso ai loa au. Ua faaleleia lava lo'u olaga talu mai lena taimi."<sup>10</sup> Ua tatou iloa uma le toatele o tagata o o latou olaga o le a faaleleia e le talalelei toefuataiina. O tatou aapa atu ea ia i latou?

7. O le tosina atu ma le atamai o o tatou talavou i alafaasalalau faaagafesootai ua latou maua ai ni avanoa tulagaese e aapa atu ai i isi o loo naunau i le talalelei. I le faamatalaina ai o le faaali atu o le Faaola i sa Nifae, na tusia ai e Mamona, "[Sa] ia aoao atu ma auauna atu i fanau . . . , ma ia tatala o latou laulaufaiva . . . ina ia mafai ona latou tautatala

mai" (3 Nifae 26:14). O le asō ou te manatu e mafai ona tatou faapea "tatala o latou [limamatua na e tesiai] ina ia mafai ona latou tautatala atu." O atu i ai, le autalavou!

O le faasoaina atu o le talalelei e le o se avega ae o se fiafiaga. O le mea ua tatou ta'ua o le "galuega faafafeautalai a tagata o le au paia" e le o se polokalama ae o se uiga o le alofa ma le aapa atu e fesoasoani ia i latou o siomiaina i tatou. O se avanoa foi e molimau atu ai po o a ni o tatou lagona e uiga i le talalelei toefuataiina a lo tatou Faaola. E pei ona aoao mai Elder Ballard, "O se faamaoniga sili ona taua o lo tatou liuaina atoa ai ma o tatou lagona e uiga i le talalelei i o tatou lava olaga, o lo tatou naunautaiga lea e faasoat atu i isi."<sup>11</sup>

Ou te molimau atu ia Iesu Keriso, o le Malamalama ma le Ola o le Lalolagi (tagai 3 Nifae 11:11). O Lana talalelei toefuataiina ua faamalamalamaina ai lo tatou ala i le olaga faaletino. O Lana Togiola ua tatou maua ai le faamautinoaga o le ola pe a mavae le oti ma le malosi e tumau ai e agai atu i le tino ola pea. Ma o Lana Togiola tatou te maua ai le avanoa e faamagaloina ai a tatou agasala ma, i lalo o le fuafuaga mamalu o le faaolataga a le Atua, e agavau ai mo le ola e faavavau, le meaalofa sili o meaalofa uma a le Atua" (MF&F 14:7). I le suafa o Iesu Keriso, amene. ■

#### FAAMATALAGA

1. Thomas S. Monson, "Susu Maia i le Konafesi," *Liahona*, Nov. 2013, 4.
2. Quentin L. Cook, "How to Be a Member Missionary," *New Era*, Feb. 2015, 48.
3. M. Russell Ballard, "Ia Outou Faalagolago i le Alii," *Liahona*, Nov. 2013, 44.
4. M. Russell Ballard, "Ia Outou Faalagolago i le Alii," *Liahona*, Nov. 2013, 44.
5. Clayton M. Christensen, *The Power of Everyday Missionaries* (2012), 30.
6. Tagai Christensen, *The Power of Everyday Missionaries* 26–27.
7. Tagai Gary C. Lawrence, *How Americans View Mormons: Seven Steps to Improve Our Image* (2008), 34–35.
8. Tagai Ashley Kewish, "Cab Driver Hands Out Copies of Book of Mormon to Rio Visitors," Aug. 8, 2016, [ksl.com](http://ksl.com).
9. Christensen, *Power of Everyday Missionaries*, 21.
10. Personal letter, Aug. 21, 2016.
11. M. Russell Ballard, "O Le Taimi Lenei," *Liahona*, Jan. 2001, 89.



Saunia e Elder Jeffrey R. Holland

O Le Korama a Aposetolo e Toasefululua

## Sui Vaaia i le Ekalesia

*Ua matou talosagaina outou o faiaoga o aiga ia avea ma suivaaia o le Atua i Ana fanau, ia alolofa atu ma tausi ma tatalo mo tagata ua tofia i ai outou.*

**E**lei leva atu sa manava mai ai se tuafafine nofofua, lea o le a ou faaigoaina ia Moli, ma tau mai i lona fale ua lua inisi (5 cm) le maualuga o le vai ua lilofia ai le fola atoa o lona fale i le pito i lalo (basement). Sa vave ona ia iloaina o ona tuaoi ia latou te faaaoga faatasia ni alavai, masalo sa matua tele ni a latou tagamea ma ni taelega sa faia i lena aso ona pa atu i [totonu o lona fale] ia vai mai alavai.

Ina ua uma ona valaau atu Moli i sana uo e sau e fesoasoani, sa la tau fai asu loa ma faamama. Ae tatagi loa ma le logo o le faitotoa. Sa valaau mai lana uo, "O ou faiaoga o aiga!"

Sa ata Moli. "Oi o le aso mulimuli o le masina," sa ia tali atu ai, "ae ou te faamautinoa atu ia te oe e le o o'u faiaoga o aiga."

Sa leai ni seevae, susu le ofuvae, o le ulu sa fusi i le sikafu, ma se pea o totigilima pa'u mananaia, sa alu atu ai loa Moli i le faitotoa. Ae o ona foligavaaia e le masani ai sa lei faatusalia i le vaaiga sa lei masani ai o tagata ua tutu nei i ona luma. O *ana* faiaoga o aiga!

"Oka toeitiiti ou matapogia i lo'u te'i ia oulua se!" sa ia ta'u mai ai ia te au mulimuli ane. "O se vavega o faiaoga o aiga lenei—le ituaiga lea e faasoa soo

"O ai la?" sa valaau mai ai lana uo mai le fola pito i lalo o le fale.

"Sa ou fia faapea atu, 'E mautinoa lava e le o Nifae e Toatolu,'" sa tautino mai ai Moli, "ae sa ou taofia au lava ia ma fai atu lemu lava, 'o o'u faiaoga o aiga, ae ua la lagona e le o se taimi lelei lea e tuu mai ai le la savali.'<sup>1</sup>

Usi e, e mafai ona tatou toe suecue teisi lava i le tiute o le perisitua ua faamatalaina o le "puna muamua lava lea o fesoasoaniga a le Ekalesia" i tagata taitoatasi ma aiga.<sup>2</sup> Ua anoanoai le tele o punaoa o loo lolomi atu pea lava pea i pepa e saga aoao ai ma faatulaga lenei tiute. E faitau afe lauga musuia ua tuuina atu e taumafai e uunaia lenei tiute. E mautinoa lava e leai ofisa malaga i soo se mea e mafai ona faamaoopooina le tele o a tatou malaga ta'usalaina i le le faia o asiasiga a faiaoga o aiga. Ae o loo tatou tauivi pea ia ausia soo se mea e latalata atu i se tulaga taliaina o le faatinoga e faatatau i le poloaiiga a le Alii ia "leoleo i lugia o le ekalesia e le aunoa"<sup>3</sup> e ala i asiasiga faaleaiga a le au perisitua.

O se tasi o luitau o loo tatou feagai ai o le suia lea o uiga o tagata o le Ekalesia. Ua tatou iloa i lo tatou faitauaofai ua salalau atu nei i uarota ma paranesi



e silia ma le 30,000 o loo i ai i malo ma teritori pe a ma le 188, ua matua luitauina ai lava le asiasi atu i aiga o o tatou uso ma tuafafine nai lo le popofou o le Ekalesia lea sa aoao ai e tuaoi ia tuaoi i se mea sa ta'ua o "asiasiga faapitonuu."

Ma le isi, i le tele o iunite o le Ekalesia, o loo i ai se aofaiga faata-pulaa o le au perisitua o loo avanoa e faia asiasiga faaleaiga, ma tuua ai i latou e mafai ona auauna atu e tai 18 pe 20 aiga—pe sili atu foi—e asiasi i ai. E mafai foi ona i ai ni faafitauali o le mamaao o feoa'iga, o le taugata tele ma le le maua o ni ala o femalaga'aiga, ma le uumi o itula faigaluega o le aso ma le vasio. E faaopoopo atu i nei mea ia tapu faaleaganuu e faasaga i asiasiga faaleaiga e le taliaina atoa ai ma faafitauali o le saogalemu ia o loo tutupu i le tele o pitonuu o le lalolagi—ia, ua amata ona tatou vaaia le lavelave o le faafitauali.

Uso e, i tulaga silisili ma tulaga ia e mafai ai ona faia, o se asiasiga faalemasina i aiga taitasi o loo avea pea ma ala sili e tauivi i ai le Ekalesia. Ae i le iloaina ai o le tele o nofoaga i le lalolagi atoa o le ausiaina o lea tulaga e le mafai ai ma mafua ai ona lagona e na uso lo latou toilalo pe a tatou talosagaina i latou e faia le mea e le mafai ona faia moni, sa tusi atu ai le Au Peresitene Sili i taitai perisitua o le Ekalesia ia Tesema o le 2001 ma tuuina atu ai lenei fautuaga musuia ma aoga: "O loo i ai nisi nofoaga i le Ekalesia," sa latou tusi atu ai, "lea e le mafai ai ona faia asiasiga faaleaiga i aiga uma i masina taitasi ona o le le lava o uso agavaa o le perisitua ma le tele o isi luitau i le lotofiale." Ua matou ta'ua nisi o na mea. "A tulai mai ia tulaga faapea," sa latou saunoa pea, "e tatau i taitai ona faia le mea sili latou te mafai e faaaoga ai punaoa ua latou maua e leoleo ai ma faamalosia tagata taitoatasi."<sup>4</sup>

Uso e, afai ou te feagai ma nei ituaiga o tulaga faigata i la'u uarota po o le paranesi, o le a ma faaaogaina ma la'u soa o le Perisitua Arona le fautuaga a le Au Persitene Sili (lea ua i ai nei o se aiaiga faavae i le tusitau-lima) i le ala lenei: Muamua, pe fia



lava masina e faaalu ina ia ausia ai, o le a ma faia lava le poloiga faatusitusiga paia ia "asiasi atu i fare o tagata taitoatasi o le ekalesia,"<sup>5</sup> faamautu se taimi faatulaga ia ma o ai i na aiga i se aso ua faakalenaina e mafai ona faia ai ma tino mai ai. I le faia ai e tusa ma lena faatulagaga, o le a ma tuu atu le ma faamuamua sili lava i taimi avanoa ma le tele o fesootaiga ia i latou e sili atu ona manaomia i maua—o tagata sailili ia e aoaoina e faifeaultalai, tagata fou liliu mai, o e mamai, o e ua tuuatoatasi, o e le toaaga, aiga e taitoatasi matua o loo i ai pea fanau i le fare, ma isi.

A o galulue ai i le ma faatulagaga o asiasiga i aiga uma, atonu e alu ai ni masina e faataunuu ai, o le a ma faia nisi ituaiga o fesootaiga ma tagata taitoatasi ma aiga o loo i luga o le ma lisi i soo se auala ua saunia e le Alii i nei aso ofoofogia. E mautinoa lava o le a ma leoleo mo a ma aiga i le lotu, ma e pei ona fai mai tusitusiga paia, o le a "talatalanoa, o le tasi i le tasi e uiga i le uelefea o o latou agaga."<sup>6</sup> Ma le isi, o le a ma telefon i ai, imeli i ai ma tesi i ai ni feau tusitusia, pe ta foi i ai se feau faamanuia e ala i se tasi o le tele o ituaiga o alafaasalalau faaaga-fesootai o loo avanoa ia i maua. Ina ia fesoasoani e talanoaina ni manaoga

faapitoa, atonu ma te auina i ai se upusii faatusitusiga paia po o se laina mai se lauga o se konafesi aoao poo se Savali FaaMamona e aumai mai le anoanoai o punaoa i luga o le LDS.org. E tusa ma le saunoaga a le Au Peresitene Sili, o le a ma faia le mea sili ma te mafai i tulaga o ma feagai ai e ala i punaoa ua avanoa ia i maua.

Uso e, o le aioiga o loo ou faia i le po nei e mo outou ina ia siitia la outou vaaiga mamao e uiga i faiaoga o aiga. Faamolemole, i ni auala fou atu ma lelei atu, tagai ia te outou lava o ni suivaia o le Alii i Ana fanau. O lona uiga ia lafoai ese tumasani o le tulafono atatuuvale a Mose—e pei o le, o le faaiuga o le masina lea e te faananati atu ai e ave se savali na tusia e se isi tagata mai le mekasini a le Ekalesia lea ua uma ona faitau i ai le aiga. Ae, matou te faamoemoe o le a outou atiaeina se amioga o le popole faamaoni mo le au paia ina ia aoaoina i le talalelei, leoleoina ma le tausiaina o le tasi ma le isi, talanoaina o manaoga faaleagaga ma faaletino i soo se auala e fesoasoani atu ai.

E tusa ai ma mea e "faitaulia" mo faiaoga o aiga, o mea lelei uma e te faia e "faitaulia," o lea la ia lipoti atu uma! O le mea moni, o le lipoti e sili ona taua, o le auala ua e faamanuiaina ma tausia ai i latou i totonu o lou vaavaiga, lea e leai ma se fesootaiga ma se kalena patino po o se nofoaga patino. O le mea e sili ona taua, o lou alofa lea i ou tagata ma lou faataunuina o le poloiga ia "leoleo i luga o le Ekalesia e le aunoa."<sup>7</sup>

I le aso 30 o Me o le tausaga ua tea, sa solomuli lemu mai ai fafo le pikiapu a Troy Russell mai lana fale-taavale e alu atu e foai atu ni oloa i le Deseret Industries. Sa ia lagonaina le oso o le pa'u pito i tua i se patupatu. I le manatu ai o se mea na pa'u ese mai le pikiapu, sa ia oso ai i fafo ae iloa atu o lona atalii faapelepele e iva tausaga le matua o Austen, o loo faō i luga o le auala. O le feei, o le faamanuiafaaleperisitua, o le vaega o faa-lavelave faafuasei, ma le aufaigaluega a le falemai, i lea tulaga, sa lei aoga. Na maliu Austen.



**O LE AU PERESITENE SILI**




Henry B. Eyring  
Fesoasoani Muamua



Thomas S. Monson  
Peresitere

**O LE KORAMA A APOSETOLO E TOASEFULULUA**



Gerrit W. Gong

Ulisses Soares

Craig C. Christensen

Richard L. Maynes

Donald L. Hallstrom

L. Whitney Clayton

## AU PULEGA AOAO O FITUGAFULU

AU PULEGA AOAO O FITUGAFULU (i le faasologa faa'alafapeta)		OLE AU EPIKOPO PULEFAAMALUMALU		TATAI AOAO		AOGA SA		AUALOFA		PERAIMERI		ALII TALAVOU	
	Wilford W. Andiesen												

Oketopa 2016



I le le mafai ai ona moe pe maua se filemu, sa lē mafaamafanafanaina Troy. Sa ia fai mai ua sili atu i lo mea e mafai ona ia lavātia ma e le mafai ona ia toe ola. Ae i lena taimi o tiga matuitui na oo atu ai ni malosiaga togiola se tolu.

Muamua o le alofa ma le agaga faamautinoa o lo tatou Tama i le Lagi, o le faatasi mai e ala i fesootaiga a le Agaga Paia na faamafanafanaina Troy, aoaoina o ia ma le agaalofa ma musumusu atu o loo silafia e le Atua mea uma e uiga i le maumauina o se Alo lelei ma atoatoa. Lona lua o lona toalua, o Deedra, lea na fusimau ia Troy ma alofa ia te ia ma faamanatu ia te ia ua maliu foi sona atalii ma ua naunau o le a le maumau atu foi ma si ana tane. O le tagata lona tolu i lenei tala o John Manning, o le faiaoga o aiga *tulagaese*.

Ou te le iloa po o le a le faatulagaga a John ma lana soa talavou na faia e asiasi ai i le aiga o Russell, po o a foi ni a la savali pe a la o atu iina, ae pe na faapefea foi ona la lipotia o la aafiaga. Ae o le mea ou te iloa, o le tautotogo ua mavae sa aapa atu ai Uso Manning i lalo ma piki ifo i luga ia Troy Russell mai le faalavelave i lena auala taavale e pei lava ona pikii i luga e [Troy] lava ia ia Austen. E pei lava o le ituaiga o faiaoga o aiga po o se leoleo po o se uso i le talalelei sa tatau ona avea ai o ia, sa faia ai e John le tausiga ma le vaavaaiga faaleperisitua o Troy Russell. Sa ia amata i le faapea atu, “Troy, e manao Austen ia e toe tu i luga i ou vae—e aofia ai le malae paseketipolo—o lea la o le a ou i ai iinei taeao uma i le 5:15 i le vaveao. Ia sauni ona ou te le manao ou te sau i totonu e fafagu oe i luga—ma ou te *iloa* e le manao foi i ai Deedra i lena mea.”

“Ou te lei fia alu,” sa ta’u mai e Troy ia te au mulimuli ane, “ona sa ou aveina lava Austen i taimi uma i na taeao ma sa ou iloa o le a tiga tele ia manatuaga. Ae sa finau pea John, o lea sa ou alu ai. Mai lena aso muamua, sa ma talanoa—pe ou te tautala foi—ae faalogo John. Sa ou talanoa i le taimi atoa na ma tietie ai i le lotu ma faapena ai ma le toefoi atu i le fale. O



nisi taimi sa ou tautala a o paka le ma taavale i le auala ma matamata atu i le oso ae o le la i luga o Las Vegas. Sa faigata i le taimi muamua, ae i le aluga o taimi sa ou iloa ai sa ou mauaina lo'u malosiaga i le ituaiga o tagata taalo paseketipolo telegese o le Ekalesia, ma le leaga o lana togi i le mama a o oso i luga, ae o sē na alofa ia te au ma faalogo ia te au seia iu lava ina toe oso a'e le la i lo'u olaga.”<sup>8</sup>

Ou uso e o le perisitua, a tatou talanoa e uiga i faiaoga o aiga po o le leoleoina po o auauunaga patino faaleperisitua—pule a oe i le ta'uga e te manao ai—o le mea lenei lea tatou te talanoa i ai. Ua matou talosagaina outou o faiaoga o aiga ia avea ma suivaia o le Atua i Ana fanau, ia alolofa atu ma tausi ma tatalo mo tagata

ua tofia i ai outou, e pei ona matou alolofa atu ma tausi ma tatalo foi mo outou. Ia outou leoleoina ma faamlosia le lafu a le Atua i auala e ogatusa ma ou tulaga, ou te tatalo ai, i le suafa o le Leoleo Mamoe Lelei o i tatou uma, lea ua avea ai au ma Ana molimau, le Alii o Iesu Keriso, amene. ■

#### FAAMATALAGA

1. Personal conversation, June 2016.
2. *Melchizedek Priesthood Leadership Handbook* (1990), 5.
3. Mataupu Faavae ma Feagaiga 20:53.
4. Tusi a le Au Peresitene Sili, “Leoleoina ma le Faamlosia o Tagata o le Ekalesia,” Tes. 10, 2001; o lenei fautuaga ua faaofia ai i le *Tusitalima 2: Taitaiina o le Ekalesia* (2010), 7.4.3.
5. Mataupu Faavae ma Feagaiga 20:47, 51.
6. Moronae 6:5.
7. Mataupu Faavae ma Feagaiga 20:53.
8. Personal conversation and email exchange, Apr. 2016.



Saunia e Elder LeGrand R. Curtis Jr.  
O Le Fitugafulu

# E I Ai Le Mana i le Tusi

O le mana sili o le Tusi a Mamona o lona aafiaga lea i le aumaia faalatalata o i tatou ia lesu Keriso.

I le aso 14 Iuni, 1989, ona o ni faamatalaga sese e uiga i le Ekalesia, na faasaina ai e le malo o Kana ia gaoioiga uma a Le Ekalesia a Iesu Keriso o le Au Paia o Aso e Gata Ai i totonu o lena atunu o Aferika. Na maua e le malo meatotino uma a le Ekalesia, ma taofia gaoioiga uma a faifeatalai. O tagata o le Ekalesia, o e na faasino i lenei taimi o se "tapu", na faia le mea sili ia ola ai i le talalelei e aunoa ma sauniga faaleparanesi po o le lagolago a faifeatalai. E anoanoai tala musuia e uiga i le ala na faasusulu atu ai pea e tagata o le ekalesia le malamalamo o le talalelei e ala i tapuaiga i o latou fale ma tausia e le tasi le isi o ni faiaoga asiai ma faiaoga o aiga.

Na iu ina foia le faafitauli, ma i le aso 30 Novema, 1990, na faaiuina ai le tapu ma toe faaaauai ai gaoioiga masani a le Ekalesia.<sup>1</sup> Talu mai lena taimi ua matua maoae fegalegaleaiga a le Ekalesia ma le malo o Kana.

O tagata na soifua i le taimi o le tapu e vave lava ona faasino i faamanuiaga na oo mai mai lena vaitaimi uigaese. Na faamalosia le faatuatua o le toatele e ala i faigata sa fetaiai ma

i latou. Ae o se tasi o faamanuiaga o le tapu na oo mai i se auala uiga ese.

O Nicholas Ofosu-Hene sa avea ma se leoleo talavou na tofia e leoleoa se faletapuai a le AAG i le taimi o le tapu. O lona tiute o le leoleoina o le fale i le po. Ina ua faatoa taunu Nicholas i le faletapuai, sa vaia le gasu o mea, o pepa, tusi, ma nofoa sa taatitia solo. I le ogatotonu o lenei gasu, sa ia vaia ai se kopi o le Tusi a Mamona. Sa ia taumafai ia aua nei amanaiaina le tusi aua sa tau atu ia te ia e leaga. Ae sa ia lagona le tosina atu i ai. Na iu lava, ina le mafai e Nicholas ona aveese le tusi mai lona mafaufau. Sa ia pikiina i luga. Sa ia lagona e tatau ona amata ona faitauina. Sa ia faitauina i le po, ma na tafe mai ona loimata i ona alafau ao ia faitauina.

O le taimi muamua sa ia pikiina ai i luga, sa ia faitauina atoa le 1 Nifae. O le taimi lona lua, sa ia faitauina atoa le 2 Nifae. Ina ua ia oo i le 2 Nifae mataupu e 25, sa ia faitauina mea nei: "Ma ua matou tautalatala e uiga ia Keriso, ua matou olioli ia Keriso, ua matou talai atu Keriso, ua matou vavalu e uiga ia Keriso, ma ua matou tusitusi foi e tusa ma

a matou valoaga, ina ia mafai ona iloa e a matou fanau po o le a le puna e mafai ona latou tepa taulai i ai mo se faamagaloga o a latou agasala."<sup>2</sup>

I lena taimi na matua malosi le lagonaina e Nicholas o le Agaga ma mafua ai ona ia masūsū. Na ia iloaina i le taimi o lana faitauga sa tele ni uunaiga faaleagaga sa ia mauaina faapea o lenei tusi o se tusi paia, o se tusi ua sili ona sa'o ua ia faitauina. Na ia iloaina o le Au Paia o Aso e Gata Ai, e ese mai mea sa ia faalogo i ai, e matua talitonu lava ia Iesu Keriso. Ina ua mavae le tapu ma ua toe foi atu fai featalai i Kana, na auai Nicholas, ma lona toalua ma lana fanau i le Eklesia. Ina ua ou vaai ia te ia i le tausaga ua tea, ua avea o ia ma taitai leoleo ma o loo auauna atu o se peresitene o le Itu o Tamale Kama o le Eklesia. Fai mai a ia: "Ua suia e le Eklesia lo'u olaga. . . . Ou te faafetai i le Atua Silisili Ese mo le taitaiina atu o a'u i lenei talalelei."<sup>3</sup>

O Alibert Davies, o se isi tagata Kana, na malaga faatasi ma se uo i se tasi o a tatou faletapuai, lea sa faia ai se fonotaga faaleauperesitene a le uo. Ao ia faatali mo lana uo, sa faiatua e Alibert se tusi na ia maua ai iina. Ina ua uma le fonotaga, sa manao Alibert e ave le tusi i le fale. Sa faatagaina o ia e ave e le gata o lena tusi ae o se kopi foi o le Tusi a Mamona. Ina ua ia taunu i le fale, sa amata ona ia faitauina le Tusi a Mamona. Sa le mafai ona ia tuuina i lalo. Sa ia faitauina e ala i le malamalamo o le moligao seia oo i le 3 i le vaveao. Sa ia faia lena mea mo ni nai po, lofutuina i mea sa ia faitauina ma lagonaina. Ua avea nei Alibert ma se tagata o le Eklesia.

O Angelo Scarpulla na amata ana suesuega faalelotu i lana gagana Italia ina ua 10 ona tausaga. Na iu ina avea o ia ma se faifeau ma auauna atu i lana ekalesia ma le tuuto. I se taimi faapitoa, sa amata ona maluelue lona faatuatua, ma ia sailia ai ma mauaina ni avanoa mo nisi suesuega. Peitai, o le tele o ana suesuega, o le tele foi lea o lona atuatuvalo. O mea sa ia faiatua ma lagona na faatalitonuina o ia sa i ai se liliuese tele mai le aoaoga

faavae moni lea na aoaoina e Iesu ma Aposetolo anamua. Na saili Angelo mo le talalelei moni a le Atua i faatuatuaga eseese ae sa lagona le le faamalieina mo le tele o tausaga.

I se tasi aso sa ia feiloi ai i ni tagata se toalua o le Ekalesia o e na fesoasoani i faifeautalai e saili nisi tagata e aoao atu. Sa ia lagona le tosina atu ia i laua ma faalogo ma le olioli i le la savali. Sa taliaina ma le loto i ai e Angelo se kopi o le Tusi a Mamona.

I lena aafiai sa amata ai ona ia fai-tauina le tusi. Sa ia lagona le lofutuina i le olioli. E ala atu i le Agaga, na tuuina atu ai e le Atua ia Angelo se faamautinoaga faapea i totonu o le Tusi a Mamona o le a ia mauaina ai le upumoni lea na ia sailia mo le tele o tausaga. Na faatumulia o ia i lagona matagofie. O mea sa ia fai-tauina ma aoaoina mai faifeautalai na faamaonia ai lana faaiuga sa i ai se liliuese tele, ae sa ia iloaina ai foi ua toefuatai mai i le lalolagi le Ekalesia moni a le Atua. O se taimi puupuu mulimuli ane, sa papatiso ai loa Angelo i le Ekalesia.<sup>4</sup> Ina ua ou faatoa feiloi ia te ia, sa avea o ia ma peresitene o le Paranesi o Rimini a lo tatou Ekalesia i Italia.

O aafiaga o Nicholas, Alibert, ma Angelo e uiga i le Tusi a Mamona e talitutusa lava ma aafiaga na maua e Pale P. Palate:

“Sa ou tatalaina [le tusi] ma le nau-natai. . . . sa ou fai-tau i le aso atoa; o le fia-i sa avea ma se avega, sa leai



so'u fia ai; sa avea le moe ma se avega pe a . . . oo mai le po, aua sa ou fiafia atu i le fai-tau nai lo le moe.

“A o ou fai-tau, sa i ai le agaga o le Alii i o'u luga, ma sa ou iloa ma malamalamā e moni le tusi, e pei o le manino ma le iloagofie e pei ona malamalamā ma silafia e le tagata o loo i ai o ia. Ua faatumulia nei lo'u olioli, e peiseai, ma sa lava lo'u fiafia e taui ai a'u mo faanoanoaga uma, osigataulaga ma faigata o lo'u olaga.”<sup>5</sup>

E i ai i nisi tagata ni aafiaga malolosi e uiga i le Tusi a Mamona i le taimi muamua latou te tatalaina

ai, ae mo isi e auauai ona oo mai le molimau e uiga i le upumoni ao latou fai-tau ma tatalo e uiga i ai. Na faapena a'u. Sa ou fai-tau muamua i le Tusi a Mamona ao avea a'u ma se tamaititi aoga seminare talavou. O le kopi lenei o le Tusi a Mamona sa ou fai-tauina. E le mafai ona ou tau atua le taimi tonu po o le nofoaga sa tupu ai, ae i se taimi o lena fai-tau, na amata ai ona ou mauaina se lagona. Sa i ai se mafanafana ma se agaga lea e sau i taimi uma ou te tatala ai le tusi. Sa tuputupu ae le lagona ao faaaauau la'u fai-tau. O loo faaaauau pea lena lagona e oo mai lenei aso. O taimi uma ou te tatala ai le Tusi a Mamona, e pei o loo kiina se ki—e oo mai le Agaga i lo'u loto ma lo'u agaga.

Ae mo nisi tagata, o se molimau i le Tusi a Mamona e tuai lava ona oo mai, pe a mavae le tele o suesuega ma tatalo. E i ai sa'u uo e fai-tau i le Tusi a Mamona e saili ai ia iloa pe moni. Sa ia faaaogaina le valaaulia i le Moronae ia ole atu i le Atua ma se loto faamaoni, ma le manatu moni i ai ma le faatuatu ia Keriso, pe moni le Tusi a Mamona.<sup>6</sup> Ae na te lei vave maua se tali faale-agaga na folafola mai. Ae, i se tasi aso ao ia mafaufau loloto, agai atu i le fale, na molimau atu ai le Agaga ia te ia e moni le Tusi a Mamona. I lona fiafia





tele ma le lofituina lea sa ia tuuina ai i lalo faamalama o le taavale ma ee atu, e lei faia mo se tagata faapitoa ae i le lalolagi atoa, “E moni!”

Pe o tatou molimau i le Tusi a Mamona e maua mai le uluai taimi tatou te tatala ai pe i le aluga o taimi, o le a uunaia i tatou uma i o tatou aso pe afai tatou te faaaauau pea ona faitau ma faaaoga ona aoaoga. Na aoao mai Peresitene Ezra Taft Benson: “O loo i ai se mana i le tusi lea e amata ona tafe atu i o outou olaga i le taimi lava e amata ai ona e duesue faamaoni i le tusi. O le a e maua ai le malosi sili atu e tetee ai i faaosoosoga. O le a e maua ai le malosi sili atu e aloese ai mai mea taufaasese. O le a e maua ai le malosi e tumau ai i le ala sa’o ma le vaapiapi.”<sup>7</sup>

Ou te uunaia tagata uma o mauaina lenei savali, e aofia ai e umia le Perisitua Arona o loo potopoto mai i lenei sauniga i lenei po, ina ia iloa le mana o le Tusi a Mamona. E pei ona faamalosiau mai Peresitene Thomas S. Monson: “Faitau le Tusi a Mamona. Mafaufau loloto i ana aoaoga. Ole atu i le Tama Faalelagi pe moni.”<sup>8</sup> I le taimi o lena faagasologa o le a tou

lagona ai le Agaga o le Atua i tou olaga. O le a avea lena Agaga ma vaega o lau molimau i le moni o le Tusi a Mamona, o Iosefa Samita o se perofeta a le Atua, ma o Le Ekalesia a Iesu Keriso o le Au Paia o Aso e Gata Ai o le Ekalesia moni a le Atua i le lalolagi i lenei vaitaimi. O le a fesoasoani lena molimau e te tetee atu ai i faaosoosoga.<sup>9</sup> O le a sauna oe mo “le valaau malosi . . . ia filiga . . . e galulue i le tovine o le Alii.”<sup>10</sup> O le a tu o se taula mautinoa pe a faaaogaina ia tuuaiga po o faamatalaga mataga e luitauina lou faatuatua, ma o le a avea ma se faavae mautu-mausali pe a luiina oe i ni fesili e le mafai ona e taliina, aemaise i se taimi vave. O le a mafai ona e iloaina le mea moni mai le mea sese, ma o le a e lagona le faa-mautinoaga o le Agaga Paia o faamautinoa atu pea lava pea lau molimau ao faaaauau pea ona faitauina le Tusi a Mamona i lou olaga atoa.

Ou te uunaia foi matua uma o loo faafogoga mai po o faitauina lenei savali ina ia avea le Tusi a Mamona ma se vaega taua o lou aiga. Ao tuputupu ae le ma fanau, sa matou faitauina le

Tusi a Mamona ao faia a matou ‘aiga o le taeao. O le faailogatusi lenei sa matou faaaaogaina. I le pito i luma o loo i ai se upusii mai ia Peresitene Benson o folafola mai o le a liligi mai e le Atua faamanuiaga i o tatou luga pe a tatou faitauina le Tusi a Mamona.<sup>11</sup> I tua o loo i ai le folafolaga lenei mai ia Peresitene Marion G. Romney, lea na avea ma se fesoasoani i le Au Peresitene Sili: “Ou te mautinoa afaei faitau e matua le Tusi a Mamona i o latou aiga ma le loto tatalo i aso uma lava, e le gata ia i latou a e faapea foi a latou fanau, o le a faatumulia o tatou fale ma tagata uma o nonofo ai, i le agaga o lena tusi. . . . O le a aluese le agaga o finauga. O le a lapataia e matua a latou fanau i le alofa ma le poto tele. O le a sili ona tali atu ma gauai atu le fanau i fautuaga a o latou matua. O le a faateleina le amiontonu. O le a faateleina le faatuatua, faamoemoe, ma le alofa mama—o le alofa mama o Keriso—i o tatou aiga ma olaga, ma aumaia o se taunuuga le filemu, olioli, ma le fiafia.”<sup>12</sup>

I le taimi nei, i le tele o tausaga talu ona o ese atu le ma fanau mai le aiga ma tausia ni a latou foi aiga, ua mafai ona ma iloa manino atu le faataanuuina o le folafolaga a Peresitene Romney. E le atoatoa lo ma aiga, ae e mafai ona ma molimau atu i le mana o le Tusi a Mamona ma faamanuiaga o le faitauina ua aumaia ma faaaauau ai pea ona aumaia i olaga o lo matou aiga atoa.

O le mana sili o le Tusi a Mamona o lona aafiaga lea i le aumaia faa-latalata o i tatou ia Iesu Keriso. O se molimau malosi ia te Ia ma Lana misiona togiola.<sup>13</sup> E ala mai [i le Tusi a Mamona] ua tatou malamalamā ai i le mamalu ma le mana o Lana Togiola.<sup>14</sup> O loo aoao manino mai ai Lana aoaoga faavae.<sup>15</sup> Ma ona o le mataina o mataupu o loo faamatala mai ai le asiasiga a le Keriso toetu i sa Nifae, ua tatou vaaia ma lagonaina Lona alofa, faamanuiaga, ma le aoao atu o na tagata ma oo ai ina iloaina o le a Ia faia le mea lava e tasi mo i tatou pe a tatou o mai ia te Ia e ala i le ola ai i Lana talalelei.<sup>16</sup>

Uso e, ou te molimau atu i le mana o le Tusi a Mamona. Pe o faiatua i le gagana Igilisi, Italia, po o le Farani, lolomi pe i se masini eletonika, na ou maua le agaga mata-gofie lava e tasi o tafe mai mai ona mataupu ma fuaiupu i lo'u olaga. Ou te molimau atu i ona tomai e faalatalata atili atu ai i tatou ia Keriso. Ou te tatalo ina ia taitasi i tatou ma faaaoga tatau le mana o loo i lenei tusi mata-gofie o tusitusiga paia. I le suafa, o Iesu Keriso, amene. ■

#### FAAMATALAGA

1. Tagai "You Can't Close My Heart: Ghanaian Saints and the Freeze," Jan. 6, 2016, history.lds.org.
2. 2 Nifae 25:26.
3. Imeli mai ia Nicholas Oforos-Hene, Oke. 27, 2015.
4. Tagai Angelo Scarpulla, "O La'u Sailiga mo le Toefuataiga," *Liahona*, Iuni 1993, 17–20; imeli mai ia Ezio Caramia, Sept. 16, 2016.
5. *Autobiography of Parley P. Pratt*, ed. Parley P. Pratt Jr. (1938), 37.
6. Tagai Moronae 10:4–5.
7. *Aoaoga a Peresitene o le Ekalesia: Ezra Taft Benson* (2014), 157.
8. Thomas S. Monson, "Ia Lototele e Tu Na O Oe," *Liahona*, Nov. 2011, 62; tagai foi Thomas S. Monson, "Mama o le Perisitu," *Liahona*, Me 2011, 66; *A Prophet's Voice: Messages from Thomas S. Monson* (2012), 490–94.
9. Na aoao mai Peresitene Thomas S. Monson: "O i latou uma ua umia le perisitu, e tatau ona auai i aso taitasi i le suesueina o tusitusiga paia. . . . Ou te folafola atu ia te outou, pe o e umia le perisitu Arona po o le Perisitu Mekisateko, afai e te suesueina ma le filiga ia tusitusiga paia, o le a faateleina lou mana e aloese ai mai faaosooosoga ma maua ai le taitaiga a le Agaga Paia i mea uma e te faia" ("Ia Avea ma Tagata Sili e Mafai ona Avea ai Oe," *Liahona*, Me 2009, 68).
10. Alema 28:14.
11. "Ou te folafola atu ia te outou e faapea, e amata atu i le taimi nei, afai o le a tatou faiatua i aso uma mai ona itulau ma ola i ona mataupu, o le a liligi mai e le Atua i lugia o fanau taitoatasi a Siona ma le Ekalesia se faamanuiauga e le'i iloaina muamua lava" (*Aoaoga: Ezra Taft Benson*, 142).
12. Marion G. Romney, "The Book of Mormon," *Ensign*, May 1980, 67.
13. Tagai, mo se faataitaiga, o le titulau autu o le Tusi a Mamona; 1 Nifae 11; 2 Nifae 25; Mosaea 16; 18; Alema 5; 12; Helaman 5; 3 Nifae 9; Mamona 7.
14. Tagai, mo se faataitaiga, 2 Nifae 2; 9; Mosaea 3; Alema 7; 34.
15. Tagai, mo se faataitaiga, 2 Nifae 31; 3 Nifae 11; 27.
16. Tagai 3 Nifae 11–28.



Saunia e Peresitene Dieter F. Uchtdorf  
Fesoasoani Lua i le Au Peresitene Sili

## Aoao mai ia Alema ma Amoleka

*Ou te faamoemoe o i latou ua se ese mai le ala o le avea ma soo o le a vaai e ala i o latou loto ma aoao mai ia Alema ma Amoleka.*

#### Alema le Itiiti

Faatasi ai ma le toatele o tagata le mafaagaloina i tusitusiga paia, o Alema le Itiiti. E ui o ia o le atalii o se pero-feta maoae, ae sa leiloa lona ala mo se taimi ma oo ai ina avea ma se "tagata . . . amoleaga ma le ifo i tupua." Mo ni mafuaaga tatou te le malamalamā i ai, na ia tetee malosi i lona tama ma saili e faaumati le Ekalesia. Ma ona o le susua tele o ana upu ma faatosinaga, sa ia matua ausia ai ia faiga.<sup>1</sup>

AE sa suia le olaga o Alema ina ua faaali atu i ai se agelu a le Alii ia te ia ma fetalai atu i se siufogfa o faiitili. Mo aso e tolu ma po e tolu, sa "falo tigaina [Alema] i le mafatia faavavau, . . . i tiga o se agaga lava ua faasalaina." Ona oo lea, ua ia manatuina se mea sa i ai i lea taimi faigata—o se upumoni e faavavau, sa aoao atu e lona tama: o le a afio mai Iesu Keriso "e togiola mo agasala a le lalolagi." Ua leva ona teenaina e Alema ia mataupu, ae o lea la "ina ua tau ane [lona] mafaufau i lenei manatu," sa ia tuu atu ai loa ma le lotomaualalo ma le naunautai lona faalagolago i le mana togiola a Keriso.<sup>2</sup>

Ina ua tulai a'e Alema mai lenei aafiaga, sa suia lona tagata. Mai i lena

taimi, sa ia tuuto atu lona olaga i le toe faaleleia o mea na ia faaleagaina. O ia o se faataitaiga mamana o le salamo, faamagaloga, ma le tumau ma le faatuatua.

Sa filifilia mulimuli ane Alema e sui i lona tama e avea ma taitai o le Ekalesia a le Atua.

E tatau ona iloa e tagatanuu uma o le malo o sa Nifae le tala ia Alema. Semanu e faatumulia Twitters, Instagrams, ma Facebooks i ona aso i ata ma tala e uiga ia te ia. Masalo sa faaali soo o ia i luma o le pepa o le *Saraemila Faalevaiaso* ma sa avea ma mataupu o tusitusiga, ma polokalama faapitoa o televise. I se faapuupuuga,





masalo o ia le tagata lauiloa sili ona tautaua o ona aso.

Ae ina ua vaai Alema ua faagaloina e lona nuu le Atua ma sii ae i latou lava i le faamaualuga ma finauga, sa ia filifili ai e faamavae mai le tofiga a tagata lautele ae tuuto atu “atoatoa o ia lava i le perisitua maualuga o le faatulagaga paia a le Atua,”<sup>3</sup> i le talaiina o le salamo i tagata sa Nifae.

Muamua, sa matua faamanuiaina Alema—seia oo ina ua malaga atu i le aai o Amonaea. Sa matua iloa lelei e tagata o lena aai ua le o toe avea Alema ma o latou taitai faalemaloo, ma sa itiiti lava so latou faaaloalo mo lana pule faaleperisitua. Sa latou faifai ia te ia, faatauemu ia te ia, ma tuliese o ia i fafo mai lo latou aai.

I le lotonutimomoia, sa fuitua ai Alema i le aai o Amonaea.<sup>4</sup>

Ae sa tau atu e se agelu ia te ia e toe foi.

Se'i mafaufau lava i ai: sa faatonu o ia e toe foi i le nuu sa itagiaina o ia ma sa inosiaina le Ekalesia. O se tofiga matautia ma e masalo sa lamatia ai le ola. Ae sa lei faatuai lava Alema. Sa “vave ona ia toe foi atu.”<sup>5</sup>

Sa tele ni aso na anapogi ai Alema ina ua ia ulufale atu i le aai. Sa ia ole atu i se tagata na matua le masani ai pe mafai ona ia “tuuina mai . . . sina meaai i se auauna faatauvaa a le Atua.”<sup>6</sup>

#### **Amoleka**

O le igoa o lenei tagata o Amoleka.

O Amoleka o se tagatanuu maumea ma lauiloa i Amonaea. E ui o ia o se

suli o le toatele o tagata talitonu, ae ua faavaivaia foi lona lava ia faatutua. Mulimuli ane sa ia tautino mai, “Sa valaaicina au i le tele o taimi ae sa ou le faalogo; o lea sa ou iloa e uiga i nei mea, peitai sa ou le fia [talitonu]; o lea na ou alu ai pea lava i le foulave faasaga i le Atua.”<sup>7</sup>

Ae sa saunia e le Atua ia Amoleka, ma ina ua la feiloi ma Alema, sa ia talileleia le auauna a le Alii i lona fale, lea sa nofo ai Alema mo le tele o aso.<sup>8</sup> I lena taimi, sa tatala atu e Amoleka lona loto i le savali a Alema, ma sa oo mai ai ia te ia se suiga ofoofogia. Mai lena taimi, sa lei gata na talitonu Amoleka; ae sa avea foi o ia ma siamupini o le upumoni.

Ina ua toe alu atu Alema e aoao ia tagata Amonaea, sa i ai sana molimau lona lua i ona autafa—o Amoleka, o se tasi lava o i latou.

O mea na tutupu mulimuli ane ua avea ma se tasi o tala sili ona faanoanoa ma fiafia foi i tusitusiga paia uma. E mafai ona e faitau i ai i le Alema mataupu 8–16.

O le asō, ou te fia talosagaina outou ia mafaufau i ni fesili se lua:

Muamua: “O le a se mea e mafai ona ou aoao mai ia Alema?

Lua: “E faapefea ona ou pei o Amoleka?”

#### **O Le A Se Mea e Mafai ona Ou Aoao Mai ia Alema?**

Se'i ou amata atu e ala i le fesili atu i taitai uma ua mavae, o loo i ai nei, po o le lumanaia i le Ekalesia a Iesu Keriso,

“O le a se mea e mafai ona e aoao mai ia Alema?”

O Alema o se tamalii sa tulagaese le faamanuiaina ma talenia. Atonu e faigofie le mafaufau faapea sa ia lei manao-miaina se fesoasoani a se tagata. Ae ui i lea, o le a le mea sa faia e Alema ina ua ia toe foi atu i Amonaea?

Sa maua e Alema ia Amoleka ma fesili atu i ai mo se fesoasoani.

Ma sa maua ai e Alema le fesoasoani.

Po o le a lava se mafuaaga, o nisi taimi e mumusu ai tatou o taitai e saili ma fesili atu i a tatou Amoleka. Masalo tatou te manatu e sili atu lo tatou faia o le galuega e i tatou lava ia, pe tatou te mumusu ne'i faalavelave i isi, pe tatou te mafaufau foi e le o fia auai isi. E tele lava ina tatou faatuutuu e valaaulia tagata e faaaoga a latou taleni mai le Atua ma auai i le galuega tele o le faaolataga.

Mafaufau i le Faaola—sa Ia amata faatu ea Lana Eklesia na o Ia?

Leai.

O Lana savali sa le o le “Soso ese. O le a ou faia le mea lea.” Ae o le, “O mai, mulimuli mai ia te au.”<sup>9</sup> Sa Ia musuia, valaaulia, aoao, ona faatuatua-inia lea o Ona soo “e fai mea ua outou vaai mai o ou faia.”<sup>10</sup> I lea ala, sa le gata na atiae ai e Iesu Keriso Lana Eklesia ae sa atiae ai foi Ana auauna.

Po o le a lava le tofiga o loo e auauna ai i le taimi nei—pe o se peresitene o se korama a tiakono, se peresitene o se siteki, po o se Peresitene o se Eria—inia ia faamanuiaina, e tatau ona e sailia au Amoleka.

Atonu o se tagata e faatauvaa pe le amanaiaina i totonu o le tou au paia. Atonu o se tagata e *foliga mai* e le naunau pe le mafai ona auauna atu. O a outou Amoleka atonu e talavou pe matutua, alii po o ni tamaitai, leai ni potomasani, lē lavāvā, pe le toaaga i le Lotu. Ae o le mea atonu e le o muai iloaina, o loo matelaina i latou e fia faalogo atu ia te oe i upu nei “Ua manaomia oe e le Alii. Ou te manao-mia oe!”

I le taele o o latou loto, e toatele o loo fia auauna atu i lo latou Atua. Latou te fia avea ma se meafaigaluega

i Ona aao. Latou te fia sasau atu a latou selesaito ma tauivi ma lo latou malosi e saunia le lalolagi mo le toe afio mai o lo tatou Faaola. Latou te fia atiae Lana Ekalesia. Ae e fai si o latou musua e amata. E tele lava ina latou faatalitali se'i talosagaina.

Ou te valaaulia outou ia mafaufau ia i latou i o outou paranesi ma uarota, i a outou misiona ma siteki, o e o loo manaomia ona faalogo i se valaau ia faatino. O loo galulue faatasi le Alii ma i latou—i le sauniaina o i latou, i le faamalūlūina o o latou loto. Saili i latou e ala i lagona o lou loto.

Aapa atu ia i latou. Aoao i latou. Uunaia i latou. Fesili ia i latou.

Faasoa atu ia i latou upu a le agelu ia Amoleka—o faamanuiaaga a le Alii o le a mau i luga o i latou ma o latou aiga.<sup>11</sup> Atonu e faateia oe i le iloaia o se auauna toa a le Alii semanu e ono natia pea lava.

#### **"E Faapefea Ona Ou Pei o Amoleka?"**

E ui o nisi o i tatou e tatau ona saili mo se Amoleka, ae mo isi atonu o le fesili e faapea "E faapefea ona ou pei o Amoleka?"

Masalo i le gasologa o tausaga, ua faasolo ina faaitiitia lou tuuto i lou avea ma soo. Masalo ua faasolo vaivai le malosi o lau molimau. Masalo ua e faataumamaoina oe lava mai le tino o Keriso. Masalo ua i ai se mea ua e tiga ai ma ita ai. E pei o nisi o le Ekalesia anamua o Efeso, atonu ua outou tuua lo outou "uluai alofa"<sup>12</sup>—o upumoni musuia ma faavavau o le talalelei a Iesu Keriso.

Masalo, e pei o Amoleka, e te iloaina i lou loto e faapea ua "valaauiina [oe e le Alii] i le tele o taimi" ae "sa [e] le fia faalogo."

Ae ui i lea, o loo silasila atu le Alii ia te oe i le mea na Ia silasila ai ia Amoleka—o le gafatia o se auauna lototoa i se galuega taua e fai faatasi ai ma se molimau e faasoat atu. O loo i ai auaunaga e leai se tasi e mafai ona faia i se ala lava e tasi. Ua faatuatuina oe e le Alii i Lana perisitua paia, lea e taofia le gafatia paia e faamanuia ai ma siitia isi. Faalogo ma lou loto ma mulimuli i uunaiga a le Agaga.



#### **O Le Malaga a se Tasi Tagata**

Sa ou ootia lava i le malaga a se tasi uso na fesili ifo ia te ia lava, "A valaau mai le Alii, mata o le a ou lagonaina?" O le a ou ta'ua le uso lelei lea ia Tavita.

Sa liliu mai Tavita i le Ekalesia pe ā ma le 30 tausaga talu ai. Sa ia auauna atu i se misiona ona ia auai lea i se a'oga faaloia. A o a'oga o ia ma faigaluga e tausi si ona aiga talavou, sa ia tau ai i se faamatalaga e uiga i le Ekalesia na ia le mautonu ai. O le faateleina lava o lona faiatau i nei ituaiga o tusiga le lelei, o le faateleina foi lena o lona le mautonu. Na i'u lava ina īa talosagaina ia aveeseina lona igoa mai pepa faamaumau o le Ekalesia.

Mai lena taimi, e pei foi o Alema i ona aso fouvale, sa faalu ai e Tavita le tele o taimi e finau ai ma tagata o le Ekalesia, ma faia ni talanoaga i luga o le initonet i se faamoemoega i talu'iina o latou talitonuga.

Sa lelei tele o ia i lea mea.

O se tasi o tagata na la finau lea o le a ou ta'ua o Iakopo. Sa agalelei Iakopo i taimi uma ma faaaloalo ia Tavita, ae sa mausali foi o ia i lona puipuiga o le Ekalesia.

I le aluga o tausaga, sa atiae e Tavita ma Iakopo le feāvata'i ma se faigauo. O le mea sa lei iloa e Tavita sa amata ona

tatalo Iakopo mo Tavita ma sa ia faia ma le faatuatua tele mo le silia ma le sefulu tausaga. Sa ia ave le igoa o lana uo mo tatalo i totonu o malumalu a le Alii ma faamoemoe o le a faamalūlūina le loto o Tavita.

I le aluga o tausaga, sa sua lemu lava Tavita. Sa amata ona ia toe manatua ma le faamemelo ia aafiafaaaleagaga sa ia oo i ai muamua, ma sa ia manatua ina le fiafia sa ia lagonaina a o avea o ia ma se tagata o le Ekalesia.

E pei foi o Alema, sa lei galo atoa ia Tavita ia upumoni o le talalelei na ia opomauina muamua. Ma e pei foi o Amoleka, sa lagona e Tavita le aapa atu o le Alii ia te ia. Ae o le taimi lea ua avea Tavita ma se paaga i se ofisa loia—o se galuega taualoa. Sa ia atiaeina se tulaga sa lauiloa ai i le faitioina o le Ekalesia, ma sa faamaualuga tele na le talosaga ai ina ia toe faaulufaleina.

Ae ui i lea, sa faaauau pea ona ia lagonaina le toso a le Leoleo Mamoe.

Sa ia talitonu atoa i le mau, "A e afai ua leai se poto i so outou, ina ole atu ia i le Atua, o le foai tele mai i tagata uma ma le le toe ta'uta'ua, ona foaiina mai ai lea ia te ia."<sup>13</sup> Sa ia tatalo, "Le Atua e, ou te toe fia avea ma tagata o le Au Paia o Aso e Gata Ai, ae e i ai a'u fesili e manaomia ni tali.



Sa amata ona ia faalogo i musumusuga a le Agaga ma tali musuia a uo, e sili atu i lo se isi lava taimi muamua. Sa faasolosolo lava ona liua ona masalosologa i le faatuatua, seja i'u ina ia iloaina, ua mafai ona ia toe lagonaina se molimau ia Iesu Keriso ma Lana Ekalesia toefuataiina.

I lena taimi, sa ia iloa ai o le a mafai ona ia faatoilaloina lona faamaualuga ma faia soo se mea e tatau ai ina ia toe talaina o ia i totonus o le Ekalesia.

Mulimuli ane, sa toe ulu atu Tavita i vai o le papatisoga ona amata lea ona toe faitau aso e toe fuatai ai ona faamanuiaga.

Ou te fiafia lava e lipoti atu i le taumafanafana na sei mavae atu nei, na toefuatai ai faamanuiaga o Tavita. Ua toe toaga atoa nei o ia i le Lotu ma auauna atu o se faiaoga o Aoaoga Faavae o le Talalelei i lana uarota. Ua ia faaaogaina avanoa uma e talanoa atu ai i isi e uiga i lona liua, le faamaloloina o mea na ia faaleagaina, ma molimau atu e uiga i le talalelei ma le Ekalesia a Iesu Keriso.

### Faaiuga

Ou uso e ma tuafafine, ia tatou saili atu, ia maua, uunaia, ma faalagolago atu i le au Amoleka i totonus o a tatou uarota ma siteki. E toatele Amoleka o loo i ai i le Ekalesia i aso nei.

Masalo e te iloaina se tasi. Masalo o oe le isi.

Atonu o loo musumusu atu le Alii ia te oe, uunaia oe ia toefoi mai i lou uluai alofa, foai mai au taleni, faaaoga ma le agavaa le perisitua, ma auauna faatasii ma ou uso i le Au Paia i le faalatalata atili atu ia Iesu Keriso ma le fausiaina o le malo o le Atua iinei i le lalolagi.

E silafia e lo tatou Faaola pele le mea o loo e i ai. Na te silafia lou loto. E finagalo o Ia e laveai ia te oe. O le a Ia aapa atu ia te oe. Tau lava o le tatala atu o lou loto ia te Ia. Ou te faamoemoe, o i latou ua se ese mai le ala o le avea ma soo—e tusa lava po o ni nai mea iti—o le a mafaufau loloto i le agalelei ma le alofa tunoa o le Atua, ia lagonaina

i o latou loto, ia aoao mai ia Alema ma Amoleka, ma faalogo i le fetailaiga a le Faaola e suia ai olaga: “Sau, mulimuli mai ia te au.”

Ou te uunaia outou ia faalogo i lena valaau, aua e mautinoa a e faalogo, o le a e mauaina le seleselega o le lag. O faamanuiaga a le Alii o le a mau i ou luga ma lou aiga.<sup>14</sup>

Ou te molimau atu ai i lenei mea ma tuu atu lau faamanuiaga i le avea ai ma se Apostolao a le Alii, i le suafa o Iesu Keriso, amene. ■

### FAAMATALAGA

1. Tagai Mosaea 27:8–10.
2. Tagai Alema 36:6–20.
3. Alema 4:20.
4. Tagai Alema 8:24.
5. Alema 8:18.
6. Alema 8:19.
7. Tagai Alema 10:2–6.
8. Tagai Alema 8:27.
9. Luka 18:22.
10. Faaliliuga a Iosefa Samita, Mataio 26:25 (i le faaopoopoga o le Tusi Paia).
11. Tagai Alema 10:7.
12. Tagai Faaaliga 2:4.
13. Iakopo 1:5.
14. Tagai Alema 10:7.



Saunia e Peresitene Henry B. Eyring  
Fesoasoani Muamua i le Au Peresitene Sili

# Ina la Faamalosia Foi o la

Ou te tatalo ia tatou tutulai a'e i o tatou valaauga e siitia isi ia saunia i latou mo a latou auaunaga mamalu.

**U**a ou lagona le faamanuaina i le faatasi ai i lenei sauniga ma i latou o loo umiaina le perisitua a le Atua. O le tuuto, o le faatuatua, ma auaunaga le manatu faapito o lenei tinotele o alii ma taulelea o se vavega faaonapo nei. Ou te lauga atu i le po nei i ē o umiaina le perisitua, matutua ma talavou, ua lotogatasi i auaunaga ma le loto atoa i le Alii o Iesu Keriso.

Ua faamatuu mai e le Alii Lona mana ia i latou i tofiga uma o le perisitua o e o loo auauna atu ma le agavaa i o latou tiute faaleperisitua.

Sa faamatalaina e Uilifoti Uitilafi, a o avea ma Peresitene o le Ekalesia lona aafiaga i tofiga o le perisitua:

"Sa ou faalogo i le lauga muamua lava na faato'a ou faalogo i ai i lenei Ekalesia. O le aso na sosoo ai, na ou papatiso ai. . . . Sa faauuina a'u o se Aoao. Sa vave ona amataina la'u misiona. . . . Sa ou alu i lena misiona atoa o se Aoao. I le konafesi sa faauuina ai au o se Ositaulaga. . . . Ina ua uma ona fauina au o se Ositaulaga sa auina atu au . . . i se misiona i le itu i saute o le atunu. O le taimi lena o le tautoulu o le 1834. Sa ma faatasi ma se soa, ma sa ma amata e aunoa ma se etetupe ma se ato. Sa ou

faimalaga na o au i le tele o maila ma talai atu le Talalelei, ma sa ou papatiso ina le toatele o tagata o ē sa le mafai ona ou faamauina i le Ekalesia ona sa na o au o se Ositaulaga. . . . Sa umi sina taimi o ou faimalaga e talai atu le Talalelei a o lei faauuina au o se Toeaina. . . .

"[O lenei] ua tusa ma le lima sefulufa tausaga o avea au ma se uso o Apostolo e Toasefululu. Ua ou faimalaga ma lena tofi ma isi korama mo le ono sefulu nei tausaga; ma ou te fia faapea atu i lenei potopotoga e tutusa lava le lagolagoina o au e le mana o le Atua

a o umiaina le tofi o se Aoao, aemaise a o taitai ai i le tovine o se Ositaulaga, ma le taimi ua avea ai au ma se Apostolo. E leai lava ma se eseesega i lenei mea pe afai e fai o tatou tiute."<sup>1</sup>

O le gafatia faaleagaga matagofie o le leai o se eseesega ua fautuaina mai i le faamalamalamaga a le Alii o le Perisitua Arona o se "faaopoopoga" o le Perisitua Mekisateko.<sup>2</sup> O le upu *faaopoopoga* o lona uiga ua fesootai ni mea se lua. O lenei fesootaiga e taua i le perisitua i le avea ai ma malosiaga ma faamanuiga e mafai ona avea ai, i lenei lalolagi ma le faavavau, aua "e leai se amataga o aso po o se iuga o tausaga."<sup>3</sup>

O le fesootaiga o se mea faigofie. E saunaia e le Perisitua Arona alii talavou mo se faatuatuaga sili atu ona paia.

"O le mana ma le pule o le perisitua maualuga, po o le Perisitua Mekisateko, o le umia lea o ki o faamanuiga uma faaleagaga o le ekalesia—

"O le mauaina o le avanoa e maua ai mealilo o le malo o le lagi, e tatala mai ai le lagi ia te i latou, e mafuta ai ma le faapotopotoga aoao ma le ekalesia a le Ulumatua, ma olioli i le mafutaga ma le afio ai o le Atua le Tamā, ma Iesu le puluvaga o le feagaiga fou."<sup>4</sup>

O na ki o le perisitua e faaaogaina atoatoa e le tamalii e toatasi i le taimi e tasi, le Peresitene ma le faiataulaga sili pulefaamalumalu i le Ekalesia a le Alii. Ona auala lea i le pulefaamatuu a le Peresitene, o alii uma e mauaina le Perisitua Mekisateko e mafai ona faaee atu i ai le pule ma le avanoa e saunoa ai ma galue i le suafa o le Silisili Ese.





O lena mana e le muta. E faatatau i le ola ma le otī, i le aiga ma le Ekalesia, i le natura sili o le Atua lava Ia ma Lana galuega e faavavau.

O loo saunia e le Alii ē o umiaina le Perisitua Arona ia avea ma se toeaina e auaua atu ma le faatuatua, mana, ma le lotofaafetai i lena Perisitua Mekisateko mamalu.

Mo toeaina, o le a ttau le lotofaafetai loloto i le faataunuina o la tatou vaega i auauanga atoatoa i le perisitua. O le a outou manatuaina ō outou aso o ni tiakono, aoao, po o se ositaulaga ina ua aapa atu i latou sa umiaina le perisitua mauluga e siitia ma faamalosia outou i la outou malaga faaleperisitua.

E tofu tagata uma e umiaina le Perisitua Mekisateko ma ni manatuaga faapena, ae o le lagona o le lotofaafetai atonu e faaititia i le aluga o tausaga. O lo'u faamoemoega ia toe faamumu lena lagona faatasi ai ma se naunautaiga e avatu i tagata uma e te mafaia lea lava ituiga e tasi o fesoasoaniga na e mauaina muamua.

Ou te manatua se epikopo na taulimaina au e peiseai ua ia te au le gafatia atoa e avea ai ma tagata e umia le mana o le perisitua. Sa ia valaau mai i se tasi Aso Sa a o avea au ma se ositaulaga. Sa ia fai mai sa ia manao-mia au e avea ma ana soa e asiisi atu i nisi o tagata o le matou uarota. Sa foliga mai i lona leo sa na o au lava lona faamoemoe mo le tulaga manuia. Sa ia le manaomia au. Sa lelei tele ona fesoasoani i lana au epikopo.

Sa ma asiisi atu i se tina ua oti lana tane sa mativa ma fiaai. Sa ia manao ia ou fesoasoani atu ia te ia ia pa'i atu i le loto [o le tinal], ia lu'i o ia e fai se paketi ma faaaoga, ma folafola ia te ia e mafai ona ia tulai a'e i se tulaga e le gata e tauai ai o ia lava ae faapena foi ona fesoasoani ai i isi.

Sa sosoo ai ma lo ma o atu e faama-fanafana ni teineiti se toalua sa ola i se tulaga faigata. A o ma savavali ese atu, sa ia saunoa lemu mai ia te au, "O le a le galu lava i nai teineiti la lo ta o mai ia i lau."

I le fale na sosoo ai, sa ou vaai ai i le auala e valaaulia ai se tagata le toaga e foi mai i le Alii e ala i le faatalitonuina o ia sa manaomia o ia e tagata o le uarota.

O lena epikopo o se na umiaina le Perisitua Mekisateko sa siitiaina la'u vaai ma uunaiaina au e ala i faataitaiga. Sa ia aoao au ia maua le mana ma le lototele e alu ai i sooo se mea i auau-naga mo le Alii. Ua leva ona maliu o ia ma tauia, ae ou te manatua pea o ia ona sa ia aapa mai ma sii a'e au i luga a o avea au ma sē na umiaina le Perisitua Arona sa leai se potomasani. Sa ou iloaina mulimuli ane, sa ia vaai ia te au i luga o le ala o le perisitua i le lumanai ma ni tiutetauave sili atu, lea sa ou le malamalamā i ai i lena taimi.

Sa faia foi e lo'u tama le mea lava e tasi mo au. O ia o se tagata potomasani ma atamai na umiaina le Perisitua Mekisateko. Sa talosagaina o ia i se tasi taimi e se Aposetolo e tusi se tamai faamatalaga e uiga i faamaoniga

faasaienisi mo le umi talu ona i ai le lalolagi. Sa ia tusia ma le faaeteete, ma le iloaina e ono faitau i ai nisi e malolosi ni lagona e faapea e laitiiti ifo le matua o le lalolagi nai lo faamaoniga faasaienisi ua fautuaina.

Ou te manatua pea le tuuina mai e lo'u tama ia te au o le mea sa ia tusiaina ma faapea mai, "Hal, o loo ia te oe le poto faaleagaga e iloa ai pe tatau ona ou auina atua lenei tusi i aposetolo ma perofeta." Ou te le o manatuaina le tele o mea na tusia i le pepa, ae o le a ou tauaveina e faavavau le lotofaafetai sa ou lagonaina mo sē maoae na umaina le Perisitua Mekisateko na vaia ia te au le poto faaleagaga sa lei mafai ona ou vaia.

I se tasi po, i nai tausaga mulimuli ane, ina ua uma ona faauuina au o se Aposetolo, sa valaau mai ai le perofeta a le Atua ia te au ma faatonuina au e faitau se mea na tusiaina e uiga i se aoaoga faavae o le Ekalesia. Sa ia faaaluina le po e faitauina ai ni mataupu o se tusi. Sa ia fai mai ma se ataata, "E le mafai ona ou faitauina uma lenei mea. E le tatau ona e malolo ae o lea ou te galue." Ona ia faaogaina lea o upu toeitiiti lava a tutusa ma upu na faaaoga e lo'u tama i tausaga na muamua atu: "Hal, o oe e tatau ona faitauina le tusi lenei. O le a e iloaina pe o sa'o ina ia lolomiina."

O le mamanu lava e tasi o le siitiaina e sē umia le Perisitua Mekisateko o le vaai ma tuu atu le talitonuga [i le isi] na oo mai i se tasi po i se faaaliga lauga na lagolagoina e le Ekalesia. I le 17 o o'u tausaga, sa talosagaina ai au e lauga atu i se aofia toatele. Sa leai ma so'u iloa po o le a se mea o faamoemoeina mai ia te au. Sa lei tuuina mai se autu, ma o lea sa ou saunia ai se lauga sa matua sili atu ma le mea sa ou iloaina e uiga i le talalelei. A o ou lauga atu, sa ou iloaina na ou faia se mea sese. Ou te manatua pea ina ua uma la'u lauga, sa i ai so'u lagona lofituina o le toilalo.

O le failauga na sosoo ai ma o le failauga faaiu foi lea o Elder Matthew Cowley o le Korama a Aposetolo e Toasefululua. O ia o se failauga maoae—sa alofagia i le Ekalesia atoa. Ou te manatua pea lo'u vaai atu ia te ia mai lo'u nofoa e sosoo ma le pulelala.

Sa ia amata saunoa i se leo mamana. Sa ia fai mai o la'u lauga na ia lagona ai o loo i ai o ia i se konafesi maoae. Sa ia ataata a o ia saunoa ai. Sa mou atu o'u lagona o le toilalo ma na sosoo ai ma le talitonuga e ono i ai se aso e avea ai a'u ma se tagata ua manatu o ia ua ou avea ai.

O le manatuaga o lena po o loo taitaia ai pea au ia faalogo ma le toto'a pe a lauga sē o umiaina le Perisitua Arona. Ona o le mea sa faia e Elder Cowley mo au, ou te faamoeomoe ai lava i taimi uma o le a ou faalogo i le afioga a le Atua. E seāseā ou le fiafia ae tele ina maofa, ma e le mafai ona taofia lo'u atata e pei ona sa faia e Elder Cowley.

E tele mea e mafai ona fesoasoani e faamalosia ai o tatou uso talavou ia tutulai a'e i le perisitua, ae e leai se mea e sili atu ona mamana nai lo lo tatou fesoasoani atu ia i latou ia atiae le faatuatua ma le talitonuga e mafai ona latou utuvai mai le mana o le Atua i a latou auauanaga faaleperisitua.

O le a le tumau ia i latou le faatuatua ma le talitonuga mai se aafiaga se tasi o le siitiaina, e oo lava i sē sili ona faamniaina e umiaina le Perisitua Mekisateko. O le tomai e utuvai ai mai na mana e tatau ona faafaleleina e le tele o faailoaga o le talitonuga mai ia i latou e sili atu ona tele aafiaga i le perisitua.

O le a manaomia foi e ē umiaina le Perisitua Arona ia uunaiga ma faasa'oga i aso uma e oo lava i itula uma mai le Alii lava Ia e ala i le Agaga Paia. O le a avanoa lena mea ia i latou pe a latou *filifili e tumau ma le agavaa mo lena mea*. O le a faalagolago i filifiliga o le a latou faia.

O le mafuaaga lena e tatau ai ona tatou aoao atu e ala i faataitaiga ma e ala i le molimau i upu a le taitai maoae o le Perisitua Mekisateko, le Tupu o Peniamina e moni.<sup>5</sup> O upu na o le alofa e tautalagia i le suafa o le Alii, lē e ana lenei perisitua. Na aoao mai e le Tupu o Peniamina mea e manaomia mai ia i tatou ina ia tumau ai le lava o le mama e maua ai le uunaiga ma le aoa'iga a le Alii.

"Ma mulimuli lava, e lē mafai ona ou ta'u atu ia te outou mea uma e mafai ona outou faia ai le agasala; ona ua tele



ala ma auala eseese, ua matua tele lava e lē mafai ona ou fatauina.

"Ae o le mea lenei e mafai ona ou ta'u atu ia te outou, afai tou te lē vaavaia outou lava, ma o outou mafauauga, ma a outou upu, ma a outou galuega, ma tausi i poloaiga a le Atua, ma tumau pea i le faatuatua i mea ua outou faalogo i ai e uiga i le afio mai o lo tatou Alii, e oo lava i le iuga o o outou ola, e fano lava outou. Ma o lenei le tagata e, ia manatua, ma lē fano ai."<sup>6</sup>

Ua tatou iloa uma ia ūfanafana mu a le fili o le amiontu ua tafana mai e pei o se matagi matautia i talavou o loo umiaina le perisitua tatou te alolofa tele i ai. Ia i tatou, e foliga mai i latou o autau talavou, na ta'ua i latou lava o atalii o Helamana. E mafai ona sao mai i latou, e pei ona faia e na autau talavou, pe afai latou te faasaogalemuina i latou lava e pei ona uunaia ai i latou e le Tupu o Peniamina.

Sa lei masalosalo lava atalii o Helamana. Sa latou tau ma le totoa ma manumalo ai ona sa latou talitonu i upu a o latou tina.<sup>7</sup> Ua tatou malamalamā i le mana o le faatuatua o se tina alofa. O loo tuuina atu e tina lena lagolagosua tele i o latou atalii i nei aso. O i tatou, o ē umiaina le perisitua, e mafai ma e tatau ona faaopoopo atu

lena lagolagosua faatasi ma lo tatou naunautaiga e tali atu i le poloaiga afai ua tatou liua, e ao ona tatou aapa atu i lalo ma faamalosia o tatou uso.<sup>8</sup>

O la'u tatalo ia taliaina e alii uma e umiaina le Perisitua Mekisateko le avanoa ua ofoina mai e le Alii:

"Ma afai e i ai se tagata i totonus o outou ua malosi i le Agaga, ia tuu atu ia te ia na te ave faatasi ma ia lē ua vaivai, ina ia faagaeetiaina o ia i le agamalu atoa, ina ia faamalosia foi o ia.

"O lea, ia outou ave faatasi ma outou e ua faauuina i le perisitua maualalo, ma auina atu i latou e muamua atu ia te outou e fai tuutuuga, ma saunia le ala, ma faataunu tuutuuga ua lē mafai e outou lava ona faataunu.

"Faauta, o le ala lenei na ati a'e ai e a'u aposetolo, i aso anamua, la'u ekaleisia ia te a'u."<sup>9</sup>

O outou taitai perisitua ma tama o le au Perisitua Arona e mafai ona faia ni wavega. E mafai ona outou faatumuina tulaga o toeaina faamaoni i alii talavou e taliaina le valaau ia talai atu le talalelei ma faia ma le talitonuga. O le a outou vaaia le toatele tou te siitiaina ma faamalosia e tumau ma le faamaoni, faaipoipo atu ma le agavaa i le malamalu, ma i se taunuuga, latou te siitia ma saunia foi isi.

O le a le moomia ai ni polokalama fou o gaoioiga, ni punaoa faafaaiaoga ua faaleleia, po o ni alafaasalalau faaagafesootai sili atu. O le a le manaomia ai se valaauga e sili atu ma le valaauga o loo ia te oe i le taimi nei. O le tautoga ma le feagaiga o le perisitua e te maua ai le mana, pule, ma le taitaiga. Ou te tatalo ia outou o i o outou aiga ma suesue ma le toto'a le tautoga ma le feagaiga o le perisitua, o loo maua i le Mataupu Faavae ma Feagaiga 84.

Tatou te faamoemoe uma lava o le a faatoateleina alii talavou e mauaina aafiaga e pei o Uilifoti Utilafi, o lē, a o avea ma se Perisitua Arona, sa ia aoao atu le talalelei a Iesu Keriso ma le mana e liua ai.

Ou te tatalo ia tatou tutulai a'e i o tatou valaauga e siitia isi ia saunia i latou mo a latou auauanga mamalu. Ou te faafetai lava ma lo'u loto atoa i tagata lelei na siitaina au ma faaali mai ia te au le auala e alofa atu ai ma siitia isi.

Ou te molimau atu o Peresitene Thomas S. Monson o loo umiaina ki uma o le perisitua i le lalolagi i aso nei. Ou te molimau atu, i ana auauanga i le olaga atoa, ua avea ai pea o ia ma se faataitaiga mo i tatou uma o le aapa atu e siitia isi i le avea ai ma sē umiaina le Perisitua Mekisateko. Ou te faafetai lava au ia mo le auala na ia siitia ai au ma faaali mai ia te au le auala e siitia ai isi.

O loo soifua le Atua le Tama. O Iesu o le Keriso. O Lana Ekalesia ma [Lona] malo lenei. O Lana perisitua lenei. Ua ou iloaina lenei lava mea mo au lava ia e ala i le mana o le Agaga Paia. I le suafa o le Alii o Iesu Keriso, amene. ■

#### FAAMATALAGA

1. Wilford Woodruff, "The Rights of the Priesthood," *Deseret Weekly*, Mar. 17, 1894, 381.
2. Tagai Mataupu Faavae ma Feagaiga 84:30; 107:14.
3. Mataupu Faavae ma Feagaiga 84:17.
4. Mataupu Faavae ma Feagaiga 107:18–19.
5. Ua fautua mai i le Alema 13:6–9 e faapea sa umia e perofeta o le Tusi a Mamona le Perisitua Mekisateko.
6. Mosaea 4:29–30.
7. Tagai Alema 56:47.
8. Tagai Luka 22:32.
9. Mataupu Faavae ma Feagaiga 84:106–8.



Saunia e Peresitene Thomas S. Monson

# ○ Mataupu Faavae ma Folafolaga

*Uso e, ia tausi lelei o tatou tino ma o tatou mafaufau e ala i le tausiaina o mataupu faavae ua tuuina mai i le Upu o le Poto, o se fuafuaga ua tuuina mai le lagi.*

**O**le po nei, uso e, ou te tatalo mo le taitaiga a lo tatou Tama Faalelagi a o ou faasoa atua la'u savali ia te outou.

I le 1833, sa faaali atu ai e le Alii i le Perofeta o Iosefa Samita se fuafuaga mo le soifua maloloina. O lena fuafuaga o loo maua i le vaega e 89 o le Mataupu Faavae ma Feagaiga ma ua lauiloa o le Upu o le Poto. Ua aumai ai se faatonuga maoti e

faatatau i meaai tatou te aai ai, ma faasaina ai le faaaogaina o mea e faaleagaina ai o tatou tino.

O i latou e usiusitai i poloaiga a le Alii ma tausia ma le faamaoni le Upu o le Poto ua folafola atu i ai ni faamanuiaga patino, lea e aofia ai ma le soifua maloloina lelei ma se malosi faaletino e faaopoopoina.<sup>1</sup>

Talu ai nei sa ou faitau ai i le tala moni e uiga i se faailoaga o aafiaga e





faatatau i nei folafolaga. O se tagata faamaoni o le Ekalesia, o John A. Larsen, sa auauna atu i le Taua Lona Lua o le Lalolagi i luga o le vaa o le USS *Cambria* i le Coast Guard a le Iunaite Setete. I le taimi o se taua i le atu Filipaina, sa oo mai ai se tala e uiga i se vaega o faapapomu ma vaalele tau faapapomu ua lalata ane. Sa tuu mai ia faatonuga ina ia vave o ese loa. Talu ai ua leva ona alu ese atu le vaa o le USS *Cambria* sa ao mai e John ma soa e toatolu a latou meatau ma faataalise atu i le matafaga, ma le faamoemoe e maua se tamai vaa e momoli ai i latou i vaa tetele i tai o le a o ese. O le mea e laki ai, sa piki i latou e se vaa ma faataalise atu loa i le vaa tele mulimuli o le a alu ese mai le faga. O alii sa i ai i luga o le vaa tele ua aluese, i se taumafaiga ua faataalise ese atu i le vave e mafai ai, sa pisi tele i luga o le vaa sa na ona togi mai lava o maea i lalo i alii e toafa, ina ia mafai ona latou fe'a'ei atu ai i luga o le vaa.

O John faatasi ai ma se leitio faaualesi mamafa o loo fusi i lona patua, sa taupe i le pito o se maea e fasefulu futu le umi (12 m), i le pito o le vaa tele ua agai ese atu i le vasa tele. Sa amata ona ia toso atu o ia i luga, sa mau le isi lima i luga o le isi lima ma le iloaina, afai e mamulu, e mautinoa lava e ono oti ai. I le na o le tasi vaetolu o le ala na ia a'ea, sa matua mu ona lima i le tiga. Sa faasolo ina vaivai lea sa ia lagona ai ua le toe mafai ona pipii.

Faatasi ai ma lona malosi ua fai ifo, a o ia mafaufau ai ma le vaivai i lona taunuuga, sa valaau atu ma le leleoa John i le Atua, ma ta'u atu ia te Ia sa ia tausia i taimi uma le Upu o le Poto ma sa ola i se olaga mama—ma o lea ua ia matua manaomia lava ia faamanuiaga folafolaina.

Mulimuli ane sa fai mai John ina ua uma lana tatalo, sa ia lagonaina se puna tele o le malosi. Sa amata ona ia toe pe'a atu i luga ma vave ona a'e i le maea. Ina ua taunuu i le fola o le vaa,

sa lelei pea lana manava—sa lei selo ia. O faamanuiaga o le soifua maloloina ma le malosi faaopoopoina, o loo folafola mai i le Upu o le Poto, sa ia mauaina. Sa ia tuu atu le faafetai i lona Tama Faalelagi, i lena taimi, faapea ai ma lona olaga atoa, mo le tali i lana tatalo faananau mo se fesoasoani.<sup>2</sup>

Usa e, ia tausi lelei o tatou tino ma o tatou mafaufau e ala i le tausiaina o mataupu faavae ua tuuina mai i le Upu o le Poto, o se fuafuaga ua tuuina mai le lagi. Faatasi ai ma lo'u loto ma le agaga atoa, ou te molimau atu i faamanuiaga mamalu o loo faatalitali mai ia i tatou pe a tatou faia lenei mea. Ma ia faapena lava ona faia, ou te tatalo ai, i le suafa o lo tatou Alii ma le Faaola, o Iesu Keriso, amene. ■

#### FAAMATALAGA

1. Tagai Mataupu Faavae ma Feagaiga 89:18–21.
2. Tagai Robert C. Freeman and Dennis A. Wright, comps., *Saints at War: Experiences of Latter-day Saints in World War II* (2001), 350–51; ua faaaogaina i le faatagaga.



Sauniga i le Taeao o le Aso Sa | 2 Oketopa, 2016

Saunia e Peresitene Thomas S. Monson

# O Le Ala Atoatoa i le Fiafia

*Ou te molimau atu i le meaalofa sili, o le fuafuaga lea a lo tatou Tama mo i tatou. O le ala atoatoa lea e tasi i le filemu ma le fiafia.*

**O**u uso e ma tuafafine pele, iinei uma i le Maota Autu mo Konafesi ma le lalolagi atoa,

ou te faafetai lava mo le avanoa e faasoa atu ai ou manatu ia te outou i lenei taeao.



I le limasefulu lua tausaga talu ai ia Iulai 1964, sa i ai so'u tofiga i le Aai o Niu Ioka i le taimi sa faia ai le Faaaliga a le Lalolagi iina. I se tasi taeao po sa ou asiasi atu ai i le Mormon Pavilion i le faaaliga. Sa ou taunuu atu ae o le a amata le faaaliga o le atatifaga a le Ekalesia le *Man's Search for Happiness*, o se faatinoga o le ata o le faaolataga lea ua avea ma se ata lauiloa a le Ekalesia talu mai lena taimi. Sa ou nofo i tala ane o se alii talavou e masalo sa 35 tausaga le matua. Sa puupuu le ma talanoaga. Sa le o ia o se tagata o lo tatou faatuatuaga. Ona pe lea o moli, ma amata loa le ata.

Sa matou faalogo i le leo o le tagata faamatalaupu a o ia fai maia ni fesili anoa e faataatau i tagata uma: O fea na ou sau ai? Aisea ua ou i ai iinei? O fea ou te alu i ai pe a uma lenei olaga?" Sa faalologo uma taliga e fia faalogo i tali, ma sa pulato'a uma mata i ata na faaali. Sa tuu mai se faamatalaga o lo tatou olaga i le muai olaga, faatasi ai ma se faamalamalamaga o lo tatou faamoe-moega i le lalolagi. Sa matou molimauina se vaega ootia o le maliu o se tamā matua lava mai lenei olaga faapea ai ma lona toe feiloai atu ma le mamalu i ē pele ia te ia na muamua atu ia te ia i le lalolagi o agaga.

I le faaiuga o lenei ata matagofie o le fuafuaga a lo tatou Tama Faalelagi mo i tatou, sa savavali ese atu tagata ma le filemu, e toatele sa vaaia le ootia i le savali o le ata. Sa lei tu i luga le tagata asiiasi talavou lea sa i o'u tala ane. Sa ou fesili atu i ai pe na fiafia i le ata. O lana tali malosi: "O le mea moni lenei!"

O le fuafuaga a le Tama mo lo tatou fiafia ma lo tatou faaolataga o loo faasoaina atu e a tatou faifeautalai i le lalolagi atoa. Ae le o tagata uma e faafogfa i lenei savali paia e taliaina ma opomauina. Peitai, o alii ma tamaitai i soo se mea, e pei lava o la'u uo talavou i le Faaaliga a le Lalolagi i Niu Ioka, e iloaina ona upumoni, ma latou filifili ma le mausali e ui i le ala lea o le a taitai atu ai i latou ma le saoga-lemu i le aiga. E suia o latou olaga e faavavau.

E taua i le fuafuaga, o lo tatou Faaola, o Iesu Keriso. Ana le aunoa

ma Lana taulaga togiola, semanu e leiloloa tagata uma. Peitai, e le lava le tau na ona talitonu ia te Ia ma Lana misiona. E manaomia ona tatou galulu ma aoao, saili ma tatalo, salamo, ma faaleleia. E manaomia ona tatou iloa tulafono a le Atua ma ola ai. E manaomia ona tatou mauaina Ana sauniga faaola. E na o le faia lava o lena mea o le a tatou maua ai le fiafia moni e faavavau.


Ua faamanuiaina i tatou i le *i ai* o le upumoni. Ua i ai so tatou tiute e *faasoa atu* le upumoni. Ia tatou *ola* i le upumoni ina ia tatou mauaina mea uma ua i ai i le Tama mo i tatou. E leai ma se mea Na te faia vagana ai o mea mo lo tatou manuia. Na Ia ta'u mai ia i tatou, "O la'u galuega ma lo'u mamalu lenei—ia aumaia le tino ola pea ma le ola faavavau o le tagata."<sup>1</sup>

Mai le taele o lo'u agaga, ma i le lotomaualalo atoa, ou te molimau atu ai i le meaalofa sili, o le fuafuaga lea a lo tatou Tama mo i tatou. O le ala atoatoa lea e tasi i le filemu ma le fiafia iinei ma i le lalolagi a sau.

Ou uso e ma tuafafine, ou te tuua ia te outou lo'u alofa ma la'u faamunuiga a o ou faai'u ai, ma ou te faia ai i le suafa o lo tatou Faaola ma le Togiola, o Iesu Keriso, amene. ■

#### FAAMATALAGA

1. Mose 1:39.



Saunia e Peresitene Russell M. Nelson

Peresitene o le Korama a Aposetolo e Toasefululua

## Olioli ma le Ola ai Faaleagaga

*Afai o le taulaiga o o tatou olaga o lesu Keriso ma Lana talalelei, e mafai ona tatou lagona le olioli e tusa lava po o a mea o tutupu—pe le o tutupu foi—i o tatou olaga.*

**O**'u uso e ma tuafafine pele, o le asō ou te fia talanoa atu ai i se mataupu faavae e taua i lo tatou ola ai faaleagaga. O se mataupu faavae lea o le a atili taua pe a faateleina ia mala ma mea matautia o siomiaina i tatou.

O aso nei e gata ai, e le tatau la ona faateia i tatou pe a tatou vaai atu i le

faataunuina o valoaga. O se vaega o perofeta, e aofia ai Isaia, Paulo, Nifae, ma Mamona, na muai vaaia le oo mai o na taimi faigata,<sup>1</sup> i o tatou aso o le a vavao le lalolagi atoa,<sup>2</sup> o le a avea tagata ma "e alolofa i latou ia i latou, . . . o e le lotoaiga, . . . o e ua tele le manao i mea faafafia a e leai se manao i le Atua,"<sup>3</sup>



ma o le a toatele o le a avea ma auauna a Satani o e ua sapasapaia le galuega a le fili.<sup>4</sup> E moni, ta te “le tau . . . ma alii o le pouliuli o lenei lalolagi, [faapeal] ma agaga leaga i mea o i le lagi.”<sup>5</sup>

Ao faateleina feteenaiga i le va o malo, ao fasiotia e tagata faatupu vevesi palaaai ia tagata le sala, ma ao faateleina le avea ma mea masani ia le amio leaga i soo se mea mai pisinisi i malo, o le a se mea e mafai ona fesoasoani ia i tatou? O le a se mea e mafai ona fesoasoani ia i tatou taitoatasia ia tatou tauiviga patino ma lui faigata o le ola ai i nei aso e gata ai?

Na aoao mai e le perofeta o Liae se mataupu faavae mo le ola ai faale-agaga. Muamua, mafaufau i ona tulaga: Na sauaina o ia mo le aoao atu o le upumoni i Ierusalem ma poloaiina e le Alii ia tuua ana meatotino ma sosola atu ma lona aiga i le vao. Na nofo o ia i se faleie ma ola i mea na mafai ona maua e agai atu i se taunuuga e le mai-loa, ma sa ia vaia ona atalii e toalua, o Lamana ma Lemuel, o fouvale agai i aoaoga a le Alii ma sauaina o laua uso o Nifae ma Sama.

E manino lava, na silafia e Liae mea faafeagai, popole, lototiga, tiga, faanoanoa, ma le faavauvau. Peitai sa ia tautino atu ma le lototoa ma aunoa ma le faatuai se mataupu faavae e pei ona faaalia e le Alii: “Ua i ai tagata, ina ia latou maua le olioli.”<sup>6</sup> Vaai faalemafau-fau atu! Mai upu uma na mafai ona ia faaaogaina e faamatala ai le natura ma le faamoemoega o tatou olaga iinei i le faaletino, ua ia filifilia le upu *olioli!*

Ua tumu le olaga i auala ‘alo ma auala muta, luitau ma tofotofoga o soo se ituaiga. Atonu ua tofu i tatou ma ni taimi o mafatiaga, tiga, ma le faanoanoa lea toetoe lava a lofutuina ai i tatou. Ae ua tatou i ai iinei ina ia maua le olioli?

Ioe! O le tali o le ioe mautinoa! Ae e mafai faapefea lena mea? Ma o le a le mea e ao ona tatou faia ia maua ai le olioli lea ua faapolopolo mai e le Tama Faalelagi mo i tatou?

Na tuuina mai e Eliza R. Snow, Peresitene Aoao lona lua o le Aualofa, se tali manai tele. Ona o le faatonuga tautaua a Misuri e faaumatia [tagata mamona], lea na tuuina atu i le amataga



o le taumalulu matautia o le 1838,<sup>7</sup> na latou sosola ese ai ma nisi o le Au Paia mai le setete i lena lava taumalulu. I se tasi po, sa nonofo Eliza ma lona aiga i se tamai fale laau na faaaoga e tagata sulufai a le Au Paia. O le tele o mea na faatumu ai va o laupapa na aveesea ma faaaoga i le afi e i latou na muamua atu, o lea na matua pupu ai va o laau ma na mafai e se pusi ona tolotolo mai ai i totonus. Sa maatiati le malulu, ma na malo tiaa a latou meaai.

I lena po pe a ma le 80 tagata na faapupuu i totonus o lena tamai fale laau, e na o le 20 futu faatafafa (6.1 mita faatafafa). O le toatele na saofafai pe tutu i le po atoa e taumafai ia faamafanafana. I fafo, na faaaluina e se vaega o alii le po e potopoto ai i autafa o se afi mumu saesae, ma o nisi na usuina ni viiga ao isi na tunuina ni pateta ua aisa. Na tusia e Eliza: “Sa leai se tomumu na faalogoina—na fiafia tagata uma, ma a fua i o latou foliga, masalo semanu e faapea ni tagata ese o ni tagata o loo sailia ni mea faafafia nai lo se vaega o tagata ua tutulieseai.”

O le lipoti a Eliza e faatatau i lena afiafi vaivai ma taufaamatau na matua foliga ai o loo lelei mea uma. Sa ia tautino mai: “O se po fiafia tele lena po. Ua na o le au paia e mafai ona maua le fiafia i lalo o soo se tulaga.”<sup>8</sup>

O le mea lena! E mafai ona maua e le au paia le fiafia i lalo o soo se tulaga. E mafai ona tatou lagona le olioli e tusa lava pe le o lelei le aso, se vaisago, po o se tausaga!

O o'u uso e ma tuafafine pele, o le olioli o tatou lagonaina e itiiti lava se mea e faatatau i tulaga o tatou olaga ao mea uma o loo faatatau i le taulaiga o o tatou olaga.

Afai o le taulaiga o tatou olaga e i fuafuaga o le faaolataga a le Atua, lea faatoa uma ona aoaoina ai i tatou e Peresitene Thomas S. Monson, ma ia Iesu Keriso ma Lana talalelei, e mafai ona tatou lagona le olioli e tusa lava po o a mea o tutupu—pe le o tutupu foi—i o tatou olaga. O le olioli e sau mai [ia te Ia] ma ona o Ia. O Ia o le puna o le olioli uma. Tatou te lagonaina i le taimi o le Kerisimasi pe a tatou usuina le pese, “Le lalolagi ia fiafia.”<sup>9</sup> Ma e tatou te lagonaina i le tausaga atoa. Mo le Au Paia o Aso e Gata Ai, o Iesu Keriso o le olioli lea!

O le mafuaaga lena e tuua ai e o tatou faifeatalai o latou aiga ina ia talai atu Lana talalelei. E le o lo latou sini le faateleina o le aofai o tagata o le Eklesia. Ae, o a tatou faifeatalai e aoao atu ma papatiso<sup>10</sup> ia aumai le olioli i tagata o le lalolagi!<sup>11</sup>

E pei lava foi ona ofo mai e le Faaola le filemu lea e “silisili lava i mea uma e manatu i ai,”<sup>12</sup> Na Ia ofoina mai foi le malosi faateleina, loloto, ma le lautele o le olioli lea e tetee ai i tulaga faaletagata po o le malamalamafaletino. Mo se faataitaiga, e le mafai ona e lagona le olioli pe a mafatia lau tama i se ma'i e leai se togatifi, po o ua leai sau galuega po o ua faalata oe e lou toalua. Peitai o le olioli tonu lava lena o loo ofoina mai e le Faaola. O Lona olioli e faifai pea, ma faamautinoa mai o tatou “puapuaga o le a nao sina minute laitiiti”<sup>13</sup> ma faapaiaina mo lou manuia.<sup>14</sup>

E faapefea la, ona tatou maua lena olioli? E mafai ona tatou amata i le “vaavaai atu ia Iesu o le na te taitaiina ma le na te faaatoatoaina le faatuatua”<sup>15</sup> “i mafaufauga uma.”<sup>16</sup> E mafai ona tatou tuuina atu le faafetai mo Ia i a tatou tatalo ma i le tausia o feagaiga na tatou

osia ma Ia faapea ma lo tatou Tama Faalelagi. Ao avea ai ma atili moni lo tatou Faaola ia i tatou ma pe a tatou augani atu mo Lona olioli ina ia tuu mai ia i tatou, o le a faateleina ai lo tatou olioli.

O le olioli e mamana, ma o le taulai atu i le olioli e aumai ai le mana o le Atua i o tatou olaga. E pei o mea uma, o Iesu Keriso o lo tatou faataitai sili, “o le na onosai i le satauro, . . . ona o le olioli sa tuu i ona luma.”<sup>17</sup> Mafaufau i lena mea! Ina ia mafai ona Ia onosaia aafiaga aupito i faigata e lei onosaia muamua i le lalolagi, na taulai atu ai lo tatou Faaola i le *olioli*!

Ma o le a le olioli lea sa tuu i Ona luma? E mautinoa lava na aofia ai le

olioli i le faamamaina, faamaloloina, ma le faamalosia o i tatou; o le olioli i le totogiina mo agasala a tagata uma o le a salamo; o le olioli o le a mafai e oe ma a'u ona toe foi atu—i le mama ma le agavaa—e nonofo ma o tatou Matua Faalelagi ma aiga.

A tatou taulai i le olioli lea o le a oo mai ia i tatou, po o i latou tatou te alolofa i ai, o le a le mea e mafai ona tatou onosaia lea e foliga lofituina, tiga, taufaafefe, le talafeagai, pe foliga e le mafai?

O se tasi o tamā i se tulaga lamatia faaleagaga na taulai atu i le olioli o le faamamaina ma ia agavaa ma le Alii—o le olioli o le saoloto mai le tausala-inia ma le maasiasi—ma le olioli o le

mauaina o le filemu o le mafaufau. O lena taulaiga na tuuina atu ai ia te ia le lototoa e tau atu ai i lona toalua ma le epikopo lona faafitauli i ponokalafi ma lona le faamaoni. O loo ia faia nei mea uma na fautuaina ai o ia e lona epikopo e fai, taumafai ma lona loto atoa ia toe maua le faatuatuaga a lona toalua pele.

Na taulai atu se tamaitai talavou i le olioli o le tumau ai i le mama mai feusuaga ina ia fesoasoani ia te ia e onosaia ia tauemuga a uo ao ia savali ese mai se tulaga laulioa ma taufaaosooso, ae matautia faaleagaga.

O se tamaloa e masani ona faaluma-inia lona toalua ma soona lafo ni upu mataga i lana fanau na taulai atu i le olioli ia agavaa ia avea le Agaga Paia ma ona soa tumau. O lena taulaiga na uunaia o ia e tuu ese le tagata natura,<sup>18</sup> lea sa masani ona ia gauai atu i ai, ma ia faia ni suiga manaomia.

Na ta'u mai ia te a'u e se ue mamae ona tofotofoga mamafatu i vaitausaga e lua ua mavae atu. Fai mai o ia, “Sa ou aoao ia mafatia ma le olioli. Na tofatumoanaina o'u puapuaga i le olioli ia Keriso.”<sup>19</sup>

O le a se mea ta te mafai ona onosaia ao tatou taulai atu i le olioli lea ua “tuu i o [tatou] luma”?<sup>20</sup> O le a le tulaga salamo o le a mafai ona faia? O a vavaiga o le a avea ma malosiaga?<sup>21</sup> O a ni aaoiga o le a avea ma se faamanu-iaga?<sup>22</sup> O a faanoanoaga, e oo lava i mala, o le a avea ma o tatou lelei?<sup>23</sup> Ma o a auaunaga faigata a le Alii o le a mafai ona tatou tuuina atu?<sup>24</sup>

Ao tatou taulai atu ma le maelega i le Faaola ma mulimuli i Lana mamanu o le taulai atu i le olioli, e tatau ona tatou aloese mai mea e mafai ona faalavelave i lo tatou olioli. Manatua Korioa, le aneti-Keriso? Sa faia e Korioa le tele o faamatalaga pepelo e uiga i le Faaola, na alu atu Korioa i lea nofoaga ma lea nofoaga seia oo ina aumai o ia i luma o le faitaulaga sili o le na fesiligia o ia: “Aisea ua e fealuai ai e faapiopio ala o le Alii? Aisea ua e aoao atu ai i lenei nuu o le a leai se Keriso, e taofi ai lo latou olioli?”<sup>25</sup>

Soo se mea e tetee ia Keriso po o Lana aoaoga faavae o le a taofia





lo tatou olioli. E aofia i lena mea ia filosofia a tagata, lea e tele i luga o le initoneti ma poloka, lea e tutusa lava ma mea na faia e Korioa.<sup>26</sup>

Afai tatou te vaai atu i le lalolagi ma mulimuli i ona mamanu mo le fiafia,<sup>27</sup> tatou te le iloaina lava le olioli. E ono maua e tagata le amiontonu le tele o lagona ma faalogona, ae latou te le mauaina lava le olioli!<sup>28</sup> O le olioli o se meaalofa mo le au faamaoni.<sup>29</sup> O se meaalofa e sau mai le taumafai ma le leai o se mafaufau i ai ia ola i se olaga amiontonu, e pei ona aoao mai e Iesu Keriso.<sup>30</sup>

Na ia aoao i tatou ia maua le olioli. Afai tatou te filifilia le Tama Faalelagi e avea ma o tatou Atua<sup>31</sup> ma pe a tatou lagona le aoga o le Togiola a le Faaola i o tatou olaga, o le a faatumulua i tatou i le olioli.<sup>32</sup> O taimi uma lava tatou te tausia ai o tatou taitoalua ma tialainia a tatou fanau, o taimi uma lava tatou te faamagalo atu ai i se tasi pe tapa se faamagaloga, tatou te lagona le olioli.

O aso uma ta te filifili ai ia ola i tulafono faaselesitila, o aso uma tatou te tausia ai a tatou feagaiga ma fesoasoani i isi ia faia lena lava mea e tasi, o le a avea mo tatou le olioli.

Faalogo i upu a le fai Salamo: "Ou te tuu Ieova i o'u luma e le aunoa; aua o i lo'u itu taumatau o ia, e le faagaeetia ai lava a'u. . . . O i [Lona] luma le fiafia e malie ai."<sup>33</sup> Ao tamauina lenei mataupu faavae i o tatou loto, o le a mafai ona

avea aso taitasi ma aso o le olioli ma le fiafia.<sup>34</sup> Ou te molimau atu ai i le suafa paia o Iesu Keriso, amene. ■

#### FAAMATALAGA

1. Tagai 2 Timoteo 3:1-5.
2. Tagai Mataupu Faavae ma Feagaiga 45:26; 88:91.
3. 2 Timoteo 3:2-4.
4. Tagai Mataupu Faavae ma Feagaiga 10:5.
5. Efeso 6:12.
6. Nifae 2:25.
7. Na tuuina atu e Kovana Lilburn W. Boggs o Misuri se faatonuga i le aso 27 Oketopa, 1838 ia faumatia tagata Mamona (tagai *Aoaoga a Peresitene o le Ekalesia: Iosefa Samita* (2007), 373).
8. Tagai Eliza R. Snow, in Edward W. Tullidge, *The Women of Mormondom* (1877), 145-46.
9. "Le Lalolagi ia Fiafia," *Viiga*, nu. 113.
10. E faia e faifeautalai le mea ua poloaina ai i latou e le Alii: latou te talai atu, aoao atu, ma papatiso i Lona suafa (tagai Mataio 28:19; Mareko 16:15; Mamona 9:22; Mataupu Faavae ma Feagaiga 68:8; 84:62; 112:28). I Lana Tatalo o le Faatoga, na tautino atu ai e Iesu Lona sootaga i le olioli o Ona soo. Na ia fetalai atu, "Ou te fai atu foi nei mea a o ou i le lalolagi, ina ia maua e i latou *lo'u* olioli ia atoatoa ai i tonotu ia te i latou" (Ioane 17:13; faaopoopo le faamamafa).
11. Tagai Alema 13:22.
12. Filipi 4:7.
13. Mataupu Faavae ma Feagaiga 121:7.
14. Tagai 2 Nifae 2:2.
15. Eperu 12:2.
16. Mataupu Faavae ma Feagaiga 6:36.
17. Eperu 12:2.
18. Tagai Mosaea 3:19 AM. Manatua: o le "tagata natura" e le na o se fili i le Atua; o ia foi o se fili i lana ava ma lana fanau.
19. Tagai Alema 31:38.
20. Eperu 12:2.
21. Tagai Eteru 12:27.
22. Tagai Eperu 12:6.
23. Tagai Mataupu Faavae ma Feagaiga 122:7.
24. Tagai Mataio 19:26; Mareko 10:27.
25. Alema 30:22. Ua tumu le Tusi a Mamona i faataitaiga o alii ma tamaitai o e na tofo i le olioli ma le fiafia *aua sa latou filifili e mulimuli ia Iesu Keriso*. O se isi la filifiliga, e pei o Korioa, e taitai atu ai i le faumatia.
26. *Taufaaleaga*, o lona uiga o se taufaasese, ua faauigaina o se faamatalaga pepelo ma faataumaoi ua fuafuaina e faamanua ai le tulaga o se tasi po o se mea. O le taufaaleaga na tupu i aso o Korioa, ma o loo tupu i le taimi nei. Na saunoa le Perofeta o Iosefa Samita e uiga i le malosi o le Ekalesia e ui lava i le feagai ai ma le taufaaleaga. Na ia fai mai: "Ua faatuina le Tulaga o le Upu Moni; e leai se lima e le paia e mafai ona taofia le galuega mai le alualu i luma; atonu e vevesi mai sauaga, tuuatasia vaega a tagata leaga, faapotopo vaegaua, faatoilalo mai le taufaaleaga, ae o le upu moni a le Atua o le a agai atu i luma ma le malosi, mamalu, ma tutoatasi, seia ulufia konetineta uma, asia nuu uma, uititia ai atunuu uma, ma lagonaina i taliga uma, seia faataunuina uma fuafuaga a le Atua, ma o le a fetalai mai Ieova Silisili ua maea le galuega" (*Aoaoga: Iosefa Samita*, 474).
27. Ua aoao mai le lalolagi o le faatauina o *mea* o le a aumaia le olioli. Ma a le aoga lena mea, faatau nisi mea! Ua aoao mai foi e mafai ona e maua le olioli i le faia sooa o le agasala. Ma a le aoga lena mea, fai atili le agasala! O le folafolaga e faapea o le a e maua le olioli sili i le faia o soo se mea e te manao e fai. E le mo'i!
28. E le mafai i lenei lalolagi po o le lalolagi a sau.
29. O Au Paia Amiontonu "o e na onosaia satauro o le lalolagi . . . o le a fai mo o latou tofi le malo o le Atua, . . . ma o lo latou olioli o le a atoatoa e faavavau" (2 Nifae 9:18).
30. Mo se faataitaiga, tagai 2 Nifae 27:30; Alema 27:16-18.
31. Tagai 1 Nifae 5:40.
32. Tagai Mosaea 4:2-3.
33. Salamo 16:8, 11.
34. Tagai Isaia 35:10; 2 Nifae 8:3.



Saunia e Elder Peter F. Meurs  
O Le Fitugafulu

# E Mafai ona Fesoasoani le Faamanatuga ia i Tatou ia avea ma Tagata Paia

*Mafaufau i ni auala se lima e faatele ai le aafiaga ma le malosi o lo tatou auai e le aunoa i le sauniga paia o le faamanatuga.*

**O** se tasi o o'u muai manatuaga i sauniga faamanatuga na tupu i lo matou aiga i Warrnambool, Ausetalia. E i le va o le 10 ma le 15 tagata na auai i la matou paranesi, ma o lo'u tama, o se tasi o le toatolu na umia le perisitua, na masani lava ona maua le avanoa e faamanuia ai le faamanatuga. Ou te manatuaina ia lagona sa ou maua ao ia faitauina ma le lotomaualalo ma le faaeteete ia upu o tatalo o le faamanatuga. E masani ona tetete lona leo ao ia lagona le Agaga. O nisi taimi e tatau ona ia taofi ina ia pulea ona lagona ao lei faamaeaina le tatalo.

I le avea ma se tamaitiiti lima tau-saga, ou te lei malamalamā i le uiga atoa o upu ma mea na fai; ae na ou iloa o se mea taua sa tupu. Na ou lagona le faatosinaga toafimalie ma le faamautinoa o le Agaga Paia ao mafaufau lo'u tama i le alofa o le Faaola mo i tatou.

Na aoao mai le Faaola: "Ma o lenei mea ia outou faia e le aunoa ia te i latou o e e salamo ma papatiso i lo'u igoa; ma ia outou faia e faamanatu ai

faateleina ai le aafiaga ma le malosi o la tatou auai e le aunoa i le sauniga paia o le faamanatuga, o se sauniga e mafai ona fesoasoani ia i tatou e avea ma tagata paia.

## 1. la Muai Saunia

E mafai ona amata a tatou tapenaga mo le faamanatuga ao lei taitai amataina le sauniga faamanatuga. O le Aso Toonai o se taimi lelei lea e mafaufau ai i lo tatou alaluu i luma faaleagaga ma tapenaga.

O le olaga faaletino o se meaalofa taua i la tatou malaga i le avea ai e pei o lo tatou Tama Faalelagi. E taua tele lo tatou faaaofia ai o luitau ma tofotofoga lea e aumaiia mo i tatou avanoa e suia ai ma tuputupu ae ai. Na aoao mai le Tupu o Peniamina faapea "o le tagata natura o se fili i le Atua, . . . ma o le a faapea lava, e faavavau faavavau lava, vagana ai ua gauai atu o ia i uunaiga a le Agaga Paia, ma tuu ese le tagata natura ma avea ma tagata paia e ala i le togiola a Keriso le Alii" (Mosaea 3:19). O le auai i le sauniga faamanatuga e aumai ai le avanoa e gauai atili atu ai o tatou loto ma agaga i le Atua.

I a tatou sauniuniga, o le a ootia o tatou loto ao tatou faaalia le agaga faafetai mo le Togiola a Keriso, salamo mai a tatou mea sese ma vaivaiga, ma ole atu mo le fesoasoani a le Tama i la tatou faigamalaga faifai





pea ina ia avea atili faapei o Ia. O le a mafai ona tatou tulimatai atu i le avanoa ua saunia e le faamanatuga ina ia manatua Lana taulaga ma faafou a tatou tautinoga i feagaiga uma ua tatou osia.

## 2. Ia Vave Taunu

E mafai ona faaleleia o tatou aafiaga i le faamanatuga pe a tatou taunuao lei taitai amataina le sauniga ma mafaufau loloto ao tataina le musika e muai tataina.

Na aoao mai Peresitene Boyd K. Packer: "O pese i le amataga o sauniga, e taina ma le faaaloalo, o se meaai mo le agaga. Na te valaauina musumusuga."<sup>1</sup> "E le o se taimi lena," na faamalamalama mai ai e Peresitene Russell M. Nelson, "e talatalanoa ai pe fepasai

ai ni feau, ae o se taimi e manatunatu loloto ai ma le agaga tatalo a o sauniuni faaleagaga le au taitai ma le au paia mo le faamanatuga."<sup>2</sup>

## 3. Usu ma Aoao mai Upu o le Viiga o le Faamanatuga

O le viiga faamanatuga o se vaega taua tele o lo tatou aafiaga i le faamanatuga. E faagaeetia e musika o tatou manatu ma lagona. E i ai i viiga faamanatuga se faatosinaga sili pe a tatou taulai atu i upu ma le aoaoga faavae mamana o loo aoao mai ai. E tele mea tatou te aoao mai i upu e pei o le "Manua, ma faalavaau mo i matou,"<sup>3</sup> "Ia tatou manatua ma mautinoa o loo mama o tatou loto ma lima,"<sup>4</sup> ma "Faamasino tonu ma alofa ua tasi i Le paia!"<sup>5</sup>

A tatou lagiina se viiga e saunia ai e aai ma feinu i faatusa, e mafai ona avea upu ma se vaega o tautinoga o a tatou feagaiga. Mafaufau, mo se faataitaiga: "Matou te alolofa ia te oe, le Alii e; ua tumu o matou loto. O le a matou savailia ou ala filifilia."<sup>6</sup>

## 4. Auai Faaleagaga i Tatalo o le Faamanatuga (Tagai Moronae 4-5)

Nai lo le faalogologo ma le faaeteete i upu masani o tatalo o le faamanatuga, e mafai ona tatou aoao ma lagona atili ao tatou auai atu faaleagaga i le mafaufau i tautinoga ma faamanuiaga fesootai o loo aofia i nei tatalo paia.

E faamanuiaina ma faapaiaina le areto ma le vai i o tatou agaga. Latou te faamanatu maia ia i tatou le taulaga a

le Faaola ma e mafai ona Ia fesoasoani mai e avea i tatou ma tagata paia.

E faamatala mai e tatalo lo tatou aai i le areto ia manatua ai le tino o le Alo, lea na Ia tuuina mai o se taulaga ia agavaa ai tagata uma mo le toetutu, ma e tatou te feinu i le vai ia manatua ai le toto o le Alo, lea na Ia faamaligiina saoloto mai ina ia togiola ai i tatou i tuutuuga o le salamo.

O tatalo e faailoa mai ai ia feagai-ga ma se fuaitau “latou te loto ina ia” (Moronae 4:3). O lenei fuaitau e tele naua se faamoemoega mo i tatou. O tatou loto ia auauna atu ma auai? O tatou loto ia suia? O tatou loto e faailoa atu o tatou vaivaiga? O tatou loto ia aapa atu ma faamanuia i isi? O tatou loto e faalagolago atu i le Faaola?

Ao tuuina mai folafolaga ma ao tatou aai ma feinu, ua tatou faamautinoa atu i o tatou loto ua tatou loto e:

- Ave i o tatou luga le suafa o Iesu Keriso.
- Taumafai e tausi Ana poloaiga uma.
- Manatua pea o Ia.

E faaiuina le tatalo i se valaaulia musuia ma se folafolaga: “Ina ia latou maua pea lona Agaga e faatasi ma i latou” (Moronae 4:3).

Na tusia e Paulo, “A o le fua o le Agaga o le alofa, o le olioli, o le filemu, o le onosai, o le mataalofa, o le agalelei, o le faamaoni, o le agamalu, ma le le gaoia” (Kalamatia 5:22–23). Ua avanoa mo i tatou faamanuia ma meaalofa matagofie pe a tatou tausia a tatou feagaiga.

### 5. Mafafau ma Manatua o la ao Tufaina mai ia Faatusa o le Faamanatuga

E mafai ona avea taimi faaaloalo ao tufaina mai e le au perisitua le faamanatuga o se mea paia ia i tatou.

Ao tufaina le areto, e mafai ona tatou mafafau i le faatinoga tupito o le alofa mo i tatou, na ave ai e le Faaola “i ona luga le otii, ina ia mafai ona ia tatalaina fusi o le otii ia ua noatia ai ona tagata” (Alema 7:12).

E mafai ona tatou manatua le faamanuia faamamaluina o le Toetu lea “o le a oo mai i tagata uma, . . . o e

pologa ma e saoloto, o tane ma fafine, o e e amioleaga ma e e amiontonu; ma e oo lava i se lauulu e tasi o o latou ulu o le a le toesea; ae o le a toefuataiina mea taitasi i lona tulaga atoatoa” (Alema 11:44).

Ao tufaina le vai, e mafai ona tatou manatuaia le aioi atu o le Faaola:

“Faauta, o A’u, o le Atua, na mafatia i nei mea mo tagata uma, ina ia latou le mafatia pe afai latou te salamo; . . .

“O le mafatia lea na oo ai ia te a’u lava, o le Atua lava lea, o le ua silisili i tagata uma, le gatete ona o le tiga, ma tafe ifo ai i pu afu uma, ma mafatia ai i le tino atoia ma le agaga—ma manao ia ia Ou le inuina le ipu oona, ma ma’e’e’e” (MF&F 19:16, 18).

Tatou te manatua na Ia ave “i ona luga [o tatou] vaivaiga, ina ia mafai ona faatumuina ona loto i le alofa mutimutivale, e tusa ai ma la le tino, ina ia mafai ona ia silafia e tusa ai ma la le tino, le ala e fesoasoani ai i ona tagata, e tusa ma o [tatou] vaivaiga” (Alema 7:12).

A tatou mafafau i a tatou aafiaiga i le faamanatuga, atonu tatou te fesiliglia i tatou lava:



- O le a se mea ou te faia i lenei vaiaso e saunia lelei ai mo le faamanatuga?
- Mata e mafai ona ou saofaga atili atu i le migao ma le faaaliga lea e o faatasi ma le amataga o le sauniga faamanatuga?
- O le a le aoaoga faavae lea na aoaoina i le viiga faamanatuga?
- O le a se mea na ou faalogo i ai ma lagona ao ou faalogo atu i tatalo o le faamanatuga?
- O le a se mea na ou mafafau i ai ao tufaina le faamanatuga?

Na aoao mai Elder David A. Bednar: “O le sauniga o le faamanatuga o se valaaulia paia ma fai soo ia salamo faamaoni ma ia faafouina faaleagaga. O le faatinoga o le taumamafa i le faamanatuga, na o le faamanatuga lava, e le faamagaloina ai ni agasala. Ae a o tatou saunia ma le mafafau loloto i ai ma auai i lenei sauniga paia faatasi ma se loto momomo ma le agaga salamo, ona maua lea o le folafolaga o le a mafai ona tatou maua *pea* le Agaga o le Alii e faatasi ma i tatou. Ma e ala i le mana faapaiaina o le Agaga Paia e fai ma a tatou soa tumau, e mafai ai ona tatou faatumauina *pea* se faamagaloga o a tatou agasala.”<sup>7</sup>

Ou te molimau atu i le tele naua o faamanuiaga o avanoa mo i tatou pe a faateleina a tatou sauniuniga mo ma auai faaleagaga i le sauniga o le faamanatuga. Ou te molimau atili atu ai i nei faamanuiaga ua avanoa mo i tatou ona o le alofa o lo tatou Tama oi le Lagi ma le taulaga togiola le iu a Lona Alo Pele, o Iesu Keriso. I Lona suafa paia, o Iesu Keriso, amene. ■

### FAAMATALAGA

1. Boyd K. Packer, “O Faaaliga mo le Tagata Lava Ia: O Le Meaalofa, o le Tofotofoga, ma le Folafolaga,” *Liahona*, Ian. 1995, 73.
2. Russell M. Nelson, “Tapuaiga i le Sauniga Faamanatuga,” *Liahona*, Aok. 2004, 13.
3. “Iesu o Nasareta, le Tupu, Faaola,” *Viiga*, nu. 101.
4. “While of These Emblems We Partake,” *Hymns*, no. 173.
5. “Maeu le Poto ma le Alofa,” *Viiga*, nu. 109.
6. “As Now We Take the Sacrament,” *Hymns*, no. 169.
7. David A. Bednar, “[Faatumauina] Pea le Faamagaloina o a Outou Agasala” *Liahona*, Me 2016, 61–62.



Saunia e Linda S. Reeves

Fesoasoani Lua i le Au Peresitene Aoao o le Aualofa

# O Le Fuafuaga Tele o le Togiolaina

*Ou te iloa, a tatou salamo faamaoni i a tatou agasala,  
e aveesea moni lava i latou—e aunoa ma se faailoga!*

nai masina ao le'i maliu Peresitene Boyd K. Packer, sa maua e taitai aoao o le perisitua ma ausilali le avanoa taua e na te saunoa mai ai ia i matou. E le mafai ona tu'u le mafaufau e uiga i mea na ia saunoa mai ai. Sa ia ta'u mai sa ia mafaufau i tua i lona olaga, ma vaai mo le faamaoniga o agasala sa ia faia ma salamoina ma le faamaoni, ma sa *leai se faailoga* na mafai ona ia mauaina. Ona o le taulaga togiola a lo tatou Faaola pele, o Iesu Keriso, ma e ala i le salamo faamaoni, sa aveesea atoatoa ana agasala, e pei e le'i tutupu lava. Ona faamanatu mai lea e Peresitene Packer ia i matou o taitai i lena aso e moni lenei mea mo i tatou taitoatasi o e salamo faamaoni.

Ou te iloa se alii sa aafia i ni solitulafono o le ola mama i nai tausaga ua mavae. Mo sina taimi, sa lagona e lenei alii le maasiasi tele ma popole tele e alu atu i lona toalua ma ona taitai perisitua. Sa ia manao e salamo atoatoa ae sa faaalia moni sa ia nau nau e lafoai lona lava faaolataga e faavavau i lo le tuu o lona toalua ma le fanau ia faanoanoa, maasiasi, po o isi taunuuga e ono oo mai i lona ta'uta'u atu.

A tatou agasala, e masani ona tau-mafai Satani e tauanau i tatou o le mea e le manatu faapito e fai, o le puipui o isi mai le le fiafia i le iloaina o a tatou agasala, e aofia ai le 'aloese mai le ta'uta'u atu i lo tatou epikopo, o le e mafai ona faamanuiaina o tatou olaga e ala i ki o le perisitua o se faamsino lautele i Israelu. Peitai, o le mea moni, o le mea e le manatu faapito ma faakeriso e fai, o le ta'uta'u atu ma salamo. O le fuafuaga tele lenei o le togiolaina a le Tama Faalelagi.

Mulimuli ane, na ta'uta'u atu e lenei alii pele [ana agasala] i lona toalua faamaoni ma ona taitai o le Ekalesia, ma faailoa atu le salamo maoae. E ui o se mea sa sili ona faigata na ia faia, o lagona o le to'omaga, filemu, faafetai, alofa mo lo tatou Faaola, ma se malamalama sa siitia e le Alii lana avega mamafa ma sapasapai o ia sa ia maua ai le olioli lemafa'amatalaina, e ui i taunuuga ma lona lumanai.

Sa ia mautinoa o le a le fiafia lona toalua ma le fanau—ma sa le fiafia i latou; ma o le a ai se fono aoai ma se faamalologa mai lona valaauga—ma sa faia lava. Sa ia mautinoa o le a nutimomoia le loto a lona toalua, tiga, ma ita—ma sa faapena lava. Ma sa talitonu o ia o le a ia alu ese, ma ave tamaiti—ae sa le'i faia e ia.

O solitulafono matuia i nisi taimi, e taitai atu i le tete'a, ma e faalagolago i tulaga, atonu e tatau ai. Sa ofo lenei tama, sa taliaina o ia e lona toalua ma tuuto atu o ia lava e fesoasoani ia te ia i soo se auala e na te mafaia. Mulimuli ane, sa mafai ona ia faamagaloina atoatoa o ia. Sa ia lagona le mana faamalolo o le Togiola a le Faaola mo ia. I le tele o tausaga mulimuli ane, o lenei ulugalii ma le la fanau e toatolu o loo malolosi ma faamaoni. E auauna atu le tane ma le ava i le malumalu ma maua se faaipoipoga matagofie, ma agaalofa. Ua matua manino lava le loloto o le molimau a lenei alii ma lona alofa ma le faafetai mo le Faaola i lona olaga.



Sa molimau mai Amuleka, "Ou te manao ia outou o mai ma aua le toe faamaaaina o outou loto; . . . afai tou te salamo . . . , o le taimi nei lava o le a faataunu ai le fuafuaga tele o le togolaina ia te outou."<sup>1</sup>

Ina ua ou auauna atu faatasi ma lou toalua a o ia pulefaamalumalu i se misiona, sa ma o ai i se tasi o taeao i le malae vaalele e piki mai se vaega toatele o faifeautalai. Sa ma gauai atu i se alii talavou patino. Sa foliga faanoanoa, mamafatu, toetoe a le fiafia. Sa ma vaai ma le faaeteete ia te ia i lena aoauli. I le afiafi, sa faia ai e lenei alii talavou se ta'uta'u atu na tolopoina, ma sa mafau-fau ona taitai e tatau ona ia toe foi i le fale. E ui sa ma faanoanoa tele sa ia le faamaoni ma sa le'i salamo ao le'i sau i lana misiona, i le agai atu i le malae vaalele, sa ma viia o ia ma le faamaoni ma le agaalofa mo le mauaina o le lototoa e ta'u mai lana mea sese, ma sa ma folafola atu e tumau lo ma fesootai atu ia te ia.

Sa faamanuiaina lenei alii talavou i ni matua lelei, taitai perisitua maoae, ma se uarota e lagolago ma agaalofa. I le mavae ai o se tausaga o le galue malosi ina ia salamo atoatoa ma tau-mafa i le Togiola a le Faaola, sa mafai ona ia toe foi mai i la matou misiona. E faigata mo a'u le faamatalaina o lagona o le olioli sa ma lagonaina a o ma pikina lenei alii talavou mai le malae vaalele. Sa tumu o ia i le Agaga, fiafia, lototele i luma o le Atua, ma nau-nau e faataunu se misiona faamaoni. Sa avea o ia ma se faifeautalai maoae, ma mulimuli ane sa ma maua ma lou toalua le avanoa e auai atu ai i lana faamauga o le malumalu.

I se faatusatusaga, ou te iloa se isi faifeautalai o le, sa iloa lana agasala e lei ta'uta'uina atu a o le'i faia lana misiona o le a mautinoa lava le vave ona auina atu ai o ia i le fale, sa faia lana lava fuafuaga e galue malosi atili i le taimi o lana misiona ma ta'uta'u atu i le peresitene o le misiona i ni nai aso a o lei maea lana misiona. Sa leai sona tiga faaleAtua ma sa taumafai e 'aloese mai le fuafuaga ua ofo mai e lo tatou Faaola alofa ia i tatou taitoatasai.



I le taimi o le ma misiona, sa ou faatasi atu i se taimi ma lou toalua ina ua alu atu o ia e faatalanoa se tamaloa mo le papatisoga. Ao faatautaia e lou toalua le faatalanoaga, sa ou faatali i fafo ma faifeautalai tamaitai o e na aoaoina lenei tamaloa. Ina ua maea le faatalanoaga, sa logo e lou toalua ia faifeautalai o le a papatisoina le tamaloa. Sa tutulu ma tutulu lenei tamaloa pele ao ia faamatala mai sa ia mautinoa o agasala matuina ia solia i lona olaga o le a taofia ai o ia mai le mafai ona papatisoina. E seasea ona ou molimauina le olioli ma le fiafia o se tasi e tuua le olaga faale-lolagi ma ulu atu i se olaga mama i mea na ou molimauina i lena aso.

Na molimau mai Elder D. Todd Christofferson:

"Faatasi ai ma le faatuatua i le Togiola alofa mutimutivale, ma Lona mana, o le faanoanoa e liua i le faamoemoe. E sua lava le loto ma manaoga o se tagata, ma oo ai ina faateleina le inosia o le agasala sa avea ma faatosinaga muamua. . . .

" . . . Pe o le a lava le tiga o le salamo, e le sili atu nai lo le olioli o le faamagaloga."<sup>2</sup>

E faamanatu mai e nei aafiaga ia te au ia Enosa i le Tusi a Mamona, o le "[sa] tagi atu i [le Alii] i le tatalo malosi," ona faalogo lea i le siufogaga o fetalai mai, "Enosa e, ua faamagaloina au agasala. . . .

"Ma o au, o Enosa, sa ou iloa e le mafai ona pepelo le Atua; o le mea lea,

sa tafifese ai lo'u lagona o a'u sese.

"Ma sa ou fai atu: Le Alii e, ua faapea ea ona faia lenei mea?"

"Ma sa fetalai mai o ia ia te a'u: Ona o lou faatuatua ia Keriso. . . . Ina alu ia, ua faamamaina oe i lou faatuatua."<sup>3</sup>

I le sauniaina o lenei lauga, sa ou manao e malamalama pe faapefea ona malamalama fanau a le ma fanau i le salamo ma pe faapefea o latou lagona e uiga i le Faaola, lea sa ou fai atu ai i le ma fanau e fai atu ia i latou ia fesilenei. Sa ootia a'u i tali a fanau a le ma fanau.

O le a le salamo? "Pe a e tu'iina se tagata, e mafai ona e fai atu 'faamalie atu' ma fesoasoani ia tu o ia i lugia."

O a ni ou lagona pe a e salamo? "E mafai ona e lagonaina o Ia; e mafai ona e lagonaina Lona mafanafana, ma e mou ese atu lagona le lelei."

O a ni ou lagona e uiga ia Iesu ma le Tama Faalelagi pe a e salamo? "Ou te lagona e lagona e Iesu sa aoga le faia o le Togiola, ma ua Ia fiafia ua mafai ona tatou toe mafuta ma Ia."

Aisea e finagalo ai Iesu ma le Tama Faalelagi ia ou salamo? I upu a le afafine talavou a lou atalii: "Aua La te alolofa ia te au! Ina ia alualu i luma ma avea e pei o i Laua, e tatau ona ou salamo. Ou te manao foi ia faatasi le Agaga ma a'u, o lea e manaomia ona ou salamo i aso uma ina ia maua Lona mafutaga mata-gofie. E le mafai lava ona lava lou faafetai atu ia i Laua."

Ina ua faalogo Brynlee e fa tausaga i nei fesili, sa ia fai mai, "Ou te leiloa, Tama. Tago oe e aoao mai ia te au."

I se konafesi aoao ua tuanai, sa folafola mai Elder Jeffrey R. Holland: "Pe o le a lava le tuai ua e mafaufau i ai, pe o le a foi le tele o avanoa e te manatu ua e misia, pe o le a foi le tele o mea sese e te lagona sa e faia. . . , po o le a foi le mamao ese mai le aiga ma le Atua e te lagona ua oo i ai lau malaga, ou te molimau atu e te *le'i* malaga lava i se mamao e le mafai ona aapa atu i ai le alofa faalelagi. E le mafai ona e magoto ia maualalo ifo nai lo le malamalama le gata o le Togiola a Keriso e aapa atu ai ia te oe."<sup>4</sup>

Oka, sou manao i lau fanau taitoatasi, fanau a fanau, ma outou taitoatasi, o ou uso ma tuagane, ia lagona le olioli ma le vavalalata i le Tama Faalelagi ma i lo tatou Faaola ao tatou salamo ai i aso uma i a tatou agasala ma vaivaiga. E manaomia e fanau taitoatasi e tali atu a le Tama Faalelagi, le salamo. Mafaufau po o a agasala e tatau ona tatou salamo ai. O le a le mea o loo taofia ai i tatou? O a ni auala tatou te manaomia ai le faaleleia?

Ou te iloa, e pei ona aafia ma molimau ai Peresitene Packer, pe a tatou salamo faamaoni i a tatou agasala, e aveesea moni lava i latou—e aunoa ma se faailoga! Sa ou lagona e a'u lava le alofa, olioli, le toomaga, ma le lototeli i luma o le Alii ina ua ou salamo faamaoni.

Ia te a'u, o vavega silisili i le olaga e le o le vaeluaina o le Sami Ulaula, le aveesea o mauga, e oo lava i le faamaloloina o le tino. E tupu le vavega silisili pe a tatou o atu ma le faamaulalo i lo tatou Tama oi le Lagi i le tatalo, ma augani atu ma le faamaoni ina ia faamagaloina, ona faamamaina ai lea o na agasala e ala i le taulaga togiola a lo tatou Faaola. I le suafa o Iesu Keriso, amene. ■

#### FAAMATALAGA

1. Alema 34:31.
2. D. Todd Christofferson, "O Le Meaalofa Paia o le Salamo," *Liahona*, Nov. 2011, 40.
3. Enosa 1:4–8.
4. Jeffrey R. Holland, "O Le Au Faigaluega i le Tovine," *Liahona*, Me 2012.



Sauniga e Elder M. Russell Ballard

O Le Korama a Aposetolo e Toasefululua

## A Matou Ō Ea la Te Ai?

*I le faaiuga, e tatau ia i tatou taitoatasi ona tali atu i le fesili a le Faaola: "Pe tou te fia o ese foi?"*

nai tausaga talu ai, sa matou asiiasi atu ai ma lo'u aiga i le Nuu Paia. O se tasi o mea matagofie ou te manatuaina mea mai la matou malaga o se asiasiga i le afeafe pito aluga i Ierusalem, le nofoaga anamua o le Tausamaaga Mulimuli.

A o matou tutu ai i lena nofoaga, sa ou faitau atu ia i latou mai le Ioane 17, lea sa aioi atu ai Iesu i Lona Tama mo Ona sooo:

"Ou te tatalo mo i latou . . . ina ia tasi o i latou, faapei o i taua. . . .

"E le faapito la'u tatalo mo i latou nei, a o i latou foi e faatuatua ia te au ona o la latou upu;

"Ina ia tasi i latou uma, faapei o oe le Tama o i totonu ia te au, o au foi o i totonu ia te oe, ina ia tasi i latou i totonu ia te i taua"<sup>1</sup>

Sa matua ootia au a o faitauina nei upu ma iloa ane ai o loo ou tatalo foi au ia i lena nofoaga paia ina ia mafai ona tasi au ma lo'u aiga faatasi ma lo'u Tama Faalelagi ma Lona Alo.

O a tatou mafutaga faapelepele ma aiga, uo, le Alii, ma Lana Ekalesia toe-fuataina o nisi ia o mea e sili ona taua i le olaga. Ona o nei mafutaga e matua taua lava, e tatau ona faamemelo i ai, puipuia, ma faafaileleina.

O se tasi o tala faamomoiloto i tusitusiga paia na tupu i le taimi na iloa ai e "isi . . . soo e toatele [o le Alii]" ua

faigata ona taliaina Ana aoaoga ma le aoaoga faavae, ma sa latou "o ese . . . i tua, a e *lei toe feoai i latou ma ia*."<sup>2</sup>

Ona faliu atu lea o Iesu i le Toasefululua ma fesili, "Pe tou te fia o ese foi?"<sup>3</sup>

Sa tali sa'o atu Peteru:

"Le Alii e, *a matou o ea ia te ai?* O ia te oe upu o le ola e faavavau.

"Ua matou talitonu, ma ua matou iloa o oe o le Keriso, o le Alo o le Atua soifua."<sup>4</sup>

I lena taimi, a o taulai atu isi tagata i mea sa le mafai ona latou taliaina, sa filifili Aposetolo e taulai atu i mea na latou *matua* talitonu ma iloa, ma i se taunuuga, sa latou mau faatasi pea ma Keriso.

Mulimuli ane, i le aso o le Penete-koso, sa maua ai e le Toasefululua le meaalofa o le Agaga Paia. Sa oo ina latou totoa i a latou molimau ia Keriso ma amata ai ona malamalama atoatoa atili i aoaoga a Iesu.

E leai foi ma se eseesega i nei aso. Mo nisi, o le valaaulia a Keriso ia talitonu ma tumau pea o loo faaaauau pea ona faigata—pe talia gatā. O nisi soo e faigata ona malamalama i se aiaiga faavae patino po o se aoaoga a le Ekalesia. O isi e atugalu lava i lo tatou talafaasolopito po o ni le atoatoa o nisi o tagata ma taitai o le ekalesia, i le tuanai ma le taimi nei. O loo i ai pea isi e faigata ona ola i se tapuaiga o loo

manaomia ai le tele o mea. Ma le mea mulimuli, o nisi ua "faavaivai i le faia o mea lelei."<sup>5</sup> Mo nei mafuaaga ma isi mafuaaga, ua lemautonu ai isi tagata o le Ekalesia i lo latou faatuatua, ma tuufesili ai pe faamata e tatau ona latou mulimuli ia i latou o e "ua o ese i tua, ma le toe feoai" ma Iesu.

A i ai se tasi o outou ua fememea'i i lou faatuatua, ou te fesili atu ia te outou i le fesili lava e tasi na fesili ai Peteru: "A [outou] o ea ia te ai?" Afai e te filifili ia le toe toaga mai pe tuua foi le Ekalesia toefuataiina a Iesu Keriso o le Au Paia o Aso e Gata Ai, o fea o le a e alu i ai? O le a se mea o le a e faia? O le faafiga o le "le toe feoai" ma tagata o le Ekalesia ma taitai filifilia a le Alii o le a i ai sona aafiafiga mo se taimi umi lea e le mafai ona vaaia pea i le taimi nei. Atonu o loo i ai ni aaooga faavae, ni aiaiga faavae, sina vaega o le talafaasolopito e feteenai ma lou faatuatua, ma atonu e te lagona ai e na o le pau le auala e foia ai lena fenumiaiga i le loto i le taimi nei o le "le toe feoai" ma le Au Paia. Afai e te soifua i le umi ua ou ola ai, o le a e iloinaina e i ai lava i faafitauli se auala e foia ai e i latou lava. Atonu o se malamalamaaga musuia po o se faaaliga e ono faamalamalamaaina ai se faafitauli. Manatua, o le Toefuataiga e le o se mea se tasi na tupu, ae o loo faaauau pea ona faaali mai.

Aua lava ne'i lafoaia upumoni sili na faaali mai e ala mai i le Perofeta o Iosefa Samita. Aua lava ne'i tuu le fai-tauina, mafaufau loloto, ma le faaaogaina o le mataupu faavae a Keriso o loo i totonu o le Tusi a Mamona.

Aua nei musu e tuu atu se taimi tutusa i le Alii e ala i taumafaiga faamaoni e malamalama i mea ua faaali mai e le Alii. E pei ona fai mai la'u uo pele ma paaga muamua o Elder Neal A. Maxwell i se tasi taimi, "E le tatau ona tatou manatu . . . faapea ona ua le mafai ona tatou faamalamalamaaina se mea, o le a le mafai lava la ona faamalamalamaaina."<sup>6</sup>

O lea la a o lei e faia lena filifiliga lamatia faaleagaga e alu ese, ou te uunaia oe ia toe taofi ma mafaufau ma le toto'a a o lei e lafoaia soo se mea na aumaia oe i lau molimau o le Ekalesia toefuataiina a Iesu Keriso i le taimi



muamua lava. Taofi ma mafaufau i mea sa e lagonaina iinei ma le mafuaaga na e lagonaina ai. Mafaufau i taimi na molimau atu ai le Agaga Paia ia te oe e uiga i upumoni e faavavau.

O fea o le a e alu i ai e te maua ai isi e tutusa tou talitonuga i Matua Faalelagi patino ma agaalofa, o e ua aaoaina i tatou i le auala e toe foi atu ai i lo La afioaga e faavavau?

O fea o le a e alu i ai ina ia aoaoina e uiga i se Faaola o lau uo mamae, o le na mafatia e le gata mo au agasala ae o le na mafatia foi i "tiga ma puapuaga ma faaososoga o ituaiga eseeese uma" ina ia "mafai ona faatumuina ona loto i le alofa mutimutivale, e tusa ai ma le tino, ina ia mafai ona ia silafia e tusa ai ma la le tino, le ala e fesoasoani ai i ona tagata, e tusa ma o latou vaivaiga,"<sup>7</sup> ou te talitonu, e aofia ai ma le vaivaiga o le leai o se faatuatua?

O fea o le a e alu i ai e aoao atili ai e uiga i le fuafuaga a le Tama Faalelagi mo lo tatou fiafia ma le filemu e faavavau, ma le taitaiga mo o tatou olaga faaletino ma faavavau? Manatua, o le ata o le faaolataga ua ia avatua i le olaga faaletino le uiga, faamoemoega, ma le taitaiga.

O fea o le a e alu i ai e maua ai se faatulagaga auiliili ma musuia o

faalapotopotoga faaleEkalesia lea e aoao ai oe ma lagolagoina e alii ma tamaitai o e e matua tuuto atu lava i le tautuina o le Alii e ala i le auauna atu ia te oe ma lou aiga?

O fea o le a e alu i ai e maua ai ni perofeta ma aposetolo soifua, o e ua valaauna e le Atua e tuu atu ia te oe se isi punaoa o fautuaga, malamalamaaga, faamafanafanaga, ma musumusuga mo luitau o o tatou aso?

O fea o le a e alu i ai e maua ai tagata o e ola i se seti fautuaina o tulaga faatauaina ma tulaga faatonuina o loo e faasoaina ma manao e tuufasolo atu i lau fanau ma fanau a fanau?

Ma o fea o le a e alu i ai e lagona ai le olioli lea e sau mai sauniga faaola ma feagaiga o le malumalu?

Usa e ma tuafafine, o le taliaina ma le ola ai i le talalelei a Keriso e mafai ona luitauina. Sa luitauina i taimi uma, ma o le a faapena lava. O le olaga e tai pei o tagata sopo mauga e fe'a ei i se auala tu ma faigata. O le mea masani lava le taofi i lea taimi ma lea taimi i luga o le ala ae to le manava, toe iloilo le ala, ma toe fetuunai le saoasaoa o le alu. E le o tagata uma e manaomia ona taofi i luga o le ala, ae e leai se mea e leaga ai lou faia o lena mea pe a manaomia e ou tulaga. O le mea moni, e mafai ona avea



ma se mea lelei mo i latou e faaaogaina atoa le avanoa e toe faafou ai i latou lava i vai ola o le talalelei a Keriso.

E oo mai le lamatiaga pe a filifili se tasi e alu ese mai le ala lea e tau atu i le laau o le ola.<sup>8</sup> O nisi taimi e mafai ona tatou aoao, suesue, ma iloa, ma o nisi taimi e ao ona tatou talitonu, faalagolago, ma faamoemoe.

I le faaiuga, e tatau ia i tatou taitoasati ona tali atu i le fesili a le Faaola: "Pe tou te fia o ese foi?"<sup>9</sup> E ao ia i tatou uma ona saili mo a tatou lava tali i lena fesili. Mo nisi, o le tali e faigofie lava; mo isi, e faigata. Ou te le faafoliga e iloa le mafuaaga e faigofie atu le faatuatua e talitonu ai mo nisi nai lo isi. Ae ou te matua faafetai lava i le iloa ai o loo i ai lava iina ia tali, ma afai tatou te saili i ai—saili moni ma le manatu moni i ai ma le faamoemoe atoa o se loto agaga tatalo—o le a iu lava ina tatou maua ia tali i a tatou fesili a o tatou faaaauai ai i luga o le ala o le talalelei. I la'u auauanaga, ua ou iloa i latou o ē na õ ese ma toe foi mai ina ua mavae le tofotofoga o le faatuatua.

Ou te faamoemoe ma le faamaoni o le a tatou valaauliaina se aofaiga faateleina o fanau a le Atua ia maua ma tumau i luga o le ala o le talalelei ina ia mafai

foi e i latou ona "aai i le fua ua sili ona manaomia nai lo isi fua uma lava."<sup>10</sup>

Ou te aioi atu ma le faamaoni ia tatou faamalosiau atu, taliaina, malamalamama alolofa ia i latou o loo tauivi ma lo latou faatuatua. E le tatau lava ona tatou tuulafoaiina soo se tasi o o tatou uso ma tuafafine. O loo tatou i ai uma i nofoaga eseese i luga o le ala, ma e manaomia ona tatou auauna atu i le tasi ma le isi e pei ona tatau ai.

E pei foi lava ona tatau ai ona faaloaloa atu o tatou lima i se agaga o le talileleia o tagata fou liliu mai, e faapena foi ona tatau ia i tatou ona talia ma lagolago i latou o loo i ai ni fesili ma ua fenumiai i lo latou faatuatua.

I le faaaogaina ai o se isi talafaatusa ua masani ai, ou te tatalo afai o i ai soo se tasi o mafaufau e tuua le "Vaa Tuai o Siona," lea o loo i ai le Atua ma Keriso i le foeuli, o le a taofi ma toe mafaufau toto'a ae e te lei faia lena mea.

Faamolemole ia iloa e ui lava ina taia e matagi malolosi ma galu le vaa tuai, ae ia manatua pea o loo i ai le Faaola i luga o le vaa ma e mafai ona vavao i le matagi i Lana poloaiga, "Filemu, ina malū ia." Ae, e le tatau ona tatou fefefe, ma e tatau ona tatou maua se faatuatua le femoumouai ma

iloa "[e oo lava] i le matagi ma le vai [e usiusitai] ia te ia."<sup>11</sup>

Uso e ma tuafafine, ou te folafola atu ia te outou i le suafa o le Alii o le a Ia le tuulafoai lava i Lana Ekalesia ma o le a Ia le tuulafoai lava i soo se tasi o i tatou. Manatua le tali a Peteru i le fesili ma le fetaiga a le Faaola?

"Le Alii e, a matou o ea ia te ai? O ia te oe upu o le ola e faavavau.

"Ua matou talitonu, ma ua matou iloa o oe o le Keriso, o le Alo o le Atua soifua."<sup>12</sup>

Ou te molimau atu e "leai se isi igoa e tuuina mai po o se isi lava ala po o ni auala e mafai ona oo mai ai le olataga i le fanauga a tagata, ua nao i le suafa lava ma ala i le suafa lava o Keriso"<sup>13</sup>

Ou te molimau atu foi ua valaaufina e Iesu Keriso apersetolo ma perofeta i o tatou aso ma toefuatai mai Lana Ekalesia ma aoaoga ma poloaiga "e fai ma sulufaiga mai afa, ma mai le toasa" ia o le a mautinoa lava e oo mai vagana ai ua salamo tagata o le lalolagi ma toefoi mai ia te Ia.<sup>14</sup>

Ou te molimau atu foi o le Alii ua "valaaufina i latou uma ia o mai ia te ia ma taumamafa i lona agalelei; ma e le teena e ia se tasi e sau ia te ia, e uliuli pe pa'epa'e, e pologa pe saoloto, o tane ma fafine; . . . ma ua tutusa tagata uma i le Atua."<sup>15</sup>

O Iesu o lo tatou Faaola ma le Togiola, ma o Lana talalelei toefuatiaina o le a taitai atu ai i tatou ma le saogalemu i le afioaga o o tatou Matua Faalelagi pe afai tatou te tumau i luga o le ala o le talalelei ma mulimuli i Ona tulagao. Ou te molimau atu ai i nei mea i le suafa o Iesu Keriso, amene." ■

#### FAAMATALAGA

1. Ioane 17:9, 11, 20–21.
2. Ioane 6:66; faaopoopo le faamamafa.
3. Ioane 6:67.
4. Ioane 6:68–69; faaopoopo le faamamafa.
5. Mataupu Faavae ma Feagaiga 64:33.
6. Neal A. Maxwell, *Not My Will, But Thine* (1988), 124.
7. Alema 7:11–12.
8. Tagai 1 Nifae 8:20–30.
9. Ioane 6:67.
10. 1 Nifae 8:15.
11. Tagai Mareko 4:35–41.
12. Ioane 6:68–69.
13. Mosaea 3:17.
14. Mataupu Faavae ma Feagaiga 115:6.
15. 2 Nifae 26:33.



Saunia e Bishop Dean M. Davies

Fesoasoani Muamua i le Au Epikopo Pulefaamalumalu

# O Faamanuiaga o le Tapuai

*E taua le tapuai ma e totonugalemu i o tatou olaga faaleagaga. O se mea e tatau ona tatou faananau atu i ai, sailia, ma taumafai ia oo i ai.*

## O Lana Asiasiga

O se tasi o aafiaga aupito sili ona ofoofogia ma pele ua faamaumauina i tusitusiga paia o le tala lea i le asiasiaga a le Faaola i tagata i Amerika ina ua mavae Lona maliu ma le Toetu. Sa mafatia tagata i se faafanoga sili ona maoae na mafua ai “ona suia o foliga o le eleele atoa.”<sup>1</sup> O faamaumauga o na mea na tutupu na faamatala ai faapea ina ua mavae le mala matautia na fetagisi tagata uma e le aunoa,<sup>2</sup> ma i le lotolotoi o lo latou faanoanoa tele, sa latou galala mo se faamalogea, filemu, ma le laveaiga.

Ina ua afio ifo le Faaola mai le lagi, sa faapauu faalua tagata i lalo o Ona vae. O le taimi muamua na tupu ai ina ua Ia folafola mai, ma le pule paia:

“Faauta, o Au o Iesu Keriso, o le na molimau i ai perofeta o le a sau i le lalolagi.

“Ma faauta, o Au o le malamalamama ma le ola o le lalolagi.”<sup>3</sup>

Ona ia valaaulaina lea o i latou sa i ai ia “tutulai ma o mai ia te au, ina ia outou tuu mai o outou lima i lou itu, ma ina ia outou tagotago foi i tulaga o fao i ou lima ma ou vae, ina ia outou



iloa ai o Au o le Atua o Isaraelu, ma le Atua o le lalolagi uma, ma sa fasiotia mo agasala a le lalolagi. . . .

“Ma ina ua uma ona latou o atu uma ma molimau o i latou lava, sa latou alalaga faatasi, ua fai mai:

“Osana! Ia faamanuiaina lava le suafa o le Atua Silisili Ese!”<sup>4</sup>

Ma le taimi lona lua, “sa latou faapauu i lalo i vae o Iesu.” Ae o le taimi lea ma se faamoemoega, aua ua tatou aoao na latou “tapuai atu ia te ia.”<sup>5</sup>

## Aso Nei

I le amataga o lenei tausaga sa ou i ai i se valaauga e asiasi atu i se siteki i le Iunaite Setete i sisifo. O se Aso Sa masani, sauniga masani, ma tagata masani o le Ekalesia. Sa ou vaavaai atu ao ulufale tagata i le falelotu ma agai atu ma le migao i nofoa o avanoa. O talanoaga musumusu mulimuli na lagonaina ni siuleo i le potu taalaelae atoa. Na taumafai tina ma tama—i nisi taimi sa le manuia—e faafilemu tamaiti ulavavale. Masani.

Ae i le taimi lena, ao lei amataina le sauniga, na oo mai upu musuia a le Agaga i lo’u mafaufau.

O nei tagata e lei o mai e na o le faataunu se tiute pe faalogo i failauga.

Sa latou o mai mo se mafuaaga loloto ma sili ona taua.

Sa latou o mai e tapuai.

Ao faagasolo le sauniga, sa ou matauina nisi o tagata i le aofia. Sa i ai ia i latou ni foliga e toetoe lava a paia, o se uiga o le migao ma le filemu. Sa i ai se mea e uiga ia i latou na mafanafana ai lo’u loto. O le aafiaga sa latou mauaina i lena Aso Sa o se mea sili ona uiga ese.

Sa latou tapuai.

Sa latou tofo i le lagi.

Na ou vaai ai i o latou mata.

Ma sa ou fafia ma tapuai ma i latou. Ma ao ou faia lena mea, sa talanoa mai le Agaga i lo’u loto. Ma i lena aso, sa ou iloaaina ai se mea e uiga ia te au, e uiga i le Atua ma e uiga i le matafaioi o le tapuai moni i o tatou olaga.

## Tapuai i o Tatou Olaga i Aso Taitasi

E tulaga ese lava le Au Paia o Aso e Gata Ai pe a auauna atu i valaauga o le



Ekalesia. Ae o nisi taimi atonu tatou te faia ai a tatou galuega ma tulaga masani, e pei e na o le faatinoina o se galuega. O nisi taimi o la tatou auai i sauniga ma le auauanga i le malo e ono leai se tulaga paia o le tapuai. Ma a aunoa ma lena mea, o loo tatou misia se feiloaiga le mafaatusalia faaleagaga ma le Atua—o se tasi ua tatou agavaa ai i le avea ma se fanau a se Tama Faalelagi alofa.

O le tapuai e tawa ma e totonusalemu i o tatou olaga faaleagaga, e mamao ese lava mai le avea ma se mea tupu faafuasei ma fiafia. O se mea e tatau ona tatou faananau atu i ai, sailia, ma taumafai ia oo i ai.

#### O Le A Le Tapuai?

A tatou tapuai atu i le Atua, tatou te faalatalata atu ia te Ia ma le alofa migao, lotomaualalo, ma le faaaloalo-gia. Tatou te faailoa atu ma talia o Ia o lo tatou Tupu paia, le Foafoa o le atulaulau, o lo tatou Tama pele alofa ma faavavau.

Tatou te faaaloalo ma faamamalu ia te Ia.

Tatou te tuuina atu i tatou lava ia te Ia. Tatou te sii ae o tatou loto i le tatalo faatauanau, faapelepele i Ana afioga, olioli i Lona alofa tunoa, ma tautino atu ia mulimuli ia te Ia ma le tuuto faamaoni.

O le tapuai i le Atua o se elemene taua i le olaga o se soo o Iesu Keriso lea afai tatou te toilalo e talia o Ia i o tatou loto, o le a tatou sailia ma le le manuia o Ia ia tatou fonotaga, lotu, ma malumalu.

O soo moni e tosina atu ia “tapuai atu ia te ia o le na faia le lagi, ma le lalolagi, ma le sami, ma puna o vai—ma valaau atu i le suafa o le Alii i le ao ma le po.”<sup>6</sup>

E tele mea e mafai ona tatou aoao e uiga i le tapuai moni e ala i le iloiloina o isi—tagata o e atonu e le tele se ese-esega mai ia i tatou—na fetaiai, amio ai, ma tapuai i le afioaga o le paia.

#### Ofoofogia, Lotofaafetai, ma le Faamoemoe

I le vaega muamua o le seneturi 19, na toeitiiti lava a lafoai atoa e le lalolagi Kerisiano le manatua lea o loo fetalai mai pea le Atua i tagata. Ae i le tautotogo o le 1820, na sua faava-vau lena mea ina ua ulu atu se tama faatauvaa faifaatoaga i le togavao ma tootuli ai e tatalo. Mai lena lava aso, ua faatumulia le lalolagi i le tafe mai o faaliga ofoofogia, ma faaee atu ai i ona tagata le malamalama taua e faatatau i le natura ma le faamoemoe-ga o le Atua ma Lana fegalegaleaiga ma tagata.

Na faamatalaina e Oliva Kaotui na aso o ni “aso e le mafai ona faagaloina. . . E o le olioli e! E o le ofoofogia e! E o le maofa e!”<sup>7</sup>

O upu a Oliva na faaalia ai elemene muamua lea e o faatasi ma le tapuai moni o le paia—o se lagona o le mamalu ma le maofa ma le faafetai loloto.

O aso taitasi, ae aemaise lava le aso Sapati, tatou te maua ai le avanoa ofo-ofogia e lagona ai le matagofie ma le maofa o le lagi ma tuu atu a tatou viiga i le Atua mo Lona agalelei faamanuia-inia ma le alofa mutimutivale lofituina.

O le a taitaia i tatou e lenei mea i le faamoemoe. O elemene muamua nei o le tapuai.

#### Malamalama, Poto, ma le Faatuatua

O le aso faamanuiaina o le Penetekoso, na ulu atu ai le Agaga Paia i loto ma mafaufau o soo o Keriso, faatumulia i latou i le malamalama ma le poto.

Pe ana le oo i lena aso sa i ai taimi sa latou le mautonu ai i mea e tatau ona latou faia. Na avea Ierusalema ma nofoaga lamatia mo se soo o le Faaola, ma masalo sa latou tuufesili po o le a le mea o le a avea ai i latou.

Ae ina ua faatumulia o latou loto e le Agaga Paia, na mou ese atu le masalosalo ma le musua. E ala atu i le aafiaga le mafaatusalia o le tapuai moni, sa maua e le Au Paia a le Atua se malamalama faalelagi, poto, ma se molimau malosi. Ma taitai atu ai i le faatuatua.

Mai lena taimi, na galulue le au Aposetolo ma le Au Paia ma se vaaiga naunautai. Sa latou talai atu ma le loto-toa ia Keriso Iesu i le lalolagi atoa.

A tatou tapuai atu i le agaga, tatou te valaaulia le malamalama ma le upu-monu i totolu o tatou loto, lea e faamalosia lo tatou faatuatua. E moomia foi nei elemene i le tapuai moni.

#### Avea ma Soo ma le Alofa Mama

I le Tusi a Mamona ua tatou aoao ai faapea mai le taimi na laveaiina ai Alema le Itiiti mai puapuagatia o taunuuga o lona lava fouvale, e lei toe tutusa o ia. Sa ia “malaga atu i le laueelele atoa . . . ma i totolu o tagata

uma . . . , taumafai ma le vilivilitai e toe faalelei manua uma sa [ia] faia i le ekalesia.”<sup>8</sup>

O lana tapuai faifai pea i le Atua Silisili Ese na avea ma tulaga o le avea ma soo malosi.

O le tapuai moni e faaliliuina i tatou i ni soo faamaoni ma naunautai a lo tatou Matai alofa ma le Faaola, o Iesu Keriso. E suia i tatou ma avea atili faapei o Ia.

Tatou te malamalama atili ma popole. Faamagalo atili. Alofa atili.

Tatou te iloa lelei lava e le mafaina tatou faapea ifo tatou te alolofa i le Atua ao le taimi lava e tasi o feita, tulisea, po o le le amanaiaina o isi o loo siomiaina i tatou.<sup>9</sup>

O le tapuai moni e taitai atu ai i se talitonuga le maluelue ina ia savali i le ala o le avea ai ma soo. Ma mautinoa lava le oo atu i le alofa mama. E momia foi nei elemene i le tapuai.

#### **Ulu Atu i Lona Faitotoa ma le Loto Faafetai**

Pe a ou tomanatu i mea na amata o se taeao masani o le Aso Sa, i lena faletapuai masani, siteki masani, o loo faagaeetia pea a'u e oo mai i lenei aso

i lena aafiaga ofoofogia faaleagaga lea o le a faamanuia ai pea lo'u olaga.

Sa ou iloaina e tusa lava pe tatou te pulea ma le atamai o tatou taimi, valaauga, ma tofiga—e tusa lava pe ua tatou faailogaina uma pusa i la tatou lisi o le tagata, aiga, po o le taitai “atoatoa”—afai tatou te toilalo i le tapuai atu i lo tatou Laveai alofa mutimutivale, Tupu faalelagi, ma le Atua mamalu, ua tatou misia le tele o le olioli ma le filemu o le talalelei.

A tatou tapuai atu i le Atua, tatou te faaalia ma talia o Ia, i le migao lava e tasi e pei o tagata anamua o Amerika. Tatou te faalatalata atu ia Ia ma lagona e le mafaamatatalaina o le matagofie ma le maofa. Tatou te ofo ma le agaga faafetai i le agalelei o le Atua. Ma o lea, ua tatou maua ai le faamoemoe.

Tatou te mafaufau loloto i afioga a le Atua, ma e faatumulia o tatou agaga i le malamalama ma le upumoni. Tatou te malamalama i vaaiga faaleagaga lea e na o le malamalama o le Agaga Paia e mafai ona iloa ai.<sup>10</sup> Ma o lea, ua tatou maua ai le faatuatua.

Ao tatou tapuai atu, o le a faaleleia o tatou agaga ma e tatou te tuuto atu ina ia savavali i alavae o lo tatou Faaola

pele, o Iesu Keriso. Ma mai lenei tau-nuuga, tatou te maua ai le alofa mama.

Pe a tatou tapuai atu, o le a tuu atu o tatou loto i viiga i lo tatou Atua faamaluina i le taeao, aoauli, ma le po.

Tatou te faapaia ma faamaluina o Ia e le aunoa—i o tatou fale-tapuai, aiga, malumalu, ma ia tatou galuega uma.

A tatou tapuai atu, tatou te tatalaina o tatou loto i le mana faamalolo o le Togiola a Iesu Keriso.

O le a avea o tatou olaga ma faa-iloga ma faaaliga o la tatou tapuaiga.

O'u uso e ma tuafafine, o aafiaga faaleagaga e itiiti lava se faiā i mea o loo tutupu i tou autafa ae tele se aafiaga i mea o loo tutupu i totonu o tatou loto. O lau molimau o le tapuai moni o le a liua ai sauniga masani a le Eklesia i ni taumafataga ofoofogia faaleagaga. O le a faatamaoaigaina ai o tatou olaga, faalautele lo tatou malamalama, ma faamalosia a tatou molimau. Aua a uai atu o tatou loto i le Atua, e pei o le au fai Salamo anamua, tatou te “ulu atu i ona faitotoa ma le viiga ma ona loto ma le pese: [tatou te] vivii atu ia te ia, ia outou faamanu atu i lona suafa.

“Aua e lelei le Alii; e faavavau lava lona alofa; e oo atu lava lona faamaoni i lea tupulaga ma lea tupulaga.”<sup>11</sup>

O le tapuai faamaoni ma le faatauanau, tatou te fuga ai ma tuputupu ae i le faamoemoe, faatuatua, ma le alofa mama. Ma e ala i lena faagasologa, ua tatou faapotopoto ai le malamalama faalelagi i o tatou agaga lea e faatumulina o tatou olaga i le uiga paia, filemu tumau, ma le olioli e faavavau.

O le faamanuia lena o le tapuai i o tatou olaga. Ou te molimau atu ai ma le lotomaualalo i le suafa paia o Iesu Keriso, amene. ■

#### **FAAMATALAGA**

1. 3 Nifae 8:17.
2. Tagai 3 Nifae 8:23 AM.
3. 3 Nifae 11:10–11.
4. 3 Nifae 11:14, 16–17.
5. 3 Nifae 11:17 AM.
6. Mataupu Faavae ma Feagaiga 133:39–40.
7. Iosefa Samita—Talafaasolopito 1:71, vaefamatatalaga.
8. Mosaea 27:35.
9. Tagai 1 Ioane 4:20.
10. Tagai 1 Korinito 2:14.
11. Salamo 100:4–5.





Saunia e Elder Lynn G. Robbins  
O Le Au Peresitene o Fitugafulu

# O Le Faamasino Amiontonu

*E na o le tasi lava le auala e faamasino ai faamasinoga amiontonu, e pei na faia e lesu Keriso, ma o le avea lea e faapei o la.*

Lona soifuaga faaletino, sa avea Iesu Keriso ma se faamasino alofa, atamai tele, ma onosai. Na iloga o Ia i tutsiga paia o se “faamasino amiontonu” (2 Timoteo 4:8; Mose 6:57), ma o Lana fautuaga ia i tatou “ia faamasino atu [foi] i le faamasinoga amiontonu” (tagai Faaliliuga a Iosefa Samita, Mataio 7:1–2 [in Mataio 7:1, vaefaaatalaga a]) ma ia “tuu atu lou faalagolago i le Agaga lena lea na te taitai ia fai mea lelei . . . [ma] ia faamasino ma le amiontonu” (MF&F 11:12).

O le a fesoasoani le fautuaga a le Toasefululu i sa Nifae ia i tatou e faamasino e pei ona faia e le Alii: “O le a avea outou ma faamasino o lenei nuu, e tusa ma le faamasinoga o le a ou tuu atu ia te outou, lea o le a tonu. O lea, o a ituaiga o tagata e tatau ona outou i ai? E moni ou te fai atu ia te outou, e pei lava o a’u nei” (3 Nifae 27:27; faaopoopo le faamamafa). O nisi taimi e galo ai ia i tatou ina ua Ia tuuina mai le fautuaga ina ia faapei o Ia, sa i ai i le anotusi o le auala e faamasino ai ma le amiontonu.

## Faamasino ma le Le Amiontonu

O se faataitaiga mataga o le faamasino le amiontonu e sau mai le faataoto o le mamoe na leiloa ina ua faamasino

sese e le au Faresaio ma le au tusiupu le Faaola ma Lana malo o le taumafataga, i le fai atu, “Ua talia e lenei tagata o e agasala, ua aai faatasi foi o ia ma i latou” (Luka 15:2)—sa latou lei mafaufau i o latou foi tulaga o ni tagata agasala. O le maua i loto faasala, sa lei iloa ai lava e le au tusiupu ma le au Faresaio le olioli o le laveaiina o mamoe na leiloloa.



O le “au tusiupu [foi] ma le au Fare-saio” lea na aumaia “le fafine o maua-inia o mulilua” (Ioane 8:3) i le Faaola e vaai pe Na te faamasinoina o ia e tusa ma le tulafono a Mose (tagai fuaiupu e 5). Ua tou silafia le vaega o totoe o le tala, le ala na Ia faamaualalo ai i latou mo a latou faamasinoga le amiontonu, ma le ala na latou “agasala [ai] i o latou loto fuatia ifo” ma “taitasi ma alu” (fuaiupu 9; faaopoopo le faamamafa). Ona ia fetalai atu lea i le fafine, “Ou te le faasala foi ia te oe: alu ia oe, aua e te toe agasala. Ona vivii atu lea o le fafine i le Atua mai lena itupo, ma sa talitonu i lona suafa” (Faaliliuga a Iosefa Samita, Ioane 8:11 [i le Ioane 8:11, vaefaaatalaga c]).

Ua i ai i le tagata natura i totonu o i tatou taitoatas i le tulaga o le faasala o isi ma faamasino ma le le amiontonu po o le faafiaamiontonu. Na tupu foi lenei mea ia Iakopo ma Ioane, o Aposetolo e toalua a le Faaola. Sa matuai feitai lava i laua ina ua leai se faaaloalo o tagata o le nuu o Samaria i le Faaola (tagai Luka 9:51–54):

“Ua iloa atu e [i laua], ona la fai mai lea, Le Alii e, pe e te finagalo ma te fai atu ia alu ifo le afi mai le lagi, ia fano ai i latou, pei ona faia e Elia?

“A ua faliu o ia, ma aoai ia te i laua, ma faapea atu, E le iloa e oulua le uiga o oulua loto.

“Aua e lei sau le Atalii o le tagata e faaumatia le ola o tagata, a ia faaolaina” (fuaiupu 54–56).

E ao i “faamasino lautele” i nei vaitaimi (MF&F 107:74), o o tatou epikopo ma peresitene o paranesi, ona aloese mai soo se uunaiga faapea e faasala, e pei ona faia e Iakopo ma Ioane i lena taimi. O se faamasino amiontonu e tali atu ma le agaalofa ma le malamalamia i mea e tautau atu. O se talavou ua faia se mea sese, mo se faataitaiga, e tatau ona tuua le ofisa o le epikopo o lagonaina le alofa o le Faaola e ala i le epikopo ma ua tumu i le olioli ma le mana faamalolo o le Togiola—leai se maasiasi po o le inosia. A leai, e ono tulituli mamaao ese atu e le epikopo le mamoe leiloa e aunoa ma le silafia (tagai Luka 15:4).

## Aoai

    Ae peitai, e le aveesea e le agaalofa le manaomia o se aoaiga. O le upu *aoaiga* e sau mai le upu Latina *discere*, “ia aoao,” po o le *discipulus*, “tagata aoao,” aveaina o se soo ma se tamaitiiti aoga ma se e mulimuli ia te ia.<sup>1</sup> O le aoai i le ala a le Alii o le aoao atu lea ma le alofa ma le onosai. I tusitusiga paia e masani ona faaaoga e le Alii le upu *aoaiina* pe a talanoa e uiga i le aoai (tagai, mo se faataitaiga, Mosaea 23:21; MF&F 95:1). O le upu *aoaiina* e sau mai le upu Latina *castus*, o lona uiga o le “ola mama po o le mama,” ma o le uiga o le *aoaoiina* o le “ia faamamaina.”<sup>2</sup>

    I le lalolagi, o le faamasino faalelolagi lea e faasalaina se tagata ma *loka* o ia i le falepuipui. I le faatusatusa atu i ai, o le Tusi a Mamona e aoao i tatou a tatou faia se agasala ma le loto i ai, ua avea i tatou ma o “[tatou] lava faamasino” (Alema 41:7) ma faasala i tatou lava i le falepuipui faaleagaga. O le mea e malie ai, o le faamasino lautele i lenei tulaga e umia ki lea e *tatala* ai fai-tooa o le falepuipui; “aua Ou te sauna, faatasi ma le aoaiga, se ala mo le *lave-aiga* o i latou i fafo mai le faaosoosoga, i mea uma” (MF&F 95:1; faaopoopo le faamamafa). O faatinoga a se faamasino amiotonu e alofa mutimutivale, alofa, ma laveai, e le tausalaina.

    Na aoaiina le tama talavou o Iosefa Samita i se olaga faataitai e fa tausaga ao lei mauaina papatusi auro, “ona e te lei tausia poloaiga a le Alii.”<sup>3</sup> Mulimuli ane, ina ua leiloloa itulau e 116 ia Iosefa sa toe aoaiina foi o ia. E ui na salamo moni Iosefa, na aveesea lava e le Alii ona avanoa mo se vaitau puupuu aua “o e Ou te alofa i ai Ou te aoaiina foi ina ia mafai ona faamagaloina a latou agasala” (MF&F 95:1).

    Fai mai Iosefa, “Na olioli le agelu ina ua ia toe tuuina mai ia te a’u le Urima ma le Tumema ma faapea mai ua fiafia le Atua i lo’u faatuatua ma lo’u lotomaualalo, ma alofa mai ia te a’u ona o *lo’u faamaoni* ma lo’u filiga i le tatalo.”<sup>4</sup> Ona na finagalo le Alii e aoao atu ia Iosefa se lesona e suia ai le loto, na Ia manaomia ai se taulaga tiga mai ia te ia—o le taulaga o se vaega taua o le aoaiga.



## Taulaga

    “I ona po anamua, o le *taulaga* o lona uiga o le faia lea ia paia pe faapaiaina se mea po o se tagata,”<sup>5</sup> lea e fesoottai ai, i se auala felagolagomai, i le faauigaga o le upu *aoaiina*—“ia faamamaina.” E faapena foi, i Israaelu anamua, na maua se faamagaloga i le faia o se osigataulaga mo se agasala po o se solitulafono, po o se taulaga.<sup>6</sup> E le gata na “faasino atu [le taulaga] i lena taulaga tele ma le mulimuli” (Alema 34:14) ae na fesoasoani foi e mamanuina se lagona loloto o le faafetai mo le Togiola a le Faaola. O le le loto i ai e ositaulaga o se vaega o lo tatou salamo faatauem po o le vaai maualalo i le taulaga sili a Keriso mo le agasala lava e tasi ma aveesea ai le taua o Lona mafatiaga—o se failoga le amanaiaina o le le lotofaafetai.

    I se isi itu, ona o le ese o le uiga o le taulaga, ua tatou *maua* moni lava se mea e faatatau i le agavaa e faavavau—o Lona alofa mutimutivale ma le faamagaloga ma mulimuli ane “o mea uma ua i ai i [le] Tama” (MF&F 84:38). I le avea ai ma se vaega o le faagasologa

o le salamo, o le taulaga e avea foi ma se pulu pasama e fesoasoani e suitulaga i le “faanoanoa o le mafau-fau” (Alema 42:18) ma le “filemu o le mafaufau” (Mosaea 4:3). A aunoa ma le taulaga, o le a faigata i se tagata ona faamagalo o ia lava, aua o le a faaauau ai pea le iloa na latou taofia se mea.<sup>7</sup>

## O Le Avea o le Matua o se Faamasino Amiotonu

    E ui o le a tofia nisi o i tatou e avea ma faamasino lautele, o le mataupu faavae o le faamasino amiotonu e faata-tau ia i tatou uma, aemaise o matua o e maua le avanoa i aso uma e faaaoga ai nei mataupu faavae ia latou fanau. O le aoao atu ma le lelei o se tamaitiiti o le ute tonu lea o tulaga lelei faamatua, ma o le aoai atu ma le alofa o le ute tonu lea o le avea ma se faamasino amiotonu.

    Na aoao mai Peresitene Iosefa F. Samita, “Afaf ua tetee ma faigata ona puleaina le fanau, ia onosai ia i latou sei aoutou faatoilaloina ai i le alofa, . . . ona mafai ai lea ona outou [mamanuina a] latou amio i le ala tou te mananao i ai.”<sup>8</sup>



O le malamalama faapea o le aoao atu o le ala e aoai ai, e masani lava ona faasino ai perofeta i uiga faaKeriso. Ua aumai ia i tatou e le Mataupu Faavae ma Feagaiga lenei fautuaga iloga i le aoaiga:

“E leai se mana po o se aafia e mafai pe tatau ona faatumauina ona o le perisitua, nao i le faatauanau, i le talitiga, i le agamaualalo ma le agamalu, ma le alofa faamaoni;

“I le agalelei, ma le malamalama manino, lea o le a faalautele tele ai le agaga e aunoa ma le pepelo, ma aunoa ma le faaoleole—

“E aoai atu i taimi e tatau ai ma le maatiati, pe a uunaia ai e le Agaga Paia; ma ona faaali atu ai lea pe a mavae, o se alofa faateleina” (MF&F 121:41–43).

Ua aoao mai i tatou e lenei mau ina ia aoai atu “pe a uunaia ai e le Agaga Paia,” *ae le* pe a uunaia e le ita. E le ogatusa le Agaga Paia ma le ita auia “o le e i ai le agaga o le finauga ua le mai ia te au o ia, ae ua mai le tiapolo ia, o le o le tama o le finauga, ma ua faaos e ia loto o tagata ia fefinaui ma le ita” (3 Nifae 11:29). Na aoao mai Peresitene Siaosi Alapati Samita faapea “o mea agaleaga e le masani lava ona faia i lalo o le musumusuga a le Alii. O le Agaga o le Alii o se agaga o le agalelei; o se agaga o le onosai; o se agaga o le alofa

moni ma le alofa ma le faapalepale ma le onosai. . . .

“. . . Ae afai e ia i tatou le agaga o le vaavaai masei . . . i se uiga faataumaoia, . . . e *le tulai mai lava* lena mea o se tau nuuga o le mafutaga ma le Agaga o lo tatou Tama Faalelagi, ma e faatamaia ai.

“. . . O le agalelei o le mana ua tuuina mai e le Atua ia i tatou e tatala ai loto maaa ma faamalie ai agaga faamaualuga.”

#### Faasinomaga Moni o a Tatou Fanau

Ina ua asiiasi atu le Faaola i sa Nifae, sa Ia faia se mea ofoo fogia faatasi ai ma tamaiti:

“Ma sa oo ina ia aoao atu ma auauna atu i fanau a le motu o tagata . . . , ma ia tatala o latou laulaufaiva, ma sa latou tautatala atu i o latou tama mea tetele ma le ofoo fogia. . . .

“. . . Ma sa latou vaai ma lagolina nei fanau; ioe, e oo lava i pepe sa tatalaina o latou gutu ma tautatala mai i mea ofoo fogia” (3 Nifae 26:14, 16).

Masalo na sili atu nai lo le *tatalaina o gutu* o pepe, na tatala e le Alii *ia mata ma taliga* o o latou matua maofa. O na matua ua tuuina atu i ai le meaalofa ofoo fogia o se tepa i le faavavau ma i le vaai i le faasinomaga moni ma tino o le muai olaga o a latou

fanau. Pe le suia ai ea e faavavau e lena mea le auala o *vaavaai* atu ai ma taulimaina ai e matua a latou fanau? Ou te fiafia i le ese esega o se upusii lenei e faataau ia Goethe: “O le auala o e vaai atu ai [i se tamaitiiti] o le ala lena o e taulimaina ai i latou, ma o le ala o e taulimaina ai i latou o le mea lena [o le a] avea ai i latou.”<sup>10</sup> O le manatuaina o le faasinomaga moni o se tamaitiiti o se meaalofa lea o le vaaiga mamao lea e uunaia faalelagi le vaaiga a le faamino amiontonu.

#### Faaiuga

Na aoao mai i tatou e Peresitene Thomas S. Monson, “Ia aua lava nei avea le foiaina o se faafitauli ma mea e sili ona ttau nai lo se tagata e tatau ona e alofa i ai.”<sup>11</sup> E ttau tele lena mataupu faavae i le avea ai ma faamino amiontonu, aemaise lava ia tatou lava fanau.

E na o le tasi lava le auala e faamasino ai faamasinoga amiontonu, e pei na faia e Iesu Keriso, ma o le avea lea e faapei o Ia. O lea, “o a ituaiga o tagata e tatau ona outou i ai? E moni ou te fai atu ia te outou, e pei lava o a’u nei” (3 Nifae 27:27). I le suafa, o Iesu Keriso, amene. ■

#### FAAMATALAGA

1. Tagai “disciple,” etymonline.com.
2. Tagai *Merriam-Webster’s Collegiate Dictionary*, 11th ed. (2003), “chasten.”
3. Karen Lynn Davidson and others, eds., *Histories, Volume 1: Joseph Smith Histories, 1832–1844*, vol. 1 of the Histories series of *The Joseph Smith Papers* (2012), 83.
4. *Aoaoga a Peresitene o le Ekalesia: Iosefa Samita* (2007), 76; faoopopo le faamamafa.
5. Taiala i Tusitusiga Paia, “Taulaga,” scriptures.lds.org.
6. Tagai Bible Dictionary, “Sacrifices.”
7. O le taulaga tatou te ofoina atu i luga o le fata faitaulaga o le laulau faamanatuga i vaiaso taitasi o se loto momomo ma le agaga salamo (tagai 2 Nifae 2:7; 3 Nifae 9:20; Mataupu Faavae ma Feagaiga 59:8). O le loto momomo o se loto ua salamo; o le agaga salamo o se agaga usiusitai (tagai D. Todd Christofferson, “Pe a Liua Mai Oe,” *Liahona*, Me 2004, 12).
8. *Aoaoga a Peresitene o le Ekalesia: Iosefa F. Samita* (1998), 307.
9. *Aoaoga a Peresitene o le Ekalesia: Siaosi Alapati Samita* (2011), 231–2, 234; faoopopo le faamamafa.
10. Faailoa atu o Johann Wolfgang von Goethe, brainyquote.com.
11. Thomas S. Monson, “Mauaina o le Olioli i le Faigamalaga,” *Liahona*, Nov. 2008, 86.



Saunia e Peresitene Henry B. Eyring  
Fesoasoani Muamua i le Au Peresitene Sili

# Lotofaafetai i le Aso Sapati

*Mo le Au Paia o Aso e Gata Ai, o le Sapati o se aso lena  
o le lotofaafetai ma le alofa.*

**O**u uso e ma tuafafine pele o loo i ai i le lalolagi atoa i Le Eklesia a Iesu Keriso o le Au Paia o Aso e Gata Ai, ua ou faafetai lava ua faatonuina au e Peresitene Thomas S. Monson e lauga i le konafesi i lenei aso Sapati. Ou te tatalo ia molioo atu e le Agaga Paia a'u upu i o outou loto.

O le asō ou te manao ai e talanoa atu e uiga i lagona o le loto. O le lagona o le a ou taulai atu i ai o le lotofaafetai—aemaise lava i le aso Sapati.

Tatou te lotofaafetai mo le tele o mea: o se agalelei mai o se tagata ese, o se meaai pe a tatou fiaai, o se malutaga i luga o o tatou ulu pe a oo mai ni afā, o se ivi ua gau ua faamaloloina, ma le tagi malosi a se pepe fou faato'a fanau mai. O le toatele o i tatou o le a manatuaina se lagona o le lotofaafetai i taimi faapena.

Mo le Au Paia o Aso e Gata Ai, o le Sapati o se taimi lena, po o le aso tonu lea, o le lotofaafetai ma le alofa.



Sa faatonuina e le Alii le Au Paia i le Itumalo o Siakisone, Misuri, i le 1831, e tatau ona tuusa'o atu a latou tatalo ma faafetai i le lagi. Sa tuu atu i le Au Paia anamua se faaaliga e uiga i le auala e tausi ai le aso Sapati ma le auala e anapopogi ai ma tatalo.<sup>1</sup>

Ua ta'u mai e le Alii ia i latou, ma i tatou, le auala e tapuai atu ai ma avatu le faafetai i le Sapati. E pei ona outou silafia, o le mea e sili ona taua o le alofa tatou te lagoinaina mo ē e foai maia ni meaalofa. O le fetalaiga lenei a le Alii i le auala e avatu ai le faafetai ma le auala e alolofa ai i le Sapati:

“Ou te tuu atu ia te outou se polo-aiga, e fai atu: Ia e alofa atu i le Alii lou Atua ma lou loto atoa, ma lou manatu atoa, mafaufau, ma le malosi; ma ia e auauna atu ia te ia i le suafa o Iesu Keriso. . . .

“Ia e faafetai atu i le Alii lou Atua i mea uma.

“Ia e osi atu se taulaga i le Alii lou Atua i le amiontonu, o se taulaga lava o le loto momomo ma le agaga salamo.”<sup>2</sup>

Ona faaaauau lea o le fetalaiga a le Alii ma lapatai mai e uiga i le faafetai atu i le Tama Faalelagi ma Iesu Keriso o ē e foaiina mai meaalofa: “Ma ua leai se mea e faatausuai ai le tagata i le Atua, pe ua leai ni isi e faamumu faasaga i ai lona toasa, tau lava o i latou o e latou te lē tautinoina lona aao i mea uma, ma lē usiusitai i ana poloaiga.”<sup>3</sup>

O le toatele o outou o loo faafofoga mai o loo maua lava le olioli lava i le Sapati o se aso e manatua ai ma avatu le faafetai i le Atua mo faamanuiaga. Tou te manatuaina le pese masani:

*Pe a mafatia oe i mea tiga,  
Pe a e manatu ua le toe aoga,  
Faitau ou manuia ua maua mai,  
E te ofo tele i mea ua Ia fai.*

*Faitau ou manuia;  
E tele mai luga.  
Faitau ou manuia;  
Mai le Atua. . . .*

*Po ua mafatia oe i faigata?  
Ua mamafa ea o lau avega?  
Faitau ou manuia aua le vaivai,  
Pesepe pea ma le faafetai.<sup>4</sup>*

Ou te maua ni tusi ma ni asiasiga mai tagata faamaoni o le Au Paia o Aso e Gata Ai o loo lagonaina le mamafatū i avega. O nisi ua latalata atu lava i le lagonaina e faapea, mo i latou lava ia, ua le toe aoga. Ou te faamoemoe ma tatalo o mea ou te ta'u atu e uiga i le lotofaafetai i le Sapati o le a aoga lea e mouese ai masalosalogia ma amata vivii ai o outou loto.

O le tasi faamanuiaga e mafai ona tatou lotofaafetai ai o lo tatou i ai lea iina i le sauniga faamanatuga, ma potopoto faatasī e sili atu ma le toatasi pe toalua o Ona soo i Lona suafa. O loo i ai nisi i le fale ua le mafai ona toe tulai mai o latou moega. O loo i ai nisi o loo fia i ai i le mea o loo tatou i ai ae o loo auauna atu i falema'i ma tuuina atu le saogalemu mo tagata lautele, pe o loo puipuia foi i tatou i le lamatia ai o o latou lava ola i ni toafa po o ni togavao. O le mea moni i le mafai ona tatou potopoto ma le isi tagata e toatasi o le Au Paia ma taumamafa i le faamanatuga, o le a fesoasoani ia i tatou ia lagona ai le lotofaafetai ma le alofa mo le agalelei o le Atua.

Ona o le Perofeta o Iosefa Samita ma le talalelei toefuataiina, o se isi

faamanuiaga e mafai ona tatou fai-tauina o le mauaina lea o le avanoa e taumamafa ai i le faamanatuga i vaiaso taitasi—e saunia, faamanuiaina, ma tufaina e ni auauna faatagaina a le Atua. E mafai ona tatou lotofaafetai pe a faamautu atu e le Agaga Paia ia te oe upu o le tatalo o le faamanatuga, e fofogaina e ni au perisitua faatagaina, ua faamamaluina e lo tatou Tama Faalelagi.

I faamanuiaga uma e mafai ona tatou fai-tauina, o le faamanuiaga aupito silisili, o le lagonaina o le faamagaloga lea e oo mai pe a tatou aai i le faamanatuga. O le a tatou lagonaina le alofa sili atu ma le talisapaiaina o le Faaola, o le ana le taulaga lemafuatia ua mafai ai ona faamamaina i tatou mai le agasala. A tatou aai ma feinu i le areto ma le vai, tatou te manatua na mafatia o Ia mo i tatou. Ma pe a tatou lagonaina le lotofaafetai mo mea ua Ia faia mo i tatou, o le a tatou lagonaina Lona alofa mo i tatou ma lo tatou alolofa mo Ia.

O le faamanuiaga o le alofa tatou te mauaina o le a faafagofie atili ai mo i tatou ona tausia le poloaiga ia "manatua pea o ia."<sup>5</sup> E mafai foi ona e lagona-na le alofa ma le lotofafetai, e pei o au,

mo le Agaga Paia, o le ua folafola mai e le Tama Faalelagi o le a faatasi pea ma i tatou pe a tatou tumau faamaoni i feagaiga ua tatou osia. E mafai ona tatou fai-tauina na faamanuiaga uma i Aso Sa uma ma lagonaina le lotofaafetai.

O le Sapati o se taimi tonu foi lea e manatua ai le feagaiga na tatou osia i le vai o le papatisoga e alofa atu ma auauna atu i fanau a le Tama Faalelagi. O le faataunuina o lena folafolaga e mafai ona aofia ai le auai i se vasega po o se korama ma le faamoemoe atoa o le loto ina ia mafai ona fausia le faatua-tua ma le alofa i va o uso ma tuafafine o loo i ai iina faatasi ma i tatou. O lena folafolaga o le a aofia ai ma le faatau-nuina ma le fiafia o o tatou valaauga.

Ou te faafetai mo le tele o Aso Sa na ou faiaoga ai i se korama a tiakono i Bountiful, Iuta, faapea foi ma se vasega o le Aoga Sa i Idaho. Ma ou te manatua foi taimi na ou auauna ai o se fesoasoani i lo'u toalua i le vasega pepe, ma o la'u galuega autu lava o le tufaina atu ma le pikiina i luga o meataalo.

Sa tele ni tausaga ae faatoa ou iloaina e ala i le Agaga o la'u auaunaga faatauvaa mo le Alii sa taua tele i olaga o fanau a le Tama Faalelagi. Sa faate'ia au ona o loo manatua pea e nisi o i latou ma faafetai mai ia te au mo au taumafaiga le atoatoa e auauna atu ia i latou mo le Matai i na aso Sapati.

E pei lava ona masani ai i nisi taimi, le le mafai ona tatou vaaia o taunuuga o a tatou lava auaunaga e tuuina atu i le Sapati, e ono le mafai foi ona tatou vaaia aafiga faatupulaia o isi auauna a le Alii. Ae o loo fausia e le Alii ma le filemu Lona malo e ala i Ana auauna faamaoni ma faamaulalo, ma sina faailoa faalauaitele e agai atu i lona lumanai mamalu i le meleniuma. E manaomia ai le Agaga Paia ina ia vaaia ai le mamalu faatupulaia.

Sa ou ola ae ma alu i sauniga faamanatuga i se paranesi laitiiti lava i New Jersey faatasi ma ni nai tagata ma le aiga e toatasi, le matou aiga. I le fitusefulu-lima tausaga talu ai, sa papatiso ai au i Philadelphia i le falesa e tasi lava na fausia e le Ekalesia na mafai ona matou o i ai i Penisilevania po o New Jersey. Ae i le mea sa i ai le



paranesi laitiiti i Princeton, New Jersey, ua i ai nei ni uarota tetele se lua. Ma i le lua aso talu ai, na faatinoina ai e le faitau afe o tagata talavou se fiafia a o lumanai ai le faapaiaga o le Malumalu o Philadelphia Penisilevania.

A o avea ma se alii talavou, sa valauina au o se faifeautalai o le itu lea sa matou tapuai ai i Aso Sa i le falesa e tasi i Alebuquerque, Niu Mekisiko. O le asō o loo i ai se malumalu ma siteki e fa.

Sa ou tuua Albuquerque ina ia alu i le a'oga i Cambridge, Massachusetts. Sa na o le tasi le falesa ma se itu na i ai mo le tele o le vaega o Massachusetts ma Rhode Island. Sa ou tietie atu i mauga o lena nuumaotua matagoifie e alu ai i sauniga faamanatuga i ni paranesi toalaiti, ole tele lava i ni tamai fale mautotogi po o ni fale o aiga ua toefaaafou. O lea la ua i ai nei se malumalu paia a le Atua i Belmont, Massachusetts, ma siteki ua salalau solo i le itumalo.

O le mea sa lei mafai ona manino teile i la'u vaai i lena taimi o le liligiina e le Alii o Lona Agaga i luga o tagata i na tamai sauniga faamanatuga. Sa mafai ona ou lagonaina, ae sa lei mafai ona ou vaaia le faalauteleina ma le taimi o faamoemoega o le Alii e fausia ma faamamalu Lona malo. Sa vaaia e se perofeta e ala i faaaliga, ma faamau-mauina mea ua mafai nei ona tatou vaaai i ai i tatou lava. Sa fai mai Nifae o le a le maoae lava lo tatou aofai, ae o le malamalama faatupulaia o le a avea ma se vaaiga e vaaia:

“Ma sa oo ina ou vaaai atu i le eklesia a le Tamai Mamoe a le Atua, ma sa toaititi ona aofai. . . .”

“Ma sa oo ina a'u, vaaai a'u o Nifae, i le mana o le Tamai Mamoe a le Atua, ua alu ifo i luga o le au paia o le eklesia a le Tamai Mamoe, ma luga o tagata o le feagaiga a le Alii, o e sa faataapeapeina i luga o le lalolagi atoa; ma sa faauupegaina i latou i le amiotonu ma le mana o le Atua i le mamalu tele.”<sup>6</sup>

I lenei tisipenisione, o se faamatalaga faaperofeta faapenei o lo tatou tulaga ma avanoa i luma atu o loo faamaumauina i le Mataupu Faavae ma Feagaiga:



“Tou te lei malamalama lava i le tetele o faamanuiaga o i ai i le Tamā i ona lava aao ma ua saunia mo outou;

“Ma e lē mafai ona outou gafatia mea uma i le taimi nei; e ui i lea, ia fiafia, ona o le a Ou taitaia outou i le ala. O le malo ua ia outou ma o ona faamanuiaga ua ia outou, ma o 'oa o le faavavau ua ia outou ia.

“Ma o ia o lē e taliaina mea uma ma le *faafetai* o le a faamamaluina; ma o mea o le lalolagi lenei o le a faaopoopoina ia te ia, i le sautuaselau lava, ioe, e sili atu.”<sup>7</sup>

Ua ou lagonaina lena suiga o le faatupulaia o le lotofafetai mo faamanuiaga ma se alofa i le Atua ua faateleina i le Eklesia atoa. E foliga mai ua faatelevaveina i tagata o le Eklesia i taimi ma nofoaga o loo i ai tofotofoga o lo latou faatuatua, lea e ao ai ona latou aioi atu i le Atua mo se fesoasoani e faaauau ai le malaga.

O le a tatou pasia ni taimi o tofotofoga faigata e pei foi ona sa i ai mo le nuu o Alema i lalo o le taitaiga a Amulona agaleaga, lea na tuuina ni avega i o latou tua sa matua mamafatu mo i latou ona tauaveina:

“Ma sa oo ina oo mai le siufogfa o le Alii ia te i latou i o latou puapuaga, ua fetalai mai: Ina ea ia o outou ulu ma ia faamafanafanaina outou; ona ua Ou iloa le feagaiga na outou faia mai ia te a'u; ma o le a Ou osifeagaiga ma o'u tagata ma laveai i latou mai le pologa.

“Ma o le a Ou faamāmāina foi avega ua tuu i o outou tau'a, e oo ia te outou tou te le lagonaina i latou i luga o o outou tua, a'o outou i ai lava i le pologa; ma o le a Ou faia lenei mea ina ia mafai ona outou tutu e avea o ni molimau mo a'u i le lumanai, ma ina ia mafai ona outou iloa ma le mautinoa o A'u, o le Alii le Atua, e asiiasi atu i o'u tagata i o latou puapuaga.

“Ma o lenei sa oo ina faamāmāina avega sa tuu i luga o Alema ma ona uso; ioe, sa faamalosia i latou e le Alii ina ia mafai ona latou tauave ma le faigofie a latou avega, ma sa latou gaua'i atu ma le fiafia ma le onosai i le finagofie atoa o le Alii.”<sup>8</sup>

O oe ma au o ni molimau i soo se taimi lava tatou te tausia ai a tatou feagaiga a le Alii, aemaise lava pe a faigata, e faafogaina e Ia a tatou

tatalo o le faafetai mo mea ua Ia faia mo i tatou ma tali mai i a tatou tatalo mo le malosi e tumau ai ma le faafetua. Ua sili atu ma le faatasi ona Ia faafafiaina i tatou e pei foi ona Ia faamalosia tatou.

Atonu e te tomanatu lelei po o le a se mea e mafai ona e faia e ola ma tapuai ai i lenei lava aso Sapati e faaali atu ai le lotofaafetai ma faamalosia ai oe lava ia ma isi mo tofotofoga o loo i luma atu.

E mafai ona e amata i se tatalo patino ma se tatalo faaleaiga o le faafetai mo mea uma ua faia e le Atua mo oe. E mafai ona e tatalo ia iloa mea e finagalo le Alii e te faia e auauna atu ai ia te Ia ma isi. Aemaise lava, e mafai ona e tatalo ia ta'u atu e le Agaga Paia ia te oe se tagata o loo tuuatoatas pe o loo mafatia lea e finagalo le Alii e te alu atu i ai.

E mafai ona ou folafola atu o le a taliina au tatalo, ma a e faatino ia tali o le a e mauaina, o le a e maua le olioli i le Sapati ma o le a taumasuasua lou loto i le faafetai.

Ou te molimau atu e silafia ma alofa le Atua le Tama ia te oe. Sa togiaolina e le Faaola, le Alii o Iesu Keriso au agasala, ona o le alofa mo oe. O le Tama ma le Alo, La te silafaina lou igoa e pei ona La silafaina le igoa o le Perofeta o Iosefa Samita ina ua La faaali atu ia te ia. Ou te molimau atu o le Ekalesia lenei a Iesu Keriso ma o le a Ia faamamaluina feagaiga ua e osia ma faafouina ma le Atua. O le a suia lou lava natura ia avea atili ai e faapei o le Faaola. O le a faamalosia oe e tetee atu i faaososoga ma tetee atu i lagona o le masalosalo e uiga i le upumoni. O le a e mauaina le olioli i le Sapati. Ou te folafola atu ai ia te outou i le suafa o le Alii o Iesu Keriso, amene. ■

#### FAAMATALAGA

1. Tagai Mataupu Faavae ma Feagaiga 59.
2. Mataupu Faavae ma Feagaiga 59:5, 7–8.
3. Mataupu Faavae ma Feagaiga 59:21.
4. "Faital Ou Manuia," *Viiga*, nu. 151.
5. Moronae 4:3; 5:2; Mataupu Faavae ma Feagaiga 20:77, 79.
6. 1 Nifae 2:12, 14.
7. Mataupu Faavae ma Feagaiga 78:17–19; faaopoopo le faamamafa.
8. Mosaea 24:13–15.



Sauniga i le Afiafi o le Aso Sa | 2 Oketopa, 2016

**Sauniga e Elder David A. Bednar**  
O Le Korama a Apostolo e Toasefululua

## "Ana Iloa e Outou o A'u"

*Pe na o lo tatou iloaina ea o le Faaola, pe o faateleina ea lo tatou iloaina o la? E faapefea ona tatou iloaina le Alii?*

**A** o faai'uina e le Faaola le Lauga i luga o le Mauga, sa Ia faamamafa atu le upumoni e faavavau e faapea "ua na o le faia lava o le finagalo o le Tama e maua ai le alofatunoa laveai o le Alo."<sup>1</sup>

Sa Ia tautino mai:

"E le sao atu i le malo o le lagi i latou uma o e fai mai ia te au, Le Alii e, le Alii e; na o le na te faia le finagalo o lo'u Tama o i le lagi.

"E toatele latou te fai mai ia te au i lea aso, Le Alii e, le Alii e, matou te lei perofeta ane ea i lou igoa, o lou igoa foi na matou tulia ai temoni? o lou igoa foi na matou fai ai vavega e tele?

"Ma ona ou tautino atu ai lea ia te i latou i lena taimi: Ou te lei iloa lava outou; ia outou o ese atu mai ia te au, outou o e e faia le amioletonu."<sup>2</sup>

O lo tatou malamalamamaaga i lenei tala e faalaueteleina pe a tatou mafaufau i se toe faafouga musuia o le tusiga. E taua tele, o le fetalaiga a le Alii o loo tusia i le Lomiga o le King James o le Tusi Paia, "Ou te lei iloa lava outou," sa suia i le Faaliliuga a Iosefa Samita o le "Tou te lei iloaina lava a'u."<sup>3</sup>

Mafaufau foi i le faataoto o taupou e toasefulu. Toe mafaufau i taupou valea e toalima ma lē saunia sa o atu e toe aumai se suaau mo a latou moli ina ua



mavae ai o le faalogoina o le alaga e ō e feiloi ma le faato'ā faiava.

"Ua latou o e faatau, ona sau ai lea o le faatoafaiava, o e ua saunia foi ua latou ulufale atu faatasi ma ia i le tausamaaga, ona pupuni ai lea o le faitotoa.

"Mulimuli ane, ona o mai ai lea o isi taupou [valea e toalima], ua faapea mai, Le Alii e, le alii e, ia e tatala atu le puipui mo i matou.

"A ua tali atu o ia, ua faapea atu, E moni, ou te fai atu ia te outou, ou te le iloa outou."<sup>4</sup>

O le faatatauga o lenei faataoto mo i tatou taitoatasi ua faalauteleina e se isi faafouga musuia. E taua tele le fasifuitau, "Ou te le iloa outou" e pei ona tusia i le Lomiga o le King James o le Tusi Paia sa faamanino i le Faaliliuga a Iosefa Samita e faapea, "Tou te le iloa a'u."<sup>5</sup>

O fasifuitau "Tou te lei iloaina lava a'u" ma le "Tou te le iloa a'u" e tatau ona avea ma se pogai o se iloiloga faaleagaga faaletagata lava ia mo i tatou taitoatasi. Pe na o lo tatou iloaina ea o le Faaola, pe o faateleina ea lo tatou iloaina o Ia? E faapefea ona tatou iloaina le Alii? O nei fesili o le agaga o le taulaiga lea o la'u savali. Ou te valaaulia ma le naunau-tai le fesoasoaniga a le Agaga Paia a o tatou iloiloina faatasi lenei mataupu taua.

#### Oo Ina Iloa

Sa fetalai mai Iesu:

"O A'u nei le ala, ma le upu moni, ma le ola; e le alu atu lava se tasi i le Tama, pe a le ui mai ia te au.


"Ana iloa e outou o a'u, po ua iloa foi e outou lo'u Tamā."<sup>6</sup>

Tatou te iloaina le Tama pe a tatou iloaina Lona Alo Pele.

O se tasi o faamemoega sili o le olaga faaletino e le o tau na ona aoao e uiga i le Alo e Toatasi na Fanaua o le Tama ae ia tauivi foi ia iloa o Ia. O laasaga taua e fa e mafai ona fesoasoani ia i tatou ia iloa ai le Alii, o le faatinoina o le faatuatua ia te Ia, mulimuli ia te Ia, auauna atu ia te Ia, ma le talitonu ia te Ia.

#### Faatinoina o le Faatuatua ia te Ia

O le faatinoina o le faatuatua ia Iesu Keriso o le faalagolago lea i Ana galuega, alofa mutimutivale, ma le alofa tunoa.<sup>7</sup> E amata ona tatou iloaina le Faaola pe a tatou amata faaaogaina o



tatou malosiaga faaleagaga ma faataitai Ana aoaoga, pe mafai foi ona tuu atu se avanoa o o tatou loto mo se vaega o Lana afioga.<sup>8</sup> A o faateleina lo tatou faatuatua i le Alii, tatou te faalagolago ia te Ia ma maua le talitonuga maumau-tutu i Lona mana e togiola, faamalolo, ma faamalosia ai i tatou.

O le faatuatua moni e taulai atu i le Alii ma e tau atu e le aunoa i faatinoga amiontonu. "O le faatuatua [ia Keriso o le] uluai mataupu faavae lea i le tapuaiga ua faali mai, . . . o le faavae o le amiontonu uma . . . ma o le mataupu faavae o le faatinoga i tagata atamamai uma."<sup>9</sup> Ona o le faatinino e tusa ma mataupu faavae sa'o na folafola mai e le Togiola, e totonugalemu i le mauaina ma le faatinoina o le faatuatua moni, "e mate lava le faatuatua pe a leai ni galuega."<sup>10</sup> E tatau ona fai i tatou ma "e anaana i le upu ae le na o le faalogo i ai."<sup>11</sup>

O le faalogo i le afioga a le Atua ma le mauaina o le meaalofa faaleagaga o le faatuatua i le Faaola e fesootai lelei, ona "e tupu le faatuatua i le taulologologo atu, o le taulogologo atu foi o i le afioga a le Atua lea."<sup>12</sup> E oo ina tatou masani ma Ia ma Lona siufogaga a o tatou suesue ma aai i Lana afioga i tusitusiga paia,<sup>13</sup> tatalo atu i le Tama i Lona suafa ma le manatu moni i ai,<sup>14</sup> ma saili atu mo le mafutaga faifai pea

a le Agaga Paia.<sup>15</sup> O le aoaoina ma le faaaogaina i o tatou olaga o le mataupu faavae a Keriso o se mea e tatau ona tatou faia muamua ina ia maua ai le meaalofa o le faatuatua ia te Ia.<sup>16</sup>

O le faatinoina o le faatuatua i le Alii o se tapenaga talafeagai lea mo le mulimuli ia te Ia.

#### Mulimuli ia te Ia

"Ua savali ane Iesu e latalata ane i le vai o Kalilaia, ona silafia lea e ia o le uso e toalua, o Simona ua igoa ia Peteru, ma Aneterea lona uso ua la lafo le upega i le vai: aua o tagata fai faiva i laua.

"Ona fetalai atu lea o ia ia te i laua, Ina mulimuli mai ia ia te au, ou te faia oulua ma fai faiva i tagata.

"Ona la tuua loa lea o laua upega, a e mulimuli atu ia te ia."<sup>17</sup>

O Peteru ma Aneterea o ni faataitai-iga malolosi ia o le faalogo ma mulimuli i le Matai.

Ua faatonu mai foi le Faaola ia te oe ma au, "Ai se fia mulimuli mai ia te au, aua ne'i usiusitai o ia ia te ia, a ia ave e ia lona satauro, i le mulimuli mai ai ia te au."<sup>18</sup> Ina ia ave le satauro a se tasi e ao ona faafitia e ia o ia lava i mea uma e lē amioatua ma tuinanauga uma faa-lelalolagi ae tausi i poloaiga a le Alii.<sup>19</sup>

Sa apoapoi mai le Faaola ia i tatou ina ia avea e faapei o Ia.<sup>20</sup> O lea, o le mulimuli i le Alii ua aofia ai le faataitai



atu ia te Ia. E faaauau pea ona tatou iloaina le Alii pe a tatou saili atu e ala i le mana o Lana Togiola ia avea ai e pei o Ia.

I Lana galuega i le olaga faaletino, sa faailoga ai e Iesu le ala, taitai le ala, ma fai le faataitaiga atoatoa. “O se manatu sa’o e uiga i ona uiga faaletagata, [Lona] atoatoa, ma uiga paia”<sup>21</sup> e maua ai le faamoemoega tumau ma le taitaiga manino pe a tatou mulimuli atu ia te Ia i luga o le ala o le avea ma soo tuuto.

O le mulimuli atu i le Faaola e mafai ai foi ona tatou maua se malamalama tonu e faapea o le ala o le olaga [o loo tatou] tulitulimatagauina”<sup>22</sup> o loo ogatusa ma le finagalo o le Atua. O sea malamalama e le o se mealilo ua le iloaina ma e le o taulai autu atu i a tatou sailiga faaletino po o ni popolega masani faaleolaga nei. Ae, o le alualu i luma tumau ma mausali i luga o le ala o feagaiga, o le ala lea o le olaga e fiafia i ai o Ia.

O le miti a Liae i le Tusi a Mamona ua faailoa ai le ala e tatau ona tatou mulimuli ai, o luitau o le a tatou fetaia’i, ma punaoa faaleagaga o le a maua e fesoasoani ai ia i tatou i le mulimuli ai ma le o mai i le Faaola. O le fetaomi atu i luma i le ala lauiti ma le vaapi-api, o le mea lea e finagalo o Ia tatou te faia. O le tofoina o le fua o le laau ma oo ai ina matua “liua i le Alii”<sup>23</sup> o faamanuiaga ia o loo Ia naunau mo i

tatou ia maua. O lea, ua Ia valaaulia ai i tatou, “Sau, mulimuli mai ia te a’u.”<sup>24</sup>

O le faatinoina o le faatuatua ma le mulimuli ia Iesu Keriso o ni sauniuniga talafeagai ia mo le auauna atu ia te Ia.

#### *Auauna Atu ia te Ia*

“Aua pe faapefea ona iloa e se tagata le matai e lei auauna i ai o ia, ma o se foi o se tagata ese ia te ia, ma ua mamao mai mafaufauga ma faamoemoega o lona loto?”<sup>25</sup>

Tatou te iloaina atili le Alii pe a tatou auauna atu ma galulue i Lona malo. A tatou faia lea mea, Na te faamanuiaina ma le agalelei i tatou i fesoasoaniga faalelagi, meaalofa faaleagaga, ma le gafatia faateleina. E le taitai tuua na o i tatou pe a tatou galulue i Lona tovine.

Sa Ia tautino mai: “Aua o le a Ou alu muamua atu i o outou luma. O le a Ou i ai i lo outou lima taumatau ma lo outou agavale, ma o le a i ai lo’u Agaga i o outou loto, ma si’o faataamilo outou e a’u agelu, e sapasapai outou i luga.”<sup>26</sup>

Tatou te iloaina le Faaola pe a tatou faia le mea silisili tatou te mafafia e ò ai i mea e finagalo o Ia tatou te ò i ai, pe a tatou tauivi e ta’u atu mea e finagalo o Ia e ta’u atu, ma pe a tatou avea ma tagata e finagalo o Ia tatou te avea ai.<sup>27</sup> Pe a tatou faamamaluina ma le loto atoa lo tatou faalagolago atoa ia te Ia, Na te faalauteleina lo tatou gafatia e auauna atu ai ma le mataalia atili. E faa-solosolo lava ona ogatasi atoatoa atili

o tatou manaoga ma Lona finagalo, ma Ona faamoemoega e avea ma o tatou faamoemoega, i lena tulaga o le a tatou “lē ole [atu ail] i se mea ua le tusa ai ma [Lona finagalo].”<sup>28</sup>

O le auauna atu ia te Ia e manaomia ai o tatou loto atoa, manatu, mafaufau, ma le malosi atoa.<sup>29</sup> O le mea lea, o le auauna atu i isi ma le lē manatu faapito e faatoilaloina ai lagona faaloloto ma le manatu faapito o le tagata natura. Tatou te tuputupu a’e ia alolofa i ē tatou te auauna i ai. Ma ona o le auauna atu i isi o le auauna atu lava lea i le Atua, ua tatou tuputupu a’e ai e alolofa atili ia te Ia ma o tatou uso ma tuafafine. O lea alofa o se faailoaga lea o le meaalofa faaleagaga o le alofa mama, le alofa le pona lava lea o Keriso.<sup>30</sup>

“Ia outou tatalo atu i le Tamā ma le malosi atoa o le loto, ina ia faatumulua outou i lenei alofa, lea ua ia faaee mai i luga o i latou uma o e o soo moni o lona Alo, o Iesu Keriso; ina ia mafai ona avea o outou ma atalii o le Atua; a oo ai ina afio mai o ia o le a tatou faapei o ia, ona o le a tatou vaai ia te ia e pei ona i ai o ia; tau ina ia tatou maua lenei faamoe; tau ina ia mafai ona faamamaina i tatou e pei lava ona mama o ia.”<sup>31</sup>

Tatou te iloaina le Alii pe a faatumulia i tatou i Lona alofa.

#### *Talitonu ia te Ia*

E mafai ea ona tatou faatino le faatuatua ia te Ia, mulimuli ia te Ia, auauna atu ia te Ia, ae le talitonu ia te Ia?

Ua ou masani i tagata o le Ekalesia o ē taliaina le moni o aoaoga faavae ma mataupu faavae o loo i ai i tusitusiga paia ma ia ua folafola atu mai lenei pulelaa. Ae ua faigata tele ia i latou ona talitonuina o na upumoni o le talalelei e faatatau tonu i o latou olaga ma o latou tulaga. E foliga mai latou te faatuatua i le Faaola, ae latou te le talitonu i Ana faamanuiaga folafolaina o loo avanoa mo i latou pe, e mafai foi ona tupu i o latou olaga. Ua ou feiloi foi i ni uso ma ni tuafafine o e faataunuina tiute o o latou valaauga ae e lei avea lava le talalelei toefuataiina o se mea moni e ola ma suia ai o latou olaga. Tatou te iloa le Alii pe a le gata ina tatou talitonu ia te Ia ae talitonu foi ia te Ia ma Ana faamautinoaga.

I le Feagaiga Fou, sa talosaga atu ai se tama i le Faaola ia faamalolo lona atalii. Sa tali atu Iesu:

“Afaia ua e mafaia ona [talitonu], e mafaia mea uma lava i le [talitonu].

“Ona alaga loa lea o le tamā o le tama, ua fai mai ma le tagi, Le Alii e, ua ou [talitonu]; ia e fesoasoani i lo’u le [talitonu].”<sup>32</sup>

Ua faatele ona ou manatunatu i le talosaga a lenei tama: “Ia e fesoasoani mai i lo’u le [talitonu].” Ou te tomanatu pe o le faamoemoega o le aioiga a le tama lea sa le na o le manao ina ia fesoasoani ia te ia ia talitonu ia Iesu o lo tatou Togiola ma i Lana mana faamalolo. Atonu ua uma ona ia faamaluina Keriso o le Alo o le Atua. Ae masalo na ia manaomia le fesoasoani ia talitonu ai i le mana faamalolo o le Matai e mafai moni ona faia taitoatasi ma faapatinoina tele ina ia manuia ai lona lava atalii pele. Atonu sa ia talitonu ia Keriso i se tulaga lautele, ae sa lei talitonu ia Keriso i se tulaga patino ma faletagata lava ia.

E tele ina tatou molimau atu i mea tatou te iloa e moni, ae masalo o le fesili e sili atu ona fitoitonu mo i tatou taitoatasi, pe tatou te talitonu ea i mea ua tatou iloa.

O sauniga paia e faatinoina i le pule tatau ai o le perisitua e taua i le talitonu i le Faaola, iloaina o Ia, ma le mea sili-sili, o le talitonu i mea ua tatou iloa.

“Ma o le perisitua [Mekisateko] lea e pulea le talalelei ma umia le ki o mealilo o le malo, *o le ki lava lea o le malamalamā e uīga i le Atua.*

“O lea, o ona sauniga, ua faaaliai ai le mana o le faale-atua.”<sup>33</sup>

Tatou te talitonu ma iloa le Alii pe afaaogaina le ki o le malamalamā e uīga i le Atua e ala i le Perisitua Mekisateko e tatala ai le faitotoa ma mafai ai mo i tatou taitoatasi ona maua le mana o le faaleatua i o tatou olaga. Tatou te talitonu ma iloa le Faaola pe a tatou mulimuli ia te Ia e ala i le mauaina ma le faamamaluina ma le faamaoni o sauniga paia ma le faateleina o le mauaina o Ona fofoga i o tatou mata.<sup>34</sup> Tatou te talitonu ma iloa le Keriso pe a tatou lagonaina patino le mana e suia ai, faamalolo, faamalosia, ma le faapaiaina o



Lana Togiola. Tatou te talitonu ma iloa le Matai pe a [mauaa] “le mana o lana afioga i totonusi o i tatou,”<sup>35</sup> ma ua tusia i o tatou mafaufau ma loto,<sup>36</sup> ma tatou “lafoai ese [a tatou] agasala uma ina ia [tatou] iloa ai [o Ia].”<sup>37</sup>

O le talitonu ia te Ia o le faalago-lago lea i Ana faamanuiaga matalasi o loo avanoa ma talafeagai i o tatou olaga ma aiga. O le talitonu ia te Ia ma o tatou agaga atoa<sup>38</sup> e oo mai pe a tatou fetaomi atu i luma i luga o le ala o feagaiga, lafoai atu o tatou loto i Lona finagalo, ma gauai atu i Ana mea e faamuamua ma le taimi mo i tatou. O le talitonu ia te Ia—taliaina o le moni o Lona mana ma folafolaga—e valaaulia ai se vaaiga, filemu, ma le olioli i o tatou olaga.

### Folafolaga ma le Molimau

I se aso o i luma, “o le a tootutuli ai tulivae uma ma ta’uta’u atu e laulau-faiva uma”<sup>39</sup> o Iesu o le Keriso. I lena aso faamanuiaina, o le a tatou iloa ai Na te silafia i tatou uma taitoatasi i o tatou igoa. Ma ou te molimau atu ma folafola atu e le mafai ona tau na ona tatou iloa e uīga i le Alii, ae ia tatou iloa foi o Ia a o tatou faatinoina le faatuitua, mulimuli, auuna atu, ma talitonu ia te Ia. Ou te molimau atu ai i le suafa paia o Iesu Keriso, amene. ■

### FAAMATALAGA

1. James E. Talmage, *Jesus the Christ*, 3rd ed. (1916), 245–46.
2. Mataio 7:21–23.

3. Faaliliuga a Iosefa Samita, Mataio 7:33 (i le Mataio 7:23, vaefaaamatatalaga a).
4. Mataio 25:10–12.
5. Faaliliuga a Iosefa Samita, Mataio 25:11 (i le Mataio 25:12, vaefaaamatatalaga a).
6. Ioane 14:6–7.
7. Tagai 2 Nifae 2:8; 31:19; Moronae 6:4.
8. Tagai Alema 32:27.
9. *Lectures on Faith* (1985), 1.
10. Iakopo 2:20.
11. Iakopo 1:22.
12. Roma 10:17.
13. Tagai 2 Nifae 32:3; Mataupu Faavae ma Feagaiga 18:34–36.
14. Tagai Moronae 10:4.
15. Tagai Ioane 14:26; Mataupu Faavae ma Feagaiga 121:46.
16. Tagai Ioane 7:17. Ua tofu i tatou uma ma se tiutetauave e saili ma faia mea uma e mafai ona tatou faia e agavaa ai mo le meaalofa o le faatuitua. Peitai, i le faaiguia, e faaee mai e se Atua alofa ma agalelei le meaalofa i o tatou luga.
17. Mataio 4:18–20.
18. Mataio 16:24.
19. Tagai Faaliliuga a Iosefa Samita, Mataio 16:26 (i le faaopoopoga o le Tusi Paia).
20. Tagai 3 Nifae 27:27.
21. Tagai *Lectures on Faith*, 38.
22. Tagai *Lectures on Faith*, 38.
23. Alema 23:6.
24. Luka 18:22.
25. Mosaea 5:13.
26. Mataupu Faavae ma Feagaiga 84:88.
27. Tagai “Ou te Alu i Mea E te Tofia,” *Viiga*, nu. 169.
28. Helamana 10:5.
29. Tagai Mataupu Faavae ma Feagaiga 4:2.
30. Tagai Moronae 7:47.
31. Moronae 7:48.
32. Mareko 9:23–24.
33. Mataupu Faavae ma Feagaiga 84:19–20; faaopoopo le faamamafa.
34. Tagai Alema 5:14, 19.
35. Alema 26:13.
36. Tagai Eperu 8:10.
37. Alema 10:18.
38. Tagai Omina 1:26.
39. Mosaea 27:31.



Saunia e Brian K. Ashton

Fesoasoani Lua i le Au Peresitene Aoao o le Aoga Sa

# O Le Mataupu Faavae a Keriso

*O le mataupu faavae a Keriso e faatagaina i tatou ina ia maua le mana faaleagaga lea o le a siitiaina i tatou mai o tatou tulaga faaleagaga o i ai nei i se tulaga e mafai ai ona faaatoatoaina i tatou.*

**O** le asiasiga a Iesu i sa Nifae ina ua mavae Lona Toetu sa faatulagaina lelei e aoao mai ai ia i tatou mea e sili ona taua. Na amata i le molimau atu o le Tama i tagata o Iesu o Lona “Atalii Pele, o le ua [Ia] fiafia lava i ai.”<sup>1</sup> Ona afio ifo lea o Iesu Lava Ia ma molimau atu e uiga i Lana taulaga togiola,<sup>2</sup> valaau atu i tagata ia “iloa mautinoa” o Ia o le Keriso e ala i le o mai ma tagotago i faailoga o le manua i Lona itu ma tulaga o fao i Ona lima ma ona vae.<sup>3</sup> O nei molimau na faavaeina e aunoa ma le masalosalo

o le Togiola a Iesu ua atoatoa ma ua faataunuina e le Tama Lana feagaiga ina ia auina mai se Faaola. Ona aoaoina lea e Iesu o sa Nifae i le ala e maua ai faamanuiaga uma o le fuafuaga o le fiafia a le Tama, lea ua avanoa mo i tatou ona o le Togiola a le Faaola, e ala i le aoao atu ia i latou o le mataupu faavae a Keriso.<sup>4</sup>

O la’u savali i le asō e taulai atu i le mataupu faavae a Keriso. Ua faauigaina e tusitusiga paia le mataupu faavae a Keriso o se faatinoga o le faatuatua ia Keriso ma Lana Togiola, salamo,

ia papatisoina, mauaina o le meaalofa o le Agaga Paia, ma tumau e oo i le iuga.<sup>5</sup>

**O Le Mataupu Faavae a Keriso ua Mafai ai ona Tatou Maua Faamanuiaga o le Togiola a Keriso**

Ua mamanuina e le Togiola a Keriso tulaga ia atonu tatou te faalagolago i ai “i galuega, ma le alofa mutimutivale, ma le alofa tunoa o le Mesia Paia,”<sup>6</sup> “[ia] atoatoa ia Keriso,”<sup>7</sup> maua mea lelei uma,<sup>8</sup> ma maua le ola e faavavau.<sup>9</sup>

O le mataupu faavae a Keriso i le isi itu o le ala lea—pau lea o le ala—tatou te maua ai faamanuiaga uma ua faaavanaoa mai ia i tatou e ala mai i le Togiola a Iesu. O le mataupu faavae a Keriso lea e faatagaina i tatou ina ia maua le mana faaleagaga lea o le a siitiaina i tatou mai o tatou tulaga faaleagaga o i ai nei i se tulaga e mafai ai ona faaatoatoaina i tatou faapei o le Faaola.<sup>10</sup> E faatatau i lenei faagasologa o le toe fanauina, na aoao mai ai Elder D. Todd Christofferson: “O le toe fanauina, e le pei o lo tatou fananau mai i la le tino, o se faagasologa ae le o se mea ua fuafua e tupu. Ma o le galuega ai i lena faagasologa, o le faamoemoega tutotonu lea o le olaga nei.”<sup>11</sup>

Sei o tatou vailiilia ia elemene taitasi o le mataupu faavae a Keriso.

## **Muamua, faatuatua ia Iesu**

**Keriso ma Lana Togiola.** Ua aoao mai perofeta o le faatuatua e amata i le faalogo atu i afioga a Keriso.<sup>12</sup> E molimau atu afioga a Keriso e uiga i Lana taulaga togiola ma tau mai ia i tatou le ala e mafai ai ona tatou maua le faamagaloga, faamanuiaga, ma le faaeaga.<sup>13</sup>

O le faalogo i afioga a Keriso, tatou te faatino ai le faatuatua e ala i le filifili ia mulimuli i aoaoga ma faataitaiga a le Faaola.<sup>14</sup> Ina ia faia lenei mea, na aoao mai ai Nifae e ao ona tatou faalagolago “atoa i galuega a [Keriso,] o lē ua malosi aoao e laveai.”<sup>15</sup> Ona sa avea Iesu o se Atua i le muai olaga,<sup>16</sup> sa soifua i se soi-fuaga e leai se agasala,<sup>17</sup> ma i le taimi o Lana Togiola na faamalieina tulaga uma o le faamasinotonu mo oe ma a’u,<sup>18</sup> ua ia te Ia le mana ma ki e faataunu ai le toetutu mai o tagata uma,<sup>19</sup> ma o Ia ua mafai ai ona faatoilaloina e le alofa mutimutivale le faamasinotonu



i luga o tuutuuga o le salamo.<sup>20</sup> A tatou malamalama loa i lena mea o le a mafai ona tatou maua le alofa mutimutivale e ala i galuega a Keriso, o le a mafai ona tatou “maua le faatautua e salamo ai.”<sup>21</sup> O le faalagolago atoa atu i galuega a Keriso o le talitonu lea sa Ia faia le mea na manaomia e laveai ai i tatou ona faatino lea o lo tatou talitonuga.<sup>22</sup>

O le faatuatua e mafua ai foi ona tuu lo tatou popole tele e uiga i manatu o isi ia i tatou ma amata ona popole atili i mea o finagalo ai le Atua ia i tatou.

**Lua, salamo.** Na aoao mai Samuelu le sa Lamana, “Afafai tou te talitonu i le suafa [o Keriso] o le a outou salamo ia outou agasala uma.”<sup>23</sup> O le salamo o se meaalofa ttau mai lo tatou Tama Faalelagi ua mafai ona o le taulaga a Lona Alo e Toatasina na Fanaua. O se faagasologa ua tuuina mai e le Tama ia i tatou lea tatou te suia ai, po o le liliu atu, o o tatou manatu, amioga, ma o tatou lava tagata ina ia tatou avea atili faapei o le Faaola.<sup>24</sup> E le faapea ua na o mo agasala tetele ae o se faagasologa o aso taitasi o se iloiloga faaletagata lava ia ma le faaleleiga<sup>25</sup> lea e fesoasoani ia i tatou ina ia faatoilaloina a tatou agasala, o tatou le atoatoa, vaivaiga, ma o tatou faaletonu.<sup>26</sup> O le salamo e mafua ai ona avea i tatou ma “soo moni” o Keriso, lea e faatumuina i tatou i le alofa<sup>27</sup> ma lafoaia o tatou popolega.<sup>28</sup> O le salamo e le o se fua-fuaga faaleoleo i le le taunuui ai o tatou fuafuaga ia ola atoatoa.<sup>29</sup> O le salamo faifaipea ua na o le pau lea o le ala e mafai ona aumaia ia i tatou le olioli tumau ma mafai ai ona tatou toe foi e mau faatasi ma lo tatou Tama Faalelagi.

E ala atu i le salamo tatou te gauai atu ai ma le usiusitai i le finagalo o le Atua. O lenei mea e le faia na o oe. O le iloaina o le agalelei o le Atua ma lo tatou faatauvaa,<sup>30</sup> tuufaatasia ma a tatou taumafaiga sili ina ia ogatasi a tatou amioga ma le finagalo o le Atua,<sup>31</sup> e aumaia ai le alofa tunoa i o tatou olaga.<sup>32</sup> O le alofa tunoa “o auala paia ia o le fesoasoani atu po o le malosiaga, ua tuuina mai e ala i le alofa mutimutivale ma le alofa o Iesu Keriso . . . ia faia galuega lelei lea e le mafai ona [tatou] faatumauina pe a faia



ia [tatou] lava auala.”<sup>33</sup> Talu ai o le salamo e faatatau moni lava i le avea ai e pei o le Faaola, lea e le mafai ona faia na o i tatou, tatou te manaomia tele le alofa tunoa o le Faaola e faia ai ni suiga talafeagai i o tatou olaga.

A tatou salamo, o le a suia a tatou amioga tuai ma lē tonu, vaivaiga, lē atoatoa, ma popolega i ni amioga ma talitonuga fou lea tatou te latalata atili atu ai i le Faaola ma fesoasoani ina ia tatou avea faapei o Ia.

**Tolu, papatisoga ma le faamanatuga.** Na aoao mai le perfeta o Mamona faapea “o fua muamua o le salamo o le papatisoga.”<sup>34</sup> Ina ia atoatoa, e tatau ona tuufaatasia le salamo ma le sauniga o le papatisoga e faafoeina e se tasi o le umia le perisitua o le pule a le Atua. Mo tagata o le Ekalesia, o sauniga na osia i le papatisoga ma isi gaoioiga e toe faafouina pe a tatou feinu ma aai i le faamanatuga.<sup>35</sup>

I sauniga o le papatisoga ma le faamanatuga, tatou te osifeagaiga ai ina ia tausia poloaiga a le Tama ma le Alo, manatua pea Keriso, ma gauai

atu e tauave le suafa o Keriso (po o Lana galuega ma uiga paia<sup>36</sup>) i luga o i tatou.<sup>37</sup> O le Faaola, i le tali mai, ua osifeagaiga e faamagalo, po o le faamagalo o a tatou agasala<sup>38</sup> ma liligi atili mai lona Agaga i luga o i [tatou].<sup>39</sup> Ua folafola mai foi Keriso e saunia i tatou mo le ola e faavavau e ala i le fesoasoani ia i tatou ina ia avea faapei o Ia.<sup>40</sup>

Na tusia e Douglas D. Holmes, Fesoasoani Muamua i le Au Peresitene Aoao o Alii Talavou: “O sauniga o le papatisoga ma le faamanatuga e faatusaina uma i le taunuuga faaiu ma le faagasologa o le toe fanaufouina. I le papatisoga, tatou te tanuina le tagata tuai o le tino ma o mai i se olaga fou.<sup>41</sup> I le faamanatuga, ua tatou aoao ai o lenei suiga o se faagasologa auauai, [lea] i lea taimi, ma lea vaiaso, tatou te liua ai ao tatou salamo, osifeagaiga, ma e ala atu i le faateleina o faaeega paia a le Agaga [e avea ai faapei o le Faaola].”<sup>42</sup>

O sauniga ma feagaiga e taua i totonu o le matapu faavae a Keriso. O le mauaina ma le agavaa o sauniga o le perisitua ma le tausia o feagaiga e



o faatasi o le a faaalia mai ai le mana o le amioatua i o tatou olaga.<sup>43</sup> Na faamalamalama mai e Elder D. Todd Christofferson o “lenei ‘mana o le amioatua’ e sau mai le tagata ma e ala i le uunaiga a le Agaga Paia.”<sup>44</sup>

**Fa, o le meaalofa o le Agaga Paia.** A mavae le papatisoga e tuuina mai ia i tatou le meaalofa o le Agaga Paia e ala i le sauniga o le faamauga.<sup>45</sup> O lenei meaalofa, afai tatou te mauaina, o le a mafai ai ona tatou maua le mafutaga faifai pea o se Atua<sup>46</sup> ma faaaauau pea ona maua le alofa tunoa lea e avea ma se vaega ttau o Lana faatosinaga.

I le avea ai ma o tatou soa tumau, o le a tuuina mai e le Agaga Paia ia i tatou le mana po o le malosiaga faaopoopo e tausia ai a tatou feagai-ga.<sup>47</sup> Na te faapaiaina foi i tatou,<sup>48</sup> o lona uiga o le “saoloto mai le agasala, ua mama, faamamaina, ma faapaiaina e ala i le togiola a Iesu Keriso.”<sup>49</sup> O le faagasologa o le faapaiaga e le gata ua faamamaina i tatou, ae ua faaee mai ia i tatou ni meaalofa faaleagaga e manao-mia po o ni uiga paia o le Faaola<sup>50</sup> ma suia o tatou lava natura,<sup>51</sup> i se tulaga “ua le o toe i ai so [tatou] manao e fai

mea leaga.”<sup>52</sup> O taimi uma tatou te talia ai le Agaga Paia i o tatou olaga e ala i le faatuatua, salamo, sauniga, auauanaga faaKeriso, ma isi taumafaiga amiotonu, ua suia i tatou seia oo i lea laa ma lea laa, sina mea itiiti ii ma sina mea itiiti i o ia avea ai i tatou faapei o Keriso.<sup>53</sup>

**Lima, tumau e oo i le iuga.** Na aoao mai le perofeta o Nifae a uma ona maua le meaalofa o le Agaga Paia, e ao ona tatou “tumau . . . sei oo i le iuga, i le mulimuli lea i le faataitaiga a le Alo o le Atua soifua.”<sup>54</sup> Ua faamatalaina e Elder Dale G. Renlund le faagasologa o le tumau e oo i le iuga faapenei: “E mafai ona faaatoatoaina i tatou e ala i le faateleina o le faalagolago atoa e le aunoa . . . faatinoina o le faatuatua ia [Keriso], salamo, tau mamafa ma feinu i le faamanatuga e faafou ai feagaiga ma faamanuiaga o le papatisoga, ma le mauaina o le Agaga Paia e fai ma soa tumau i se tulaga maualuga atu. A tatou faia lea mea, e avea atili i tatou e faapei o Keriso ma ua mafai ona tumau e oo i le iuga, ma mea uma e aofia ai.”<sup>55</sup>

I se isi faaupuga, o le taliaina o le Agaga Paia ma suiga ia e fatuina i totonu o i tatou o le a fausia atili ai lo

latou faatuatua. O le faateleina o le faatuatua e taitai atu ai i le salamo faaopoopo. Ao tatou ositaulagaina faafaaatusa o tatou loto ma a tatou agasala i luga o le fatafitaulaga, o le a tatou maua le Agaga Paia i se tulaga sili atu. O le mauaina o le Agaga Paia i se tulaga sili atu e uunaia atili ai i tatou i le ala o le toe fanaufouina. A o tatou faaaauau pea i lenei faagasologa ma maua sauniga ma feagaiga faaola uma o le talalelei, o le a tatou maua le “alofa tunoa mo le alofa tunoa” seja tatou maua le atoaga.<sup>56</sup>

#### E Tatau ona Tatou Faaaogaina le Mataupu Faavae a Keriso i o Tatou Olaga

Uso e ma tuafafine, ao tatou faaaogaina le mataupu faavae a Keriso i o tatou olaga, ua faamanuiaina faaletino ma faaleagaga i tatou, e oo lava i tofotofoga. O le a iu ina mafai ona tatou “taofi mau i mea lelei uma.”<sup>57</sup> Ou te molimau atu ua tupu lenei faagasologa ma e faaaauau pea ona tupu i lo’u lava olaga, i lea laasaga ma lea laasaga, i sina mea itiiti ma sina mea itiiti.

Ae o le mea sili ona ttau, e ao ona tatou faaaogaina le mataupu faavae a Keriso i o tatou olaga aua ua saunia ai le ala lava e tasi e toe foi atu ai i lo tatou Tama Faalelagi. Ua na o le pau lea o le ala e talia ai le Faaola ma avea ai ma Ona atalii ma afafine.<sup>58</sup> O le mea moni, ua na o le pau le ala ia magalo ai mai agasala ma agai ai i luma faale-agaga o le faaaogaina lea o le mataupu faavae a Keriso i o tatou olaga.<sup>59</sup> I se isi itu, na aoao mai le Apostolo o Ioane faapea “o i latou . . . e le tumau i le mataupu ia Keriso, e le o ia te i latou le Atua.”<sup>60</sup> Ma na fofoga atu e Iesu Lava Ia i le Toasefuluhia i sa Nifae afai tatou te toilalo i le faatinoina o le faatuatua ia Keriso, salamo, ia papatisoina, ma tumau ia oo i le iuga, o le a “tattu ifo i lalo [i tatou] ma lafo i le afi, o se mea e le mafai ona [tatou] toe foi mai ai.”<sup>61</sup>

E faapefea la ona tatou faaaogaina ma le atoatoa le mataupu faavae a Keriso i o tatou olaga? O se tasi o auala o le faia o se taumafaiga magafagafai i vaiaso taitasi e saunia ai mo le faamanatuga i le faaluina o sina taimi e mafau-fau ai ma le agaga tatalo i mea e sili ona manaomia ai se faaleleiga. O le a tatou

mafai loa ona tatou aumaia i luga o le fata faitaulaga se mea se tasi o loo taofia i tatou mai le avea faapei o Iesu Keriso, ia ole atu i le faatuatua mo se fesoasoani, ole atu mo meaalofa faaleagaga talafeagai, ma osifeagaiga ia faaleleia i le vайасо a sau.<sup>62</sup> A o tatou faia lena mea, o le a oo mai le Agaga Paia i o tatou olaga i se tulaga sili atu, ma o le a tatou maua se malosiaga faaopoopo e faatoilalo ai o tatou le atoatoa.

Ou te molimau atu o Iesu Keriso o le Faaola o le lalolagi ma ua na o Lona suafa e mafai ona laveaiina ai i tatou.<sup>63</sup> Ua na o Ia e ala mai ai mea lelei uma.<sup>64</sup> Ae o le “taofi mau i mea lelei uma,”<sup>65</sup> e aofia ai le ola e faavavau, e tatou ona faaauau pea ona tatou faaaogaina le mataupu faavae a Keriso i o tatou olaga. I le suafa paia o Iesu Keriso. ■

#### FAAMATALAGA

1. 3 Nifae 11:7.
2. Tagai 3 Nifae 11:10–11.
3. Tagai 3 Nifae 11:14–15.
4. Tagai 3 Nifae 11:21–39.
5. Tagai 2 Nifae 31; 3 Nifae 27:16–20. O loo maua le mataupu faavae a Keriso i tusitusiga paia uma ae e matele lava i le Tusi a Mamona. 6. 2 Nifae 2:8.
7. Moronae 10:32.
8. Tagai Moronae 7:22–24.
9. Tagai Mataupu Faavae ma Feagaiga 132:23.
10. O le tuuafatasiga o le Togiola a Keriso ma le mataupu faavae a Keriso ua faavaeina ai le talalelei a Keriso (tagai 3 Nifae 27:13–21).
11. D. Todd Christofferson, “Toe Fanauina,” *Liahona*, Me 2008, 78.
12. Tagai Roma 10:17; 2 Nifae 31:19; Alema 32:27–29; Moronae 7:25.
13. Tagai 2 Nifae 32:3.
14. Tagai 2 Nifae 31:10, 13.
15. 2 Nifae 31:19.
16. Tagai Ioane 1:1–3; Mose 7:47; Aperaamo 3:24–27.
17. Tagai Eperu 4:15; Mataupu Faavae ma Feagaiga 45:4.
18. Tagai Alema 34:16.
19. Tagai 2 Nifae 9:21–22; Dallin H. Oaks, “O Ki ma le Pule o le Perisitua,” *Liahona*, Me 2014, 49–52.
20. Tagai Alema 34:15–16.
21. Alema 34:15.
22. O le faalagolago atoa i galuega a Keriso e aofia ai le iloaina ua na o Iesu Keriso le punavai o le togiolaina (tagai Mosaea 4:7–8). E manaomia ai foi lo tatou talitonu e mafai e Keriso ona laveaiina i tatou o ni tagata taitoatasi. O se tasi na o mafuaaga o i le Mataupu Faavae ma Feagaiga 27:2, ua faatonuina ai i tatou a tatou aai ma feinu i le faamanatuga, e le na o lo tatou manatuaina o mafatiaga o Keriso ae o mea sa la faia foi mo i tatou taitoatasi.
23. Helamana 14:13.
24. Tagai Russell M. Nelson, “Salamo ma le Liuaina,” *Liahona*, Me 2007, 102–5.



25. Tagai Neil L. Andersen, “Salamo ... Ina Ia Ou Faamaloloina Outou,” *Liahona*, Nov. 2009, 40–43.
26. Tagai Jeffrey R. Holland, “O Mea Malepelepe e Fonofonoina,” *Liahona*, Me 2006, 69–71; Anthony D. Perkins, “O Le Alofa Tele ma le Ofoofogia,” *Liahona*, Nov. 2006, 76–78.
27. Moronae 7:48.
28. Tagai Moronae 8:16. E moni o lo tatou salamo o se tasi lea o faamaoniga autu o i tatou o soo o le Faaola. E mafai moni ea ona tatou faapea atu o loo mulimuli ia Keriso pe afai tatou te le o faaauau pea ona salamo pe o taumafai ia liliu atu o tatou loto ma galuega ia te Ia?
29. Tagai *Fetuunai i le Olaga Faafaifeatalai* (tamaitusi, 2013), 46.
30. Tagai Mosaea 4:5–7.
31. Tagai 2 Nifae 10:24; 25:23.
32. Tagai Helamana 5:11; Eteru 12:27; Moronae 10:32–33.
33. Bible Dictionary, “Grace.”
34. Moronae 8:25.
35. A tatou aai ma feinu ma le agavaa i le faamanatuga, ua tatou faafouina a tatou feagaiga ma le Atua (tagai Delbert L. Stapley, i le Conference Report, Oct. 1965, 14; L. Tom Perry, “Ao Tatou Fetagofii Atu Nei i le Faamanatuga,” *Liahona*, Me 2006, 41).
36. Tagai Dallin H. Oaks, “Molimau” (o le lauga na tuuina atu i le semina mo peresitene fou o le misionia, 25 Juni, 2014), 1–2.
37. Tagai Moronae 4:3; tagai foi Mosaea 18:8–10; Mataupu Faavae ma Feagaiga 20:37 mo nisi feagaiga tatou te osia i le papatisoga.
38. Tagai Moronae 8:25.
39. Mosaea 18:10.
40. Tagai 2 Korinito 3:18; Eteru 12:27; Mataupu Faavae ma Feagaiga 35:2; Mose 1:39.
41. Tagai Roma 6:4.
42. Douglas D. Holmes, “Come unto Christ—the Doctrine of Christ,” unpublished manuscript.
43. Tagai Mataupu Faavae ma Feagaiga 84:19–21.
44. D. Todd Christofferson, “O Le Mana o Feagaiga,” *Liahona*, Me 2009, 22.
45. O le faamauga e faia i le faaee atu o lima (tagai, mo se faataitaiga, Galuega 8:17).
46. Tagai Mataupu Faavae ma Feagaiga 20:28; O Le Taiala i Tusitusiga Paia, “Agaga Paia,” scriptures\_lds.org.
47. Tagai 2 Korinito 3:18; 1 Nifae 14:14; Mataupu Faavae ma Feagaiga 93:20.
48. Tagai 3 Nifae 27:20.
49. Taiala i Tusitusiga Paia, “Faapaiaga, (Sanctification),” scriptures\_lds.org.
50. Tagai Moronae 7:48; 8:26; 10:8–18.
51. Tagai Mosaea 4:14; Mataupu Faavae ma Feagaiga 84:33; Bruce R. McConkie, “The Ten Blessings of the Priesthood,” *Ensign*, Nov. 1977, 33–35.
52. Mosaea 5:2.
53. E taialaina foi i tatou e le Agaga Paia ia toe foi ati i le Tama oi le Lagi (tagai 2 Nifae 32:5; Mataupu Faavae ma Feagaiga 45:57) i le fesoasoani mai ia i tatou ia iloa mea e ao ona tatou faia ia avea ai e pei o Keriso (tagai 2 Korinito 3:18; Eteru 12:27; Mataupu Faavae ma Feagaiga 84:46–48).
54. 2 Nifae 31:16. O le tumau seia oo i le iuga ua talafeagai lava le faaigoaina, ua e manaomia uma ai le taimi ma le onosai (tagai Iakopo 1:2–4). O le mea moni e le mafai ona tatou atinaeina nisi uiiga faaKeriso e aunoa ma le fetaiia ma fetauaiga ma faigata. Mo se faataitaiga, e faapefia ona tatou avea ma tal-tigi pe afai e le manaomia ona tatou mafatia mo se taimi umi?
55. Dale G. Renlund, “Le Au Paia o Aso e Gata Ai, Taumafai Pea,” *Liahona*, Me 2015, 56.
56. Tagai Mataupu Faavae ma Feagaiga 93:12, 19.
57. Moronae 7:25; tagai foi Mosaea 2:41.
58. Tagai Mataupu Faavae ma Feagaiga 39:4–6.
59. Tagai 2 Nifae 9:24.
60. 2 loane 1:9.
61. 3 Nifae 27:17.
62. Atonu e masani ona aumai e se tasi le tau-laga lava e tasi mo le tele o vайасо seiologa, faatasi ai ma le fesoasoani a le Faaola, ma e pei ona aoao mai e Elder Neal A. Maxwell, “ua uma ona totogiiina” (“Ia Teena e Outou le Amioletonu Uma,” *Liahona*, Jul. 1995, 64).
63. Tagai 2 Nifae 25:20.
64. Tagai Moronae 7:24.
65. Moronae 7:25.



Saunia e Elder Carl B. Cook  
O Le Fitugafulu

# Auauna Atu

*E manaomia tagata uma, ma e manaomia e tagata uma  
se avanoa e auauna atu ai.*

**A**o ou laitiiti ou te fiafia lava e galulue faatasi ma le uso o lou tama o Lyman ma lona toalua o Dorothy i le la faatoaga. Na masani lava ona taitaia e Lyman la matou galuega, ao Dorothy e fesoasoani ma aveina le loli tuai o le Dodge. Ou te manatua le lagona popole pe a mau i le palapala pe taumafai e ae i se tamai aega: E valaau atu Lyman, “Tuu i le kia malosi, Dorothy!” O le taimi lena e amata ai ona ou tatalo. Ae, faatasi ai ma le fesoasoani a le Alii ma le mavae ai o le pao o kia, e maua ai e Aunt Dorothy le kia malosi. Faatasi ai ma le lokaina o pau uma e fa ma le agai atu i luma o le loli maaauai ai loa la matou galuega.

“O le “Tuuina i le kia malosi” e faatatau lea i le suiina i le kia faapi-toa lea e faatulaga ai isi kia ia galulue faatasi ina ia atili ai ona malosi.<sup>1</sup> O le kia malosi, faatasi ai ma le tuuina ia ‘ai uma pau e fa, e mafai ai ona e suia i se kia maualalo ma maua ai le malosi, ma agai ai i luma.

Ou te fia mafaufau ia i tatou taito-tasi o se vaega o le kia malosi ao tatou auauna atu ai faatasi i le Eklesia—i uarota ma paranesi, i korama ma ausilali. E pei lava ona tuufaatasia ia kia ina ia maua ai atili le malosi, ua sili atu foi lo tatou malolosi pe a tatou tutu faatasi. A tatou aufaatasi e auauna atu i isi, ua

sili atu mea tatou te ausia faatasi nai lo nao i tatou. E faagaeetia le auai ma le lotogatasi ao tatou auauna atu ma fesoasoani i le galuega a le Alii.

## O Le Auauna Atu o se Faamanuiaga

O le avanoa e auauna atu ai o se tasi o faamanuiaga maoae o le auai i le Eklesia.<sup>2</sup> Na fetalai mai le Alii, “Afai e te alofa mai ia te a’u, e te auauna mai ia te a’u,”<sup>3</sup> ma auauna atu ia te Ia e ala i le auauna atu i isi.<sup>4</sup>

Ma a tatou auauna atu, ua tatou latala atili atu i le Atua.<sup>5</sup> O le a tatou iloina o Ia i auala atonu tatou te le mailoa. O le a faateleina lo tatou faatuatua ia te Ia. O le a faia se ililogia o a tatou faafitauli. O le a amata ona faamalie-in atili le olaga. O le a faateleina lo tatou alolofa mo isi, faapea ma o tatou manaoga e auauna atu. E ala atu i lenei faagasologa faamanuiaina, o le a avea atili ai i tatou e faapei o le Atua, ma tatou lava saunia e toe foi atu ia te Ia.<sup>6</sup>

E pei ona aoao mai Peresitene Marion G. Romney: “O le auauna atu e le o se mea tatou te tigaina ai i lenei lalolagi ina ia tatou maua ai le aia tatau e nonofo ai i le malo selesitila. O le auauna atu o uiga tonu lea e faavae ai se olaga faaeaina i le malo selesitila.”<sup>7</sup>

## O Le Auauna Atu e Mafai ona Luitauina

Ae peitai, o le auauna atu i le Eklesia, e mafai ona faigata pe luitauina pe a talosagaina i tatou e faia se mea tatou te fefefe ai, pe a tatou le lavava e auauna atu, pe afai ua valaauina i tatou e fai se mea tatou te lei muamua fuafua i ai.

Talu ai nei sa ou maua ai se vala-auga fou. Sa ou galue i le Eria o Aferika Sautesasae. O se mea faagaeetia le auauna atu i se nofoaga e fou ma ua faatuina ai le Eklesia, ma e ma te alolofa i le Au Paia. Ona valaauina lea o a’u e toe foi i le laumua o le Eklesia,



ma o se tala moni, sa leai sou naunau-taiga. O se suiga i tofiga na aumai ai le le mailoa.

I se tasi po ina ua uma ona manutatu i suiga o le a oo mai, sa ou miti e uiga i le tamamatua o le tamamatua a lo'u tama o Iosefa Skeen. Sa ou iloa mai lana api talaaga ina ua la masii mai ma lona toalua, o Maria, i Navu, sa ia manao e galue, o lea sa ia sailia ai le Perofeta o Iosefa Samita ma fesili atu pe faapefesa ona ia fesoasoani atu. Sa auina atu o ia e le Perofeta e galue i le vao ma fai atu ia te ia fai le mea sili na te mafaia, ma sa ia faia. Na faigaluega o ia i le faatoaga a le aiga o Samita.<sup>8</sup>

Sa ou mafaufau i avanoa sa maua e Iosefa Skeen i le mauaina o lona valaauga i lena auala. Na faafusei lava ona ou iloaina e tutusa lava i ma'ua, pei o i tatou uma. O valaauga uma o le Ekalesia e sau mai le Atua—e ala mai i Ana auauna tofia.<sup>9</sup>

Sa ou lagona se faamautinoaga faaleagaga tulaga ese faapea na musuia lo'u valaauga fou. E taua lo tatou faia o lena fesootaiga—o o tatou valaauga e aumai sa'o lava ia i tatou mai le Atua e ala mai o tatou taitai perisitua. Ina ua mavae lenei aafiaga, na suia ou uiga, ma sa faatumulua a'u i se manaoga loloto ia auauna atu. Ou te faafetai mo faamanuiaga o le salamo ma mo le suia o lo'u loto. Ou te fiafia i lo'u tofiga fou.

E tusa lava pe tatou te mafaufau o o tatou tofiga o se manatu o o tatou taitai perisitua, pe na tatou mauaina ona e leai se tasi na taliaina, o le a faamanuiaina i tatou pe a tatou auauna atu. Ae a tatou iloa atu le aao o le Atua i o tatou valaauga ma auauna atu ma o tatou loto atoa, o le a oo mai se mana faoopoopo i la tatou auaunaga, ma o le a avea i tatou ma auauna moni a Iesu Keriso.

#### O Le Auauna Atu e Manaomia ai le Faatuatua

O le faataunuina o valaauga e manaomia ai le faatuatua. I se taimi puupuu talu ona amata faigaluega Iosefa i le faatoaga, sa matua mama'i lava i laua ma Maria. Sa leai ni a la tupe ma sa faatasi ma tagata ese. Sa avea ma se taimi faigata mo i la'ua. Sa tusia e Iosefa i lana api talaaga, "Sa faaauau



pea ona ma galulue [ma] tumau faamoni i le Ekalesia i le faatuatua ititi sa ia i ma'ua, e ui sa taumafai le tiapolo e faaumatia ma toe faafoi ma'ua i tua."<sup>10</sup>

O a'u, ma le fia selau o isi na tupuga mai ai, o le a faavavau pea ona faafetai i le le toe foi o Iosefa ma Maria. E oo mai faamanuiaga pe a tatou tumau i o tatou valaauga ma tiute ma taofimau ma le faatuatua uma ua tatou maua.

Ou te iloa se faiaoga lelei o le Aoaoga Faavae o le Talalelei o le uunaia tagata o le vasega pe a ia aoao atu, ae e le o le tulaga lena sa i ai i taimi uma. Ina ua uma ona auai i le Ekalesia, sa ia maua se valaauga e faiaoga i le Peraimeri. Sa ia lagona le leai o ni ona tomai faafaaiaoga, ae talu ai sa ia iloa le taua o le auuuna atu, o lea na ia taliaina ai. Na vave ona lofituina o ia e le fefe, ma sa ia le toe auai mai ina ia auu ai nei ona faiaoga. O le mea e faafetai ai, na iloa e ona faiaoga o aiga lona le auai mai, asia o ia, ma valaaulla o ia e toe foi mai. Sa fesoasoani le epikopo ma tagata o le uarota ia te ia. Mulimuli ane, faatasi ai ma le faateleina o le faatuatua, sa amata ona ia aoao atu le fanau. Ao ia faaaogaina mataupu faavae ua aoaoina nei i le *Aoao Atu i le Ala a le Faaola*, sa faamanuiaina ana

taumafaiga e le Alii, ma sa avea o ia ma se faiaoga talenia.<sup>11</sup>

Ua uunaia i tatou e le tagata o le natura o i totolu o i tatou tatou te faia ni alofaaga mai le auuuna atu mo mafuaaga e pei o le "Ou te le o sauna; e tele nisi mea e tatau ona ou aoao i ai," "Ua ou lelava ma e manaomia se malologa," "Ua ou matua tele—o le taimi lenei o se isi tagata," po o le "Ua ou matua pisi lava."

Usi e ma tuafafine, o le taliaina ma le faataunuina o se valaauga o se faatinoga o le faatuatua. E mafai ona tatou faalagolago atu i mea e aoao soo mai e lo tatou perofeta, o Peresitene Thomas S. Monson: "O lē ua valaauna e le Alii, e faagavaaina e le Alii," ma "Pe a tatou i ai i le galuega a le Alii, ua agavaa i tatou mo le fesoasoani a le Alii."<sup>12</sup> Pe o tatou lofituina pe le lofituina, pe o tatou matua fefefe pe matua iva, e finagalo le Alii ina ia tatou tuu i le kia malosi ma ia malolosi ma auuuna atu.

Ou te le o vaia ni faailoga o Pere-sitene Monson ma ana paaga i le Au Peresitene Sili ma le Korama a le Toasefululua ua pisi tele pe ua le lavava tele. Latou te faataitai mai i se auala musuia le malosi e oo mai i o tatou olaga pe a tatou faatinoa le faatuatua, talia tofiga,



ma faataunuina ma le tautinoga ma le tuuto. Latou te “tuu atu [o latou tauau] ma tulei”<sup>13</sup> i le tele o tausaga ua mavae, ma o loo latou faaaauau pea ona tulei i luma, agai i luma, ma luga.

Ioe, latou te galulue i valaauga taua, ae o valaauga po o tofiga *uma* e taua. Na saunoa Peresitene Gordon B. Hinckley, o se perofeta ma le Peresitene o le Ekalesia ua mavae: “O loo tatou galulue faatasi i lenei galuega sili. . . . O lau galuega e taua tele i le tulaga o lou lava tiutetauave, e pei foi o la’u galuega i lo’u tulaga. E leai se valaauga i lenei ekalesia e faatauvaa pe ititi foi lona taui.”<sup>14</sup> E taua valaauga uma.<sup>15</sup>

#### **Sei o Tatou Auauna Atu**

Ia tatou tutulai ae i le faatuatua, “tuu atu [o tatou tauau] ma tulei,” ma uunaia lenei “galuega taua.”<sup>16</sup> Sei o tatou “tuuina i le kia malosi,” faatasi ai ma Aunt Dorothy. I le avea ai ma uso ma tuafafine, ia tatou auauna atu.

Afai e te manao ia faafafiaina lou epikopo po o le peresitene o le paranesi, fesili atu ia te ia “E faapefea ona ou fesoasoani atu?” “O fea e finagalo le Alii ou te auauna atu ai?” Ao ia tatalo ma mafaufau i ou tiutetauave patino, faaleaiga, ma faalegaluega, o le a musuia o ia e tuu atu se valaauga talafeagai. A vaetofiaina oe, o le a e maua se faamanuiaga faaleperisitua e fesoasoani e faamanuiaina oe. O *le a* faamanuiaina oe! E manaomia tagata

uma, ma e manaomia e tagata uma se avanoa e auauna atu ai.<sup>17</sup>

#### **O Iesu Keriso o lo Tatou Faataitaiga Sili**

O Iesu Keriso, lo tatou Faataitaiga Sili, na tuuina mai Lona soifua i le galuega a Lona Tama. I le Fono Tele ao lei faia lenei lalolagi, o Iesu, o le na filifilia ma fauuina mai le amataga, na ofo mai, “O A’u lenei, auina atu a’u.”<sup>18</sup> O le faia o lea mea, na avea moni ai o Ia ma auauna o i tatou uma. E ala mai ia Iesu Keriso ma le mana ua tatou maua e ala i Lana Togiola, ua mafai ai foi ona tatou auauna atu. O le a Ia fesoasoani mai ia i tatou.<sup>19</sup>

Ou te alofa tele i nisi o outou o e atonu e le mafai ona auauna atu i le Ekalesia i le taimi nei i auala e masani ai ona o tulaga faaletagata lava ia ae o loo ola i se olaga o le agaga o le auaunaga. Ou te tatalo ina ia faamanuiaina outou i a outou taumafaiga. Ou te faailoa atu foi le agaga talisapaia ia i latou o e o faalauteleina valaauga i vaiaso taitasi, faapea foi ma i latou o e e le o toe mamao ona taliaina ni valaauga e auauna atu. O saofaga ma ositaulaga uma e taua tele, aemaise lava mai ia te Ia o le o loo tatou auauna atu i ai. O i latou uma o e auauna atu o le a maua le alofatunoa o le Atua.<sup>20</sup>

Po o a lava o tatou matutua po o tulaga, ia avea le auauna atu ma a tatou “tu masani.”<sup>21</sup> Auauna atu i lou valaauga. Auauna atu i se misiona. Auauna atu i lou tina. Auauna atu i se tagata ese. Auauna atu i lou tuaoi. Tau lava o le auauna atu.

Tau ina ia faamanuia i tatou tai-toatas i le Alii ia tatou taumafaiga ia auauna atu ma avea ma soo moni o Iesu Keriso.<sup>22</sup> Ou te molimau atu o loo soifua o Ia ma taitaia lenei galuega. I le suafa o Iesu Keriso, amene. ■

#### **FAAMATALAGA**

1. Tagai “Compound Gears,” [technologystudent.com/gears1/gears3.htm](http://technologystudent.com/gears1/gears3.htm); “Compound Gear Reduction,” curriculum. vexrobotics.com.
2. Tagai *Tala’i La’u Talalelei: O Se Taiala mo le Galuega Faafaeatalai* (2004), 87.
3. Mataupu Faavae ma Feagaiga 42:29; tagai foi Mataupu Faavae ma Feagaiga 59:5.
4. Tagai Mataio 25:40; Mosaea 2:17.
5. Tagai Ioane 12:26.
6. Tagai Mataupu Faavae ma Feagaiga 81:4–6.
7. Marion G. Romney, “The Celestial Nature of Self-Reliance,” *Ensign*, Nov. 1982, 93.
8. Tagai Joseph Skeen, reminiscences and diary, 7, Church History Library, Salt Lake City; see also *Journal and History of Joseph Skeen*, ed. Greg S. Montgomery and Mark R. Montgomery (1996), 23.
9. Tagai Mataupu Faavae ma Feagaiga 1:38; Mataupu Faavae o le Faatuatua 1:5.
10. Skeen, reminiscences and diary, 8, ua faalaugatasia le sipelaga ma failogatusi; tagai foi *Journal and History of Joseph Skeen*, 23; Luk 22:31; 2 Nifae 28:19–24; Alema 30:60; Mataupu Faavae ma Feagaiga 10:22–27.
11. Tagai *Aoao Atu i le Ala a le Faaola* (2016), 37–38; *Tusitalaulima 2: Taitaina o le Ekalesia* (2010), 5.3, 5.5.4.
12. Thomas S. Monson, “Tiute o Valaauga,” *Liahona*, Julai 1996, 52.
13. “Uunai Atu ia ma Tulei,” *Viiga*, nu. 163.
14. Gordon B. Hinckley, “O Le Galuega Lenei a le Matai,” *Liahona*, Julai 1996, 76–79.
15. Saunoa mai foi Peresitene Hinckley: “E te maua se avanoa sili mo le faamalieina i le faia o lou tiute e pei foi o a’u i lo’u tiute. O le alualu i luma o lenei galuega e faalagolago lea ia tatou taumafaiga tuuafatasi. Po o le a lava lou valaauga, ia faia i le agaga lava lea e tasi ia maua ai le lelei e pei foi ona ou faia i lo’u valaauga. O le mea sili ona taua ona o lenei galuega o le galuega a le Matai. O la tatou galuega o le o atu lea ma faia mea lelei e pei ona sa Ia faia” (“O Le Galuega Lenei a le Matai,” 78).
16. Na saunoa mai Peresitene Thomas S. Monson: “E faapefea ona faalauteleina e se tasi se valaauga? E faigofe lava, e na o le faataunuina lava o le auaunaga e faataauai i ai” (“Tiute o Valaauga,” 51).
17. Tagai Alema 37:6.
18. “Uunai Atu ia ma Tulei,” *Viiga*, nu. 163.
19. Tagai *Tusitalaulima 2*, 3.3.1, 3.3.3, 19.1.1, 19.4. “O le auauna atu o alii ma tamaitai ma tamaiti ma teineiti, e faataunuai ai le galuega a le Atua” (*Aoao Faavae o le Talalelei* [2009], 178).
20. Aperaamo 3:27.
21. Tagai Mataupu Faavae ma Feagaiga 76:5.
22. Tagai Mosaea 6:26 PM.
23. “They, the Builders of the Nation,” *Hymns*, no. 36.
24. Tagai Moronae 7:48 AM.



Saunia e Elder Ronald A. Rasband  
O Le Korama a Aposetolo e Toasefululua

## Ne'i Galo ia te Oe

Ou te fautuaina outou ia manatua, aemaise lava i taimi o faigata, le taimi na e lagona ai le malosi o le Agaga ma lau molimau; manatua ia faavae faaleagaga na e fausia.

Talofa, uso e ma tuafafine pele. Ua faamanuiaina tele i tatou i lenei konafesi. Ua matua faamauala-loina a'u i lo'u tausaga muamua o se sii o le Korama a Aposetolo e Toasefululua. O se tausaga sa manaomia ai le tele o taumafaiga patino, sa i ai le tuputupu ae faaletagata lava ia ma tatalo faifai pea i le Tama oi le Lagi. Sa ou lagona ia tatalo o le lagolagosua a aiga, uo, ma tagata o le Ekalesia i le lalolagi atoa. Faafetai mo o outou manatu ma tatalo.

Sa ou maua foi le avanoa e feiloai ai i uo ou te alofa i ai, o nisi sa ou iloa mo le tele o tausaga ma le toatele sa ou feiloai i ai talu ai nei. O le maea ai o se feiloaiga ma se uo pele sa ou masani ma alofa i ai mo le tele o tausaga sa ou lagona ai le fiafia e saunia la'u lauga i le aso.

Ina ua ma feiloa, sa tautino mai e la'u uo sa tauivi o ia [faaleagaga]. Sa ia lagona sa ia oo, e faaaoga ai ana upu, i se "tulaga faigata o le faatuatua" ma saili la'u fautuaga. Sa ou lagona le faafetai sa ia faasoa mai ona lagona ma popolega ia te au.

Sa ia failoa mai se manao tele mo mea sa ia lagona muamua faaleagaga ma mea ua ia manatu nei o le a ia misia. A o ia talanoa mai, sa ou faalogo

ma le toto'a ma tatalo faatauanau ia iloa le mea e finagalo le Alii ou te tau atu.

Atonu o la'u uo, e pei o nisi o outou, sa faia se fesili faigofie ua faa-upuina i le pese Peraimeri: "Le Tama e, o e i ai [moni] iina?"<sup>1</sup> Mo i latou atonu o loo faia lenei fesili e tasi, ou te fia faasoa atua ma outou le fautuaga na ou tuuina atu i lau uo ma faamoemoe tou te maua ai le faamalosia o le faatuatua


ma faafouina lou naunautaiga e avea o se soo tuuto a Iesu Keriso.

Ou te amata i le faamanatu atu o oe o se atalii po o se afafine o se Tama oi le Lagi alofa ma e tumau pea Lona alofa. Ou te iloa e faigata le manatua o na lagona mautinoa o le alofa pe a e i ai i le lotolotoi o faigata po o tofotofoga faaletagata lava ia, le fiafia po o mana-oga ua le taunuu.

E silafia e Iesu Keriso faigata ma tofotofoga ogaoga. Na Ia tuuina mai lona soifua mo i tatou. O ona itula mulimuli sa tumu i le sauaina, e sili atu i soo se mea e mafai ona tatou malama-malama i ai, ae o Lana taulaga o se faailoga silisili o Lona alofa mama mo i tatou uma.

O le a le suia e se mea sese, agasala, po o se filifiliga le alofa o le Atua mo i tatou. E le faapea la ua faatagaina ai amioga leaga, pe aveesea ai lo tatou tiute ia salamo pe a faia ni agasala. Ae *aua nei galo* e silafia ma alofa le Tama Faalelagi ia te outou taitoatasi, ma e saunia pea o Ia e fesoasoani mai.

A o ou mafaufau i le tulaga o la'u uo, sa ou mafaufau i le tele o le atamai o loo maua i le Tusi a Mamona: "Ma o lenei, ou atalii e, ia manatua, ia manatua o luga lava o le papa o lo tatou Togiola, o le o Keriso lea, le Alo o le Atua, e ao ina oulua atinae ai lo





oulua faavae; ina ia pe a auina mai e le tiapolo ana matagi malolosi, ioe, ana ufanafana i le asiosio, ioe, pe a pesi mai ia te oulua ana uatoa uma ma lana afa malosi, o le a leai sona mana i luga o oulua e tofo ifo ai oulua i lalo i le to o le pagatia ma le malaia e le gata, ona o le papa lea ua oulua atinæ ai i luga, o le faavae mautinoea lea, o se faavae lea afai e atiae ai tagata e le mafai lava ona paau i latou.<sup>2</sup>

Ou te molimau atu “o le vanu o le pagatia ma le malaia” o se nofoaga e leai se tasi e fia nofo ai. Ma sa lagona e la’u uo lona latalata ai i le vanu.

A ou fautuaina ni tagata, e pei o la’u uo, ou te sailia o latou faaiuga na faia i le tele o tausaga ma taitai atu ai i latou e faagalo aafiaga paia, ia vaivai, ma ia masalosalo. Sa ou fautuaina i latou, e pei ona ou fautuaina outou i le taimi lenei, ia manatua aemaise lava i taimi o faigata, le taimi na e lagona ai le Agaga ma le malosi o lau molimau; manatua ia faavae faaleagaga na e fausia. Ou te folafola atu a outou faia lenei mea, ma aloese mai mea e le fausia ma faamalosia ai lau molimau po o mea e faitioina

ai au talitonuga, o le a e toe manatua i lou mafaufau na taimi pele na tuputupu ae ai lau molimau e ala i le tatalo lotomaualalo ma le anapogi. Ou te faamautinoa atu ia te oe o le a e toe lagona le saogalemu ma le mafanafana o le talalelei a Jesu Keriso.

E tatau ia i tatou ona faamalosia muamua i tatou lava faaleagaga ona faamalosia ai lea o i latou o siomiaina i tatou. Mafaufau loloto e le aunoa i tusitusiga paia, ma manatua manatu ma lagona na e oo i ai a o e fatauina. Saili atu foi i isi punavai o le upumoni, ae ia mulimuli i lenei lapataiga mai tusitusiga paia: “Peitai e lelei le aoaoina pe *afai* latou te faalogologo i fautuaga a le Atua.”<sup>3</sup> Auai i sauniga Lotu, aemaise le sauniga faamanatuga, ma aai ma feinu i le faamanatuga ma faafou feagaiga, e aofia ai le folafolaga ia manatua pea le Faaola, ina ia faatasi pea le Agaga ma outou.

Po o a mea sese sa tatou faia po o ni lē atoatoa tatou te lagonaina, e mafai lava ona tatou siitia ma faamanuiaina isi. O le aapa atu ia i latou i auaunaga faaKeriso e mafai ona fesoasoani ia i

tatou e lagona le loloto o le alofa o le Atua i o tatou loto.

E taua le manatua o le fautuaga mamana o loo maua i le Teuteronomie: “Ia e matua faaeteete lava ia te oe, *ne’i galo ia te oe* nei mea na iloa ai e ou mata, ne’i te’ a ese ai lou loto i aso uma o lou olaga, a ia e faailoa atu i lau fanau, ma le fanau a lau fanau.”<sup>4</sup>

E aafia augatupulaga i filifiliga tatou te faia. Faasoa atu lau molimau i lou aiga; uunaia i latou ia manatua le auala na latou lagona ai ina ua latou iloaina le Agaga i o latou olaga ma ia faamau-mau na lagona i api talaaga ma talaaga faaletagata lava ia ina ia mafai e o latou lava upu, ona faamanatu ia i latou le lelei o le Alii ia i latou.

Tou te manatua, sa toe foi atu Nifae ma ona uso i Ierusalem e aumai papatusi apamemea sa i ai talaaga na faamaumauina e o latou tagata, ina ia le galo ia i latou lo latou tuanai.

I le Tusi a Mamona foi, sa faaigoa ai e Helamana ona atalii i o latou “uluai matua” ina ia latou le faagaloina le agalelei o le Alii:

“Faauta, ou atalii e, ou te manao ia ouluua manatua e tausi poloaiga a le Atua: . . . Faauta, ua ou tuu atu ia te ouluua igoa o o tatou uluai matua, o e na o mai i fafo mai le laueelele o Ierusalem; ma ua ou faia lenei mea ina a ouluua manatua o ouluua igoa ia ouluua manatua ai i laua; ma a ouluua manatua i laua ia ouluua manatua a laua galuega; ma a ouluua manatua a laua galuega ia ouluua iloa ai ua taura, ma ua tusia foi, e faapea na lelei.

“O lea, ou atalii e, ou te manao ina ia ouluua faia le mea ua lelei, ina ia taua ma tusia e uiga ia te ouluua, e pei ona taua ma tusia e uiga ia te i laua.”<sup>5</sup>

E toatele tagata i le vaitaimi lenei e i ai le tu masani e tasi o le faaigoaina o o latou fanau i toa o tusitusiga paia po o tuua faamaoni o se auala e uunaia ai i latou ina ia latou le faagaloina lo latou tupuaga.

Ina ua ou fanau mai, sa tuuina mai ia te au le igoa o Ronald A. Rasband. E faamamaluina e lou faaiu le laina o tuua o lou tama. O le mataitusi ogatotonu *A* sa tuuina mai ia te au e faamanatu mai ia te au ia faamamalu ia

tuaa Tenimaka a lou tina sa i ai le igoa Anderson.

O le tama o le tamamatua o le tama o lou tina o Jens Anderson sa sau mai Tenimaka. Ma i le 1861 na taitai atu ai e le Alii ni faifeautalai Mamona i le aiga o Jens ma Ane Catherine Anderson, lea na faailoa atu ai e faifeautalai ia i laua ma le la tama e 16 tausaga, o Andrew, le talalelei toefuataiina. O lea na amata ai loa le talatuu o le faatuatua lea ua faamanuiaina ai a'u ma lo'u aiga. Sa faitau e le aiga o Anderson le Tusi a Mamona ma papatisoina i se taimi puupuu mulimuli ane. O le tausaga na sosoo ai, sa usitaia e le aiga o Anderson se valaau a se perofeta ia laasia le Atlantic ma auai faatasi ma le Au Paia i Amerika Matu.

O le mea na faanoanoa ai, na maliu Jens i luga o le vasa, ae na faaauau pea lona toalua ma le atalii i le Vanu o Sate Leki, ma taunuui ai i le aso 3 Setema, 1862. E ui i o latou faigata ma mafatiga, sa lei maluelue lo latou faatuatua, ma e faapena foi le faatuatua o le toatele o a latou fanau.

I lo'u ofisa o loo tautau ai se atavali<sup>6</sup> lea e i ai se faamanatu faafatusa matagofie o lena uluai feiloaiga i le va o o'u tuaa ma na faifeautalai tuuto anamua. Sa ou naunau lava ia aua nei galo o'u tuaa, ma ona o lo'u igoa o le a faavavau ai pea ona ou manatuaina lo latou talatuu o le faamaoni ma le ositaulaga.

Aua lava nei galo, pe fesiligia, pe le amanaiaina ni aafiaga patino, paia faaleagaga. O le mamanu a le fili o le aveesea mai lea o i tatou mai molimau faaleagaga, ao le finagalo o le Alii o le



Ua ta'u e Elder Rasband lenei atavali "o se faamanatu faafatusa" o le uluai feiloaiga i le va o ona tuaa ma faifeautalai Mamona anamua.

faamalamalama ma faagauai atu i tatou i Lana galuega.

Sei ou faasoaa atua se faataitaiga patino o lenei upumoni. Ou te manatua lelei se taimi na ou maua ai se uunaiga i se tali o se tatalo faatauanau. Na manino ma malosi le tali. Peitai, na ou toilalo e faatino i le taimi lava lea le uunaiga, ma i le mavae ai o se taimi sa amata ona ou mafaufau pe na moni le lagona sa ou maua. Atonu na i ai foi nisi o outou na pa'u atu i lena faatosinaga a le fili.

I nai aso mulimuli ane, sa ou ala ae ai ma lenei mau malosi i lo'u mafaufau:

"E moni, e moni, Ou te fai atu ia te oe, afai e te manao i se isi molimau, liliu ane lou mafaufau i le po na e tagi mai ai ia te a'u i lou loto. . . .

"Ou te lei tautala atu ea le filemu i lou mafaufau e uiga i le mataupu? O le a se molimau sili atu e mafai ona e maua mai lo lena mai le Atua?"<sup>7</sup>

Sa pei o fetalai mai le Alii, "Ia, Ronald, ua uma ona ou tau atu le mea e tatau ona e faia. Fai loa!" E ese lo'u faafetai mo lena aoaiga ma le taitaiga alofa! Na vave ona faamafanafanaina a'u e ala i le uunaiga ma mafai loa ona agai i luma, i le iloinaina i lo'u loto ua tali mai la'u tatalo.

Ou te faasoaa atua lenei aafiaga, uso e ma tuafafine, e faailoa atu ai le vave ona galo i o tatou mafaufau ma le ala e taitaia ai i tatou e aafiaga faaleagaga. Ua ou aoao e faataua ia taimi "nei galo ia te a'u."

I la'u uo, ma i latou o e mananao e faamalosia o latou faatuatua, ou te tuuina atu lenei folafolaga: a tou ola ai ma le faatuatua i le talalelei a Iesu Keriso ma usitai i ana aoaoga; o le a puipua ma tuputupu ae a outou molimau. Ia tausi feagaiga na tou osia, tusa lava po o a amioga a i latou o loo siominaina outou. Ia avea ma matua, uso ma tuafafine, matua matutua, aunts, uncles, ma uo filiga o e faamalosia e pele ia te outou ma se molimau patino ma faasoaa atu aafiaga faaleagaga. Ia tumau faamaoni ma tutumau, e tusa lava pe a oo mai afa o masalosaloga e osofaia tou olaga e ala i amioga a isi. Saili le mea lena e faagaeetia ma faamalosia oe faaleagaga. Aloese mai taulaga taufaasese

ua ta'uua o "upumoni" lea ua matua faigofie ona salalau atu, ma manatua e tusi i lalo ou lagona o le "alofa, olioli, o le filemu, o le onosai, o le mataalofa, o le agalelei, o le faamaoni, o le agamalu, [ma le] le gaoia."<sup>8</sup>

I le lotolotoi o afa malolosi o le olaga, *aua nei galo* lou tupuaga paia o se atalii po o se afafine o le Atua po o lou taunuuga e faavavau ia toe foi atu i se aso e nonofo faatasi ma Ia, lea e sili atu nai lo se isi lava mea e ofo mai e le lalolagi. Manatua upu alofa ma le matagofie a Alema: "Faauta, ou te fai atu ia te outou, ou uso e, afai ua oo ia te outou se liuga o le loto, ma afai ua outou lagona le fia pepese i le pese o le alofa togiola, ou te fia fesili atu, e mafai ea ona outou lagonaina nei?"<sup>9</sup>

Ia i latou uma o e lagona le tatau ona faamalosia o lo latou faatuatua, ou te aioi atu ia te outou, *aua nei galo!* Faamolemole aua nei galo.

Ou te molimau atu o Iosefa Samita o se perofeta o le Atua. Ou te iloa na ia vaai ma talanoa ma le Atua le Tama ma Lona Alo, o Iesu Keriso, e pei lava ona ia tusia i ana lava upu. E ese lou faafetai i le *lei galo* ia te ia ona tusia o lena aafiaga, ina ia tatou iloa uma ai lana molimau.

Ou te molimau faamaoni atu i le Alii o Iesu Keriso. O loo soifua o Ia; ou te iloa o loo soifua o Ia ma o loo tu i le ulu o lenei Eklesia. Ua ou iloa nei mea mo au lava, saoloto mai soo se isi lava leo po o molimau, ma ou te tatalo o le a *le galo lava* ia te oe upumoni paia e faavavau—muamua ma le sili o i tatou o atalii ma afafine o ni Matua Faalelagi soifua ma alolofa, e na o le pau o la finagalo o lo tatou fiafia e faavavau lea. Ou te molimau atu ai i nei upumoni i le suafa o Iesu Keriso, amene. ■

#### FAAMATALAGA

1. "O Le Tatalo a le Tamaitiiti," *Tusipese a Tamaiti*, 6–7.
2. Helamana 5:12 AM.
3. 2 Nifae 9:29; faoopoopo le faamamafa.
4. Teuteronomie 4:9; faoopoopo le faamamafa.
5. Helamana 5:6–7.
6. O le atavali muamua na tusiina e Christen Dalsgaard i le 1856. O le ata i lo'u ofisa o se kopi na tusiina e Arnold Friberg i le 1964.
7. Mataupu Faavae ma Feagaiga 6:22–23.
8. Kalatia 5:22–23.
9. Alema 5:26.



Saunia e Elder Evan A. Schmutz  
O Le Fitugafulu

# O Le a Soloiesea e le Atua o Loimata Uma

*Ao tatou faatinoina lo tatou faatuatua i le Faaola, o le a la siitiaina i tatou i luga ma taitaiina i tatou e ala i o tatou tofotofoga ma, iu ai, ina laveai i tatou i le malo selesitila.*

**O**se vaega o le fuafuaga a lo tatou Tama Faalelagi, na Ia faataga ai le faanoanoa ia lalagaina i o tatou aafiaga faaletino.<sup>1</sup> E ui e foliga e eseese uma tofotofoga tiga e oo mai ia i tatou taitoatas, ae ia tatou mautinoa i se tasi tulaga po o le isi, tatou te oo uma lava i puapuaga ma tauiviga. Ou te tatalo o le a taialaina i tatou e le Agaga Paia i se malamalama sili atu i le mafuaaga ua tupu ai lenei mea.

A tatou vaavaai atu i aafiaga faigata o le olaga e ala atu i tioata o le faatuatua ia Keriso, o le a mafai ona tatou vaai atu e i ai se faamoemoega faaleatua i o tatou mafatiaga. E mafai ona aafia le au faamaoni i le moni o le fautuaga foliga feteenai a Peteru. Sa ia tusia, “Afafai e *tigaina* outou ona o le amiontu, amuia outou.”<sup>2</sup> Ao tatou faaaogaina o tatou “loto [ia] malamalama ai,”<sup>3</sup> e mafai ona faalauteleina i tatou i lo tatou gafatia e onosaia ai o tatou tofotofoga ma le lelei ma aoao mai ai— ma toe faaleleia mai—ai. O lea ituaiga o malamalama ua maua mai ai se tali i le fesili faisoo “Aisea e tutupu ai mea le lelei i tagata lelei”

Ua masani tagata uma o loo faalogologo mai i le asō i nisi o fuataga o

le tuuatoatasi, faanoanoa, tiga, po o le faavauvau. A aunoa ma se “mata o le faatuatua”<sup>4</sup> ma se malamalamaaga o le upumoni e faavavau, e masani ona tatou iloaina o le tiga ma le puapuaga ua lagonaina i le faaletino e mafai ona le iloa ai pe natia ai le olioli faavavau o le iloaina o le fuafuaga sili a lo tatou Tama oi le Lagi o le fuafuaga *moni lava* o le fiafia. E leai se isi lava auala e maua ai le atoaga o le olioli.<sup>5</sup>



Ua valaaulia i tatou e le Atua ina ia tali atu ma le faatuatua i o tatou lava puapuaga uiga ese ia mafai ai ona tatou seleselina faamanuiaga ma maua le atamai lea e le mafai ona aoaoina i se isi lava auala. Ua faatonuina i tatou ia tausia poloaiga i soo se tulaga, aua “o le e faamaoni i puapuaga, ua sili atu le tele o le taui o lea lava tagata i totonu o le malo o le lagi.”<sup>6</sup> Ma e pei ona tatou faitau i ai i tusitusiga paia, “Afafai ua e faanoanoa, ole atu i le Alii lou Atua i le talosaga, ina ia olioli o outou agaga.”<sup>7</sup>

O le Apostolo o Paulo, o se tagata ua masani i puapuaga, na faaaoga lona lava aafiaga e aoao atu ai ma le loloto ma le matagofie le vaaiga faavavau lea e oo mai pe a tatou tumau lelei ai ma le onosai. Na ia fai mai, “Aua o lo matou puapuaga mamasagia ma le vave mavae, e tupu mai ai mo i matou le manuia mamafa e matua silisili ese lava ma le faavavau.”<sup>8</sup> I se isi faaupuga, e mafai ona tatou iloa i le lotolotoi o o tatou puapuaga ua saunia e le Atua se taui e faavavau.

O le tomai o Paulo e tautala atu ai e uiga i tofotofoga, sauaga, ma faanoanoaga o lona olaga ao aumaia e le puapuaga “mamasagia” ni manatu sese i le tulaga ogaoga o lona mafatiaga, lea na tofatumoanaina i vaaiga faavavau o le talalelei. O le faatuatua o Paulo ia Iesu Keriso na mafai ai ona lavatia mea uma. E faalima ona sasaina o ia i maea, faatolu i laau, faatasi ona fetogia: faatolu ona mafatia i luga o le vaa; e faatele ona i ai i le tulaga lamatia o le oti i le malemo, e tagata faomea, ma e oo lava i tagata pepelo; na ia mafatia i le vaivai ma le tiga, galala i le fiaai ma le fiainu, ma sa faafalepuipuiina i le malulu ma le le lavalava.<sup>9</sup>

O le toatele o i tatou ua aioi atu i le Atua ina ia aveese le pogai o o tatou puapuaga, ma pe a le oo mai le toomaga na tatou sailia, ua faaososoina i tatou i le mafaufau faapea e le o faafogofa mai o Ia. Ou te molimau atu, e oo lava i na taimi, e faafogofa o Ia ia tatou tatalo, e i ai se mafuaaga mo le faatagaina o o tatou puapuaga ia faaauau,<sup>10</sup> ma o le a fesoasoani mai ia i tatou ia tauaveina.<sup>11</sup>

I se fuaitau patino ma le loloto ua ta'uina mai e Paulo ia i tatou se “mea



matuitui i le tino” e leai se igoa lea na aumaia ia te ia le tiga tele ma faatolu ona ave ai o ia i ona tulivae, ma aioi atu i le Alii ina ia aveesea mai ia te ia. O le tali atu i tatalo a Paulo, e lei aveesea e le Alii le mea matuitui ae sa fetalai atu i le filemu ma tuu atu le malamalamama i lona loto, faapea atu, “O lo’u nei alofa tunoa e lava lea e fesoasoani ia te oe; aua o le vaivai e faaatoaina ai lo’u mana.” O le i ai o se malamalamaga fou, na mafai ai e Paulo ona talia ma maua le loto faafetai mo le mea matuitui na tuuina mai ia te ia. Na ia fai mai, “O lea ua tele ai lava lo’u fiafia . . . i mea ua ou vaivai ai, ina ia tumau i o’u luga le mana o Keriso.”<sup>12</sup>

A o tatou mauaina lenei vaavaia faavavau i o tatou olaga, ua tuputupu ae lo tatou gafatia e onosai ai, ua tatou aoao e fesoasoani atu i e manaomia le fesoasoani,<sup>13</sup> ma e tatou te talisapaia ma faaalia le lotofaafetai mo aafiaga na tuuina mai e le Atua ia i tatou e avea ma ni aoaoga i le ala o le ola e faavavau.

Pe a tatou mauaina i tatou lava o galulue e ala i puapuaga, e mafai ona

faigata ona iloa atu o tatou tofotofoga o ni faailoga i luga o o tatou auala patino i le avea ai ma soo. Ae pe o le mauaina o i tatou lava i nisi taimi i le lagonaina o le faanoanoa po o luga o le ala tanu o le fiafia, o le aoao mai ma lagona le alofa mo puapuaga o isi e mafai ona avea ma se faamanuiaiga.

I le taimi o se tofiga o le konafesi faalesiteki talu ai sa ou auai atu ai i le atu Filipaina, sa ootia lou loto ina ua ou iloaina se aafiaga matautia sa oo ia Brother Daniel Apilado. Sa papatisoina Brother Apilado ma lona faletua i le 1974. Sa la taliaina ma le naunautai le talalelei toe-fuataiina ma faamauina i le malumalu. Mulimuli ane, sa faamanuiaina i laua i se fanau aulelei e toalima. I le aso 7 Iulai, 1997, ao auauna atu Brother Apilado o se peresitene o se siteki, sa sasao ai se afi i lo latou tamai fale. Na laveai e le atalii ulumatua o Brother Apilado o Michael lona tama, toso ese mai o ia mai le fale ua mu, ona toe tamoe lea i le fale e laveai mai isi. O le taimi mulimuli lena na vaai ai Brother Apilado i lona atalii o ola. O i latou na maliliu i le afi

o le faletua lea o Brother Apilado, o Dominga, ma le la fanau uma e toalima.

O le iloaina sa soifua Brother Apilado i se olaga sa fiafia i ai le Atua i le taimi na tupu ai le faalavelave sa lei taofia ai le faalavelave, pe na sao mai ai o ia i le faanoanoaga lea na mulimuli mai ai. Ae o lona *faamaoni* i le tausiga o ana feagaiga ma le faatinoina o le faatuatua ia Keriso na tuuina atu ai ia te ia le faamautinoaga i le folafolaga o le a ia toe faatasia ma lona toalua ma le aiga. Na avea lenei faamoemoe ma se taula i lona agaga.<sup>14</sup>

I le taimi o la’u asiasiga, ua avea Brother Apilado, i le taimi nei ma peteriaka o le siteki, na faailoa atu a’u i lona faletua fou, o Simonette, ma i le la fanau tama e toalua, o Lafaele ma Tanielu. E moni, e mafai ma o le a “fufusi [e Iesu Kerisol] i e loto momomo”<sup>15</sup>

I le faasoaina atu o le tala ia Brother Apilado, ou te popole i le tele o mea na toesea mai ia te ia e ono faapea ai le toatele o o latou faanoanoaga ma mafatiaga e leai se afaina i le faatusatusa i ai. Faamolemole aua le faatusatusa, ae ia



saili ina ia iloa ma faaaoga ia mataupu faavae e faavavau ao tou savavali atu i le ogaumu o o outou lava puapuaga.

Afai e mafai ona ou tautala atu ia te outou taitoatasi—"outou uma o e tigaina ma mafatia i avega"<sup>16</sup>—e mafai ona ou fautua atu o tou tauiviga—faanoanoaga taitoatasi, tiga, faigata, ma vaivaiga o soo se ituaiga—ua silafia uma e lo tatou Tama oi le Lagi ma Lona Alo. Ia lototeli! Ia faatuatua! Ma ia talitonu i folafolaga a le Atua!

O le faamoemoega ma le misiona a Iesu Keriso e aofia ai Lona "ave i ona luga o tiga ma ma'i o ona tagata," "ave i ona luga o latou vaivaiga," ma "fesoasoani ai i ona tagata e tusa ma o latou vaivaiga."<sup>17</sup>

Ina ia mauaina atoatoa nei meaalofa ua ofo fua mai e lo tatou Faaola, e tatau ona tatou aoao uma o mafatiaga lava ia e le aoaoina pe tuuina mai ai ia i tatou se mea e umi le taua seiloga ua tatou aofia ma le *faaeteete* i le faagasologa o le aoaoina mai o tatou puapuaga e ala i le faatinoina o le faatuatua.

Na faasoa mai i se tasi taimi e Elder Neal A. Maxwell se mea na ia aoaoina e uiga i le puapuaga mausali i upu nei:

"O nisi tulaga o le puapuaga, pe a onosai lelei, e mafai moni lava ona faalelei atili ai i tatou. . . .

" . . . O se vaega o le onosaia lelei e aofia ai le agamalu, i lotolotoi o o tatou mafatiaga, ia aoao mai o tatou aafia talafeagai. Nai lo le na o le ui atu i nei mea, e tatau ona latou ui mai ia i tatou . . . i auala lea e faapaiaina ai i [tatou]."<sup>18</sup>

Na ou vaia i olaga ma faataitaiga a isi o le faatinoina o le faatuatua malosi ma tumau ia Iesu Keriso ma Ana folafolaga e aumai ai se faamoemoega mausali o le oo mai o mea silisili. O lenei faamoemoe mautinoea e faato'aina i tatou, aumaia le malosi ma le mana lea tatou te manaomia e tumau ai.<sup>19</sup> A mafai ona tatou faafesootaia o tatou puapuaga i se faamautinoaga o le faamoemoe i lo tatou tulaga faaletino ma *faapitoa lava* i le taui o loo faatalitali mai mo i tatou i nofoaga

faalelagi, o le a faateleina lo tatou faatuatua ia Keriso ma maua le toafimalie i o tatou agaga.

O le a mafai loa ona tatou iloa atu le faamoemoe pe a mavae faigata. Na aoao mai Elder Jeffrey R. Holland: "E i ai moni *lava* le faamoemoe pe a mavae faigata. O le Malamalama lea o le Lalolagi, o le Fetuao Pupula, o le 'malamalama e leai sona iuga, e le faapoululigia' [Mosaea 16:9]. O le Alo lava lea o le Atua Lava Ia."<sup>20</sup>

E mafai ona tatou maua le malosi i le iloaina o aafiaga faigata uma i lenei olaga e le tumau; e oo lava i po sili ona pouliuli e liua i le tafa o ata.

Pe a maea mea uma ma ua tatou onosaia mea uma ma le faatuatua ia Iesu Keriso, ua tatou maua le folafolaga o le a "Soloieseae foi e le Atua o loimata uma nai o [tatou] mata."<sup>21</sup>

Ou te molimau atu o le Atua lo tatou Tama ma Lona Alo, o Iesu Keriso, o loo soifua ma o i Laua o ni tausi folafolaga. Ou te molimau atu o loo valaaulia i tatou uma e le Faaola ia o mai ma aai ma feinu i Lona Togiola. Ao tatou faatinoina lo tatou faatuatua ia te Ia, o le a Ia siitiaina i tatou i luga ma taitaiina i tatou e ala i o tatou tofotofoga ma, iu ai, ina faasaoina i tatou i le malo sele-sitila. Ou te valaaulia outou ia o mai ia Keriso, tumau lelei i le faatuatua, ma ia faaatoatoa ia te Ia. I le suafa paia o Iesu Keriso, amene. ■

#### FAAMATALAGA

- Tagai Kenese 3:16–19.
- 1 Peteru 3:14; faaopoopo le faamamafa.
- Mosaea 12:27.
- Eteru 12:19.
- Tagai 3 Nifae 28:10; tagai foi 2 Nifae 31:19–21.
- Mataupu Faavae ma Feagaiga 58:2.
- Mataupu Faavae ma Feagaiga 136:29.
- 2 Korinito 4:17.
- Tagai 2 Korinito 11:23–27.
- Mataupu Faavae ma Feagaiga 121:7–8; 122.
- Tagai Mosaea 24:12–15.
- Tagai 2 Korinito 12:7–9.
- Tagai Mosaea 4:16.
- Tagai Eteru 12:4.
- Isaia 61:1; tagai foi fuiupu 2–3.
- Mataio 11:28.
- Alema 7:11–12.
- Neal A. Maxwell, "Enduring Well," *Liahona*, Apr. 1999, 12.
- Tagai Eteru 12:4.
- Jeffrey R. Holland, "O Se Faitaulaga Sili i Mea Lelei Atali," *Liahona*, Ian. 2000, 42.
- Faaaliga 7:17; tagai foi Faaaliga 21:4.



Saunia e Elder K. Brett Nattress  
O Le Fitugafulu

# E Leai Se Olioli Sili Atu Nai lo le Iloa ua Latou Iloa

Ou te le iloa pe i ai se isi mea i lenei lalolagi e mafai ona aumaia le fiafia ma le olioli sili atu nai lo le iloa ua iloa e a tatou fanau le Faaola.

**U**so e ma tuafafine, talu ai nei sa ou mafaufau loloto ai i lenei fesili: "Afaí o mea uma ua iloa e tou fanau e uiga i le talalelei e sau mai ia te outou—ua na o outou lo latou punaoa—o le a le tēlē o lo latou iloa?" O lenei fesili e faatau ia i latou uma o e alolofa, faiaoga, ma unaia fanau.

E i ai se meaalofa sili atu e mafai ona tatou tuuina atu ia tatou fanau nai lo na o se manatuaga ua mumuina loloto i o latou loto tatou te iloa o loo soifua lo tatou Faaola? O latou iloa ea tatou te iloa? Ma le mea sili, ua latou iloa mo i latou lava o loo soifua o Ia?

Ao ou laitiiti, o a'u le tamaititi sili ona faigata na tausi e lo'u tina. Na matua ova lou ulavale. Na tau mai e lo'u tina o ona popolega sili na i ai faapea a nei ou te le aulia lou tulaga matua. Matuai ou ulavale lava.

Ou te manatua ao ou laitiiti i le nofo ai i se tasi o sauniga faamanatuga faapitoa ma lo matou aiga. Faatoa maua e lo'u tina se seti fou o tusitusiga paia. Sa i ai faatas i lenei seti fou tusi faavae uma i le lomiga tuufaatasi e tasi, ma sa i ai i le ogatotonu ni pepa laina mo faamatalaga tusitusia.

O se faamaoniga atili e fesoasoani atu ia tou malamalama i tofotofoga na feagai ma o'u matua i le tausia o lo matou aiga, sei ou tau atua a matou faitauga tusi faaleaiga. O taeao taitasi, e faitau ai e lo'u tina le Tusi a Mamona ia i maua i le 'aiga o le taeao. I lea lava taimi, ma te nonono filemu ai ma lou uso matua, o Dave, ae leai se faaaloalo. O le mea moni lava, ma te le faalogo. Na ma faitauina ia upu i luga o le pura siriolo [cereal].

I se tasi taeao, sa ou filifili ai e fai sao atu loa i lo'u tina. Sa ou fai atu, "Aisea ua e faia ai lenei mea ia i ma'ua? Aisea e te faitau ai le Tusi a Mamona i taeao uma?" Ona ou faia lea o se faamatalaga ou te ma e tau atu. O le mea moni, ou te le talitonu sa ou faia. Sa ou fai atu ia te ia, "Tina, ou te le o faalogo!"

O lana tali alofa mai sa avea ma se taimi taua tele i lo'u olaga. Sa ia fai mai, "Atalii, sa ou i ai i se sauniga lea na aoao mai ai Peresitene Marion G. Romney e uiga i faamanuiaiga o le faitau o tusitusiga paia. I le taimi o lenei sauniga, sa ou maua ai se folafolaga afai ou te faitauina le Tusi a Mamona i la'u fanau i aso taitasi, e le leiloloa i latou." Ona ia tilotilo sao mai lea i ou mata ma, ma le naunautaiga atoa, fai mai, "Ma e te le leiloa!"

Na tuia lo'u loto i ana upu. E ui i ou le atoatoa, sa ou taua ina ia faasaoina! Sa ia aoao au i le upumoni e faavavau o a'u o se atalii o se Tama Faalelagi alofa. Sa ou aoao e tusa lava po o a tulaga, sa ou taua. O se taimi sili lea mo se tamaititi le atoatoa.





E faavavau pea ona ou faafetai mo lo'u tina agelu ma mo agelu uma o e alolofa atoatoa i fanau, e ui i o latou le atoatoa. Ou te talitonu faamaoni i tuafafine uma—o le a ou tauina i latou o “agelu”—o ni tina i Siona, e tusa pe ua faaipoipo pe leai pe ua fananauina ni fanau i lenei aafiaga faalelalolagi.

Na folafola mai e le Au Peresitene Sili i tausaga ua mavae: “O le avea ma tina, e latalata atu i le faaleatua. O se galuega aupito maualuga, ma aupito paia lea e faia e le tagata. E tuu ai o ia, o le na te faamamaluina lona valaauga paia ma lana galuega, e pito atu i agelu.”<sup>1</sup>

Ou te faafetai mo agelu i le Ekalesia atoa o e folafola atu ma le lototoa ma le alofa ia upumoni faavavau i fanau a le Tama Faalelagi.

Ou te faafetai mo le meaalofa o le Tusi a Mamona. Ou te iloa e moni! O loo i ai le atoaga o le talalelei a Iesu Keriso. Ou te le iloa se tasi o le o loo fatauina ma le filiga le Tusi a Mamona i aso taitasi ma le manatu mama i ai ma le faatuatua ia Keriso o le ua leiloa lana molimau ma ua pau ese atu. O folafolaga faavaloaaga a Moronae o loo aumai faatasi ai ma le ki ina ia iloa le moni o mea uma—e aofia ai ma le maua o le

tomai ia iloatino ma aloese mai pepelo a le fili. (Tagai Moronae 10:4–5.)

Ou te faafetai foi mo se Tama Faalelagi alofa ma mo Lona Alo, o Iesu Keriso. Na saunia e le Faaola le faataitaiga sili o le ala e ola ai i se lalolagi lē atoatoa ma le le talafeagai. “Ua tatou alolofa ia te ia, aua na ia muai alofa mai ia te i tatou” (1 Ioane 4:19). E le mafuatiaina Lona alofa mo i tatou. O Ia o la tatou uo sili ona faamaoni. O Lona afu “ua pei o alualu toto ua pau ifo” mo oe ma a'u foi (Luka 22:44). Na Ia faamagalo i e na foliga e le mafaamagaloina. Na Ia alofa i e le alofagia. Na Ia faia mea e le mafai e se tagata ola ona faia. Na Ia saunia se Togiola ia faatoilalo ai agasala, tiga, ma ma'i o tagata uma.

Ona o le Togiola a Iesu Keriso, ua mafai ona tatou ola ma le folafolaga e tusa lava po o a tauiviga o tatou feagai ai, e mafai lava ona tatou faamoemoe ia te Ia, “o le ua malosi aoao e laveai” (2 Nifae 31:19). Ona o Lana Togiola, ua tatou maua ai le olioli, filemu, fiafia, ma le ola e faavavau.

Na saunoa mai Peresitene Boyd K. Packer: “Vagana ni nai tagata toaitiiti lava o e ua filifili i le malaia, e leai se amio, leai se tuinananu, leai se fouvaluga, leai se solitulafono, leai se liliuese,

leai se agasala e le aofia ai i le folafolaga o le faamagaloga atoatoa. O le folafolaga lena o le togiola a Keriso.”<sup>2</sup>

O se tasi o mea sili ona matautia na tupu i le talaaga faaletagata o le asi-asiga talai lea a le Faaola i tagata ana-mua o Amerika. Vaai faalemafaufau pe faapei pe ana faapea na i ai iina. A o ou mafaufaufau loloto i Lona alofa ma popolega i na vaega o le Au Paia na potopoto i le malumalu, na ou toe tomanatu i tamaiti taitoatasi o e e sili ona ou alofa i ai nai lo le ola. Na ou taumafai e vaai faalemafaufau atu pe faapei ou lagona i o outou tamaiti, ia molimau patino i le valaaulia a le Faaola i tamaiti taitasi ia o mai ia te Ia, ia molimau i aao faaloaloa mai o le Faaola, tu i autafa o tamaiti taitasi, taitoatasi, lagona lemu ia tulaga fao i Ona aao, ona vaai lea ia i latou taitasi o tu ma molimau mai o loo soifua o Ia! (Tagai 3 Nifae 11:14–17; tagai foi 17:21; 18:25.) O le faliu mai o tatou fanau ma fai mai, “Tina, Tama, o Ia lea!”

Ou te iloa pe i ai se mea i lenei lalolagi e mafai ona aumaia le fiafia ma le olioli sili nai lo le iloaina e iloa e a tatou fanau le Faaola, o le iloa latou te iloa “po o le a le puna e mafai ona latou tepa taulai i ai mo se faamagaloga o a latou agasala.” O le mea lena,

i le a avea ai ma tagata o le Ekalesia, "matou te talai atu Keriso" ma matou molimau atu ia Keriso (2 Nifae 25:26).

- O le mea lena tatou te tatalo ai ma a tatou fanau i aso taitasi.
- O le mea lena tatou te faitau ai tusi-tusiga paia ma i latou i aso taitasi.
- O le mea lena tatou te aoao ai i latou ia auauna atu i isi, ina ia latou maua faamanuiaga o le sailia o i latou lava ao latou gauai atu i le auaunaga i isi (tagai Mareko 8:35; Mosaea 2:17).

Ao tatou tuuto atu i tatou lava i nei mamanau faigofie o le avea ma soo, ua tatou faamalosia a tatou fanau i le alofa atu i le Faaola ma se taitaiga ma le puipuiga faalelagi ao latou fetaiai ai ma matagi malolosi a le fili.

O le talalelei e faatatau moni lava i le tagata e toatasi. E faatatau i le mamoe e tasi na leiloa (tagai Luka 15:3–7); e faatatau i fafine Samaria e toatasi i le vaieli (tagai Ioane 4:5–30); e faatatau i le atalii faamaumauoa e toatasi (tagai Luka 15:11–32).

Ma e faatatau i se tamaitiiti e toatasi atonu na faapea atu na te le o faalogo.

E faatatau ia i tatou taitoatas—lo tatou le atoatoa o i ai—ia tasi ma le Faaola e pei ona tasi o Ia ma Lona Tama (tagai Ioane 17:21).

Ou te molimau atu ua i ai so tatou Tama Faalelagi alofa, e silafia i tatou i o tatou igoa? Ou te molimau atu o Iesu Keriso o le Alo soifua o le Atua soifua. O Ia o le Toatasi Na Fanaua ma o lo tatou Fautua i le Tama. Ou te molimau atu foi e oo mai le olataga e ala i Lona suafa—ma e leai lava se isi auala.

O la'u tatalo ia tuuto atu o tatou loto ma lima e fesoasoani i fanau uma a le Tama Faalelagi ia iloa o Ia ma ia lagona Lona alofa. Ao tatou faia, ua Ia folafola mai ia i tatou le olioli ma le fiafia e faavavau i lenei lalolagi ma i le lalolagi a sau. I le suafa, o Iesu Keriso, amene. ■

#### FAAMATALAGA

1. "Message of the First Presidency," i le Conference Report, Oct. 1942, 12–13; faitauina e Peresitene J. Reuben Clark Jr.
2. Boyd K. Packer, "O Le Taeao Pupula o le Faamagaloga," *Liahona*, Ian. 1996, 23.



Saunia e Elder Dale G. Renlund

O Le Korama a Aposetolo e Toasefululua

## Salamo: O Se Filifiliga Fiafia

*E le gata ua mafai ona salamo ae ua faafiafaina foi ona o lo tatou Faaola.*

**O**u uso e ma tuafafine, ina ua 12 ou tausaga, sa nonofo lo matou aiga i Göteborg, o se aai i le talafatai i le itu i saute o Suetena. Mo le silafia, o le nuu lea e susu mai ai la tatou paaga pele o Elder Per G. Malm,<sup>1</sup> le na maliu i lenei taumafanafana. Ua tatou misia o ia. Tatou te faafetai mo lona malualii ma lana auaunaga mamalu faapea ai ma le faataitaiga a lona aiga peleina. Ma e tatou te tatalo ma le mautinoa mo faamanuiaga silisili a le Atua mo i latou.

I le lima sefulu tausaga talu ai, sa matou auai i le lotu i se fale tele na toefaaftou. I se tasi Aso Sa, o la'u oo o Steffan,<sup>2</sup> le isi tiakono e toatasi i le paranesi, sa faafeiloaia au i le lotu ma

le fiafia. Sa ma o atu i le faaopopoga o le falesa na sosoo atu, ma ia toso maia i fafo mai lana taga se mea faapapa tele ma se afitusi. I se faatinoga o le lototete faatamaitiiti, sa ou ave ai le mea faapapa ma tutu le vavae umi faafuefu. Sa ou faamoemoe e tapē le vavae ae lei pa le meafaapapa. Ae ina ua mu o'u tamatamai lima a o taumafai ai e tapē, sa pa'u ese le mea faapapa. Sa ma tilotilo atu ma Steffan ma le fefefe a o faaauau pea ona mu le vavae.

Sa pasae le mea faapapa, ma liloia uma le faaopoopoga o le falesa ma le falesa i le asu. Sa ma faananati ona faamama toega o le mea faapapa na taape solo ma talai faamalama e taumafai ai e faalu i fafo le manogi,



ma le faamoemoe e leai se tasi o le a iloaina. O le mea e lelei ai, e leai se tasi na manu'a ma se mea na faaleagaina.

Ina ua o mai tagata i le sauniga, sa latou matauina le malosi o le manogi. Sa faigata ona le iloaina. Sa faalavelave le manogi i le natura paia o le sauniga. Ona sa toalaiti lava le au Perisitua Arona—ma i le mea e mafai ona faamatalaina o mafaufauga le fesootai (ona o le mea faapapa ma le faamanatuga)—sa ou tufaina le faamanatuga, ae sa ou lagona le le agavaa e ai. Ina ua ofo mai le fata faamanatuga ia te au, ou te lei tagofia le areto po o le vai. Sa le lelei ou lagona. Sa ou maasiasi ma na ou iloa o le mea sa ou faia na le fiafia i ai le Atua.

Ina ua tuua le lotu, sa fai mai le peresitene o le paranesi, o Frank Lindberg, o se toeaina matua tulagaese ma lona lauao sinasina, ou te alu atu i lona ofisa. Ina ua ou nofo i lalo, sa ia tilotilo mai ia te au ma le agalelei ma fai mai na ia matauina ou te lei ai i le faamanatuga. Sa ia fesili mai pe aisea. Sa ou masalo na ia iloa le mafuaaga. Sa ou mautinoa na iloa e tagata uma le mea na ou faia. Ina ua ou ta'u atu ia te ia, sa ia fesili mai po o le a so'u lagona. I lo'u tagi, sa ou ta'u atu ia te ia ma le gatete sa ou salamo ma ua ou iloa sa ou faatoatamaiina le Atua.

Susue e Peresitene Lindberg se kopi faaaoga soo o le Mataupu Faavae ma Feagaiga ma fai mai ia te au e fai tau ni fuaiupu na vaseina. Sa ou fai tauina leotele le fuaiupu lenei:

"Faauta, o ia o lē ua salamo i ana agasala, o ia lava lea ua faamagaloina, ma o A'u, o le Alii, e lē toe manatuina lava i latou.

"O le mea lenei e mafai ai ona outou iloa pe afai ua salamo se tagata i ana agasala—faauta, e ta'uta'u atu e ia i latou ma lafoai i ai."<sup>3</sup>

O le a le galu lava ia te au le ataata agaalofa o Peresitene Lindberg ina ua ou tepa ae i luga ina ua uma ona fai tauina. Faatasi ai ma ni nai lagona otia, sa ia ta'u mai ia te au ua ia lagona ua toe lelei mo au le toe ai i le faamanatuga. Ina ua ou tuua lona ofisa, sa ou lagonaina se olioli le mafaamatalaina.

O lea olioli o se tasi o taunuuga masani o le salamo. O le upu *salamo* o lona uiga "ia iloa mulimuli ane" ma faia se "suiga."<sup>4</sup> I le FaaSuetena, o le upu o le *omvänd*, o lona uiga "ia toe liliu mai."<sup>5</sup> O le tusitala Kerisiano o C. S. Lewis sa tusia e uiga i le manaoga ma le metotia mo se suiga. Sa ia tusia o le salamo e aofia ai le "toe faafoi atu i luga o le ala sa'o. O se aofaiga sese e mafai ona toe faasa'o," sa ia fai mai ai, "ae ua na o lou toe foi lava i tua ia maua le measese ma toe amata mai i lena vaega, ae le tau na ona *alu pea*."<sup>6</sup> O le suia o a tatou amioga ma le toe foi atu i le "ala sa'o" o se vaega o le salamo, ae ua na o se vaega. O le salamo moni e aofia ai foi se liliu atu o o tatou loto ma le naunautaiga i le Atua atoa ma le lafoaia o agasala.<sup>7</sup> E pei ona faamalamalama mai i le Esekielu, o le salamo o le "liliu ese [mai] . . . agasala, . . . fai le amio tatau ma le amiontonu; . . . toe avane le mea na ia fao, . . . [ma] savali i sauniga e ola ai, ma ua le fai le amio leaga."<sup>8</sup>

Ae o se faamatalaga le atoatoa lenei. E le o faailoa tonu ai le mana e mafai ai le salamo, le taulaga togiola a lo tatou Faaola. O le salamo moni e tatau ona aofia ai le faatuatua i le Alii o Iesu Keriso, le faatuatua lea e mafai ona suia ai tatou, le faatuatua e mafai ona Ia faamagalo ai i tatou, ma le faatuatua o le a Ia fesoasoani mai ia i tatou ia

aloese mai measese. O lenei ituaiga o faatuatua e aoga ai Lana Togiola i o tatou olaga. A tatou "iloa mulimuli ane" ma "toe liliu" faatasi ma le fesoasoaniga a le Faaola, o le a mafai ona tatou lagonaina le faamoemoe i Ana folafolaga ma le olioli o le faamagaloga. A aunoa ma le Togiola, o le a mou atu le faamoemoe ma le olioli masani, ma avea ai le salamo o se amioga pagatia e na ona fetuutuunai. Ae e ala i le faatinoina o le faatuatua ia te Ia, tatou te liua ai i Lona tomai ma le naunautaiga e faamagalo le agasala.

Sa faamautu mai e Peresitene Boyd K. Packer ia folafolaga faamoe-moeina o le salamo ia Aperila 2015 i lana konafesi aoao mulimuli. Sa ia faamatalaina le mana o le Togiola a le Faaola e faamalolo ai mea ou te manatu o le aotelega o aafia o le olaga atoa e uiga i le poto na maua i le afa seneturi o auaunaga faaaposetolo. Na saunoa Peresitene Packer: "E le tuua e le Togiola ni asaga, po o ni failogia. O le mea na te faaleleia e mausali. E na ona faamalolo, ma o le mea na te faamalolo o le a tumau lona manuia."<sup>9</sup>

Sa ia faaauau faapea:

"O le Togiola, lea e mafai ai ona toe faafoi atu i tatou taitoatasi, e leai ni mailaila. O lona uiga e tusa lava po o a mea sa tatou faia, pe o fea foi sa tatou i ai, pe na faapefea ona tupu se mea, afai lava tatou te salamo moni, ua folafola mai [e le Faaola] o le a Ia totogiina. Ma ina ua Ia totogiina, na taulimaina ai. . . .

" . . . O le Togiola . . . e mafai ona fufulu mamaina soo se pisia e tusa lava po o le a le faigata po o le a le umi po o le a foi le tele o taimi na fai soo ai."<sup>10</sup>

O le malosi o le Togiola a le Faaola e le mafuatia i le lautele ma le loloto, mo oe ma au. Ae o le a le faamalosia i luga o i tatou. E pei ona aoao mai le perofeta o Liae, a "lava le aoaoina" o i tatou e "iloa ai le lelei mai le leaga,"<sup>11</sup> ua tatou "saoloto e filifili le saolotoga ma le ola e faavavau, e ala i le Puluvgaga sili o tagata uma, pe filifili le faataga-taotauaina ma le ot."<sup>12</sup> I nisi upu, o le salamo o se filifiliga.

E mafai—ma o nisi taimi—tatou te faia ai ni filifiliga e ese ai. O ia filifiliga atonu e le foliga mai e sese, ae latou



te taofia i tatou mai le faanoanoa moni ma o lea e taofia ai la tatou sailiga o le salamo moni. Mo se faataitaiga, e mafai ona tatou filifili e tuuā'ia isi. I le avea ai ma se tama 12 tausaga le matua i Göteborg, sa mafai lava ona ou tuuā'ia Steffan. O ia lea na aumaia muamua le mea faapapa tele ma le afitusi i le lotu. Ae o le tuuā'ia o isi, e tusa lava pe faamaonia, e faatagaina ai i tatou e fai se alofaga i a tatou amioga. O le faia o lena mea, tatou te fesiitaia ai tiutetauave mo a tatou amioga i isi. A fesiitai le tiutetauve, ua tatou faaititia uma le manoga ma lo tatou tomai e faatino ai. Ua tatou liliua i tatou lava i tagata ua aafia ma le pagatia nai lo tagata e faaaoga le fatalia mo a latou lava amioga.<sup>13</sup>

O le isi filifiliga e faalavelave i le salamo o le manatu e le ogaoga a tatou measese. I le faalavelave i le mea faapapa i Göteborg, sa leai se tasi sa manu'a, leai se mea na faaleagaina tumau, ma sa faia lava le sauniga. Sa ono faigofie lava le faapea sa leai se mafuaaga e salamo ai fua. Ae o le manatu e le ogaoga a tatou measese, e tusa lava pe leai ni taunuuga vave na iloa, e aveesea ai le uunaiga ia suia. O lenei manatu e taofia ai i tatou mai le vaai atu i a tatou measese ma agasala i ni taunuuga e faavavau.

Ae o le isi auala o le mafaufau lea o a tatou agasala e le afaina ona e alofa le Atua ia i tatou e tusa lava po o a a tatou mea e fai. E faaosoooina le talitonu i mea na aoao e le taufaasese lea o Neoa i le nuu o Saraemila: "O le a faaolaina tagata uma i le aso mulimuli; ma e le tatau ona latou fefefe pe tetete, . . . ma, i le iuga, o le a maua e tagata uma le ola e faavavau."<sup>14</sup> Ae o lenei manatu taufaa'ole'ole e sese. E alofa le Atua ia i tatou. Peitai, o mea tatou te faia e afaina lea ia te Ia, ma ia i tatou foi. Ua Ia tuuina mai ni faatonuga manino e uiga i le auala e tatau ona tatou amio ai. Ua tatou taua nei mea o poloaiga. O Lana faamaoniga ma lo tatou ola e faavavau e faalagolago lea i a tatou amioga, e aofia ai lo tatou naunautaiga e saili ma le faamaulalo i le salamo moni.<sup>15</sup>

Ma le isi, tatou te lafoaia le salamo moni pe a tatou filifili e tuuese le Atua mai i Ana poloaiga. I tulaga uma,



ana faapea e le paia le faamanatuga, semanu la e le afaina le manogi o le mea faapapa lea sa faalavelave i lena sauniga faamanatuga i Göteborg. E tatau ona tatou faaeteete i le le manatu mamafa i amioga agasala e ala i le manatu mama pe le amanaia foi o le tusiaina e le Atua o Ana poloaiga. O le salamo moni e manaomia ai le faama-maluina o le paia o le Faaola ma le moni o Lana galuega i aso e gata ai.

Nai lo le faia o alofaga, ia tatou filifili e salamo. E ala i le salamo, e mafai ona tatou iloaina ai i tatou lava, e pei o le atalii faamaumau oa i le faataoto,<sup>16</sup> ma mafaufau i le taua e faavavau o a tatou amioga. A tatou malamalamala i le auala e mafai ona aafia ai lo tatou fiafia e faavavau ona o a tatou agasala, e le gata tatou te faanoanoa moni ae tatou te tau-ivi foi ia lelei atili. A fetaiiai ma faaososoga, e ao ona tatou fesili ifo ia i tatou lava, i upu a William Shakespeare:

*Se a se mea ua ou manumalo ai, pe  
a ou maua le mea ua ou sailia?  
O se miti, o se mānava, o sina lagona  
o le fiafia puupuu.  
O ai na te fia faafesuaia le fiafia i se  
minute mo tiga i le vaiaso atoa.  
Pe faatau atu le faavavau ina ia maua  
ai se meataalo?*<sup>17</sup>

Afai ua tauaso le tatou vaai i le faavavau ona o se meataalo, e mafai

ona tatou filifili e salamo. Ona o le Togiola a Iesu Keriso, ua maua ai se isi o tatou avanoa. I se talafaa-tusa, e mafai ona tatou faafesuaia le meataalo lea na tatou faatauina ma le faavalevaleda i le taimi muamua, ae toe maua mai le faamoemoe o le faavavau. E pei ona faamalamalama mai e le Faaola, "Aua, faauta, na mafatia le Alii lo oulua Togiola i le oti i la le tino; o le mea lea na mafatia o ia i le tiga o tagata uma, ina ia mafai ona salamo tagata uma ma o mai ia te ia."<sup>18</sup>

E mafai ona faamagalo mai Iesu Keriso ona o Ia na totogia le tau mo a tatou agasala.<sup>19</sup>

E filifili lo tatou Togiola e faamagalo mai ona o Lona agaalofa, alofa mutimutive, ma le alofa lemafaatusalia.

E finagalo lo tatou Faaola e faamagalo mai ona o se tasi lea o Ona uiga paia.

Ma, i le avea ai o Ia ma se Leoleo Mamoe Lelei, e fiafia o Ia pe a tatou filifili e salamo.<sup>20</sup>

E tusa foi pe tatou te lagonaina le tiga e tusa i le Atua mo a tatou amioga,<sup>21</sup> ae a tatou filifili e salamo, e vave lava ona tatou valaauliaina le Faaola i o tatou olaga. E pei ona aoao mai Amoleka, "O mai ma aua le toe faamaaaina o outou loto; aua faauta, o le taimi ma le aso lenei o lo outou olataga; ma o lea, afai tou te salamo ma le faamaaaina

o outou loto, o le taimi nei lava o le a faataunu ai le fuafuaga tele o le togolaina ia te outou.”<sup>22</sup> E mafai ona tatou lagonaina le tiga e tusa i le Atua mo a tatou amioga ae i le taimi lava e tasi e lagonaina le olioli o le mauaina o le fesoasoani a le Faaola.

O le mea moni o le mafai ai ona tatou salamo o le tala fou lea o le talalelei!<sup>23</sup> O le tausalaga e mafai ona “tafi ese.”<sup>24</sup> E mafai ona faatumulua i tatou i le olioli, maua se faamagaloga o a tatou agasala, ma maua le “filemu o le mafaufau.”<sup>25</sup> E mafai ona faasaolotoina i tatou mai lagona o le faanoanoa ma le nofopologa i le agasala. E mafai ona faatumulua i tatou i le malamalama ofoofogia o le Atua ma “le toe tiga [ai].”<sup>26</sup> E le gata ua mafai ona salamo ae ua faafiafaina foi ona o lo tatou Faaola. Ou te manatua pea lagona na ou lagonaina i le ofisa o le peresitene o le paranesi ina ua mavae le pa o le mea faapapa. Sa ou iloaina ua faamagaloina au. Sa mou ese atu lagona o le tausalaina, sa aveesea ou lagona atutuvale, ma sa toafilemu lo'u loto.

Uso e ma tuafafine, a o tatou faaiuina ai lenei konafesi, ou te valaaulia outou ia lagona atili le olioli i lou olaga: olioli i le iloaina o le Togiola a Iesu Keriso e moni; olioli i le gafatia o le Faaola, naunautaiga, ma Lona finagalo ia faamagalo mai; ma le olioli e filifili le salamo. Ia tatou mulimuli i le faatonuga a le Faaola ia “utu vai ma le olioli i vaimpuna o le faaolataga.”<sup>27</sup> Ia tatou filifili e salamo, ia lafoai a tatou agasala, ia toe liliu o tatou loto ma manatu ia mulimuli ai i lo tatou Faaola. Ou te molimau atu i le moni o Lona soifua. O au o se molimau ma se tagata e maua soooa Lona agaalofa, alofa mutimutivale, ma le alofa le mafaatusalaina. Ou te tatalo ina ia avea faamanuiaga laveai o Lana Togiola ma o outou faamanuiaga i le taimi nei—ma toe maua ai foi pea lava pea lava pea i o outou olaga atoa,<sup>28</sup> e pei ona i ai foi i lo'u olaga. I le suafa o Iesu Keriso, amene. ■

#### FAAMATALAGA

1. O Elder Per Gösta Malm (1948–2016) sa auauna atu o se Fitugafulu o le Pulega Aoao mai le 2010 seia oo ina maliu o ia. E ui sa soifua mai i Jönköping, Suetena, ae sa nonofo i laua ma lona faletua, o Agneta,



“Ou te le manatu o tagata uma e filifilia auala sese e fano; ae o lo latou laveaiga e i ai ma le toe tuu o i latou i tua i le aula sa'o. . . . O le leaga e mafai ona toe foiaina, a e le mafai ona ‘atiaeina’ i se lelei. E le faamaloloina e le taimi [se leagal]. E tatau ona foiaina le leaga, faasolosolo, . . . a lei e le mafai lava” (5–6).

7. Tagai Bible Dictionary, “Repentance.”
8. Esekielu 33:14–15.
9. O le molimau a Peresitene Boyd K. Packer i le fonotaga faaleautaitai e fesootai ma le konafesi aoao ia Aperila 2015 e lei faasalalauina. O nei saunoaga e mai i a'u lava ia faamatalaga tusitusia i le taimi o le fonotaga.
10. Boyd K. Packer, “O Le Fuafuaga o le Fiafia,” *Liahona*, Me 2015, 28.
11. 2 Nifae 2:5.
12. 2 Nifae 2:27.
13. Tagai 2 Nifae 2:26.
14. Alema 1:4. Sa lei talitonu Neoa ma e na mulimuli ia te ia i le salamo (tagai Alema 15:15).
15. Tagai Russell M. Nelson, “O Le Alofa Paia,” *Liahona*, Fep. 2003, 12–17.
16. Tagai Luka 15:17; tagai foi i fuiupu 11–24.
17. William Shakespeare, *The Rape of Lucrece*, lines 211–14.
18. Mataupu Faavae ma Feagaiga 18:11.
19. Tagai Isaia 53:5.
20. Tagai Luka 15:4–7; Mataupu Faavae ma Feagaiga 18:10–13.
21. O le salamo moni e aofia ai le “tiga e tusa i le Atua” (2 Korinito 7:10). Na aoao mai Elder M. Russell Ballard: “Mo i latou ua se ese, ua saunia e le Faaola se auala e toe foi mai ai. Ae e le fiafia e aunoa ma le tiga. E le faigofie le salamo; e manaomia ai le taimi—taimi tiga!” (“Tausia o Feagaiga,” *Liahona*, Iulai 1993, 7). Sa aoao mai foi Elder Richard G. Scott, “O nisi taimi o laasaga o le salamo e muamua lava faigata ma tiga” (“Mauaina o le Faamagaloina,” *Liahona*, Iulai 1995, 84). E ui o le tiga e tusa i le Atua ma le tiga e aafia i le faagasologa o le salamo, ae o le taunuuga mulimuli o le olioli pe a lagonaina le faamagaloga o agasala.
22. Alema 34:31; faaopoopo le faamamafa.
23. Tagai Bible Dictionary, “Gospels.”
24. Enosa 1:6.
25. Mosaea 4:3.
26. Mosaea 27:29.
27. Isaia 12:3.
28. Tagai Mosaea 26:29–30. E ui ua folafola mai e le Atua e faamagalo fua mai, ae o le agasala ma le loto i ai ma le faalagolago i le alofa mutimutivale o le Faaola e faataga ai se salamo faigofie e inosia lea e le Atua (tagai Eperu 6:4–6; 10:26–27). Sa fautua mai Elder Richard G. Scott: O le tala fiafia mo soo se tasi e manao ina ia aveese ia taunuuga o filifiliga le lelei o le tuanai e faapea, e ese le silasila a le Alii i vaivaiga nai lo Lana silasila i le fouvale. E ui foi o loo lapatai mai le Alii o le fouvale ma le le salamo o le a aumaia ai faasalaga, ae a fetalai le Alii e uiiga i vaivaiga, e fetalai lava i taimi uma ma le alofa mutimutivale” (“Malosiaga Patino e ala i le Togiola a Iesu Keriso,” *Liahona*, Nov. 2013, 83).

## Faasino Upu o Tala o le Konafesi

O le lisi lea o aafiaga na filifilia mai saunoaga o le konafesi aoao, e mafai ona faaaoga i suesuega a le tagata lava ia, aifiati faaleaiga, ma isi aaoaga. O le numera o loo faasino i le itulau muamua o le lauga.

Failauga	Tala
<b>Neil L. Andersen</b>	(35) E oo mai le liua i le toatele o tagata pe a aapa atu tagata o le Ekalesia ia te i latou "o ni molimau a le Atua."
<b>M. Russell Ballard</b>	(90) A o faiatina le loane 17 i lona aiga i le Nuu Paia, na tatalo M. Russell Ballard ina ia tasi ma i latou faapea ma le Tama ma le Alo.
<b>W. Mark Bassett</b>	(52) Ao laitiiti, na taumafai W. Mark Bassett ma lona uso, e tatala noataga o uamea ia na faamaufailogaina o se faatusa o papatusi auro.
<b>Jean B. Bingham</b>	(6) Ina ua mavae le aloga vaa faasaga i le matagi, na fatuina e Jean B. Bingham ma se vaega o tamaitai talavou ni la pe a sua le agi o le matagi. O se teineitiiti e tietie i lana uila i se fale e "faamalamalama auro" ua vaai i lona foi fale e auro faamalamalama. Na mumusu tagata e faailoa atu le tuputupu ae o se alii talavou faamanuiaina.
<b>D. Todd Christofferson</b>	(48) Na lagona e Helen Keller le olioli tele pe a fesoasoani lona faiaoga ia te ia malamalama i le uiga o upu.
<b>Carl B. Cook</b>	(110) Ao ia mafaufau loloto i le tofiga na maua e le tamamatua a lona tamamatua mai le Perofeta o losefa Samita, na maua e Carl B. Cook se faamautinoaga faapea o lona tofiga fou o le Ekalesia na sau mai le Atua. Na faateleina e se tagata fou lona faatuatua ma ua manumalo i lona fefe e aaoao atu i le Peraimeri.
<b>Quentin L. Cook</b>	(40) Ua iloa e Quentin L. Cook le mafuaaga na vaai ai lona tama i se pou moli o se faamanuiaga nai lo o se maa tu'ia i se vaaiga ofoofogia.
<b>J. Devn Cornish</b>	(32) Na sua e se foma'i sinia i le falema'i le olaga o J. Devn Cornish i le tauina atu ia te ia o le a avea o ia ma se fomai sili ona lelei.
<b>LeGrand R. Curtis Jr.</b>	(68) Na maua e Pale P. Palate ma isi tamalii e toafa ni molimau e uiga i le Tusi a Mamona. Na maua e LeGrand R. Curtis Jr. se molimau e uiga i ai a o laitiiti.
<b>Dean M. Davies</b>	(93) Na silafia e Dean M. Davies e ala i le Agaga Paia faapea o tagata o le uarota o loo ia asia na o mai i le sauniga faamanatuga e tapuai moni lava.
<b>Henry B. Eyring</b>	(75) Na siitia e le tama ma taitai perisitua a Henry B. Eyring talavou lana vaaiga ma tuu atu ia te ia le lototole. (99) Ao avea ai ma se alii talavou, sa lei iloa e Henry B. Eyring le taimi o le faamoemoega a le Alii e fausia Lona malo.
<b>Robert D. Hales</b>	(22) Ao faasolosolo ina manuia Elie Wiesel mai se taotoga o le fatu, sa fesili atu le tama a lona afafine ia te ia pe mata o le a faaititia ona tiga pe afai e matua alofa lava le tama a lona afafine ia te ia. I Aso Sa e fesoasoani ai se tane alofa i lona toalua ma'i e fai ona laei ma sauni mo le lotu.
<b>Jeffrey R. Holland</b>	(61) Na misia e faiaoga o aiga se avanoa e fesoasoani ai i se tuafafine ua lolovia le potu pito i lalo o lona fale. Ua auaua atu se faiaoga o aiga i se tama ua maliu lona atalii i se faalavelave faafusei.
<b>Peter F. Meurs</b>	(85) I le lima ai o ona tausaga, na lagona e Peter F. Meurs le unaiga mālū a le Agaga Paia ao faamanuiaina e lona tama le faamanatuga.
<b>Thomas S. Monson</b>	(78) O se tagata o le Ekalesia e na te tausia le Upu o le Poto e tatalo mo ma maua le malosi e feaei ae i se maea i luga o le fogavaa o se vaa. (80) Na iloaina e se alii talavou i le Faaaliga a le Lalolagi i le 1964 le moni o le ata o le faaoataga ina ua uma ona matamata i le ata tifaga a le Ekalesia Man's Search for Happiness [Sailiga o le Fafia a le Tagata]
<b>K. Brett Nattress</b>	(119) Na iloa e K. Brett Nattress mai lona tina, e ui lava i ona le atoatoa a o laitiiti, sa alofa lona Tama Faalelagi ia te ia.
<b>Russell M. Nelson</b>	(81) Ina ua uma ona faataunuina e se vaega o le Au Paia na faateaseina se "po fiafia" i le malulu, na matauna e Eliza R. Snow e "mafai ona maua e le Au Paia le fiafia i soo se tulaga." Na faatoilaloina e tagata o le Ekalesia tofotofoga, faaosoosoga, ma le "tagata natura" e ala i le taulai atu i le olioli lea e oo mai i le ola ai i le talalelei.
<b>Bonnie L. Oscarson</b>	(12) Ua faateleina le auai o se uso i Mekisiko i lana vasega o le Aoga Sa. Ua puipuia e se tina lana fanau mai faatosinaga le lelei i fafo atu o le aiga.
<b>Ronald A. Rasband</b>	(113) Ua fautuina e Ronald A. Rasband se uo o loo feagai ma se "faafaituli o le faatuatua." Na tumau malolosi le faatuatua o tuaa o Ronald A. Rasband, e ui i faigata ma le lototiga. Na tuai ona faatino e Ronald A. Rasband se tali o se tatalo seja oo ina ia maua se faamanu faatusitusiga paia.
<b>Linda S. Reeves</b>	(88) Ua molimau mai Boyd K. Packer o le salamo ma le Togiola a le Faaola, ua leai ai ni ana agasala. E ala i le salamo faamaoni, e maua ai e se tagata o le ekalesia, se faifeatalai, ma se tagata liliu mai le olioli ma le filemu.
<b>Dale G. Renlund</b>	(121) Na lagona e Dale G. Renlund talavou le olioli ina ua uma ona tau atu i lona peresitene o le paranesi o ia na tutuina le mea faapapa i le lotu.
<b>Evan A. Schmutz</b>	(116) Na tausia e se tagata o le Ekalesia o lē na maliliu tagata o lona aiga i se afi ana feagaiga ma faatinoina le faatuatua o le a ia toe faatasi ma i latou.
<b>Carole M. Stephens</b>	(9) Na maua e se tamaitai talavou e maua i le ma'i mautautia o le mafaufau le malosi e molimau atu ai i le Faaola ma Lana Togiola.
<b>Gary E. Stevenson</b>	(44) Na faiatua ma maua e Mary Elizabeth Rollins e sefululua tausaga se molimau e uiga i le Tusi a Mamona. A o molimau atu e uiga i le Tusi a Mamona o se faifeatalai, sa maua e Gary E. Stevenson se molimau i lona moni.
<b>Juan A. Uceda</b>	(30) Sa taliina e le Tama Faalelagi le tatalo faatauanau a Juan A. Uceda, i le laveaaina o ia ina ua mavae na laa ese mai se auala o le mauga i le taimi o lana misiona.
<b>Dieter F. Uchtdorf</b>	(15) Na unaia e se teine talavou lona tinamatua ina ia "faalogologo malosi!" Ua tatalo se tina ina ia toe foi mai lana tama teine faalogogata i le Alii. Sa faamanuiaina faifeatalai se toalua ina ua mavae le tuitui i faiototoa uma o se fale mautotogi e fa fogafale. (19) Ina ua mavae le tele o taimi, onosai, faamoemoe, faatuatua, faamautinoaga mai lana ava, ma le tele o lita o vaiinu paleni, na iloaina ai e Dieter F. Uchtdorf ona faaaoga se komepiuta patino. (71) Ua toe foi mai se tagata sa i ai muamua o le Ekalesia e faafetai ai i uo, o le Agaga Paia, ma le malosi o le faatosinaga a le Leoleo Mamoe Lelei.
<b>Kazuhiko Yamashita</b>	(55) I le avea ai ma se peresitene o le misiona, ua faamanuiaina Kazuhiko Yamashita i le iloaina o se faifeatalai o lē "naunau atu mo Keriso."



Lalo: Asiasi atu Elder Neil L. Andersen i Rarotonga; feiloai Elder Quentin L. Cook ma le peresitene o le Ripapelika o El Salvador; faafofoga Elder Jeffrey R. Holland i se konafesi e faatatau i sauaga faalelotu i Windsor Castle, Egelani.



I luga, mai le pito i luga: O Peresitene Dieter F. Uchtdorf ma lona faletua o Harriet, o loo faafeiloai atu le Au Paia o Aso e Gata Ai i le taimi o le toe faapainaia o le Malumalu o Freiberg Siamani; na feiloai Elder Gary E. Stevenson ma isi taitai o le Eklesia ma taitai o le malo i Viatenam; ofoina atu e Peresitene Russell M. Nelson ma Elder M. Russell Ballard le faamalosiauga i tagata na mafatia i lologa ma volenitua i Louisiana.



## Auaunaga a Perofeta ma Aposetolo

O loo faaauau peoa ona auauna atu perofeta ma aposetolo i le lalolagi atoa (tagai i le MF&F 107:23). O se aotelega puupuu lenei o nisi o a latou gaoioga talu mai le konafesi aoao ua mavae:

Sa ofoina atu e Peresitene Dieter F. Uchtdorf, Fesoasoani Lua i le Au Peresitene Sili, i se asiasiga ia Me 2016, se faamoemoe i tagata o le eklesia i aai na faamanualiaina talu ai nei e ala i osofaiga a le au faatupu vevesi i **Egelani, Farani, ma Peleseuma**. Sa ia asiasi atu i tagata sulufai, ma malaga atu i le nofoaga o le Malumalu o Pale Farani (lea ua lata ona faamaeaina), ma auai i le fatuina o le uluai siteki i le **Ripapelika Siekisilovakia**. Ia Iulai, sa ia malaga atu i **Italia**, ma tauaaoina atu se siaki mo le \$3 miliona i tupe a le Eklesia e fesoasoani ai mo le toomaga o tagata sulufai, ma asiasi atu i tolauapiga a tagata sulufai i **Eleni**. Ia Setema sa ia asiasi atu i tagata o le eklesia i **Romania, Molotova, Solovakia, Nouei, ma Siamani**, lea na ia toe faapaiaina ai le Malumalu o Freiberg Siamani. Na ia saunoa mai o le talalelei e aumaia le faamoemoe i tagata po o fea lava latou te i ai ma o le faatasi ai ma tagata o le eklesia "o loo i ai se lagona moni o le avea ai ma uso ma tuafafine i le Eklesia."

O Elder M. Russell Ballard o le Korama a Aposetolo e Toasefululua sa pulefaamalumalu i le konafesi a le Siteki o Moscow Rusia ia Juni, ao faatasi ai isi siteki i Saratova ma St. Petersburg, **Rusia**. Sa ia feiloai foi ma tagata o le eklesia i **Lativia, Esitonua, ma Iukureini**.

I **Egelani** ia Iuni, na saunoa atu ai Elder Dallin H. Oaks o le Korama a Aposetolo e Toasefululua i tagata o le palemene a Peretania faapea o le saolotoga o tapuaiga e faatagaina ai eklesia e faia mea lelei i le



lalolagi atoa. "Tatou te mananao i faamunuiga o le saolotoga faalelotu ia maua e tagata uma o loo nonofa i lenei paneta, ma ua tatou mamao ese lava mai i lena mea i le taimi nei," na ia saunoa ai.

I se konafesi e uiga i sauaga faalelotu ma malaga faamalosia o i latou sa faia i le Windsor Castle i **Egelani** ia Setema, na saunoa mai ai Elder Jeffrey R. Holland o le Korama a Apostolo e Toasefululua e tele mea e aoao mai le aafiaga o paonia anamua a le AAG lea e mafai ona fesoasoani i tagata sulufai faaona po nei ia tulai ai i luga o latou tulaga. "Pe a talafeagai ai, e tatau ona tatou faafaigofieina ma faauauina ia faasinomaga tulaga ese o tagata sulufai ma faamamafa atu tala mai lo latou tuanai," o lana saunoaga lea.

**I Sepania, e aofia ai le Canary Islands, ma i Potukale,** na valaaulia ai e Elder David A. Bednar o le Korama a Apostolo e Toasefululua tagata o le ekalesia, faifeautalai, ma taitai ina ia uunaia i latou o e ua le toaaga mai e toe foi mai ma ia toaaga i le Ekalesia.

Ina ua aloaiaina e **Viatename** le Ekalesia ia Iuni, na feiloai Elder Quentin L. Cook ma Elder Gary E. Stevenson, o le Korama a Apostolo e Toasefululua, ma taitai o le malo ma talanoaina le talafaasolopito ma le atinaega o le Ekalesia. Na latou soalaupuleina foi le auala e fesoasoani ai le Ekalesia i galuega lautele ma agaalofa ma fesoasoani i e matitiva ma e le tagolima. Na latou pulefaamalumalu foi i fonotaga i **Guam, Maikolenisia, ma Iapani.**

Ia Iuni foi, na faamanuiaina ai Peresipeni, **Ausetalia, ma le Atu Kuki** i le asiasiga a Elder Neil L. Andersen o le Korama a Apostolo e Toasefululua. Sa asia foi e Elder Andersen le motu o **Rarotoga** ma avea ma uluai Apostolo ua tuvae i le motu o **Mangaia.**

**I Kolomupia, Peru, ma Ekuatoa** ia Iuni, na toe faatulagaina ai e Elder Ronald A. Rasband o le Korama a Apostolo e Toasefululua ana fuafuaga faataatitia

e asiasi atu ia i latou o loo tau faaleleia mai se mafuie tele. Sa ia faasoaa atu se savali o le alofa mai ia Peresitene Thomas S. Monson ma faamautinoa atu i tagata na mafatia i le mafuie, sa lei faagaloina i latou.

**I Kuatemala** ia Aokuso, na matau ai e Elder Quentin L. Cook se tulai ae tumau i le galuega o le sailiga o talafaasolopito o aiga ma le malumalumalua ma saunoa ai o se faailoga o le faatuatua o tagata.

Ina ua faafeiloiaia le tupu ma le masiofo o Toga i le Nofoaga Autu o Aganuu Polenia a le Ekalesia i **Hawaii, ISA**, ia Iuni, na tuuina mai e Elder Dale G. Renlund o le Korama a Apostolo e Toasefululua ni saunoaga tomua i le taua o sootaga faaleaiga.

**I Louisiana, ISA**, na asia ai e Peresitene Russell M. Nelson, Peresitene o le Korama a Apostolo e Toasefululua, ma Elder M. Russell Ballard tagata na aafia i lologa ao fesoasoani atu ai ia volenitia a Mamona Lima Fesoasoani e faamama ia fale na faaleagaina ia Aokuso ma Setema. Sa matauina e Elder Ballard le sili atu ma le 11,000 tagata volenitia na malaga mai setete e 13.

Ma, ia Setema i le taimi o se faigalotu i le lalolagi atoa mo talavou matutua lea na tuusao mai i **Uosigitone, D.C., ISA**, na saunoa ai Elder Cook, "Tatou te le matau e oo lava i se lalolagi faigata ma le atuatuvale." Sa ia fautuaina le autalavou matutua e faatutu ni sini amiontonu ma faia ni fuafuaga e ausiaina i latou ma aua nei manatu faatauvaa i o latou lava taleni ma gafatia. Sa ia uunaia foi i latou e iloilo lo latou faaaogaina o ala o faasalalauga faaleagafesootai. "Tatou te faalogo soo e uiga i le faamaoni i ala o faasalalauga faaleagafesootai," sa ia saunoa ai, ae "o le faamaoni e faapei o Keriso o se sini e sili atu ona taua nai lo le faamaoni."

E mafai ona maua faamatalaga fou i le galuega a nei taitai o le Ekalesia i o latou lava itulau o le Facebook ma le **prophets.lds.org.** ■

## 152 Malumalumalua o loo Faagaoioia

Ua 152 nei malumalumalua o le Ekalesia o loo faagaoioia i le lalolagi atoa. E aofia i malumalumalua faatoa faapaiaina pe na toe faapaiaina le **Malumalumalua o Filatelefia Penisilevania** [ISA], na faapaiaina i le aso 18 o Setema, 2016; le **Malumalumalua o Freiberg Siamani**, toe faapaiaina i le aso 4 o Setema, 2016; ma le **Malumalumalua o Sapporo Iapani**, na faapaiaina i le aso 21 o Aokuso, 2016.

E luasefulu-iva malumalumalua faaopoopo o loo fausiaina po o loo toe faafouina pe na fotogafina mai. E aofia i le faapaiaga ua fuafuaina mo se taimi lata mai i le lumanai le **Malumalumalua o Fort Collins Colorado** (16 Oketopa, 2016), le **Malumalumalua o Star Valley Wyoming** (30 Oketopa, 2016), ma le **Malumalumalua o Hartford Connecticut** (20 Novema, 2016), e i ai uma i le ISA. ■

## Puipua le Saolotoga o Tapuaiga

**E**ttau ona faaaofia le Au Paia o Aso e Gata Ai “i se auala anoa i le tauvaga taua mo le saolotoga o tapuaiga,” na saunoa ai Elder Dallin H. Oaks o le Korama a Apostolo e Toasefululua i se konafesi o le saolotoga o tapuaiga i Texas, ISA, ia Setema 2016. “E moni o tagata uma, mai le fanau o le aoga faataitai e oo atu i tulaga o tagata tomai faapitoa ma tina ma tamā, ma uo ma tuaoi e mafai ma ettau ona malamalama po o le a le saolotoga o tapuaiga ma pe aisea e taua ai.”

Na saunoa foi Elder D. Todd Christofferson o le Korama a Apostolo e Toasefululua i le puipuiga o saolotoga faalelotu i se sauniga faamamaluina i Iuta, ISA, ia Iuni. “Talu ai nei,” na ia saunoa, “ua avea ma tulaga lauiloa le finau ai o le saolotoga o tapuaiga e moni lava ua na o se aia ettau e tapuai ai, nai lo le aia e faaoga saoloto ai lo outou faatuatua i lou olaga i aso uma.” Sa ia uunaia tagata o le faatuatua ia puipuia le saolotoga o tapuaiga e ala i le malamalama, tautatala atu, ma auai i faalapotopotoga ma gaoioiga faaleaganuu, faalemalo, ma faaupufai.

Ua saunoa soo mai taitai o le Eklesia i le mataupu o le saolotoga o tapuaiga, tilivaina atu o lauga ma auai i konafesi i Ausetalia, Pasila, Mekisiko, ma le Malo Aufaatasi faapea ma nofoaga eseese i le ISA. Sue a latou saunoaga ma aoao e uiga i le saolotoga o tapuaiga ma mea e mafai ona e faia e puipuia ai e ala i le asiiasi i le **religiousfreedom.lds.org**. O nisi o anotusi o loo i ai e patino i le Iunaite Setete, ae e mafai ona fetuutuunai ia mataupu faavae i isi atunu. ■



## Atamai i Aoaoga Faavae

| le lalolagi i le aso i le taimi ua vave ona maua mai faamatalaga i luga o le Initoneti, ua le o toe mamao ese le autalavou mai tagata o e osofaia le Eklesia. Ae o se taumafaiga fou ua ta'ua o le Atamai i Aoaoga Faavae o loo fesoasoani i tagata aoga seminare e atinae se malamalamaaga loloto e uiga i aoaoga faavae o le talalelei ma faateleina lo latou faatuatua ia lesu Keriso.

O loo aoaoina foi tagata aoga i le auala e tali atu ai i fesili faigata ma faafitauli e ala i le faatinoina o le faatuatua, iloiloina o manatu ma fesili i se vaaiha e faavavau, ma saili ia malamalama atili e ala i punavai atofaina mai le lagi.

I se lauga i le aufaigaluega o Seminare ma Inisitituti, sa saunoa ai Elder M. Russell Ballard o le Korama a Apostolo e Toasefululua e uiga i le Atamai i Aoaoga Faavae: “O lenei taumafaiga e musuia ma talafeagai. O le a i ai se aafiaga matagofie i luga o o tatou tagata talavou.”

O le faamoemoega autu o le Atamai i Aoaoga Faavae ina ia fesoasoani i tagata aoga:

1. Maua le malamalama faaleagaga.
2. Atamai i aoaoga faavae o le talalelei ma fuaitau o mau lea ua aoaoina ai lena aoaoga faavae.

Fausiaina i luga o mea na ausia talu ai e ala i le Tau-lotoina o Mau, o lenei taumafaiga o'o'o'o o le a mafai ai e tagata aoga ona faamalosia lo latou liua ma tautinoga o ni soo o lesu Keriso, maua le puipuiga mai faatosinaga a le fili, ma faamanuainia ia olaga o isi.

E mafai ona maua punaoa o le Atamai i Aoaoga Faavae i le **lds.org/si/seminary/manuals**. ■



*"E taua i le fuafuaga o lo tatou Faaola, o Iesu Keriso. Ana le aunoa ma Lana taulaga togiola, semanu e leiloloa tagata uma. Peitai, e le lava le tau na ona talitonu ia te Ia ma Lana misiona. E manaomia ona tatou galulue ma aoao, saili ma tatalo, salamo, ma faaleleia. E manaomia ona tatou iloa tulafono a le Atua ma ola ai. E manaomia ona tatou mauaina Ana sauniga faaola."*

Peresitene Thomas S. Monson, "O Le Ala Atoatoa i le Fiafia," *Liahona*, Nov. 2016, 80–81.

Vaavaai ma Ola Ai, saunia e Ben Hammond

Tagai Numera 21:4–9; Alema 33:18–22. O i latou na vaavaai atu ia Mose ma le gata apamemea, o se faatusa o le Alo o le Atua, na faamaloloina.



"Ua faamanuiaina i tatou i le *i ai* o le upumoni.  
Ua *i ai* so tatou tiute e *faasoatatu* le upumoni," na  
saunoa ai Peresitene Thomas S. Monson i le Konafesi  
Aoao Faaleafatausaga Lona 186 a le Ekalesia. "Ia tatou  
*ola* i le upumoni, ina ia tatou mauaina mea uma ua *i ai* i  
le Tama mo i tatou. E leai ma se mea Na te faia vagana  
*ai* o mea mo lo tatou manuia. Na la fetalai mai ia i tatou,  
"O la'u galuega ma lo'u mamalu lenei—ia aumaiā  
le tino ola pea ma le ola faavavau o le tagata."